



Երկեր



# ԼԵՎՈՆ ՇԱՆԹ

**ԷԴԻՑ ՊՐԻՆՏ**  
հրատարակչություն



**ԵՐԵՎԱՆ 2012**

ՀՏԴ 891.981-3 Շանթ  
ԳՄԴ 84Ը-4  
Շ 301

Կազմեց և խմբագրեց Նվեր Վիրաբյանը

### **Լևոն Շանթ**

Շ 301 [Ստեղծագործությունների ժողովածու]/ Լևոն Շանթ.–  
Եր.: Էդիթ Պրինտ, 2012.– 254 էջ.:

*Լևոնի Շանթի այս ժողովածուն լույս է տեսել «Իմ գրադարանը» մատենաշարով: Ներառում է հեղինակի՝ ՀՀ հանրակրթական դպրոցի և բուհական ընդունելության քննությունների ծրագրերով նախատեսված ստեղծագործություններ և լրացուցիչ ընթերցանության նյութեր:*

*Գիրքը հասցեագրված է ոչ միայն մեր դպրոցականներին, այլև աշխարհասփյուռ հայ պատանիներին ու պարմանուհիներին, ինչպես նաև մեծահասակ ընթերցողներին, բոլոր նրանց, ովքեր չեն կորցրել իրենց հետաքրքրությունը հայ բազմադարյան գրականության նկատմամբ:*

ՀՏԴ 891.981-3 Շանթ  
ԳՄԴ 84Ը-4

ISBN 978-9939-52-462-7

© «Էդիթ Պրինտ», հրատարակչություն, 2012

## ՆԱԽԱԲԱՆ

Գրող, մանկավարժ և հասարակական գործիչ Լևոն Շանթի սրբազանությունը նշանակությունը հայ գրականության և մշակույթի պատմության մեջ հիմնականում պայմանավորված է նրա դրամատուրգիայով: Նրա սրբազանությունը մեջ արժարժված են անհայրի ու հասարակության փոխհարաբերության, եսի ու անձնագոհության, զգացմունքների ու ազատության րենչանքի, հարափոփոխ ասորումների ու րրամադրությունների ինդիդներ:

1890-ական թվականներին լոյս են րեւել Շանթի մի շարք քանասրբություններ, «Լերան աղջիկը» պոեմը, վիպակները: Նրա սրբազանության քարձրակերը, սակայն, դրամատրիկական գործերն են:

Շանթի «Հին սարվածներ» դրաման առավել, քան հայ գրականության մեջ որևէ այլ սրբազանություն, արժանացել է մասնագետների ու շարքությանը: Սա է փիլիսոփայական դրամա է, է պատմական ողբերգություն: Այս սրբազանության պատմական հենքում 9-րդ դարում րեղի ունեցած դեպքերն են, որ րեղ արրացովել են աշխարհիկ ու հոգևոր սկզբունքների հավերժական հակասության, անհայրի զգացմունքների և գործողությունների ազատության, ազգային կյանքի վերածննան ողիների հարցեր, որոնք մեծ արձագանք են գրել հայ հասարակության մեջ:



# ԼԵՎՈՆ ՇԱՆԹ

(1869–1951)

Լևոն Շանթ (Նահաշպետյան, ապա հոր՝ Սեդրոսի անունով՝ Սեդրոսյան. 1869, Կ.Պոլիս – 29.11. 1951, Բեյրութ) – հայ գրող, անվանի դրամատուրգ, մանկավարժ, հասարակական գործիչ:

Ծնվել է գորգի վաճառականի ընտանիքում: Վաղ հասակում զրկվել է ծնողներից: Նախնական կրթությունն ստացել է Կ.Պոլսի Սկյուտարի ճեմարանում: 1884–1891–ին սովորել է Էջմիածնի Գևորգյան ճեմարանում, 1892–99–ին ուսանել Լայպցիգի, Ենայի, Սյունիսենի համալսարաններում՝ խորանալով մանկավարժության և հոգեբանության մեջ: 1899–ին վերադարձել է Անդրկովկաս, ավելի քան տասը տարի դասավանդել Թիֆլիսի Գայանյան օրիորդաց և Երևանի թեմական դպրոցներում:

Թիֆլիսում մասնակցել է «Վերնատուն» գրական միավորման հավաքություններին, սերտ կապերի մեջ եղել Հ. Թումանյանի, Ղ. Աղայանի, Ա. Իսահակյանի, Դ. Դեմիրձյանի հետ: Հ. Թումանյանի և Ս. Լիսիցյանի հետ կազմել ու հրատարակել է «Լուսաբեր» հայոց լեզվի դասագիրքը: 1911–ին անցել է Կ.Պոլիս, դասավանդել կեդրոնական և Եսայան վարժարաններում:

1915–ից ապրել է Եվրոպայում, 1919–ին վերադարձել է Անդրկովկաս:

Շանթի ստեղծագործական ուղին տևել է վեց տասնյակ: 1890–ական թթ. հրատարակել է բանաստեղծություններ և «Լեռան աղջիկը» պոեմը, որոնց գաղափարական հիմքը կյանքի և իդեալի հակադրության, պատրանքի և երազային սիրո գեղեցկության ռոմանտիկական մոտիվներն են, ինչպես նաև գրել է վիպակների մի ամբողջ շարք («Մնաք բարովի իրիկունը», «Երազ օրեր», «Դուրսեցիները», «Վերժին», «Դարձը», «Դերասանուհին»): Դրանցում արծարծել է սիրո և աշխատանքի, հասարակական պարտքի և անձնական ձգտումների հակադրության հարցեր: Շանթի արձակը հարուստ է հոգեբանական նրբերանգներով, քնարական ջերմությամբ, մանավանդ՝ կին հերոսների ներաշխարհի խոր իմացությամբ:

Սակայն Շանթի ստեղծագործության նշանակությունը հայ գրականության և մշակույթի պատմության մեջ կապվում է, ամենից ավելի, նրա դրամատուրգիայի հետ: «Եսի մարդը» (1904), «Ուրիշի համար» (1906), «Ճամբուն վրա» (1909) դրամաները շոշափում են անհատի և հասարակության փոխհարաբերության, ազգային – ազատագրական

պայքարի հարցեր: «Հին աստվածներ» (1909), «Կայսրը» (1916), «Շղթայվածը» (1921), «Օշին Պայլ» (1932) պատմական դրամաները իրենց նյութով կապված են հայ միջնադարի տարբեր ժամանակաշրջանների, իսկ «Կայսրը»՝ բյուզանդական պատմության հետ: Սակայն, ընդհանուր առմամբ, պատմական միջավայրի հոգեբանությունը և կենցաղի ճշմարիտ վերարտադրությունը հեղինակի համար էական խնդիր է: Պատմական դեպքերն ու անունները սոսկ պայմանական են, որի միջոցով փաստորեն արծարծվում են ժամանակակից սոցիալ-հոգեբանական խնդիրներ:

Շանթի պատմական դրամաները, հատկապես «Հին աստվածները»-ն ու «Կայսրը», հայ գրականության և թատրոնի պատմության մեջ սինվոլիզմի ամենացայտուն դրսևորումներից են: Մինվոլիզմը դրանց մեջ երևան է գալիս սյուժեն իրական և երևակայական պլաններով զուգահեռաբար զարգացնելու, կյանքն իբրև մի հավերժական և անխմաստ շրջապտույտ դիտելու, պատկերներից խորհրդանիշներ ստեղծելու և հերոսների խոսքի ենթատեքստային նշանակությունն ընդգծելու մեջ: «Հին աստվածները» դրամայում, որը Շանթի գլուխգործոցն է, գեղարվեստական մեծ ուժով բարձրացվել են աշխարհիկ և հոգևոր սկզբունքների հավերժական հակադրության, անհատի զգացմունքների և գործողության ազատության, ազգային կյանքի վերածնման ուղիների հարցեր, որոնք խոր արձագանք են գտել հայ հասարակության մեջ: Այս դրամայի շուրջը 1910-ական թթ Անդրկովկասում և Կ.Պոլսում բուռն վեճեր են ծավալվել: Դրաման ունեցել է տասնյակ բեմական մարմնավորումներ, որոնց մասնակցել են հայ թատրոնի առաջատար ուժեր: 1916-ին «Հին աստվածներ»-ը ռուսերեն թարգմանությամբ (1912) տպագրվել է Մ.Գորկու խմբագրած «Հայ գրականության ժողովածու»-ում:

Ավելի ուշ լույս է տեսել նրա «Հոգիները ծարավի»(1945) հոգեբանական վեպը:

Գրել է նաև հայոց լեզվի քերականության դասագրքեր, գրականագիտական, բանասիրական, մանկավարժական, գիտահոգեբանական, պատմագիտական բնույթի մի շարք աշխատություններ:

Թարգմանել է Մ.Լերմոնտովի «Մծիրի» (1891) պոեմը, Է.Վոյնիչի «Բոռ» (1906) վեպը, Հ. Իբսենի «Ժողովրդի թշնամին» (1968) դրաման:



## ԻՆՉՈՒ

«Ինչո՞ւ կը գրես» հարց կուտան ինծի,  
ու ես զարմացած կը նայիմ իրենց:

Ինչո՞ւ կը գոռա թափովն առյուծի  
ալեկոծ ծովը խոժոռ ժայռին մերձ.  
կամ հեզամբմունջ վտակը ինչո՞ւ  
իբր թարմ կարկաչը կողըրե անուշ,  
երբ անփույթ, կայտառ ու զվարթաչու  
առաջ կը գայթի նազանքով քնքուշ.  
ո՞վ կը հարցընե եռուն ջրվեժին,  
թե ինչո՞ւ անդուկ կը հանե շառաչ,  
մինչ սեպ բարձունքեն անդունդ կը խուժին  
փրփուր կոհակներ հորդ ու կաթնալանջ.  
խսկ դո՞ւն. քու վրադ հարցեր թափեցին,  
երբ խումն հյուսքը խինդ ու կսկիծի  
երգի մը փարած սրտեդ դուրս հորդեց:

Բայց կը հարցընեն այդ ինչուն ինծի,  
ու ես զարմացած կը նայիմ իրենց:



## ՈՒՐՎԱՆԿԱՐՆԵՐ

Ունիմ նկարչի տետրակ մը սիրուն,  
որ ժամանակի ձեռքեն խլելով  
տարեր պահեր եմ աչքերե հեռուն՝  
խորքը հուշերուս, խորշ մը ապահով:

Առաջին էջը իրարու փարած  
թերատ գծերու ցանց մըն է նրբին,  
որոնք հոն մրոտ խառնուրդեն հանկարծ  
այն չար աղջկան դեմքը կը ծնին:

Ուրիշ կուսական դեմքեր շարունակ  
կը գտնեն այնտեղ հայացքիս գերի,  
միայն բոլորն ալ անորոշ, խառնակ,  
անփույթ վրձինի մարզանք են թերի:

Անդին երագուն և ընկեր դեմքեր  
կը ժպտին ինծի անուշ կարոտով,  
իրենց նայվածքի թարմ մութերն ի վեր  
բոցեր կը ժայթքեն. ն՛ կյանք, ն՛ կորով:

Բանաստեղծական ֆանթազիներ ալ  
պատկերներուս մեջ կան գծված հստակ.  
Ոգևորություն, Սեր ու Իտեալ,  
և Գիտությունը՝ կին դիմակի տակ:

Ու խենթ իղձերու, սպասման, հուզման  
և աշխատանքի, անհաս տենչանքի  
հոն խառնափնթոր մարմնացումներ կան,  
գծած ու ավրած, գծած կրկնակի:

Այո՛, նկարչի տեսորակ մը սիրուն,  
որ մոռացության ճանկեն խլելով  
իբրև նվեր մը գալիք օրերուն  
պահեր եմ մտքիս մեկ խորշն ապահով,

## ՀՅՈՒՍՔ

Է, օրերս կանցնին ունայն,  
չունի հոգիս զբաղում.  
ո՛չ սեր, ո՛չ վիշտ, ո՛չ փոթորիկ,  
այլ միշտ թափուր ու տրտում:

Այս անապատ ճամփուն վրա  
իբրև կյանքոտ օվասիս,  
վայրկյան կուգա, երբ կը փարի  
անզուսպ զայրույթ մը սրտիս:

Ու ես կատղած կուլըրեմ երգ,  
ինչպես գետը ձանձրացած,  
որ ցասուկեն փրփուր-ժանյակ  
կը հյուսե լերկ ժայռեն ցած:

## ԳՆԱՅՔԸ

Գնացքը շեշտ, անդուլ ճեպով  
սլացիկ,  
երբ անձնատուր իր զույգ գծին  
օձաձիգ,  
կը գալարի ճամփուս վրա

աչքիս դեմ,  
ես կանգ առած, մութին մեջեն  
կը դիտեմ աչքերն անթարթ,  
որ շեշտ հեռուն  
է գամեր,  
ճապուկ մարմնին տենդոտ դողը  
անհամբեր  
ու խոնջ կրծքեն ժայթքող իր հեքը  
վայրի,  
որ հասնելու անհաս տենչովը  
կայրի:

## ՄԱՀ

Հա՛, կը մեռնիմ դեռ չապրած,  
մինչ գործ տեսնել կերազեմ,  
մինչ մտքերս հրահրած  
կյանքին գիրկը կը վազեմ:

Չէ՛, չկարծես կը վախնամ  
կյանքի վերջին այս խաղեն.  
ատ մեր ելքն է, ինչ վախնամ  
զգայության դռներեն:

Բայց դեռ շուտ է, շուտ, հոգի՛ս,  
թարմ արյունս բոց է դեռ.  
ու անծանոթ է սրտիս  
անկարելին, վախն ու հեռ:

Եվ այդ կյանքիս դեռ սեմին  
թողնեմ անուրջն իմ ամեն,  
ու դեռ ոչինչ՝ ոչինչին  
երթամ փարիմ աշխարհեն:

Դեռ հեռունն ապագան  
կը նկարվի վառ ու պերճ,  
դեռ ուժերս ալ եռ կուգան,  
բայց շունչ մըն ալ ու ալ վերջ:

Ընդմիշտ կորած են անհետ  
լույս, հույս, տենչանք ու մտքեր:  
Ա՛, ո՛չ. տվե՞ք շունչս ետ,  
ես ընելիք ունիմ դեռ:

...Ու երազես արթընցած՝  
բացվող լույսին կը հառիմ.  
անուշ արցունք կիյնա ցած.  
անխ, ես կապրիմ, դեռ կապրիմ:

## ԺԱՆԳԸ

Գգրոցիս մեջ գրիչս ինկած է հիմա  
գրած-ջնջած թղթերուս մեջ ցանուցիր,  
ժանգե պատանք մը աճած է իր վրա  
ու ալ հպարտ չառկայծիր:

Մինչ նայվածքս այդ հին գրչին է հառած,  
մեջս միտք մը զիկզակ կուտա՝ մի՞գուցե  
անշարժ կյանքես զգացումներս ալ հանկարծ  
ժանգի խավ մը գա գուցե:

## ՀՈՂՄԱՂԱՅ

Հեռուն, բլրակի ուսին արևառ՝  
գառամ, կիսափուլ հողմադացը հին՝  
հոգնած ու կրքած,  
բեռ մը տարիներ դիզած շալակին,  
դրեր է վատուժ իր մարմինը սառ  
արևին դիմաց:

Կը դառնան խարխուլ թևերն անագին  
ձոճելով քուրջերն այն բզիկ-բզիկ  
ու կեղերերգեն  
տխուր ձռինչով, հովերու կամքին,  
իր համակերպած տրտունջը հեզիկ  
այս չարքաշ կյանքեն:

## ԱՆՈՒՇ ՀՈՎԻԿ

Ահա՛ ելավ լուսինն արծաթ  
մութ ամպերու ստվերեն,  
ահա՛ նավակն ալ գեղազարդ  
մեր դրացի ժայռերեն:  
Անուշ հովիկ.  
փչե՛ հուշիկ  
ու բեր ինձի  
բյուր ժիր ալիք:

Նավակը հեզ կը սպրդի  
ալիքներու ծուփին տակ.  
աղջիկն անփույթ հենած մեկդի

կերգե ձայնովն իր հստակ:  
Անուշ հովիկ,  
փչե՛ն հուշիկ  
ու բե՛ր ինծի  
երգն անուշիկ:

Երգն է կարոտ, սեր ու զգվանք,  
ինքը հուզում ու սարսուռ.  
ալ թո՛ղ, աղջիկ, երգդ ու նազանք,  
բոց աչքերդ հո՛ն դարձուր:  
Անուշ հովիկ,  
փչե՛ն հուշիկ  
ու բե՛ր ինծի  
նավն ու աղջիկ:

## ՎԵՐ

Էհե՛յ, ես վեր թռչիլ կուզեմ,  
մաքուր է հոն, արձակ, ազատ.  
հոն հովին դեմ ես կը վազեմ,  
իբրև եղբայրն իր հարազատ,  
ալևորիկ լեռան ցայտին  
կուզեմ թառիմ բազենն վեր,  
վերեն նայիմ ամպի կույտին,  
ուր կայծակներն են պահվրտեր:  
Գիտեմ, վարեն այն վարանտո  
խելոք մարդոց երամն ըստվար՝  
«Ի՛նչ գործ ունի այդ խևը հոտ»  
պիտի ըսեն, նային իրար.

և թո՛ղ նային, հեզնեն ալ թո՛ղ  
խելոք ծաղրովն իրենց անհամ.  
էհէ՛յ, միշտ վեր, ես սրտադող  
միշտ վեր կուզեմ, որ խոյանամ:

## ԱԼԻՔԸ

Տեն, ալիքը մերթ կուռի  
կնոջ լանջի պես դողդոջ,  
ժանյակով մը փրփուրի  
նուրբ սքողված է ամբողջ,  
մերթ ալ ողորկ կը գոզնա  
ծոցին պես զույգ ստինքի,  
ուր կույս սիրտ մը կը խոկա  
աղվոր բաները կյանքի,

## ԱՆՏԱՌԻՆ ԵՐԳԸ

Մութին մեջ խոր պահվըտած  
հովը կը սուրա  
հանկարծ քունեն արթընցած  
անտառին վրա:

Ու կը խռնին ձյուղ ու ոստ  
իրարու ուսին,  
հովի չափին տակ ընդոստ  
կերզեն միասին:

հոն թախիծին երկաթե  
սուր ճիչերը կան,  
որուն հույսը կը փաթթե  
թել մը դուրեկան:

Մեղեդի մը տառապանք  
հոն կը կարկաչեն,  
ու վրեժը սանձարձակ  
կորոտա մեջեն:

Մերթ հանդուգըն շեշտ մը սուր  
ազատ ու վստահ,  
մերթ կասկածի մը սարսուռ,  
որ փախուստ կուտա:

Ծիծաղն անդին սուլելով  
կատակ մը կերգե,  
ծաղրը իր խոր բամբ ձայնով  
քովեն կը հեգնե:

Հանկարծ կարոտ մը զգույշ  
կը վազե մեկդի,  
սիրո կանչ մըն է քնքուշ,  
որ կը խլրտի:

Իսկույն խուճրը բռնկած  
զայրույթի մը պես  
նույն կտորը դարձ ի դարձ  
կը կրկնե պեսպես:



Մինչև դողդոջ, նվաղկոտ  
վերջն է, կերկարի  
Հոգնած՝ սրտի բոցն աղոտ  
որ մեղմ կը մարի:

## ԱՂՈԹՔԸ

Դուն կաղոթեիր հուզված, դողահար,  
կույս ննջարանիդ առանձնության մեջ.  
ջինջ արցունքիդ տակ ժպիտ կը խաղար,  
մինչդեռ բնածին շարժումով մը մեղկ  
լի թևերդ մերկ կը հյուսվեր իրար:

Գլխու ամեն մեկ թեթև ցնցումիդ  
կապեն ազատված մազերդ առատ,  
ինչպես ոսկեզօծ առվակ մը սրտմիտ,  
կը հոսեր ուսեդ կոհակ ու կոհակ  
դեպի ձյուն-փրփուր գիրկը անկողնիդ:

Ինչ կաղոթեիր, ինչո՞ւ, չգիտեմ,  
բայց աղեկ գիտեմ, որ քու փղոսկրե  
կիսասքող կուրծքիդ ալիքներուն դեմ  
զգացի տենչ մը Աստվածն ըլլալու,  
որուն կաղոթես դուն ամեն ատեն:

## ՄԱԿՈՒՅԿԸ

Մակույկն է խրած  
օրորուն ափին

անձնատուր եղած  
իր ամուր կապին,

Առագաստը թույլ  
կախված մեղկորեն  
կը դողա անդուլ  
հովի սարսուռեն:

Թիերն ալ հոգնած  
դադարեն երկար,  
բաց ծովուն դիմաց  
կը նային իրար:

Մինչ դժգոհ, խոհուն  
թեք կայմը ամուր  
կը դիտե հեռուն  
կարոտով տխուր:

Ու կըմբռնեն ես.  
նավն ալ կազն, անահ,  
անձկոտ սրտիս պես  
բաց ծով կը ցանկա.

Կուզե սաստկակոծ  
կյանք ու փոթորիկ,  
մինչ ափին անգործ  
կերերա լռիկ:

## ԱՍՈՒՊ ՄԸ

Այդ աղջիկը երեկ տեսա,  
հեղ մը միայն, թեթևակի.  
կարծես ասուպ մը դյուրասահ,  
որ աչքիդ դեմ կը սայթաքի:

Հազիվ գողցա ակնարկ մը վառ  
սև աչքերեն իր տենչարծարծ,  
ու ժպիտ մը, որ այտեն վար  
ինձի ձոնել ուզեց հանկարծ:

Հազիվ հպա իր զույգ մատին  
հրաժեշտի պատրվակով  
և զգացի քայլ մը անդին՝  
սրտես բան մը մնաց իր քով:

## ԵՐՆԵԿ

Երնեկ ըլլամ ես ներդաշնակ  
թավալում մը եղանակի  
ու իմ դյութիչ գգվանքիս տակ  
տամ ձեզ բաժակն անրջանքի.  
կամ ճնշըվող կուրծքե ժայթքած  
բուռն երգ մը դառնամ անգութ՝  
աննպատակ, անմիտ, ցամքած  
ձեր խեղճ կյանքը տամ երեսնուդ:

## ՓՈԹՈՐԻԿ

Ու դուրսը մութ անթափանց,  
ոչնչացումը լույսի.  
պատուհանիս դեմ հակած՝  
կեցած եմ լուռ, մեկուսի:

Ու հովն է, որ մոլեգնտոս,  
կարծես ոհմակ գայլերու,  
կոռնա հանկարծ դեմքիս մոտ  
ու խույս կուտա ալ հեռու:

Ու բյուր մատերն անձրևի  
պատուհանիս երեսին  
կը նվազեն խոլ, վայրի  
երգերեն մին քառսին:

## ՍՏՎԵՐԴ

Քու ստվերդ է թևերուս մեջ,  
քու ստվերդ խաբերա,  
որ քունիս մեջ կը գրկըվի  
ու քունիս հետ խույս կուտա.

բայց կանգ կառնե քայլ մը անդին,  
կարծես ինձի կհեզնե,  
մեղմ ժպիտ մը տժգույն այտին  
չի բաժնվիր ալ ինձմե,

Ո՛չ, ե՛տ կանչե ստվերդ նենգ,  
որ միշտ շուրջս կը հածի,  
երբ դուն ինքդ, հպարտ աղջիկ,  
դեռ միշտ օտար ես ինծի:

## **ԵՍ ՊԱՏՐԱՆՔԸ ՍԻՐԵՑԻ**

Շուրջիս տափակ ու չոր կյանքեն զայրացկոտ  
կանչեցի ես իտեալս կենսածին.  
բայց ետևես կծու ծաղրով անամոթ  
«Է՛, ան միայն գրքի մեջն է» պոռացին,  
ես ալ գիրքը ինծի ընկեր ընտրեցի,  
ես պատրանքը սիրեցի:

Մենության մեջ լուռ, մթնշող սենյակիս՝  
չիրագործվող երազներու մեջ թաղված՝  
հեռո՛ւ ու վե՛ր սավառնեցավ միշտ հոգիս,  
հո՛ն, ուր կյանքիս գոհար հույսերն են մաղված.  
ես, մոր մը պես, անուրջներս գգվեցի,  
ես պատրանքը սիրեցի:

Երբ գեղեցիկ թարմ աղջիկը ժպտեցավ,  
սիրտս դողաց հուզումով մը ներդաշնակ,  
սիրեցի ալ, միայն ո՛չ ան, որ անցավ,  
այլ անոր նուրբ հափշտակիչ դեմքին տակ  
նոր էակ մը, որ մտքերս հոն անցուցի,  
ես պատրանքը սիրեցի:

Հայրենիքի հուր կարոտը բնածին  
երբ բռնկցուց հուզված լանջս տենդորեն,  
«Դուն հայրենիք, դուն հող չունիս» հծծեցին.  
Ես դառնացա, բայց ալ ուժգին այդ օրեն  
իմըս չեղող հայրենիքս պաշտեցի,  
ես պատրանքը սիրեցի:

Ինձի համար այն ժամերը թանկ եղան,  
երբ ներշնչված ստեղծեցի միշտ անգո,  
բայց անձնուրաց ազնիվ դեմքեր սիրեկան,  
երբ իրական աշխարհին մեջ միշտ դժգոհ,  
իտեալի կյանքեն երգել ուզեցի.  
ես պատրանքը սիրեցի:

## ՇՈՒԳԵՆԱՎԻՆ ՄԵԶ

Վերջալույսի կես-մութին մեջ շոգենավը կը մաքառի,  
ծովուն կուրծքը կը պատռտե անիվներովն իր վիթխարի:

Ու գորշ ծովը վերք մը առած, վերք մը խորունկ ու կաթնահոս,  
ետ-ետ կերթա ալիք-ալիք, մոլեգնտաձ, սակայն անխոս:

Ու կը նայիմ ես նահանջող ալիքներու այդ արշավին,  
մինչդեռ մտքիս օրոր կըսե դղրդյունը շոգենավին:

Գանգես վազող խոհերն ամեն կը չքանան մեջես քիչ-քիչ.  
ու խոնջ սրտիս ալ կը տիրե ախորժ թմիր մը ամոքիչ:

Չկա այլևս վաղն ու երեկ. ներկան է լոկ, որ կըզգամ:  
ան ալ խիստ մութ զգացում մը, թե կյանք ունիմ, թե ես կամ:

Չէ, չգիտեմ՝ ինչն է թովիչ մտքիս շինծու այս նիրհին մեջ,  
բայց ես սրտանց կը ցանկայի, որ մեր ճամփան դառնար անվերջ:

## ԼՈՒՄՆԻՆ ՏԱԿ

Լուսինն անհոգ ու ժպտուն  
գորշ երկընթեն սատափե  
ծովուն վրա կը թափե  
Լույսի խուրձ մը կայծկլտուն:

Ու լուռ ափին ավազուտ  
ծովը հանդարտ ու բարի  
կը մեկնըվի, կը փարի  
քնքուշ դողով մը ծփուտ:

Ու նիրհ կուտա շոյանքով  
իր խոնջ ու քուն ցամաքին՝  
այնպես զգոյշ, մեղմագին,  
ինչպես մայր մը զավկին քով:

## ԴՈՒՆ ԻՄՍ ԷԻՐ

Դուն իմս էիր, հեղ մը լոկ,  
ան ալ պարի մը անցուկ  
պտույտին մեջ վաղանցուկ,  
միևնույնն է, որո՞ն հոգ:

Երբ նվագը խելագար  
կը դարձրներ մեզ արագ,  
երբ մեր շուրջը հակառակ  
ամենքը մեկ կը դառնար,

Չէինք տեսներ ալ ոչինչ.  
մինակ էինք ես ու դուն,  
գիրկընդխառն, զվարթուն,  
վերացման մեջ զգլխիչ:

Ու գալարած կուրծքդ ի վեր  
նագուկ մեջքիդ նրբենի,  
ընդհատ շունչդ կըզգայի,  
որ այսու ջերմ կը շոյեր:

Երբ այդ հուրեն խելահեղ՝  
ալ ջերմեռանդ և ուժգին  
քու անձնատուր լի կուրծքին  
կը փարեի սիրագեղ,

Ըսե՛, ինչո՞ւ կը ծածկես,  
այդ հմայիչ լանջիդ տակ  
չէի՞ր զգար դուն հեշտանք  
ու սարսուռ մը տենչակեզ:

Դուն իմս էիր, թեև լոկ  
բուն պարի մը անցուկ  
պտույտին մեջ վաղանցուկ,  
միևնույնն է. որո՞ւ հոգ:



## ԻՆՉՊԵՍ ՄԵԳԸ

Ինչպես մեզը, որ առտուն  
ներս կը խուժե սենյակեդ  
ծաղիկներու բուրնան հետ  
գարնան օր մը զվարթուն,  
այդպես տարտամ, սպիտակ,  
թարմ բաղձանքներ անըջոտ  
մերթ կողողեն խուռն ու հորդ  
մրրկածուփ կրծքիս տակ.  
այդ վայրկյանին խուսափուկ  
տենչ մը վրաս կը հակի,  
տենչ ունենալ ծովակի  
շաղակրատանքը փափուկ  
ու պատմել ձեզ մեղմօրոր  
սրտիս կյանքը երագուն  
ու անորոշ անկայուն  
այս բաղձանքներս իմ բոլոր:

## ԼՈՒՌ

Շուրջս խավար, հանդարտ ու քուն.  
շուք մը անգամ չի դողդղար,  
հոն, դիմացս շշուկներուն  
մահացումն է լիակատար:

Միակ ձայնը իրարու քով  
ժամացույցս ու սիրտս է հոն,  
որ կը համրեն պինդ-պինդ զարկով  
կյանքիս քայլերն արագահոս:

## ՄՐԻՆԳ

Մրինգի մեղմ ձայն մի փափուկ ու ոլոր  
լուռ գիշերին կը գեղգեղէ հեշտօրոր,  
կարծես անհույս կը հեծկլտա վշտացած.

Մերթ մտածկոտ կը նվաղի սարսուռով,  
մերթ ալ հանկարծ ամբողջ կիրք է ու կորով,  
մինչև նորեն թույլ ուժասպառ իջնէ ցած:

Լալու իղձ մը կը ճանկըռտէ կոկորդէս  
ունկընդորելով այդ սիրերգը տենչակեզ,  
որ եղեգի ծակած կրծքեն կը հոսի.

Կարծես ինծի ու իմ սրտես կը խոսի:

## ՀՈՍ ԵԿՈՒՐ

Հո՛ս եկուր, նստինք ծառին տակ,  
որ կես-մութին մեջ կերերա.  
անուշ զեփյուռը թող հստակ  
երգեր հծծէ մեր վրա:

Գիրգ ձեռքդ սեղմած ջերմ կրծքիս,  
հո՛ս եկուր, նստինք ծառին տակ,  
թող թափի դեմքիս, երբ հակիս,  
մազիդ ոսկի այդ վտակ:

Սուզվիմ աչքիդ խորքը վճիս՝  
գիրգ ձեռքդ սեղմած ջերմ կրծքիս՝  
եկո՛ւր, որ ըսեմ ականջիդ.  
«Քեզ կը սիրեմ ես, հոգիս»:

## ԵԹԵ

Եթե ձիշտ է, որ մենք ալ  
պիտի ձգենք ու երթանք,  
լքենք հոգին, խինդն ու լալ,  
ն' մարմինը, ն' այս կյանք,  
կուզենայի, որ կռվես  
չկշտացած, ազնիվ դեռ,  
դեռ հոգիս միշտ թարմ ու վես,  
մեծ ոչինչին մեջ կաթեր:

Կուզենայի խենթ հույսեր,  
բուռըն հույզեր խուռներամ,  
մաքուր ու վառ սիրտ ու սեր  
դեռ կրծքիս տակ ունենամ,  
ու քմայքներն հոգիիս  
նվազի պես հեշտուր,  
աշխատանքիս ու մտքիս  
խարխափումներն այս բոլոր.

Ե՛վ ձիգերս, թե ինչպես  
մարդը նորեն կերազեմ  
ու բարձրացման ծարավես  
անհայտին դեմ կը վազեմ.  
ն' հավատքըս թևավոր  
մարդու գալիք մեծության,  
և վերջ ամեն բռնավոր  
ստրկության, հեծության:

Թե ինչ աղվոր, գրավիչ  
կը թվի դեռ կյանքն ինձի,  
կույս շշուկ մը, կույս քրքիջ

կարծես շուրջս կը հածի:  
Երբ այս բոլորը չկան՝  
կյանքը ինքն է արդեն մահ.  
կուզեմ կյանքս հաղթական,  
կուզեմ ապրիմ մինչև մահ:

## ՄՈՒԹԻՆ ՄԵՋ

Մութ գիշերը և ամպոտ.  
սև ալիքները սրտմտած  
կելլեն ու կիջնեն ափին մոտ  
ու իրար հետքով համրընթաց  
հեռուն կը դիմեն վարանոտ:

Այդ խոր մութին մեջ՝ միայն վառ  
բաց-կարմիր բոց մը կը հևա,  
ձկնորսի նավ մը, ուրկե վար  
մուգ ջրին վրա կը սողա  
բոցին շեկ ցոլքը դողահար:

Հովը կը փչե ցամաքեն,  
խարխուլ հին նավը կը գայթի –  
մինչ խռպոտ ձայներ կաղմկեն՝  
խումբ մը ձեռք համառ կաշխատի  
հանե իր հացը ալիքեն:

## ԳԻՇԵՐԱՊԱՀԸ

Գիշեր է. տանկ-տանկ. հսկա՛ ժամացույց.  
հանգիստ է չորս դին, կը ննջեն բոլոր,  
միայն ինքն է որ՝ հանգույցե հանգույց՝  
փողոցներ կանցնի լուռ, քայլամուր.

Պաղ հովը կուգա կը զարնե ճակտին,  
ուր հին-հին հուշեր հանկարծ կը հածին,  
ինչպես երկընքի քողեն ալ անդին  
մոռցրված աստղեր մերթ վառ կառկայծին:

Ու միտքը կերթա թափով ինքնաբեր  
կը թռչի դեպի տունը հայրենի,  
ուր կյանքն ուրիշ էր, սրտերն ալ տարբեր  
այն լեռներուն մեջ վեհ ու ամեհի:

Ու պարզ կը հիշե. գիշեր է խորին,  
իրենք քույր-եղբայր լռիկ ու անքուն  
խումբով պաշարած ալեհեր հանին  
կունկընդդին անտր վեպերն հմայուն:

Եվ հանին ինքն ալ ներշնչված արդեն՝  
Մհերի ուժը կը պատմե տղոց,  
երբ հանկարծ բուքը տնակի երդեն  
այլանդակ ձայնով կը հանե հոգոց:

Ահեղ ոռնումով կարծես կը խոսի,  
կը սուլե բառեր բիրտ ու չլաված.  
բան, որ դժոխքի խորքեն կը հոսի,  
ու խաչ կը հանե հանին երկյուղած:

Իսկ տղաքը լուռ կը նային իրար.  
ու ամեն մեկը կը խորհի ինքնին,  
որ նոր Միեր մը դառնա անպատճառ,  
երբ ինքն ալ հասնի անոր տարիքին:

Եվ ահա... տանկ, տանկ. խորհող ժամացույց.  
հանգիստ է չորս դին, կը ննջեն բոլոր,  
միայն ինքն է որ՝ հանգույցե հանգույց՝  
փողոցներ կանցնի լուռ քայլամուր:

## ԶԳՈՒՇ

Եկուր ըսե, ինչո՞ւ այդպես  
կը սեղմես դուն ձեռքս ծածուկ,  
հեշտություն մը արդյոք կըմպես  
դյուրին, անմեղ ու վաղանցուկ:

Զգճու՛շ:

Բայց մի, – գուցե անզուսպ, տենչոտ  
սիրտ մը ունիս դուն, ինծի պես,  
ու ցընցումի, հուզման կարոտ,  
չգիտես ալ՝ թե ինչ կընես:

Զգճու՛շ:

Թե՛ պարզ խաղի համար նետված  
խայծ մըն է ատ չարաձիձի.  
ու կուշտ խնդաս պիտի՝ հանկարծ  
եթե սիրտս կարթիդ կատչի:

Զգճու՛շ:

Քարայր մըն է հոգիս մենիկ  
խոր անթափանց ժայռի գրկին,  
ուր ամեն ինչ հծծյուն փոքրիկ  
խուլ արձագանք կուտա ուժգին:

Զգո՛ւշ:

## ՖԱՆԹԱԶԻ

Ես անթարթ կը նայիմ աստղերուն.  
ու ինծի կը թվի, թե մթին  
երկընքի կամարեն շատ անդին  
լուսածին կա աշխարհ մը անհուն,  
և թե վառ աստղերը, որ վերեն  
մեր մտքին թռիչքը կը գերեն,  
ծակեր են, մաշուկներ, ուրկե մենք  
կը ջանանք հայացքնիս ներս նետենք.  
Ներս, ուր բոց էակներ հուր կյանքով  
դարեդար կը վառին իրար քով,  
ուր ժպտեն կը կաթի շեկ լույսեր,  
ուր կրակ, կիզում է ամեն սեր.  
ու կայծ մը՝ ամեն վիշտ, ամեն հույս.  
արցունքը՝ ջինջ շիթ մը բոցալույս.  
և ինքը ապրիլը անվերջ, ձիգ,  
կայծակի սարսուռ մը սլացիկ:

## ՆԵՏ ՄԸ

Նայվածքդ, նետ մը դարբնած կայծակե  
կը խրես աչքիս խավարին մեջ հոժ,  
ինչպես արևի ճառագայթ մը բոց,  
որ խոր անձավի մուրճը կը ծակե:

Ու ժիր մարմինդ գրկիս մեջ կեռա,  
երբ կապավինի իմ հուզված լանջին,  
երբ շրթունքներս բոցովը տենչին  
սերս կը գրեն այտերուդ վրա:

## ՊԱՏԿԵՐԻՆ ՄԵՋ

Պառկած ես հոտ, պատկերին մեջ,  
դռն, չար աղջիկ, ու կըժպտիս,  
ժպիտ մը մեղմ, որ չունի վերջ,  
ինչպես տենչանքն իմ սրտիս:

Անոթխածի նենգ դիմակով,  
նագով անմեղ ու գեղանի,  
ծածկել կուզես կույս վերմակով  
սիրուն կուրծքդ հոլանի:

Մինչ ես խաբված՝ պատկերիդ դեմ՝  
ձեռքերս վեր կառնեմ անձկոտ,  
որ վրայեդ քաշեմ նետեմ  
այդ, ծածկույթը նախանձոտ:



## ՄԱՀԻԿԸ

Թուխ երկինքեն կես-գիշերին  
նեղ մահիկի կենտ աչքն է ծուռ,  
որ անքթիթ խորագնին՝  
աչքերուս մեջ կը նայի լուռ:

Ու ժպիտով մը չոր, հեզնոտ  
ինծի ըսել կուզե կարծես.  
«նյութի՛ փշուր, ինչ կընես հոտ.  
գիտե՛մ, մե՛ծ գործ, կը մտածես...»:

## ԾՈՎ

Եկո՛ւր, բացվինք մենք իրար,  
ծո՛վ, կը կարծեմ ես ու դուն  
պիտի սիրենք անպատճառ  
իրար հույզն ու տրտմություն:

Քեզի ես շուտ հասկըցա.  
վեհ ամեհի բնության  
կապույտ սիրտն ես դուն հսկա.  
սիրտ, իմ սրտիս հար-նման:  
Դուն ալ ունիս, ինծի պես,  
դժգոհության վայրկյաններ,  
երբ կնձռոտ կը ձողփես  
սիզոտ, խիճոտ ափն ի վեր:

Մերթ ալ զվարթ կը քծնիս  
ժիր աստղերուն, լուսնին հետ.

և հուզումնեդ կառկայծիս,  
կը դողդղաս բերկրանքեդ.  
դո՞ն ալ վստահ այդ պահուն  
դեմ կը նետվիս հույսերուդ,  
որոնք ժպտով հմայուն  
կիջնեն ծոցդ քու ծփուս:

Այլև անշարժ, անծպտուն,  
ամեն բանի անտարբեր,  
մեռելություն մ' ունիս դուն,  
որ իմ կրծքես ես խլեր,  
չես խլրտիր, չես խորհիր  
ու ոչինչ ալ չես զգար,  
անխորհուրդ է ամեն իր  
այդ վայրկյանիդ ցավագար

Մերթ ալ հանկարծ փրփրուն,  
ցասուկով մը մոլեգին,  
կը գալարիս ժայռերուն ու  
կը թքնես երկընքին.  
ըսե՛, ինչո՞ւ այդ զայրույթ,  
միթե՞ դո՞ն ալ կապված ես,  
միթե՞ և քո ուժերուդ  
ազատ գործել չես տար քեզ:

Եկո՛ւր բացվինք մենք իրար,  
ծով, կը կարծես ես ու դուն  
պիտի սիրենք անպատճառ  
իրար հույզն ու տրտմություն:

## ՄԵՎԵՐՈՒ ՄԵՋ

Քնքուշ աղվոր դենք մը տխուր  
սև քողին տակ նուրբ ամպըված,  
գույգ մը սիրուն մանրիկ ձեռքեր  
սև ձեռնոցով պիրկ գրկըված,  
սև գոտիին տակ սլացիկ  
ձկուն իրան մը նրբամեջ,  
կուրծքն ուռուցիկ ու անհանգիստ  
ձուլված իր սև հագուստին մեջ,  
սև մազերու վտակ մը հորդ,  
որ ուսերեն վար կը վազե,  
ծունկերուն մեջ կը քնանա  
հովահար մը սև մետաքսե,  
և ունքերու սև թավուտեն  
ակնարկն ինծի երբ կը շանթե,  
ա՛, սև աչքեր, այդ ի՛նչ ուժ է,  
որ սիրտս այսպես կը կաշկանդե:

## ՄԻՄՅՈՆԻ

Երաժշտության իրար ընդգրկած  
կրքոտ շեշտերու խոլ հորդումին տակ  
քեզի կը դիտեմ ես հափշտակված.

Մինչ դուն ուշադիր սուզված ես դողդոջ  
ներդաշնակության այդ ծովն անհատակ,  
ուր կը փոթորկին հուզումներն ամբողջ:

Լսե՛, իմ կուրծքս ալ ալիքներ կան հորդ,  
որոնք կարոտի հովերեն ուռած  
սիրո ծարավս կերգեն մուլեզնոտ.

Այդ խոր անդունդն ալ մեկ նայե՛, հոգիս,  
և եթե խելքդ պտույտ գա հանկարծ,  
մի վախնար, գիրկս պիտի սայթաքիս:

## ՓԻԼԻՍՈՓԱՆԵՐ

Լեցուն պայծառ լուսնին տակ,  
հեռուն, կուրծքը դաշտակին,  
կուզիկ լեռներ սպիտակ  
իրար գլխու կը հակին:

Լե՛ռ, ո՛վ ըսավ. ալեհեր  
քավթառներ են խորշումած,  
որոնք հոտ կուչ են եկեր  
սավաններով փաթթըված:

Ու լրջությամբ ձառադեմ  
գլուխ գլխի կը խորհին՝  
գուցե իմաստ մը գտնեն  
գոյությանը աշխարհին:



# ԼԵՌԱՆ ԱՂՋԻԿԸ



## Վիպերգ

### ՆՎԱԳ ԱՌԱՋԻՆ

#### ԴԵՊԻ ԳԵՂԱՐԴԻ ՕՊԱՆ՝

\* \* \*

Հեռնե՛ր, սե՛գ լեռներ, ես կսիրեմ ձեզ,  
Կսիրեմ բուռըն ու անգուսպ սիրով.  
Հպարտ գագաթնիդ՝ հսկաներ կարծես՝  
Ո՛րժ կներշնչեն, թարմություն, կորով:

Հող ամեն մեկ բան սրտիս կժպտի,  
Վիշտն ու թախիծը կվանե մեկդի.  
Հող գովիկ հով մը դեմս կփույթա  
Եվ կուրծքըս ազատ շունչ կառնե կուտա:

Իսկ անդընդախոր ձորի հատակին,  
Երբ իր պատերը պատռել տըքնելով՝  
Ժայռերու դեմքին փրփուր թքնելով՝

---

1 Օպա կկոչվի լեռներուն վրա հովիվներու զարկած քանի մը վրաններուն խումբը, ուր կապրին իրենք և որուն շուրջը հոտը կգիշերե:

Կուռի կուլըրի ջուրը գետակին,  
Սիրտս ալ, գետին պես, կխսայտա վետ-վետ,  
Եռալ փրփրիլ կուզեմ իրեն հետ:

Լեռներ, վեհ լեռներ, ձեզ երգել կուզեմ  
Ոգևորության այս տենդերուս մեջ.  
Թող ձեր ճակատը ճիշտ բաց, միշտ վսեմ՝  
Դառնա գործերուս իդեալն անշեջ:

Դուն, լեռան աղջիկ, երգել կուզեմ քեզ,  
Եվ թող երգիս հետ դուրս հոսի կըրծքես  
Հոն երկար ատեն ծածկըված անհուշ  
Թըրթիռը սրտիս ու հույզերս անուշ:

Եվ երնեկ երգս ալ պարզ ըլլա, հըստակ.  
Ինչպես ամեն բան լեռներուն վրա.  
Ինչպես աղբյուրը, որ դուրս կծորա  
Մամռոտ ժայռերու գով խոռոչին տակ.  
Ինչպես լեռնային երկինքը վճիտ.  
Ինչպես, լեռան կույս, թնդունը լանջիդ:

\* \* \*

Խոր ու թեք ձորի պատըռտած կողեն  
Պարզուկ գմբեթ մը երկինք կմիտի,  
Սուր-սուր սլաք մը լարված աղեղեն,  
Որ, ըսես, հիմա վեր թռչի պիտի:

Վարը Ազատը ժայռերու գրկին  
Դեմ կուտա անոնց քարե գըզվանքին,

Խաղով, հեգնանքով, քմահաճորեն  
Դուրս սողալ կուզե Գեղամ սարերեն:

Բայց այդ իր վազքին մեջն իսկ խելագար,  
Երբ կհանդիպի սուր սուրբ գմբեթին  
Պատկառած քիչ մը կքաշվի մեկդին,  
Որ մենաստանին չըդառնա խանգար:

Հա՛, հնայք ունի բնության ծոցին  
Հին ու կիսավեր վանք մը առանձին:

\* \* \*

Օ՛հ, որքան քաղցր է ձմռան բանտեն վերջ՝  
Բնության գիրկը խենթի պես նետվիլ.  
Ու խորհրդավոր, սիրուն ձորին մեջ  
Եվ ըսքանչանալ, ն՛ ոգևորվիլ:

Տաք իրիկուն էր, երբ սայլն առավ կանգ:  
Վերջին ոլոր մ՛ալ, ու ձորը մտանք:  
Գետն իր խուլ երգով դեմերնիս փութաց,  
Պագավ երեսնիս իր շնչովը թաց:

Ճոխ ութներու թավուտ ճյուղերեն  
Սուր դայլայլիկներ կրտրուկ, թըրթըռուն  
Հանկարծ անձրևեց մեր խոնջած գլխուն.  
Մինչ գաղտնի ձայներ, որ մարդ կծաղրեն,

Չորի այն բանրձր անձավներեն կույս  
Նույնը կկրկներ թովված ականջուու:

\* \* \*

Նըրբամեջ ձորը դյութել կուզեր մեզ՝  
Վառ ծաղիկներով պրճնած դեմքն ու լանջ.  
Փարթամ բնության իբրև նուրբ բեհեզ  
Նետեր էր ուսին կըրկնոց մը կանանջ.

Սակայն վախնալով, որ հովն անպատկառ  
Ծածկույթը մարմնեն կատակով բանար,  
Անփույթ դիրքով մը փաթթեր էր մեջքին  
Փըրփուրե գետի արծաթե գոտին:

Եվ շլացանք մենք այդ կույս, ամոթխած  
Ու թարմ, գըրգըռիչ գեղեցկութենեն.  
Մոռցանք դըպրոցը, իր ժխորն ամեն՝  
Նոր հրապույրին անձնատուր եղած:

Եվ հաճոյալից խուսափուկ օրեր  
Մեր անհոգ կյանքի օրոցքը կօրրեր:

\* \* \*

Սակայն հոսուն են, վաղանց, քըմածին  
Ու դյուրափոփոխ իղձերը մարդուն.  
Ինչպես ամառվան վառ վերջալույսին  
Նըրբին, գունագեղ ամպերն անկայուն,

Լրիվ ամիս մը դեռ հազիվ անցավ,  
Երբ ամենուս ալ զգալի դարձավ,  
Որ հընչուն գետը ու ձորը գողտրիկ  
Ծարավ սըրտերնուս ալ չէր գար հերիք.



Ազատ երկրնքի կրզգայինք պահանջ.  
Ծերուկ սարերուն տեսքը ալեհեր  
Կարծես կքաշեր մեզ լեռներն ի վեր՝  
Հո՛ն, ուր հարթակ էր փրռված գեղալանջ:

Եվ մենք վճռեցինք շաբաթ մը-երկու  
Լեռներուն վրրա՛ երթանք ապրելու:

\* \* \*

Գիրք ու անկողին՝ պետքերնիս բոլոր՝  
Իր թիկունքն առավ մեկ նիհար, սև եզ.  
Դե՛ն, օպա կերթանք մենք ոլոր-մոլոր,  
Մանուկ հոտաղ մը առաջնորդ է մեզ:

Դըժվար էր ճամփան, նեղ, սեպ ու անանց,  
Շուտով գիշերն ալ հասավ անթափանց.  
Երբ հանկարծ մոտեն խուլ որոտումներ  
Դղրդեցուցին թե՛ անդունդ, թե՛ լեռ.

Եվ հոծ ամպերու թանձրության խորեն  
Դուրս սողաց շանթը ճայթումով վայրագ,  
Մինչդեռ փայլակը դողդոջ ու արագ  
Մահատիպ լույս մը կթափեր վերեն:

Իսկ մենք կելլենք միշտ լուռ ու շընչարգել  
Մութին մեզ կորած այդ շավիղն անել:

\* \* \*

Ա՛հ, այդ գիշերը ո՛վ մոռնալ կրնա  
Կատղած բնության ցասկեն դողահար՝  
Միայնակ նետված լեռներուն վըրա,  
Երբ երկընքեն վար դըժոխք կտեղար:

Չէ՛, ես կպաշտեմ այդ աղմուկն անսանձ.  
Այդ ակնախըտիդ փայլը կարձակյաց.  
Այդ կայծակները, երբ վազքերնուն տակ  
Կպատեն ամպերն այն կուտակ-կուտակ.

Բնության ահեղ այդ կըռվին հուժկու  
Ես կերկըրպագեմ հափշտակությամբ.  
Ան իմ թարմ սրտիս կուտա իղձ ու թափ  
Մեր կարճ կյանքին մեջ անդուլ կըռվելու.

Եվ մարդ ո՛ւժ կզգա այդ վեհ վայրկյանին  
Ուխտել բյուր ցընորք ու անկարելին...

\* \* \*

Բայց թունդ աղմուկին քիչ-քիչ հաջորդեց  
Առատ անձրևի զարկերն ու շառաչ.  
Եվ մենք ուժասպառ, գավազաննուս հեց՝  
Եզին հետքովը կերթանք միշտ առաջ:

«Հասանք», կավետե մեզ առաջնորդնիս.  
Ես ըսթափելով կնայիմ չորս դիս:  
Մութին մեջ բան մը հազիվ նըշմարած՝  
Այն կողմ կըշտապենք եզը զանց ըրած:

Բայց հաղթ, հովվական խոշոր ջներու  
Հաչն ու կլանչը մեզ ետ կվանեն.  
Մինչ հովիվները կելլեն վըրանեն  
Ապշած նայելով անկոչ հյուրերուն,  
Որ գոռ փոթորկին, այդ սև գիշերին  
Իրենց այցի գալ մըտածեր էին:

\* \* \*

Դեռ փոթորիկը դուրսը կաղմըկե,  
Եվ հորդ անձրևն ալ կծեծե անդուլ  
Պարզուկ վըրանին ծածկը թաղիքե՝  
Կազմելով երգ մը միակերպ ու խուլ:

Եվ այդ թացության երգը տըխրագին  
Օրոր կկարդա մեր հոգնած մըտքին,  
Եվ մենք ուժաթափ, մըրսած ու քընատ,  
Անձրևեն թըրջած ու հովեն գունատ՝  
Կընճենք խորունկ մանկական քընով:

Քունն ինչ անուշ է լեռներուն վըրա,  
Երբ փոթորիկն ալ դուրսը կգոռա,  
Երբ խեղճ վըրանըդ կդողա ահով,  
Եվ անկողնիդ մեջ երբ բընազդաբար  
Կըծիկ կդառնաս տաքնալու համար:

# ՆՎԱԳ ԵՐԿՐՈՐԴ

## ԼԵՌՆԱԴԱՇՏԸ

\* \* \*

Պայծառ արև էր, երբ աչքըս բացի,  
Ընկերներըս խոր կնընջեին դեռ.  
Վըրանին առջև երկու արծակ ձի  
Ցողաթուրմ խոտը ախորժով կուտեր:

Հըսկա ծերուկ մը երկու քայլ անդին  
Նըստեր կխորհեր ձեռքը ծընոտին:  
Դուրսեն բյուր ձայներ, ճըռվողյուն, դայլայլ  
Եվ սուր բըզզյուն մը անվերջ, անայլայլ

Համանվագ մը կդաշնակեին:  
Ես չըդիմացա, ցատկեցի տեղես.  
Ադբյուրն հարցուցի ծերուկ տանտերես.  
Ան քանի մը բառ պոռաց անմեկին,  
Ու աղջիկ մը ներս վազեց կարմըրած,  
«Գընա՛ ետևեն»՝ ծերը մըմըռաց:

\* \* \*

Ինչ սիրուն օր էր, ինչ կապույտ եթեր.  
Շուրջըս շող ու ցող, թարմություն ու զով.  
Հոն բնությունը կարծես լըվացվեր՝  
Չորցվիլ կուզեր զեփյուռի շընչով:

Ես կքալեի արբշիռ ու արագ՝  
Լեռան ջինջ օդը ծրծելով անհագ.  
Աղջիկը թեթև առջևես կերթար  
Մանրիկ, ոստոստուն քայլվածքով կայտառ,

Ա՛, իր նուրբ, ճկուն մեջքը կանացի.  
Եվ թիկունքին վար սև գիսակը ճոխ՝  
Օձի պես սողուն ու աչքի կառչող:  
Զնւր հետը խոսիլ հեղ մը ջանացի.

Գլուխը հակեց շարժումով մը վես,  
Ցընցում մը ըրավ, թրռավ առջևես:

\* \* \*

Եվ ես խելահեղ ինկա ետևեն,  
Կարծես գրրգրոված իր վագքեն համառ.  
Հասա ու ամուր բըռնեցի թևեն,  
Առանց գիտնալու, թե ինչու համար:

Անոր արևոտ այտերը սիրուն  
Հագիվ էր պագեր տասնըհինգ գարուն.  
Եվ ինչ թարմ մարմին, և ինչ հրապույր,  
Ինչպէս նըրբակազմ, ինչպէս կենսաբույր:

Ես պահ մը անթարթ նայեցա իրեն,  
Մինչ ինքն ամըչկոտ հայացքը անուշ,  
Հառեց աչքերուս վարանքով անուշ,  
«Անունըդ», ըսի. ժըպտեցավ նորեն.

Եվ հանկարծ խլեց թևը ձեռքերես  
Ու փախավ լեռան երեի մը պես:

\* \* \*

Անհետ եղավ ան ժայռերուն ետև,  
Իսկ ես միայնակ մընացի շրվար.  
Կրթօքիս տակ բան մը կճըմլեր թեթև,  
Անկանոն շունչըս արագ կհևար.

Ու սիրտըս ամուր մուրձի մը նման,  
Ջարկ կուտար պինդ-պինդ. խենթեցեր էր ան  
Անշուշտ անսովոր իմ ըշտապ վագքես  
Այսպես շընչասպառ, հուզված էի ես:

Մտքիս մեկ խորշեն կըսեին սակայն,  
Որ այդ բնական պատճառեն տարբեր  
Ուրիշ նոր բան մը հոգիս էր թափեր,  
Նոր բան մը ճըմլող, թարմ ու դուրեկան...

Միչնև որ թուլցան զարկերը սըրտիս,  
Ու ես հոգեզմայլ նայեցա չորս դիս:

\* \* \*

Նոր էր ամեն բան հոն ինծի համար.  
Այդ չըքնաղ վայրի բընությունն ազդու,  
Այդ շուրջանակի լեռներն անհամար,  
Որոնք թե-թևի հենած իրարու  
Ըսկսիլ կուզեն շուրջպար մը հսկա,  
Որ համրատատան կերթա ու կուգա.  
Մեր նեղ, ցից սարը, որ դաշտին դիմաց  
Բեմ մը կկարծես կանանչով գորգած:

Դյուցազնի բեմ մը, որուն բարձունքեն  
Ամեն առավոտ վարդ արշալույսին  
Բյուրավոր զըվարթ ձայներ միասին  
Բնության դեղը կձառեն կերգեն:

Ինչ հիացումով և հույզով եռուն  
Ներկա եմ եղեր այդ ներբողներուն:

\* \* \*

Լեռնային վայրի բընության նըման,  
Նոր էր ու բուռըն վարած կյանքերնիս.  
Անցյալի՛ հուշեր, եկե՛ք օգնության,  
Երգե՛նք միասին՝ ինչ քաղցր էր սրտիս:

Երբ առավոտը գաղտուկ ժպտալեն՝  
Լեռան ու երկնի համբույրի վայրեն՝  
Ցույց տար դալկահար, քընատ աստղերուն  
Քունեն կարմըրած այտերն իր սիրուն:

Երբ Արագածի չորս-ձյուղ գագաթին  
Թուխ-թուխ ամպերը խորունկ հորանջով  
Ճերմակ մահիճնուն ելլեին նազով.  
Եվ երբ արթըննար օդը հանդարտին  
Թռչուններու սար առաջին երգեն,  
Մենք ալ կելլեինք հովվի վրանեն:

\* \* \*

Մեր ուրախ, անգուսպ բարձրը երգերուն  
Աղբյուրն իր հեզիկ ձայնը կխսաններ,  
Մինչ իր սառնորակ հոսանքը ծիծղուն  
Քունի համբույրը այտես վար կառներ:

Հեռոն լեռներեն հրտպիտն արձագանք  
Ճըշդիվ կկրկներ յուրաքանչյուր վանկ:  
Մենք, արբած լեռան մաքուր, գաջը օղեն,  
Հողի ու ծաղկի գրգըռիչ հուտեն,

Շարժելու տենչ մը կզգայինք հանկարծ:  
Դե՛, շիտակ այն սեպ, ժայռոտ բըլրեն վեր,  
Ետնուս հող, քար վար կգըլտորվեր  
Խուլ թընդյունով մը, թափով մը անդարձ,  
Մինչ խումբը հեքով շեշտ առաջ կերթար  
Գազա՛թը միայն առնելու դադար:

\* \* \*

Այա կերթայինք ու ջոկին մեջեն  
Շուտ կթամբեինք մեր նախընտրած ձին.  
Եվ դալարագեղ լեռան թեք լանջեն  
Ձին ճամփա կիյնար միշտ հըլու սանձին:

Ա՛խ, երբ ան կատղած, բերնին հորդ փրփուր,  
Ճոխ բաշը հովին, աչքերուն մեջ հուր,  
Պինչերուն շոգի, շեշտ կսլանար  
Ոտքերն ու կուրծքը գետնին հավասար,



Կարթըննար մեջըս վայրի բընագղներ.  
Կուզեի բան մը, որ փըշըեմ ջարդեմ,  
Կուզեի կըռվիմ սուլող հովին դեմ,  
Որ ականջիս տակ ծաղրըս կհաներ:

Այն պահուն ձիես, չէ՛, տարբեր չէի,  
Ես ալ, իրեն պես, կվըրընջեի:

\* \* \*

Կամ իրիկունը, երբ թուլ ցուքերով  
Արևը երկրիս հըրածեշտ կուտար,  
Եվ երբ լեռները իրենց ըստվերով  
Պինդ կփաթթեին հովիսը դալար.

Երբ հովիվները փըչելով շըվին՝  
Դեպի վրանը ետ կքշեին  
Մայող, բառաչող հոտերն ու տավար,  
Մենք՝ թմրություննիս վանելու համար՝  
Դեպի վըտակը կերթայինք ըշտապ.

Լեռան ցատկըռտող ջուրերը հըստակ  
Ա՛լ կփըրփըրեր մեր զարկերուն տակ.  
Մինչ մենք դեռ երկար, թեև ուժաթափ,  
Իր հոսանքին դեմ կուտայինք պայքար,  
Որ կարկաչելով վըրանիս կուզար:

\* \* \*

Վըտակին մոտիկ ժայռ մը կա ցըցված,  
Որուն դեմ հովը իզուր կըսպանա.  
Լողանալե վերջ՝ զով ու թարմացած  
Հոդ կժողվըվինք՝ այդ ժայռին վրա:

Ճիշտ մեր ձախ կողմեն Մասիսն ամեհի  
Լեռան մը ուսեն շեշտ մեզ կնայի,  
Աջեն Արագած՝ հակած Արային՝  
Ո՛վ գիտե, ինչեր կպատմե հին-հին:

Այրարատ դաշտը կփըռվի մեր դեմ,  
Որ պինդ պարուրված իր գորշ ծածկոցով  
Քուն մտնել կուզե. ինչ մշուշի ծով:  
Ետիս ալ ձորի մութն է ձառադեմ,  
Ուր Ազատ խոր, խուլ անձավներուն մեջ  
Կկըռվի անդուլ իր կռիվն անվերջ:

\* \* \*

Եվ մենք անձնատուր մեզ շրջապատող  
Դարերու վըկա այդ արձաններուն,  
Կմնանք անշարժ, լուռ ու սրտադող՝  
Մութին մեջ գամած աչքերնիս հեռոն:

Հին, հոգնած դարեր, ծեր ուղտերու պես,  
Կուգան ու դանդաղ կանցնին առջևս:  
Բայց, տեսար, վե՛ճ մը մեր մեջ կփըրթի՝  
Անմիտ հորդում մը տենչահույզ սըրտի.

Գալիք օրերու քողը կպատռի  
Մեր անփորձ մըտքի հանդուգն ճիգեն.  
Ինչ պատկեր, ինչ կյանք կժպտի տակեն...  
Եվ ան վարդերանգ հույսերու գերի՝  
Պինդ-պինդ կհավտանք, սճուրբ հպարտություն,  
Թե պիտի չանցնի մեր կյանքն ապարդյուն:

# ՆՎԱԳ ԵՐՐՈՐԴ

## ԼԵՌՆՈՒՏԻՆ

\* \* \*

Այս կյանքը սըրտիս նոր էր ճշմարիտ,  
Նոր իր լեռնական պարզությամբը վեհ,  
Նոր իր ինքնաբուխ հույզերովն անմիտ,  
Նոր իր գեղովը, որ մարդ կթովե:  
Նաև հոն մեզի նոր էր ծերունին,  
Որ անշարժ նստած կխորհեր ինքնին  
Աշխույժ տարիքին իր ուժն ու գործեր,  
Եվ կռիվները, որ ան վարած էր  
Քաջ թըշնամուն դեմ երես առ երես,  
«Չէ՛, ան ատենը ուրիշ էր աշխարհ»,  
Ու խոր թախիծեն ծերը կդողար:  
Էհ, ինծի համար նոր էր վերջապես  
Այն լեռան վարդը՝ վայրի ու չքնաղ՝  
Իր աղքատ, պարզուկ ձորձերուն մեջն ալ:

\* \* \*

Բայց քիչ-քիչ վարժիլ ըսկասանք նորեն  
Վըսեմ բնության գույն ու ձևերուն.  
Կապույտը երկնի, կանանչը դաշտեն,  
Ոսկի դեղինը ամեն իրիկուն

Եվ արշալույսի երկինքը բոսոր  
Մոլոր աչքերնուս ալ չէր անսովոր:  
Դեռ չորս հեղ արև գըլխնուս չանցած  
Հոն մեզ անծանոթ տեղ չէր մնացած:  
Կաթեն ջրվեժը պաղ, փըրփըրադեզ,  
Դաշտակի ծայրի գոս ժայռը խոժոռ,  
Հարևան բլրի գլուխը խոշոր,  
Նույնիսկ մամռապատ քարերը դեզ-դեզ,  
Որ մտերմորեն վար կնայեին,  
Ա՛հ, որքան, որքան սրտիս մոտ էին:

\* \* \*

Հովվի վըրանն ալ արդեն օտար չէր,  
Կարծես հին ծանոթ էինք մենք իրար.  
Լեռան աղջիկը ալ դուրս չէր փախչեր  
Ու մեր հարցերուն պատասխան կուտար:  
Երբ իր ամըչկոտ ձայնը երերուն  
Գար երազանքիս հյուսվեր թելերուն՝  
Կդիտեի ես գորովով անանց  
Իր մութ աչքերուն խավարն անթափանց,  
Իր խիտ հոնքերուն կամարը կրկին,  
Որ մացառներ են կարծես ձորափեն  
Ու ձորին վըրա ըստվեր կթափեն  
Եվ թուխ այտերը, որ կըրռընկին,  
Եվ վարդ շըրթունքին զույգ թերթերը թաց,  
Ուր չար համբուր մը կար միշտ պահվըտած:

\* \* \*

Ա՛հ, այն ատենը տասնըութ տարվան  
Բոց մը կշրրջեր երակներուս մեջ.  
Դեռ ամբողջ կյանքս էր սպասում միայն  
Ու էությունը՝ երագանք ու տենչ:

Եվ երբ պատահեր, որ թըռչնակն անմեղ,  
Թափեր ծառերեն սիրահորդ գեղգեղ,  
Ընկերուհիին շուրջը հածելով  
Ոտոստեր, երգեր իր սերն ու գորով,

Ես կրծքիս խորը՝ նախանձեն ուռած  
Կըզգայի բուռն ու հուզիչ իղձեր.  
Հովը ականջիս լոկ սեր կհրծծեր.  
Եվ ես լալու չափ հուզված, գրըզըռված  
Կուզեի սիրվեմ, կուզեի սիրեմ  
Ու թըռչնակին պես ոստոստեմ, երգեմ:

\* \* \*

Կզգայի սիրտըս լի էր ու զեղուն՝  
Լի հորդելու չափ իր շրրթունքներեն  
Ինչպես անապակ գինին փրփրըրուն,  
Որ դուրս կթափի իր ներքին եռեն:

Ու գանգիս տենդոտ անուրջներուն մեջ  
Սիրո պատկերներ կուգային անվերջ.  
Պատկերներ օդե, պատիր, մանկական,  
Բայց անբիծ, անգին ու իտեական:

Այդ անուրջները հոգիս կօրրեին,  
Երբ բախտըս ինձի գլորեց շիտակ  
Լեռան աղջրկան պարզ վրանին տակ.  
Ա՛յ, այդ աղջիկը՝ քնքուշ լեռնուհին՝  
Որ ինչպես իր սեպ սարերն հարազատ,  
Պարզ էր, գեղանի, խըրոխտ ու ազատ:

\* \* \*

Ու կմնայի ես հաճախ մինակ  
Լեռներու դրստեր հըրապույրին քով.  
Լճու կնստեի հին վըրանին տակ  
Ընթերցանության նուրբ պատըրվակով:

Բայց ի՞նչ ընթերցում. ո՞վ է այն տըղան,  
Որ լուրջ ըզբաղի, երբ բոց կտեղան  
Զույգ մը կանացի աչքեր հմայիչ  
Ու հայացքըդ վեր կքաշեն քիչ-քիչ

«Լիր արքան» ծունկիս կնիրհեր անուշ,  
Անտարբեր ձեռքով ես հազիվ երբեք  
Սուտ կշըրջեի թերթերը մեկ-մեկ:  
Չէ՛, կկարդայի ժողված խելքս ու ուշ,  
Բայց ո՛չ խեղճ գըրքիս տողերն անկենդան,  
Այլ սև, կախարդիչ աչքերն աղջրկան:

\* \* \*

Եվ ինքը գիտեր, կշիկներ հանկարծ,  
Վրանեն կելլեր, կդառնար նորեն,  
Եվ իմ հալածող հայացքես գերված՝  
Ժըպիտ կթափեր նուրբ շըրթունքներեն:

Մերթ ալ նըստելով իր աշխատանքին  
Մեր գորշ վրանի լայն մուտքի կողքին՝  
Երգ մը կըսկըսեր, ձիգ երգ մը սարի,  
Ինքն ալ, իր երգն ալ շատ պարզ ու վայրի:

Իր անուշ ձայնը մերթ խուլ կորոտար,  
Ինչ լեռան վայրագ, փոթորկոտ հովեր,  
Մերթ կյըրթըռար հնչուն ու երեր,  
Ըսես, զեփյուռը ձորեն ձայն կուտար.

Հանկարծ կժայթեր, ջըրվեժ մը կարծես,  
Մեկ ալ կմարեր, հույսի լույսին պես:

\* \* \*

Նյութն ալ ու երգն ալ տխուր էր, քինոտ,  
«Բուռըն ջերմ սիրով կսիրե Մարոն  
Դըրացի լեռան ամենեն սըրտոտ,  
Ամենեն կտրիճ տըղան մըրահոն:

Բայց այդ սուրբ սերը պետք է խոր պահվի,  
Երկու ցեղերն են իրար թշնամի:  
Մարոն չըգիտե. դեռ լուսաբացին



Անգրըլուխ դի սը գետեն հանեցին  
Հոտի պահապան գամփըռներն հուժկու:

Վարձկան հովիվը չըճանչցավ այդ դին,  
Մարոյի հայրը ճանչցավ իր որդին.  
Եվ կատղած երդում կերավ սհարկու,  
Թե պիտի լըվա բազկովը կըթոտ  
Իր հարագատին վատ մահն ու ամոթ:

\* \* \*

Դեռ իր աչքերը ուժ ունին այնքան,  
Որ իր վրեժի նըշանը գտնեն.  
Ու ծեր ձեռքերը պիտի չդողան,  
Երբ հրացանի բըլթակը քաշեն:

Նա՛. ժայռի տակեն գընդակը թըռավ,  
Այն ի՛նչ կտրիճ էր, որ թավալ ինկավ:  
Ետ կուգա ծերը խեթ, դաժան ու քեն,  
Արյունոտ բան սը կախված է ձեռքեն:

Մարոն հորը դեմ կվազե արագ՝  
Գեշ բնագդով սը սիրտը թունդ ելած,  
Եվ սարսափահար կանգ կառնե հանկարծ  
Դեմքը մահատիպ, աչքերը վայրագ:

Մազերեն կախված հորը ձեռքեն ցած  
Իր սիրականի դեմքըն է ճանչցած»:

\* \* \*

Այսպէս կերգեր ան նըստած քովընդի՝  
Գողտրիկ գլուխը ցընցելով աշխույժ.  
Ու ճակտին տակեն նայվածք մը գաղտնի  
Դեպ իմ անկյունըս նետելով ըզգույշ:

Դյութելու իղձը ան ո՞ր էր ուսեր.  
Եվ ինչո՞ւ գերել, գըրավել կուզեր:  
Բայց ո՞րկէ ուսան աստղերը խայտալ,  
Մեզի աչք ընել, պըչրիլ ու խընդալ.

Ո՞րկէ սորվեցավ գետակը զըվարթ  
Փըրփուրե քող մը ձըզել իր վրա.  
Ան ինչո՞ւ կեռա, ինչո՞ւ կգոռա,  
Ինչո՞ւ կքըծնի ափերուն հպարտ.

Ծիածանն ինչո՞ւ կամար կկապե,  
Երբ երկինք գոհար ու շող կթափե:

\* \* \*

Մենք իրարու հետ քիչ կխոսեինք.  
Հարց մը կամ կատակ, միշտ ալ ժպտերես.  
Մերթ ցույց կուտայի ես մեկիկ-մեկիկ  
Քանի մը սիրուն պատկեր գրքերես:

Ու մոտը նըստած ծունկըս իր ծունկին՝  
Լի հեշտանքով մը անուշ, անմեկին՝  
Պատկերին միտքը կբացատրեի,  
Ա՛, ես այդ պահուն բանաստեղծ էի:

Ան դենքես կախված՝ կունկընդրեր անձայն.  
Ու գոհ, միամիտ ժըպիտ մը հանկարծ  
Կելլեր շրթունքին, կարծես, իբրև վարձ  
Իմ այդ սըրտագին ոգևորության:

Եվ այդ ժպիտն էր քընքուշ ու գոհար,  
Որ խոսքիս նոր ուժ ու հունոր կուտար:

\* \* \*

Եվ քիչ-քիչ ըզգալ ըսկըսա շուտով,  
Որ իմ գերության անտեղյակ հոգիս  
Արդեն կապված էր աննյութ շըղթայով.  
Եվ կապանք մը որ՝ թև կուտար կյանքիս:

Նոր բան մը կաճեր սըրտիս մեջ արագ՝  
Հորդ ու թրթըռուն հուզում մը կրակ  
Եվ խուժ ալիք մը կյանքի խորունկեն  
Ըզգացումներս գըրկած էր ամեն:

Ու հարց կուտայի վարանքով համակ,  
Թե արդյոք մն էր, որ կանվանեն սեր,  
Որուն խեղճ սիրտըս անժուժ կըսպասեր,  
Որով գինովնալ կըղձայի անհագ:

Հարցիս պատասխան գլուխըս չէր տար,  
Միայն ալ ուժգին սիրտըս կթընդար:

\* \* \*

Ու կհոսեին օրերը զըվարթ  
Գոհար հուզումով ու ոսկի կյանքով,  
Մինչդեռ լեռնային բնությունն հրպարտ  
Կգըզվեր մեզի խանդաղատանքով:  
Էհ, թող չըմոռնամ այն օրերն անդարձ,  
Երբ պատանեկան սիրտըս կյանք առած  
Բնության, սիրո ծոցին մեջ անհուն՝  
Գալիք կյանքի մը հույսերով զեղուն՝  
Կթափահարեր լանջիս տակ ուռած.  
Երբ գործ տեսնելու անհագուրդ տենչես  
Բյուր նըպատակներ կըստեղծեի ես.  
Երբ այդ հույզերուս բովին մեջ զըտված՝  
Սոսկալի անեծք կուտայի իմ դեմ,  
Ըսկզբունքներըս թե երբեք դավեմ:

# ՆՎԱԳ ՉՈՐՐՈՐԴ

## ԼԵՌՆԱՂԲՅՈՒՐԻՆ ՔՈՎ

Էի, այդ օրերը շատ արագ անցան  
Ժիր, պատանեկան կյանքիս վըրայեն.  
Ինչպես ամպերուն մեջեն ցիրուցան  
Կանցնի ասուպը դեմքիդ ժըպտալեն:

Միայն վառ հուշեր անուշ ու քընքուշ  
Կրծքիս խորքերը ծածկած եմ ըզգույշ.  
Ճիշտ այդպես տըղան կպահե իր քով  
Յարի մեկ ընծան անհուն գըզվանքով:

Ո՛ր է Գեղարդը իր լեռներուն հետ  
Եվ ո՛ր իմ արդի անկյունս անկենդան՝  
Բայց մի՛շտ, երբ գըրչես հանգերը խույս տան  
Ու խոնջ հայացքըս՝ կարոտով հավետ  
Արդի հարևան լեռներուն գամվի,  
Ես ձե՛զ կխորհիմ, լեռներ հայրենի...

\* \* \*

Վայրկյանի մը պես թռեր էր արդեն  
Երկու շաբաթվան միջոցը սիրուն.  
Ու վըճովեցավ, որ երկու օրեն  
Տանք հըրաժեշտնիս այդ պերճ լեռներուն:

Մեկնելու վըրա ես չէի խորհեր,  
Ուրիշ նոր հարց մը իմ միտքըս կօրրեր.  
Արդյոք աղջիկն ալ կըմպէր սիրտը դող  
Այս արբեցընող հուզումես հորդող:

Ժըպիտն էր դյուրթիչ, բայց միշտ անթափանց,  
Աչքերն ալ մուրթ-մուրթ, վար քաշող ու խոր,  
Ինչպէս անհատակ անդունդն ասիւրով,  
Ուր միայն խելքըդ կդառնա անսանձ:

Եվ այս անորոշ ծըփումս ու հույսեր  
Ա՛լ կհըրահրեր թե հուրքըս, թե սեր:

\* \* \*

Զէ՛, չէի կրնար հանդուրժել բնավ,  
Որ սեզ լեռնուհին մընար անտարբեր.  
Պահանջոտ էի, գուցե անիրավ,  
Բայց հըպարտ հոգիս մերժում չէր տաներ:

Եվ գիտեի ալ, որ այդ աղջըկան  
Քունը կտրած էր, իմ քունիս նման.  
Գիտնալը բավ չէր, և պատրաստ էի  
Կյանքիս օրերեն փունջ մը փետտելի:

Միայն լսեի իր իսկ շրթունքեն,  
Թե իր միամիտ, անբիծ, կույս սըրտին  
Իմ նայվածքներս խռովք կազդեին՝  
Խռովք և անուրջ՝ որ կյանք կբերեն,

Թե երբ ծունկ ծունկի մինակ մընայինք՝  
Խորին հեշտանք մը ու դող կըզգար ինք...

\* \* \*

Վերջին օրն էր ան, վերջին իրիկուն.  
Աղբյուրին վըրա ժայռի մը հենած՝  
Նըստեր էի ես մինակ ու նըկուն,  
Մասիսի խոսուն ակնարկին դիմաց:

Մոր գիրկը վագող գունդը ոսկեհեր  
Իր մարող լույսի ցուքերով երեր  
Կթափեր գոհար, մարգըրիտ անգին,  
Մասիսի ծերուկ, ալեզարդ գանգին:

Արևմուտքն ամբողջ արյուն էր կըտրած,  
Ուր կըողային դեղնորակ բոցեր.  
Հոգնած արևը դեմքը կգոցեր.  
Ես կդիտեի մըտացի՛ր, կոտրած  
Բնության պայծառ երանգներն այն պերձ,  
Որ աչքերուս դեմ կփոխվեր անվերջ:

\* \* \*

Հանկարծ մոտիկեն շորշյուն մը թեթև,  
Ու իր խորքերեն կհուզվի հոգիս:  
Աշխույժ շարժումով կդառնամ ետև,  
Ու ջերմություն մը կվառի դեմքիս:  
Ճանչցած էի ես քայլերը կույսին.

Աղբյուրը կուգար հին կուժ մը ուսին:  
Լուռ ըսպասեցի լարումով անհուն.  
Մինչև ան կուժը լեցուց, ու խոհուն  
Թեք տվավ զգույշ լեզ կապած քարին,  
Ու, այծյամի պես, ճարպիկ ու արագ  
Դեպի այն ժայռը նետվեցավ շիտակ,  
Ուր նըստած էի անշարժ ու լռին:  
Եվ նազանքով մը անմեղ ու գողտրիկ  
Ժըպտեցավ դեմքիս, նըստեցավ մոտիկ:

\* \* \*

Կամաց մը վրաս ծըռելով քովես  
Բաց մոռցած գիրքըս ըսկսավ թերթել,  
Լացող ուռնու թարմ ոստերուն պես՝  
Գիրկըս թափեցան վարսերը թել-թել:

Աչքերուս դիմաց կեռար խոռվքով  
Կես մը ըսքողված կուրծքը կրծքիս քով:  
Ու կխոսեինք, բայց ինչ՝ չգիտեմ:  
Էհ, ինչ կխոսին նստած իրար դեմ  
Զույգ աղբյուրները անվերջ կարկաչով.

Միայն կըզգայի, որ շունչըս նորեն  
Ետ կուգար անոր մազերուն խորեն  
Ու շրթունքներըս կայրեր իր տենչով...

Չըզիտեմ ինչպես՝ հանկարծ ծըռեցա,  
Դողդոջ շրթունքով այտին հարեցա:



\* \* \*

Ցընցում մը ըրավ ու անշարժ մնաց.  
Դեմքին վըրայեն սյուքի մը նման  
Սահեր էր անցեր համբույրս կամաց.  
Կարծես հըմայվեր, քարացեր էր ան:

Իսկ ես խելահեղ, ու բնագդորեն,  
Իսպառ բորբոքված վայելքի հուրեն,  
Ուզեցի մեջքը շըղթայեմ ամուր  
Զույգ բազուկներուս շըղթայովը կուռ.

Բայց ան դյուրաթեք, ճըկուն օձի պես,  
Թներուս մեջեն դուրս սողաց հանկարծ.  
Կես մը բարկացած, կես մը սիրարծարծ  
Թախծոտ հայացքը սահեցուց դեմքես՝

Անհետ ըլլալով ժայռերու ետին.  
Ապուշ անձկությամբ նետվեցա գետին...

# ՆՎԱԳ ՀԻՆԳԵՐՈՐԴ

## ԼԵՌՆ Ի ՎԱՐ

\* \* \*

Վրրանին մութը կուրծքըս կճընշեր,  
Եվ հուր կշընչեր բարձը այտերուս.  
Կայրեի. տոկալ՝ ալ կարելի չէր.  
Ցատկեցի տեղես ու վրրանեն դճրս:

Ու կշրջեի քայլերով մուր,  
Առջևս հոտը փըռված էր բուր.  
Ոչխարներն անհոգ մտեր էին քուն  
Խոնած իրարու՝ պառկած ու կանգուն:

Եվ հանկարծ մեկը խորունկ շունչ կառներ՝  
Խուլ հառաչանք մը, որ դուրս կպոռթկար  
Վըշտոտ, ձընշըված կուրծքե մը տկար:  
Հոտի չորս կողմն ալ հըսկա գամփըռներ  
Միշտ իրենց պարտքին պատրաստ աչալուրջ՝  
Նըստած էին լուռ, միշտ արթուն, միշտ լուրջ:

\* \* \*

Լեռուն ձայն չկա. անշրշոնջ, հանդարտ:  
Հոն մելամաղձոտ պայծառ լուսնին տակ  
Վեհ Արագածի տխուր, ալեգարդ  
Մտածկոտ դեմքը կերևա հըստակ:

Դեռատի լեռներ ծերուկ սարին քով,  
Մարդկային ձևեր առած կատակով,  
Հագիվ պահվըտած կես ըստվերին մեջ՝  
Իրար են գրկեր գգվանքով անվերջ:

Մինչ հովտին թանձրր մըթության մեջեն  
Բիրտ, անըրջային դեմքեր այլանդակ՝  
Միշտ փոփոխվելով հազար ձևի տակ  
Իրար կհըրեն, իրար կկանչեն  
Ու նախանձաբեկ կծաղրեն հըտպիտ  
Ջահիլ լեռներուն սերը միամիտ:

\* \* \*

Բայց մեկեն դադրեց հոգիս դիտելեն.  
Ու նորեն-նորեն մըտաբերեցի.  
Աղջըկան վերջին նայվածքը խորեն,  
Որ կարծես ընդմիշտ հառած էր ինծի:  
Եվ ըզգացի, որ մանուկ էի դեռ.  
Մինչ գիտե՞ք կույսին արժանին ո՞վ էր,  
Ոչ թե ինծի պես երազող տղա,  
Այլ լեռնցի մը, ուրկե կդողա  
Երեն անտառեն, արջը խոր ձորեն,  
Որ կեսգիշերին ցգըլուխ գինված՝  
Հովի պես թեթև նըժույզը սանձած՝  
Կուգա սիրուհին կառնե վըրանեն  
Ու կրծքին սեղմած կտանի հեռուն.  
Եվ մարդոց աչքին իր կինն է առտուն:

\* \* \*

Նրվաստության մը ըզգացումն ահեղ  
Ըսկաավ սիրտըս որդի պես կըրծել.  
Էհ, չընչին մարդու տեղը չէր այնտեղ,  
Հոն ո՛ւժ, գո՛րծ պետք էր, և ո՛չ երազել:

Բայց մերթ ալ ինծի այնպես կթրվեր,  
Թե այդ նայվածքը սերն էր կարեվեր.  
Այդպէն կնայի եղնիկն անկասկած  
Որսորդի նետեն վիրավոր ինկած:

Այդ նայվածքը լուռ, կարծես, կաղաչեր,  
Որ չխաղայի իր հետ այդ քընքուշ,  
Բայց վըտանգավոր կատակն անըզգույշ.  
Եվ արդյոք իրավ սա կատակ մը չէ՞ր.

Ցողի կատակ մը վարդի վառ կըրծքին,  
Որ շուտ կցընդի արևածագին:

\* \* \*

Այդ նայվածքը, ամհ, ինծմե գութ կուգեր,  
Գըթալ իր անհոգ անդորրը կյանքին  
Ու չներշընչել ապարդյուն հույզեր,  
Որոնք ծաղկե գուրկ լոկ փուշ կծըլին:

Եվ ես վարանած այդ հայացքին դեմ  
Կփըռվիմ գետին հողը կդիտեմ:  
Լալու փափագ մը կոկորդըս կուգա,  
Ու սիրտըս կըրծող կըսկիծ մը կըզգա:

Հանկարծ արցունքը կհորդի աչքես,  
Լարումս ալ թուլնալ կըսկըսի քիչ-քիչ.  
Մեղմիկ անխռով նիրի մը ամոքիչ  
Կուգա կկախվի թաց թերթերունքես.

Եվ խոր կնընջեմ՝ ցողով արցունքով  
Թըրջած խոտին մեջ, ոչխարներուն քով:

\* \* \*

Մեղմ ու գեղգեղուն ձայն մը սրինգի  
Խայթեց ականջըս, և ես արթընցա.  
Հովը երեսըս շոյեց մեղմակի՝  
Ընդոստ շարժումով ելա նըստեցա:

Լուսինը արդեն անհետ էր եղեր.  
Ճերմակ, կապտագույն նուրբ ժապավեններ  
Ձիգ-նեղ շերտերով փրռվեր էր երկար,  
Ուր լույսի առջի ցուքը կերերար:

Հովիվը ելած՝ սրրինգը բերնին  
Արոտ կքըշեր հոտը արթընցած,  
Որ կխըլըրտեր ու կամաց-կամաց  
Սուր մայուններով կյանք կուտար օդին:

Հեռուն կըլավեր խուլ ձայն մը կերկեր.  
Լույսը բացվելու արդեն մոտիկ էր:

\* \* \*

Շուտ ընկերներս ալ ցատկեցին ոտքի.  
Ամեն բան կապած պատրաստ էր արդեն.  
Արևը չէլած իջնեինք պիտի  
Այդ թարմ ու գալար մեր սարահարթեն:

Հապճեպ հըրաժեշտ տըվինք աղմըկուն  
Հյուրասեր ծերին և իրեններուն.  
Եվ վերջին անգամ, երբ ես կարկամած  
Աղջըկան դենքին նայեցա կամաց,  
Մեր հայացքները իրարու զարկին.

Ինչպես խորունկ էր ու ինչպես հուզիչ  
Իր ջերմ ակնարկը, իր ժպիտը ջինջ.  
Կարծես կգըզվեր, ու կըսեր մեկին.  
«Է, թող. ամեն մարդ իր ճամփով, եղբայր.  
Բաժնըվինք սիրով ու հիշենք իրար»:

\* \* \*

Ու բաժնըվեցանք, ան կեցած էր լուռ,  
Արահետը ձախ ծռեցավ հանկարծ.  
Վերջին նայվածք մը նետեցի տըխուր  
Եվ աղջիկն աչքես կորուսի անդարձ:

Սուր խայթ մը ու ցավ կըզգայի ներսես.  
Ալ կասկած չըկար, սիրած էի ես:  
Բայց հազիվ հպած այդ սուրբ փորձություն,  
Թողեր կերթայի, անջանտ հավիտյան:

Իսկ այդ անջատման լեղի բաժակեն  
Դուք ձեր կյանքին մեջ ընպսնծ եք երբեք.  
Հեռացանծ եք դուք ծանրը, սրտաբեկ  
Այն սիրուն, կանանչ, գողտրիկ բըլրակեն,  
Ուրկե մեկը լուռ կհետևի ձեզ,  
Եվ երբ ձեր սիրտը կպայթի կարծես...

\* \* \*

Էհ, քանի տարի անցած է հիմա  
Այդ անհոգ կյանքիս երազ օրերեն.  
Եվ որքան հեռու կապրիմ ականա  
Իմ սըրտիս մոտիկ չըքնաղ վայրերեն:

Բայց գիշերները նեղ սենյակիս մեջ՝  
Երկար հոգնելիս կամ ձանձրությես վերջ  
Հաճախ կերազեմ Գեղարդի օպան,  
Կհիշեմ հատ-հատ ամեն չընչին բան:

Ու աչքերուս դեմ կծընի պայծառ  
Լեռան աղջրկան պատկերն անարատ,  
Իմ անբիծ սրտիս հույզերն այն առատ  
Եվ վայրի սիրուս բերկրանքը անձառ...

Էհ, քանիցր վայրեր, վայրկյաններ անգին  
Իմ պատանեկան անըրջոտ կյանքին...



## ՀԻՆ ԱՍՏՎԱԾՆԵՐ

Հազարամյակ մը մեզմե սուսջ

### ԱՌԱՋԻՆ ՏԵՍԱՐԱՆ

**ՍԵՎԱՆԻ ԳԱԳԱԹԸ, ԺԱՅՈՒԵՐՈՒ ՄԵՋ ԱՎԵՐԱԿ ՄԸ,  
ԻՐԻԿՆԱՄՈՒՏ**

Վանահայրը նստած է քարի մը, ձեռքը ծնոտին ու մրախոհ կնայի վար: Կիսափող կամարի մը տակեն կամաց դուրս կելլե ձերմակալորը:

Վանահայրը՝ բարձրահասակ, թավ ու ալեխառն, գլխաբաց: ձերմակալորը նոյնպես գլխաբաց, երկար սև մազերով, ասորական ձևի հյուսված սև ու շքեղ մորուքով:

Վայրկյան մը երկուքն ալ լուռ կնային իրար:

**ՃԵՐՄԱԿԱՎՈՐԸ** – (Հեզնոտ) Կդիտեն, կդիտեն թագավորու-  
թյունդ:

**ՎԱՆԱՀԱՅՐԸ** – (Խոժոռ) Ո՞վ ես դուն:

**ՃԵՐՄԱԿԱՎՈՐԸ** – Դիտե՛, դիտե՛: Տեն, այդ երկու-երեք խար-  
խուլ խցիկները, չէ՞ որ դուն ես շիներ. հապա այն մատուռը, որ  
քու աճապարանքն է կառուցեր. և վերջապես, նայե՛, քու այդ



նոր եկեղեցիդ, որուն գմբեթը օր-օրի կբարձրանա վեր և որու գլխուն շուտով քու իսկ ձեռքովդ խաչը պիտի տնկես:

**ՎԱՆԱՀԱՅՐԸ** – Այո՛, եթե Տերը կամենա:

**ՃԵՐՄԱԿԱՎՈՐԸ** – Նայե՛ն ու հպարտացիր: Չէ՞ որ այդ բոլորը քու կամքիդ ծնունդն է:

**ՎԱՆԱՀԱՅՐԸ** – Ո՞վ ես դուն:

**ՃԵՐՄԱԿԱՎՈՐԸ** – Ա՛յ, սևավոր, ինչո՞ւ ես ժողվեր գլխուդ այդ սևազգեստ ու սևահոգի մարդիկը, ինչո՞ւ ես եկեր այդ հինավուրց կղզին:

**ՎԱՆԱՀԱՅՐԸ** – Ո՞վ ես դուն:

**ՃԵՐՄԱԿԱՎՈՐԸ** – Ելիր, ելիր, քըն՛ նորեն դուրս դեպի կյանքը այդ թշվառ ու մռայլ ամբոխը: Ելեք դո՛ւրս, դուք, որ զգայարանքները չորցնել կուզեք ու կրքերը մարել: Դո՛ւրս այս կղզիեն, դուք, որ թշնամի եք ամեն գեղեցկության, ամեն կյանքի ու շարժումի, ամեն ուժի ծնունդի: Դո՛ւրս, մի աղարտեք իմ աստվածներուս այս սուրբ դրախտը:

**ՎԱՆԱՀԱՅՐԸ** – Հոս դրախտ չկա: Այս ժայռի կտորին վրա ես իմ վանքս հիմնեցի. ասկե ետքը հոս անապատ պիտի կոչվի:

**ՃԵՐՄԱԿԱՎՈՐԸ** – Անապամ... այս ծիծղուն ծովակի ծոցին, այս թարմ արևուն դեմ: Հեռո՛ւ, կոխած տեղդ հին տաճար է աստվածներու. հեռո՛ւ հին աստվածներու շեմքեն է, որ կը խոսիս քեզի:

**ՎԱՆԱՀԱՅՐԸ** – Հին աստվածներու ավերակներեն:

**ՃԵՐՄԱԿԱՎՈՐԸ** – Ավերակը այս քարերն են, որ քեզիպեսներն են դարսեր, քանդվեր է անոնց դարսածը: Բայց ի՛նքը կյանքի մեհյանը խորտակում չունի, ինչպես և ինքը կյանքը: Կթափին քարերը, կփոխվին անունները, բայց իրենք աստվածները կան ու կմնան:

**ՎԱՆԱՀԱՅՐԸ** – Հոս մեռան քու աստվածներդ:

**ՃԵՐՄԱԿԱՎՈՐԸ** – Հո՞ս ու ամեն տեղ, ուր մարդ իր ոտքը

կղնե, հո՛ն են անոնք հավերժ ու անմահ:

**ՎԱՆԱՀԱՅՐԸ** – Հոս մեռա՛ն քու աստվածներդ, և անոնց ավերակներուն վրա ես իմ Աստծուս տաճարը կառուցի: Նայե, մութին մեջեն դեռ կնշմարվի գմբեթին արդեն կազմվող սրությունը: Հոն կթագավորե միայն հոգին, հոն կթագավորե միայն Աստծու շունչը...

**ՃԵՐՄԱԿԱՎՈՐԸ** – Հոն կթագավորե տանջանքի գործիքը ու մահը:

**ՎԱՆԱՀԱՅՐԸ** – Տանջանքն է, որ կբարձրացնե հոգին, տառապանքն է, որ կմաքրե: Եվ կյանքի ամենեն խոր բանը մահն է:

**ՃԵՐՄԱԿԱՎՈՐԸ** – Տառապանքը կյանքի խոցն է, իսկ մահը՝ կյանքի քայքայումը:

**ՎԱՆԱՀԱՅՐԸ** – Քու բերնով կխոսի մանուկ մարդկությունը:

**ՃԵՐՄԱԿԱՎՈՐԸ** – Քու բերնով կխոսի ցավագար մարդկությունը:

**ՎԱՆԱՀԱՅՐԸ** – Հերիք է. ո՞վ ես դուն, որ կհայհոյես: Հեռացի՛ր, այս կղզիին վրա ալ տեղ չկա քեզի ու քու աստվածներուդ:

**ՃԵՐՄԱԿԱՎՈՐԸ** – Այս կղզին ալ նո՛յն աշխարհն է, ինչպես ամբողջ աշխարհը: Երկրպագե՛, մոլորված, հավերժ աստվածներուն:

**ՎԱՆԱՀԱՅՐԸ** – Հեռացի՛ր:

**ՃԵՐՄԱԿԱՎՈՐԸ** – Խոստովանե՛, մոլորված, ու երկրպագե՛:

**ՎԱՆԱՀԱՅՐԸ** – Հեռացի՛ր:

**ՃԵՐՄԱԿԱՎՈՐԸ** – Կուգա օրը, ու կխոստովանիս: (Աներևույթ կըլլա):

**ՎԱՆԱՀԱՅՐԸ** – *(Կնայի շորջը, անհանգիստ)* Ո՞վ էր: Չքացավ: Տեսի՛լք, կասկած... *(Հանկարծ վճռակաս)* Ա՛, երբեք: Աշխարհիքը մուտք չունի այս կղզին: Աշխարհիքը մուտք պիտի չունենա՛ այս կղզին: Ո՛չ:

# ԵՐԿՐՈՐԴ ՏԵՍԱՐԱՆ

## ՀՐԱՊԱՐԱԿ ՆՈՐ ՇԻՆՎՈՂ ԵԿԵՂԵՑԻԻՆ ԱՌՋԵՎԸ

*Մեկ կողմը փաճարի անդուռ մուտքը: Կերևան փախարակե ելարաններ: Հոս ու հոն թափված են արաղձ, կիսափաշ քարեր, մաղ, գործիքներ:*

*Խորքը ծառեր, որոնց բուներուն մեջեն կնշմարվի ծովը:*

*Ամբողջ փեսարանի միջոցին քամի է, երբեմն խիստ բուռն թափով: Կլավի փերկներուն շրշյունը և ծովուն խոլ աղմուկը հեռուն:*

### 1

*Մեկ-երկու քարփաշ կվազեն ծառերուն փակեն դեպի ծովուն կողմը: Տեսարանի խորքեն արագ կանցնի ժամկոչը երկար ձող մը ոսին: Եկեղեցիեն դուրս կուգա Ադամ վանականը արտոքայով և աշխարելով դուրս քաշելու երկար պարան մը, որուն ծայրը ներսն է:*

**ԱԴԱՄ ՎԱՆԱԿԱՆ** – (Ջերմեռանդ) Աստված հասնի օգնության: Աստված հասնի օգնության:

**ՔԱՐՏԱՇ ՄԸ** – (Կուգա ծովուն կողմեն ձեռքերը չորցնելով, բաց են ոտներն ու թևերը) Ձգե՛, վա՛ր ձգե՛, հայր-սուրբ, ալ կարիք չկա: Ելան, ամենքն ալ ելան ափը:

**ԱԴԱՄ ՎԱՆԱԿԱՆ** – Ամենքն ալ. կըսես, ամենքն ալ և ծովը թափվածները:

**ՔԱՐՏԱՇ** – Ամենքն ալ, թեև հույսերնիս բոլորովին կտրեր էինք. այնպես կատաղի ծով է. ապշած կեցեր էինք ճարահատ. ըսինք՝ հիմա զարնե պիտի ափի ժայռերուն և փշուր-փշուր ընե լաստն ալ, մեջի եղողներն ա: Ես ու իմ Աստվածը, շատ աժան պրծան:

**ԱԴԱՄ ՎԱՆԱԿԱՆ** – Փանոք քեզի, սուրբ Աստվածածին: Իսկ  
նձ էին ծովը թափվածները: Շատերը:

**ՔԱՐՏԱՇ** – Միայն երկուքը, մեր արեղան ու օրիորդը:

**ԱԴԱՄ ՎԱՆԱԿԱՆ** – Օրիորդը... Ինչ օրիորդ:

**ՔԱՐՏԱՇ** – Իշխանին աղջիկը:

**ԱԴԱՄ ՎԱՆԱԿԱՆ** – Վայ, մն ալ իշխանի հետն էր: Է,  
կենդանի է, ուշքը վրան:

**ՔԱՐՏԱՇ** – Այո՛, երևի: Հայրն ու իր մարդիկը տարին  
վանահոր խուցը: Տեսնեիր՝ ինչպէս սփրթներ էր իշխանը:

**ԱԴԱՄ ՎԱՆԱԿԱՆ** – Կատակ է. խեղճը: Բայց ո՞վ կըսեր  
անոնց՝ այս տեսակ եղանակով ծով դուրս գային:

## 2

*Կանրեն Անդրոն, Մովսէս ու Ծերունի վանականները:*

**ՄՈՎՍԵՍ ՎԱՆԱԿԱՆ** – Է, էտքը, էտքը:

**ԱՆՏՈՆ ՎԱՆԱԿԱՆ** – Թո՛ղ, թո՛ղ քիչ մը շունչ քաշեմ: «Ետ-  
քը, ետքը» հարցնելը դյուրին է. ետքը սարսափելի էր: Վայ...  
կարծես թներս ջարդված ըլլան: (Կնստի բարձր քարի մը):

*Հաջորդ պատմության միջոցին. հոն եղողները կնոյրենան  
պատմողին, այլև կուգան քանի մը քանվոր, Ղազար, Դավիթ,  
Զաքարիա վանականները ու կավելանան ունկնդիրներուն:*

**ՄՈՎՍԵՍ ՎԱՆԱԿԱՆ** – Խոսէ՛, խոսէ՛:

**ԾԵՐՈՒՆԻ ՎԱՆԱԿԱՆ** – Թո՛ղ, տղա՛, թո՛ղ որ ուշքի գա:

**ԱՆՏՈՆ ՎԱՆԱԿԱՆ** – (Պահ մը դեմքը կծածկե ձեռքերովը  
և հանկարծ բանալով) Կեսեն արդեն անցեր էինք: Մեյ մը  
վեր կելլեինք ալիքներուն ծայրը, մեյ մը կիջնեինք անդունդը՝  
ամենքն ալ լաստին վրա փակեր էին իրենց տեղը, սփրթներ ու  
չորցեր: Ես ու արեղան կքաշեինք թիերը որքան ուժ ունեինք:  
Կամաց մը գլուխս դարձուցի, տեսա՛՝ կնոտենայինք ափին,

բայց ինչ ափ, ալիքները, որ կուգան ու կզարնեն ժայռերուն, կարծես փրփուրի սար ըլլան դենդ կեցած: Բնչ մեղքս պահեմ, սիրտս հալեցավ, ըսի՝ վերջացավ: Բայց հուսահատ ուժ տվի թիերուս. «Յան Հիսոնս Քրիստոն» ըսի՝ «Պինդ նստեցեք, չվախնաք»: Աս ըսելուս մեյ մըն ալ տեսնեմ ահագին վիթխարի ալիք մը, կարծես հեռուն ցամաքեն փրթեր կուգար շիտակ մեր վրա... (Ուրքի ելլելով): Ալ մնացածը... ալ ինչպես ըսեմ: Գիտեմ միայն, որ լաստը հանկարծ սաստիկ թեքվեցավ, կախ ինկավ անդունդի բաց շրթունքին, հանկարծ սուր ճիչ մը, ու կարծես բան մը փրթավ մեր լաստեն ու սահեցավ այդ փոսը: «Աղջիկս, աղջիկս...»: Բարձրացավ աղմուկ, իրարանցում. ես դեռ հագիվ էի հասկցեր, որ կողքես վեր թռավ արեղան, արագ նետեց վրայեն կապան, ցատկեց ջուրը: Լաստը ուժով ճոճվեցավ, մնացի մեկ թիով, լավ է՝ ալիքը ինքը կքշեր, բայց գիտեի նորեն ետ է գալու: Եվ եթե դուք ժայռերուն վրայեն թոկը ժամանակին չհասցնեիք՝ կորած էինք մենք բոլորս ալ. կես վայրկյան մը ավելի ուշ, կես վայրկյան մը և վերջացավ...

**ԾԵՐՈՒՆԻ ՎԱՆԱԿԱՆ** – Աստծու հրաձգքը:

**ԱԴԱՄ ՎԱՆԱԿԱՆ** – Իսկ օրիորդը:

**ԱՆՏՈՆ ՎԱՆԱԿԱՆ** – (Հպարտ) Մեր արեղան ազատեց:

**ԱԴԱՄ ՎԱՆԱԿԱՆ** – Լողալով:

**ԴԱՎԻԹ ՎԱՆԱԿԱՆ** – Այո՛, լողալով, հանեց ափը:

**ՄՈՎՍԵՍ ՎԱՆԱԿԱՆ** – Միթե արեղան լող տալ գիտեր:

**ԴԱՎԻԹ ՎԱՆԱԿԱՆ** – Ո՞րտեղեն, ո՞վ էր լսեր:

**ՄՈՎՍԵՍ ՎԱՆԱԿԱՆ** – Ուղղակի հրաշք է:

**ԾԵՐՈՒՆԻ ՎԱՆԱԿԱՆ** – Ձեզի կըսեմ՝ Աստծու մատը կա հողտեղ:

**ԱԴԱՄ ՎԱՆԱԿԱՆ** – Բայց աղեկ, ինչո՞ւ ճամփա ելաք այս եղանակով, Անտոն հայր-սուրբ:

**ԱՆՏՈՆ ՎԱՆԱԿԱՆ** – Է՛, այնքան ըսի, համոզեցի, իշխանու-

հի սրբուհին ինքը այնքան խնդրեց, ով է լսողը: Իշխանը հրամայեց, որ մտնեն լաստը: «Եթե կվախնաք, դուք մի գաք»: Այլ ինչպես հակառակեի, ըսի՝ Աստծու կամքը:

**ՄՈՎՍԵՍ ՎԱՆԱԿԱՆ** – Հապա աղջիկը:

**ԱՆՏՈՆ ՎԱՆԱԿԱՆ** – Ան ալ հորը կտորը:

**ԾԵՐՈՒՆԻ ՎԱՆԱԿԱՆ** – Չէ. Տիրամոր կամքն էր ասիկա (*շտրկվելով իր գավազանին վրա և ոգևորված*). նայեցեք, ով է Տիրամոր այս տաճարը կառուցողը. մեր սրբուհի իշխանուհին չէ՞, ով է մեր այս վանքը շեն ու պայծառ պահողը. ով է շիներ մեր այս խուցերը, ով է, որ շարունակ ամեն մեր պետքերուն օգնության է հասեր մեզի, մենք, որ Տիրամոր աղոթող ճորտերս ենք:

**ՁԱՅՆԵՐ** – Իրավ է, իրավ է:

**ՋԱՔԱՐԻԱ ՎԱՆԱԿԱՆ** – Աստված երկար կյանք պարգևե մեր սրբուհի իշխանուհիին:

**ԾԵՐՈՒՆԻ ՎԱՆԱԿԱՆ** – Ա՛ն, որ թողեր է ամեն իշխանական կյանք ու վայելք, իր գավակներն ու իր ապարանքը ու եկեր է Տիրամոր ոտքը, հո՛ն, Ցամաքաբերդի մենության մեջ իր կյանքին վերջին կեսը նվիրելու ճգնության ու աղոթքի:

**ԳԱՎԻԹ ՎԱՆԱԿԱՆ** – Երկար արև մեր բարեպաշտ սրբուհիին:

**ԾԵՐՈՒՆԻ ՎԱՆԱԿԱՆ** – Ա՛յ, Տիրամայրը անո՛ր համար է, որ ցույց տվավ մեզի իր հրաշքը ազատեց ալիքներեն անոր եղբայրն ու այդ աղջիկը: Թող տեսնեն բոլոր թերահավատները ու համոզվին, որ մեր Տիրամայրը երեսե չի ձգեր իր ծառաներն ու իր աղոթողները: Անպակաս ընենք մեր աղոթքները ու թող անպակաս ընե Ան իր օրհնությունը մեր վրայեն, անպակաս ընե մեր սրբուհի իշխանուհիին վրայեն: Փո՛ռք մեր Տիրամոր անունին, փո՛ռք անոր Միածին որդու անունին, հավիտյանս հավիտենից:

**ԽՈՒՄԲԸ** – (Երկյողած) Ամեն:

**ՁԱՅՆԵՐ** – Իշխանը, իշխանը:

### 3

*Իսկոյն խոսքը կրածնովի երկու մասի, կշարվի ու կկենսա խոնարհ:*

*Կնքնեն Իշխանն ու Վանահայրը, քանի մը հեղևորդներ ու վանականներ:*

**ԻՇԽԱՆԸ** – (Ուղիղ դիմելով դեպի շենքը) Ասիկա է ուրեմն քրոջս այնքան սիրած ու փայփայած եկեղեցին: Կոկիկ ու սիրուն տաճար է: (Հեղևորդներուն) Ըսի՛՜ այսօր տեսնեմ պիտի այս եկեղեցին և, այ՛, բոլոր տարերքներուն հակառակ կեցած եմ հիմա հոս ողջ և առողջ:

**ՎԱՆԱՀԱՅՐԸ** – Հանդուգն քայլ էր ըրածդ, իշխան:

**ԻՇԽԱՆԸ** – Ձեր անապատը ուրիշ է, վանահայր, ուրիշ է դուրսը: Դուրսը հանդուգն եղողինն է աշխարհը: Եվ վերջապես մեյ մըն ալ, ո՞վ գիտե, երբ եմ այս կողմերը անցնելու, այնքան գործ ունիմ և զբաղում: Չտեսնեմ անգամ մը քրոջս եկեղեցին, չհամբուրեմ անգամ մը սուրբ սեղանը երթալես առաջ:

**ՎԱՆԱՀԱՅՐԸ** – Վաղը օր չէ՛ր, իշխան:

**ԻՇԽԱՆԸ** – Վա՛ղը, բայց ես այս իրիկուն մեկնելու եմ Ցա-մաքաբերդեն:

**ՎԱՆԱՀԱՅՐԸ** – Ինչ, հիմա նորեն մտադիր ես՝ ծովն անցնիմ:

**ԾԵՐՈՒՆԻ ՎԱՆԱԿԱՆ** – Աստված չեն փորձեր, իշխան:

**ԻՇԽԱՆԸ** – Քանի լիցի: Դեռ քանի ժամ ունինք. հույս ունիմ՝ ծովը կմեղմի:

**ՎԱՆԱՀԱՅՐԸ** – Եթե քեզի չես խնայեր, պետք է խնայես զավակդ:

**ԻՇԽԱՆԸ** – Աղջիկս քաջ է: Քիչիկ մը վախցավ, քիչիկ մըն ալ ձեր Սևանի ջուրեն կուլ տվավ, բան չկա, երիտասարդություն

է, կանցնի: Բայց ինչ որ այսօր տեսավ ու ապրեցավ, այն, ատիկա չի անցնիր: Չէ՞ որ իր պատանեկան հիշատակներուն ահեղ փոթորիկ մը նվիրեցի:

**ԾԵՐՈՒՆԻ ՎԱՆԱԿԱՆ** – Կյանքի հետ չեն խաղար, իշխան:

**ԻՇԽԱՆԸ** – Ատիկա ըսողը դ՞նն ես, ծերո՞ւկ: Այնքան երկար ես ապրեր, որ մոռցեր ես, թե կյանքն ինքը խաղ մըն է միայն:

**ԾԵՐՈՒՆԻ ՎԱՆԱԿԱՆ** – Կյանքը խաչ մըն է, որդի՛ս, որ պիտի կրենք մեր ուսին, մինչև Տերը կանչէ մեզի, Տիրամայրը խնայեց քեզի այս անգամ, բայց այդ մեղքը մյուս անգամ չկրկնես:

**ԻՇԽԱՆԸ** – Եվ շնորհակալ եմ իրմեն, հա՛յր սուրբ, կաշխատիմ պարտքի տակ չմնամ: Եվ հիմա, որ ուխտի եմ եկեր իր տաճարը, չէի ուզեր եկած ըլլամ պարապ ձեռքերով: Կնվիրեմ Տիրամոր այս տաճարին կաղնի դուռ մը բարձրաքանդակ, այլև վարագույր մը ավագ խորանին, որ պիտի ըլլա թավիշ ու ոսկենկար:

**ԾԵՐՈՒՆԻ ՎԱՆԱԿԱՆ** – Օրհնյալ ըլլաս: Ձեր ցեղի անունը անջինջ պիտի մնա այս պատերեն:

**ԻՇԽԱՆԸ** – Նաև պատվիրեր եմ իմ գործակալիս, ամեն տարի, քանի շեն է իմ տունս, տասը չափ սպիտակ ցորեն դրկվի իմ կալերես ձեր անապատը: Վայելքը ձեզի, ձեր սուրբ աղոթքը ծնողներուս ու զավակներուս:

**ՁԱՅՆԵՐ** – (*Խառն*) Աստված օրհնէ ձեր ծնողներուն հիշատակը: Շեն մնա ձեր կալն ու այգին, Աստված պահէ ձեր զավակները, Աստված ավելցնէ ձեր ինչքն ու ստացվածքը:

**ԻՇԽԱՆԸ** – Իսկ հիմա... (*վանահորը*) Ո՞ր է արեղան:

**ՎԱՆԱՀԱՅՐԸ** – Իսկո՞յն, իշխան, ետևեն մարդ եմ դրկեր: Ա՛յ, արդեն:



*Կմարնե Աբեղան Միմոն վանականի ու դպիրի մը ընկերակցությամբ: Աբեղան մոռայ է. դեմքը անշարժ, աչքերը միշտ գեպին, տեսակ մը անկամբ:*

**ԻՇԽԱՆԸ** – (Քիչ մը դիտելեն ետքը) Ինչ գեղեցիկ տղա ես դուն և ինչ երիտասարդ:

**ՎԱՆԱՀԱՅՐԸ** – Միաբանությանս մեջ կրտսերն է, իշխան:

**ԻՇԽԱՆԸ** – Է, վրադ պիտի չըլլար այդ սև վերարկուն, և ես գիտեի իմ ընելիքս: Քեզի կուտայի իմ տակիս նժույգը, կուտայի քեզի, այ իմ սեփական սուրս, որ երեսուն տարի ծառայեր է ինձի հավատարիմ, և կառնեի քեզի իմ պալատս, իբրև իմ հարազատ որդիս: Իմ սև նժույգս քու այդ կերպարանքիդ աղվոր պիտի վայլեր, իսկ ձեռքդ, կտեսնեմ, շուտով պիտի սորվեր սուրիս: Ձիս ու սուրս թե հերիք չեկավ, կուտայի քեզի և աղջիկս...

**ՎԱՆԱՀԱՅՐԸ** – Իշխան:

**ԻՇԽԱՆԸ** – ...Որուն կյանքը այսօր ազատեցիր: Անիկա արդեն քունը կըլլար ըստ օրինի: Դուրսը աշխարհին մեջ՝ ով ինչ վերցուց, վերցունց:

**ՎԱՆԱՀԱՅՐԸ** – Իշխան:

**ԻՇԽԱՆԸ** – Գիտեմ, գիտեմ, այս սուրբ մենաստանին մեջ այս խոսքերուն տեղը չէ: Բայց ինչ ընեմ, կուզեի բան մը տամ, կուզեի բան մը ընեմ, կուզեի բանով մը երախտագետ ըլլամ այս անձնվեր, այս քաջ կտրիճին: Ափսո՛ս, այդ սև վերարկուն կկաշկանդե իմ թևերս: (Մոտենալով արեղային) Տղանս, քու իշխանդ քու առջևդ շատ աղքատ է ու շատ անզոր քեզի փոխարեն մը ընելու, ինչ որ ըսել կրնամ՝ հոս ներելի չէ, ինչ որ տալ կրնամ՝ քեզի պետքը չէ:

**ՎԱՆԱՀԱՅՐԸ** – Մեզի պետք է քու ու զավկիդ երկար արևը:

**ԻՇԽԱՆԸ** – Աղէկ. ես քեզի պարտական մնացի, աղվոր

զգացում չէ, ես սովոր չեմ եղեր պարտական մնալու: Ինչևէ, տո՛ւր ձեռքդ, տե՛ն իմինս, ասիկա երբեք տկար չէ եղած մեր թշնամիներուն դեմ ու երբեք ալ անարդար գործ չէ տեսած, արժանի է, որ սեղմես այդ քու ձեռքովդ, որ այսօր ազատեց աղջիկս ալիքներեն: (*Պինդ կսեղմե արեղային ձեռքը*): Մտնենք, վանահայր, տաճարին ներսը:

*Իշխանը, վանահայրը, հեղուորդները և վանականներեն շարերը կմտնեն եկեղեցի:*

**ՍԻՄՈՆ ՎԱՆԱԿԱՆ** – (*Կամաց մը բռնելով Արեղայի թևեն*)  
Երթանք, մենք ալ երթանք ու քիչ մը հանգստացիր: Դեռ դժգույն ես բոլորովին, և կզգամ մարմինդ, որ դեռ կդողա:

*Կես մը գրկած կրանի դուրս:*

## 5

**ՂԱԶԱՐ ՎԱՆԱԿԱՆ** – (*Մոտենալով Ադամ վանականին, խորհրդավոր կերպով*) Հիմա ճորքան ժամանակ պետք է ապաշխարե արեղան, որ տաճարին մուտքը բացվի իրեն համար:

**ԱԴԱՄ ՎԱՆԱԿԱՆ** – Ապաշխարե՛. ինչո՞ւ համար,

**ՂԱԶԱՐ ՎԱՆԱԿԱՆ** – Չէ՞ որ ձեռք է տվեր կնկա:

**ԱԴԱՄ ՎԱՆԱԿԱՆ** – Բայց... բայց այս տեսակ դեպք...

**ՂԱԶԱՐ ՎԱՆԱԿԱՆ** – Ատիկա միևնույնն է, մեղքը մեղք է միշտ: (*Ավելի խորհրդավոր*) Ես տեսա, երբ իրարու փաթթված դուրս ելան ալիքներուն մեջեն: Իշխանին մարդիկը գրեթե բռնի խլեցին աղջիկը անոր թևերուն մեջեն:

**ԱԴԱՄ ՎԱՆԱԿԱՆ** – (*Չայրոյթով*) Անմիտ բաներ կխոսիս:

# ԵՐՐՈՐԴ ՏԵՍԱՐԱՆ

## ԱԲԵՂԱՅԻՆ ԽՈՒՅՐ. ԳԻՇԵՐ

*Ցած ու փոքր սենյակ մը, պատերը անգաջ քար: Ճակատը քախտակալ պարզ մահճակալ, վրան փոված է փոստ մը, չոր ու կարծր բարձ մը, իսկ կոշի ծածկոցը կիսովին ինկած է գեպին:*

*Սենյակին մեջքեղը հին կարպետի կտորի մը վրա ցածիկ ու լայն գրակալը, գրակալի վրան ալ մեծ ու բաց ձեռագիր մը:*

*Սենյակին մեկ կողմը փայտե կուպիտ սեղան, վրան փայտե սև խաչ մը, կավե փարջ մը և յոդի ճրագը, որ կալալա: Մյուս կողմը սենյակի մուտքն է:*

*Մահճակալին գլուխը պատեն կախված է Աբեղայի վերարկուն:*

### 1

*Աբեղան նստած է, մահճակալին ծայրը, ձեռքերը կրծքին ծալած և աչքերը շեշտ հառած գեպին: Անոր քովը փայտե ցած աթոռակի մը վրա նստած է Կոյր վանականը, շիրակ, անշարժ, երկու ձեռքը գավազանին ու գլուխը բարձր պահած:*

**ԿՈՒՅՐ ՎԱՆԱԿԱՆ** – Ո՞ր ե՛ն մտքերդ, արեղա՛:

**ԱԲԵՂԱՆ** – (Կցնցվի ու կբարձրացնե գլուխը):

**ԿՈՒՅՐԸ** – Նորե՛ն, նորե՛ն:

**ԱԲԵՂԱՆ** – Այո՛, այո՛, մեղք է. գիտե՛մ, մեծ մեղք: Ո՛չ, ա՛լ չեմ մտածելու, ալ պետք չէ մտածեմ. երբեք, երբեք. պետք է ջնջեմ գլխես այսօրը, բոլորը, բոլորը, ծովը, հովը, լաստ, ալիք... ա՛խ, այդ ալիքները... (Հանկարծ վեր կթռչի թափով) Բայց ինչ հրաշալի բան է եղեր կովիլը անոնց հետ, երբ անոնք իրենց լույծ կուրծքը դեմ կուտան քեզի, երբ իրենց փրփուրը կգարնեն երեսիդ ու աչքերուդ, որ կուրցնեն քեզի. մեկը կցատկե ուսիդ, մյուսը կգալարի լանջիդ. մեկը կհրե, մյուսը կքաշե, կճնշե, ու

բոլորը, բոլորը ընկճել կուզեն քեզի, իսկ դուն միշտ երեսին, անոնց ելևէջքին հետ կտարուբերիս՝ բազկիդ զարկերուն տակ անոնց բոլոր ձիգերը հաղթահարելով. ան, այդ կռիվը...

**ԿՈՒՅՐԸ** – Կռիվը կյանքի համար է, արեղան, հոս անապատ է:

**ԱԲԵՂԱՆ** – *(Կոտորված)* Այո՛, անապատ: Մեղան քեզ, Աստված իմ, մեղան:

**ԿՈՒՅՐԸ** – Զգո՛ւյշ: Լավ հսկե ինքզինքիդ, արեղան, աղոթե՛:

**ԱԲԵՂԱՆ** – *(Խաչին առջև, ծունր իջնելով)* Ես կորսված մեղավոր մըն եմ, փրկե ինձի, Տեր. ես ինկած հանցավոր մըն եմ, օգնե ինձի, Տեր, մեղքի մեջ խեղդվող մըն եմ, բռնե ձեռքես, Տեր: Տես, մեղքի ծովուն մեջ... մեղքի ծովուն մեջ... ծովուն... ծովուն... *(Երկու ձեռքով դեմքը բռնած կեղև ուրթի):*

**ԿՈՒՅՐԸ** – Ըսե՛, ըսե՛:

**ԱԲԵՂԱՆ** – *(Հանկարծ դեմքը կբանա ու շեշտ կնայի անոր արձանի նման անշարժ դեմքին):*

**ԿՈՒՅՐԸ** – Ըսե՛, ըսե՛,

**ԱԲԵՂԱՆ** – Ըսե՛մ... ի՞նչը:

**ԿՈՒՅՐԸ** – Ան, ինչ որ հող խորքը, խորքը:

**ԱԲԵՂԱՆ** – Խորքը, խորքը...

**ԿՈՒՅՐԸ** – Ըսե՛, ըսե՛:

**ԱԲԵՂԱՆ** – Ո՛վ կրնա տեսներ այդքան խորքերը, ո՛վ կրնա ըսեր այդքան խորքերը:

**ԿՈՒՅՐԸ** – Իսկ ես կտեսնե՛մ, ես կըսե՛մ:

**ԱԲԵՂԱՆ** – Դո՛ւն, կո՛ւյր: *(Երգիծանքով)* Հապա ըսե՛, նայիմ, ինչ որ կտեսնես:

**ԿՈՒՅՐԸ** – *(Հայտիկ-հայտիկ)* Լաստին վրա, երբ ձեռքիդ թին ջուրը կպատռեր, ով էր հոգիիդ մեջ:

**ԱԲԵՂԱՆ** – *(Վախցած)* Լռե՛:

**ԿՈՒՅՐԸ** – Որո՞ն համար այնպես կթալրտար սիրտդ. շրթուն-

քիդ ինչ բառ էր փակած, երբ շուրջդ ամենքը Աստված կկանչեին, երբ դեմդ փոթորիկն էր, որ կծառանար:

**ԱԲԵՂԱՆ** – (*Սարսափահար*) Երևեկ բաց ըլլային աչքերդ, որ չտեսնեիր, չտեսնեիր...

**ԿՈՒՅՐԸ** – Երբ բոլոր հայացքները երկինք էին վերացած, երբ ամենքը կսպասեին վերին օգնության, ո՞ր էին սևեռած քո՞ւ աչքերդ. ո՞վ էր ան, որուն առջևը հոգիդ ծունր էր իջած:

**ԱԲԵՂԱՆ** – Լռե՛, լռե՛. դուն իրավունք չունիս ամեն բան տեսնելու, կարելի չէ ամեն բան տեսնել:

**ԿՈՒՅՐԸ** – (*Անողորմ*) Ըսե՛, ինչ էր ուզածդ, ինչ կփնտրեիր:

**ԱԲԵՂԱՆ** – (*Աղերսով*) Չգիտեմ, ոչինչ չգիտեմ, հերիք ե:

**ԿՈՒՅՐԸ** – Իսկ ծովուն մեջ, երբ ան օձի սը պես վզիդ փաթթված, մարմինը մարմնիդ ու շունչը շնչիդ, երբ դուն ամեն ինչ մոռցած ալիքները կպատռեիր, ըսե՛, նորե՞ն չգիտես, թե ինչ կուզեիր:

**ԱԲԵՂԱՆ** – (*Երազկույր*) Ո՛չ, կհիշեմ: Կհիշեմ, ամբողջ էությանմբ կցանկայի, որ ալ վերջ չունենար այդ թաց ճամփան, ալ վերջ չունենար այդ վայրկյանը:

**ԿՈՒՅՐԸ** – Ամբարի՛շտ:

**ԱԲԵՂԱՆ** – (*Խորփակված*): Բայց ունեցավ իր վերջը:

**ԿՈՒՅՐԸ** – Ու հասար ափը: Եվ երբ առին քու բեռդ թևերեդ, ու դուն ուժասպառ ինկար ավազին, արդեն դիակ սըն էիր անկենդան:

**ԱԲԵՂԱՆ** – Ճշմարիտ է. ինձի այդպես զգացի:

**ԿՈՒՅՐԸ** – Դիակ սըն ես դուն և հիմա: Մարմին սը, ուրկե ելեր է Աստծու շունչը:

**ԱԲԵՂԱՆ** – Ա՛խ, Աստված իմ, կորուսի հոգիս:

**ԿՈՒՅՐԸ** – (*Ողբի ելլնելով*) Ինկիր գետին ու կոծե՛. քուրծ հագիր ու ապաշխարե՛, իսկ ամենեն առաջ գնա իսկույն վանահոր մոտ ու խոստովանե՛:

**ԱՔԵՂԱՆ** – Խոստովանիմ, վանահորը, ինչը, ինչո՞ւ: Ա՛, ամեն, ամեն բան, բայց այդ մեկը երբեք: Երբեք: Եվ դուն ալ, հայր սուրբ չըլլա, թե...

**ԿՈՒՅՐԸ** – Ես կույր եմ, խուլ ու համր, բայց գնա՛ ինքդ վանահոր մոտ ու ինքնակամ խոստովանե՛:

**ԱՔԵՂԱՆ** – *(Կտրուկ)* Վանահորը երբեք:

**ԿՈՒՅՐԸ** – Կվախնամ:

**ԱՔԵՂԱՆ** – Ո՛չ, Բայց... բայց...

**ԿՈՒՅՐԸ** – Իհարկե, դուն կուզեիր պահես թաքուն սրտիդ մեկ հեռավոր խորշին մեջ քու այդ փոքրիկ նոր սրբությունդ, պահես և երկրպագես ծածուկ:

**ԱՔԵՂԱՆ** – Գթա՛, գթա՛ ինձի, անողո՛ք:

**ԿՈՒՅՐԸ** – Իսկ դուն քեզի կգթամ, կռապա՛շտ, հիշե պատվիրանը. «Մի՛ եղիցին քեզ այլ Աստուած բաց յինէն»:

**ԱՔԵՂԱՆ** – *(Կակազելով)* Մի՛ եղիցին... մի՛ եղիցին...

**ԿՈՒՅՐԸ** – *(Շեշտելով)* «Մի՛ արասցես քեզ կուռս ըստ ամենայն նմանութեան որ ինչ յերկինս ի վեր է և որ ինչ յերկրի ի խոնարհ և որ ինչ ի ջուրս ի ներքոյ յերկրի...»:

**ԱՔԵՂԱՆ** – *(Դողողոյց)* «Եվ որ ինչ ի ջուրս ի ներքոյ յերկրի»:

**ԿՈՒՅՐԸ** – *(Կամաց-կամաց երթալով դուռը)* «Զի ես եմ տէր Աստուած քո, Աստուած նախանձոտ, որ հատուցանեմ զմեղս յերիս և ի չորիս...»: *(Դուրս):*

## 2

**ԱՔԵՂԱՆ** – *(Կերթա ծունկի կուգա խաչելության առջև բազկատարած ու ջերմեռանդ)* «Կեցո՛ զիս, Աստուած, զի հասին ջուրք յանձն իմ, ընկայ ես ի խորս անդնդոց, ուր ոչ գոյ ինձ հանգիստ: Եկի ես ի խորս... ի խորս... ծովու... և շրջանք... ընկղմեցին զիս...» *(Քիչ-քիչ կթուլնա, կնարի ծունկերուն և գլուխը կկախե կրծքին):*

Խաչն ու սեղանը կամաց կսկսի մշուշապարիլ, ամեն ինչ կխառնի իրարու, և այդ մշուշի ֆոնին վրա հետզհետե կպարզվի աղջկան կերպարանքը: Ամբողջապես սպիտակ հագած, հագուստը պարզ, նուրբ ու ձիգ, կարծես ջրեն հանած. մազերը արձակ, խոնավ ու վրան մեկ-երկու թել ծովու խոտ:

Արեղան թեթև մը գլուխը կրարձրացնե, հանկարծ կրեսնե ու սարսափահար կցարկե ոտքի:

**ԱԲԵՂԱՆ** – (Ետ-ետ երթալով) Դո՛ն... դո՛ն...

**ԱՂԶԻԿԸ** – Այո՛, ես. միթե չէի՞ր սպասեր:

**ԱԲԵՂԱՆ** – Աստված իմ:

**ԱՂԶԻԿԸ** – Մինամկ ես:

**ԱԲԵՂԱՆ** – Ես... ես մինակ եմ միշտ:

**ԱՂԶԻԿԸ** – Ա՛յ, եկա քեզի ընկեր, և եկա այսպես կեսգիշերին, որ մինակ ըլլանք ես ու դուն: Դո՛ն, իմ քաջս, իմ արևս, իմ լուղորդս...

**ԱԲԵՂԱՆ** – Հերիք է:

**ԱՂԶԻԿԸ** – Ինչո՛ւ: Չէ՞ որ ես քեզմով է, որ հիմա կապրիմ, չէ՞ որ դո՛ն նորեն կյանքս տվիր ինձի. և ի՛նչ քաղցր է այդ կյանքը, որ դուն տվիր ինձի: Այս քանի՛, քանի՛ տարի ապրեք եմ ես, ամբողջ տասնյոթը տարի, և ես չգիտեի, բնավ չգիտեի, որ չէի ապրեր: Միտքդ է ցերեկը. հո՛ն, ալիքներուն մեջ. նայե՛, մազերս խոնավ են դեռ, բռնե՛, բռնե՛, շոշափե՛:

**ԱԲԵՂԱՆ** – (Ետ-ետ կերթա հասիշտակված՝ աղջկան նայելով):

**ԱՂԶԻԿԸ** – Բայց գիտե՛ս՝ ի՛նչ ուժեղ թևեր ունիս և ինչպե՛ս ձկուն, իսկ ես դեռ այնպես հուզված եմ, դեռ այնպես հոգնած: (Կուզե նստի արեղայի անկողնին):

**ԱԲԵՂԱՆ** – (Արգիլել ուզելով) Օրիորդ:

**ԱՂԶԻԿԸ** – (Կնստի անկողնին ծայրը) Ես օրիորդ եմ ծառաներու համար, ես օրիորդ եմ մեր հպատակներուն համար.

ին տերս ինծի այլ կերպ պիտի կանչե:

**ԱԲԵՂԱՆ** – Սեդա:

**ԱՂԶԻԿԸ** – Վայ, դուն գիտես անունս:

**ԱԲԵՂԱՆ** – Հայրդ քեզի այդպես կանչեց:

**ԱՂԶԻԿԸ** – Այո, Սեդա է անունս: Իսկ ի՞նչ է քու անունդ:

**ԱԲԵՂԱՆ** – Ինծի արեղա կկանչեն:

**ԱՂԶԻԿԸ** – Իսկ առաջ, առաջ, երբ դուն աշխարհն էիր դեռ

ու աշխարհինը:

**ԱԲԵՂԱՆ** – Իմ աշխարհքս վանքն է եղեր միշտ, քանի խելքս կհասնի:

**ԱՂԶԻԿԸ** – Ասիկա՛: Ա՛, ի՞նչ սառն է հոս, ինչպե՛ս կմրսիմ:

**ԱԲԵՂԱՆ** – Կմրսի՛ս:

**ԱՂԶԻԿԸ** – Բան մը տուր վրաս, որ հոգիս տաքնա:

**ԱԲԵՂԱՆ** – Ես ոչինչ չունիմ:

**ԱՂԶԻԿԸ** – *(Առանց գլուխը դարձնելու, երևը պատեն կախված վերարկուն մարաննիշ ընելով)* Ա՛լ:

**ԱԲԵՂԱՆ** – Վերարկո՛ւս:

**ԱՂԶԻԿԸ** – Ինչպե՛ս կմրսիմ:

**ԱԲԵՂԱՆ** – Վերարկո՛ւս:

**ԱՂԶԻԿԸ** – Կվարանի՛ս: Բայց չվարանեցար կյանքդ ինծի տալու, չվարանեցար, երբ ետևես կատղած ալիքներուն մեջը նետեցիր քեզի:

**ԱԲԵՂԱՆ** – Ո՛չ, չվարանեցա: Ան ուրիշ էր:

**ԱՂԶԻԿԸ** – Այո, ան ուրիշ էր: Հոն կռիվ էր ու փոթորիկ, իսկ հոս լուռ է ու խաղաղ, ինչպես գերեզման: Ա՛, ի՞նչ սառն է հոս, ինչպե՛ս կմրսիմ: *(Կելլե ոտքի):*

**ԱԲԵՂԱՆ** – *(Կվազե դեպի վերարկուն, ձեռքը կերկարե ու նորեն վարանած կանգ կառնե):*

**ԱՂԶԻԿԸ** – *(Խնդրանքով)* Բե՛ր, բե՛ր...

*Արեղան հանկարծ կիսե վերարկուն ու կդառնա դեպի*



աղջիկը, որ արդեն աներևոյթ է եղած: Արեղան կմնա քարացած, վերարկուն բռնած ձեռքը առաջ պարզած:

#### 4

Դուրսեն կլավի ժամկոչին ձայնը, որ մելամաղձոյր ու միալար երգով մը ժամ կկանչէ: Ձայնը հեղզհեղեղ կմտրենա: Արեղայի ձեռքեն կիյնա վերարկուն:

**ԱԲԵՂԱՆ** – (Շրթոնքներուն մեջեն) Հիսուս... (Կուզէ նորեն չոքի խաչին դէմը, որ խելառի պես ետ կցարկէ): Ո՛չ, ո՛չ: Եթէ հանկարծ նորէն երևնա... (Դեմքը կշրջէ անկողնին կողմը) Ա՛խ, Աստվածս երես դարձուց ինձմէ: (Հեծկլտանքով կիյնա մահճակալին ոտքը ու դեմքը կըթաղէ անկողնին մեջ):

Դուրսեն կլավի միշտ ժամկոչին երգը, որ հեղզհեղեղ հեռու ու հեռու, կթուրանա, կնվաղի ու կհալի:

# ԵՐԿՐՈՐԴ ԱՐԱՐ

## ԱՌԱՋԻՆ ՏԵՍԱՐԱՆ

### ԱՂԲՅՈՒՐԻ ԳԼՈՒԽԸ

#### ՀԻՆԱՎՈՒՐՅ ՎԻԹԽԱՐԻ ԾԱՌԻ ՄԸ ՍՏՎԵՐԻՆ ՏԱԿ

*Ծերունի վանականը նստած է ծառին տակը փայտե նստարանին ու քուն կերևա: Աղբյուրին մոտիկ խմբված են Ղազար, Մովսես, Դավիթ ու Զաքարիա վանականները և տիրացուն. կիսոսին փափսոսքով ու անհանգիստ: Անոնց քովը կեցած է Աբեղան, աչքերը գեղին ու կլսե:*

**ՄՈՎՍԵՍ ՎԱՆԱԿԱՆ** – Իրավ է, նորէն:

**ՏԻՐԱՅՈՒՆ** – Ցատկեր է անկողնին վրա, նստեր է կոկորդին ու սկսեր է խեղդել:

**ՄՈՎՍԵՍ ՎԱՆԱԿԱՆ** – Հիսուս–Քրիստոս:

**ՏԻՐԱՅՈՒՆ** – Խեղճը հագիվ է շունչը ազատեր:

**ԴԱՎԻԹ ՎԱՆԱԿԱՆ** – Ինչ հակառակեր է չարը հայր Բարսեղին, աս քանի՞երորդ անգամն է:

**ԶԱԲԱՐԻԱ ՎԱՆԱԿԱՆ** – Ինչ կերպարանքով է եղեր:

**ՏԻՐԱՅՈՒՆ** – Չգիտեմ, Ըսավ միայն, որ ծծումբի ծուխին պես բարձրացեր է ու առաստաղի գերաններուն մեջեն կորսվեր է դուրս:

**ՄՈՎՍԵՍ ՎԱՆԱԿԱՆ** – Անիծվածը: Նզովվի ինքն ալ, իր կերպարանքն ալ:

**ՏԻՐԱՅՈՒՆ** – Ա՛, սարսափելի է, ազատում չկա իր ճանկերեն:

**ԴԱՎԻԹ ՎԱՆԱԿԱՆ** – Գիշերները մինչև չնայիմ անկողնիս տակն ու ետևը՝ ես երբեք պառկիլ չեմ կրնար:

**ՄՈՎՍԵՍ ՎԱՆԱԿԱՆ** – Ես ալ: Անցած իրիկուն մտնեմ խուցս

ու ի՞նչ տեսնեմ, գորշ սավանին մեջ փաթթված կնկան մը պես կկզեր է անկյունը. լեղիս պատռեցավ. իսկույն խաչ հանեցի, աներևութացավ:

**ՂԱԶԱՐ ՎԱՆԱԿԱՆ** – Հւմ, այդ նգովից–արմատները կուգան կնկա կերպարանքով, կուգան խմբերով ու ալ ինչէր ըսես չեն ըներ, ինչ խայտառակություններ, ինչ գայթակղություն...

**ԶԱԲԱՐԻԱ ՎԱՆԱԿԱՆ** – Իսկ ինծի կերևնան միշտ մեր գյուղացիներու կերպարանքով: Գինեպան Ուսեփը, մեր դրացի Գափոն, շվի փչող կույր Ակոբը, տեղ գարնող Մինասը: Կուգան կհավաքվին գլխուս, ձեռքերին գինի, օղի, ուտելիքներ, խորոված: Խաշվի անմահական հոտը կլեցնե խուցս, կարծես ամբողջ բակը լեցվեր են ու մատաղ կեփեն: Ալ ինչ հրամմեներ, ինչ խնդիրք, ինչ համոզել, որ անպատճառ ուտեմ: Եվ մինչև Տիրամոր անունը չի տամ, չեն չքանար չիքդառնալիքները:

**ՄՈՎՍԵՍ ՎԱՆԱԿԱՆ** – Պատիժ է, պատիժ: Ինչո՞ւ կտանջես մեզի, Փրկի՛չ:

**ԶԱԲԱՐԻԱ ՎԱՆԱԿԱՆ**– Հակառակի պես ալ, կարծես, մտքես կգողնան Տիրամոր անունը. կփնտրեմ, կփնտրեմ, հւմ, հւմ, լեզվիս ծայրն է, բայց չեմ կրնար ըսել՝ «Սուրբ կույս Մարիամ»:

**ՏԻՐԱՅՈՒՆ** – Ա՛խ, ո՞ր փախչի մարդ այդ գարշելիներուն ձեռքեն: Ո՞ր փախչիս, ինչպես փախչիս:

**ՄՈՎՍԵՍ ՎԱՆԱԿԱՆ** – Եվ ինչ կուզեն մեզմե, և անպատճառ մեզմե:

**ԴԱՎԻԹ ՎԱՆԱԿԱՆ** – Անապատ եկողը եկեր է սատանայեն փորձվելու, ինչպես որ ինքը Տերն մեր Հիսուս Քրիստոս:

**ՄՈՎՍԵՍ ՎԱՆԱԿԱՆ** – Հիսուս Քրիստոս ըլլա մեր գորավիգը:

**ԽՈՒՄԲԸ** – Հիսուս Քրիստոս:

**ՏԻՐԱՑՈՒՆ** – Եվ ամեն տեղ են, ամեն տեղ, ուր ալ որ երթաս: Ա՛յ, ինչ գիտեք, որ հիմա մեկը նստած չի հոն, մեր ետևը: (*Տեղը կփոխես*): Կամ հոն, քարափին ծերպերուն մեջը, կամ մեր վրան, այ, սաղարթներուն մութին մեջ: Կտեսնե՞ք... կտեսնե՞ք... մեկը հոն այն մութին խորքը... կշարժվի, մեկն ալ հոն, այ, աղբյուրին ակնեն, նայե՛, նայե՛, ինտո՛ր կքչքչա... (*Սարսափած եա-եպ քաշվելով աղբյուրեն*) Հիսո՛ւ Քրիստոս, Հիսո՛ւ Քրիստոս: (*Դեմ-դեմի կուգա վանահոր հետ*):

## 2

**ՎԱՆԱՀԱՅՐԸ** – (*Խոժոռ*) Ի՞նչ կա, ինչո՞ւ ես վախցեր, տիրացո՛ւ:

**ՏԻՐԱՑՈՒՆ** – Հայր սուրբ... (Կիյնա վանահոր ոտքերը):

**ՄՈՎՍԵՍ ՎԱՆԱԿԱՆ** – Վանահայր, չարը հանգիստ չի տար մեզի:

**ՂԱԶԱՐ ՎԱՆԱԿԱՆ** – Ուժեղ է խարդավանանքը չարին:

**ՎԱՆԱՀԱՅՐԸ** – (*Զգվանքով*) Դեռ միշտ այդ հին դևն՝ կխոսիք ինձի: (*Բարկացած*) Ոտքի՛ ելիր, տիրացո՛ւ:

**ՏԻՐԱՑՈՒՆ** – (*Դեմքը ծածկած կելլե ոտքի*):

**ՎԱՆԱՀԱՅՐԸ** – (*Քիչ մը լուռ կնայի անոր, վերջը մյասներուն ու հասրիկ-հասրիկ*) Չարեն թող վախնա ան, ով չէ տիրեր իր մարմնին ու բնագոյներուն. սատանայի իշխանությունը բնագոյներու վրա է միայն:

**ԾԵՐՈՒՆԻ ՎԱՆԱԿԱՆ** – Իսկ ան ո՞վ է, վանահայր, որ տիրեր է իր մարմնին ու բնագոյներուն:

**ՎԱՆԱՀԱՅՐԸ** – (*Հպարտ*) Ա՛ն, ով եկեր է այս անապատը, ծերունի՛:

**ԾԵՐՈՒՆԻ ՎԱՆԱԿԱՆ** – Մենք մարդ ենք ամենքս ալ, վանահայր:

**ՎԱՆԱՀԱՅՐԸ** – Ո՛չ, հայր սուրբ, ով եկեր է հոս ինձի հետ իմ անապատս, պետք է ավելի վեր ըլլա, քան մարդը: Իսկ չարեն թող վախնա ան, ով չէ կտրեր իր բոլոր շղթաները աշխարհքին հետ, իր անցյալին հետ, իր հուշերուն հետ, վշտերուն, իր ուրախություններուն:

**ԾԵՐՈՒՆԻ ՎԱՆԱԿԱՆ** – Իսկ ան ո՞վ է, վանահայր, որ կրցեր է կտրել այդ բոլոր շղթաները:

**ՎԱՆԱՀԱՅՐԸ** – *(Հպարտ)* Ա՛ն, ով եկեր է այս անապատը, ծերունի:

**ԾԵՐՈՒՆԻ ՎԱՆԱԿԱՆ** – Մենք մարդ ենք ամենքս ալ, վանահայր:

**ՎԱՆԱՀԱՅՐԸ** – Ով մարդ է ու միայն մարդ՝ անիկա աշխարհիին է ու թող դառնա աշխարհին. ահա՛ պատրաստ է հայր Անտոնին լաստը: Ես չկանչեցի ձեզի հոս, որ հավաքվիք ու դևերեն սարսափիք: *(Ոգևորված կբարձրացնէ կրծքեն կախված պարզ խաչը)* Հո՛ս Տիրոջ խաչն է, հոս դևեր չկան:

**ԲՈԼՈՐԸ** – *(Ջերմեռանդ խաչ կհանեն):*

**ՎԱՆԱՀԱՅՐԸ** – Հոս կրքեր չկան, հոս բնագոյներ չկան, հոս սուրբ հոգին է միայն, հոս միտքն է միայն, վեր խոյացող միտքը դեպի ճշմարտությունը, դեպի Աստված: Այս մեկը աղէկ հասկցեք ու սատանաները թողեք աշխարհին: Դե՛, երթաք խաղաղությամբ, և Տերը ըլլա ձեզի բոլորիդ հետ:

**ԲՈԼՈՐԸ** – Ամէն *(Կցրվին):*

### 3

*Վանահայրը կեցած է մինակ. կնայի անոնց երևեն փխոր գլուխը շարելով, երբ քովեն կամաց մը կմոտենա Աբեղան, կծռի, զգույշ կբարձրացնէ Վանահոր փեշը ու կհամբուրէ:*

**ՎԱՆԱՀԱՅՐԸ** – *(Հանկարծ կզգա ու կդառնա ետ)* Բ՛նչ կընես, որդիս, ի՛նչ կընես:

**ԱՔԵՂԱՆ** – Հայր:

**ՎԱՆԱՀԱՅԻՐԸ** – Ինչ կուզես, որդիս, ինչ ունիս:

**ԱՔԵՂԱՆ** – Որքան բարձր ես դուն, հայր. որքան, որքան, բարձր:

**ՎԱՆԱՀԱՅԻՐԸ** – Բարձր կձգտի՞նք մենք բոլորս, որդյակ:

**ԱՔԵՂԱՆ** – *(Արհամարհոյ)* Ա՛, բոլորս: Քու ձայնդ ինձի կարծես երկնքեն կուզա, հեռուն, հեռուն, վերեն: Է, մենք բոլորս: Քանի խելքս կհասնի՝ եղեր եմ քու թևիդ տակը, քու խրատներուդ, քու օրինակիդ. և եղավ ժամանակ մը, երբ կարծեցի, թե ես ալ հասնելու եմ այդ բարձունքները...

**ՎԱՆԱՀԱՅԻՐԸ** – Իսկ հիմա՞, որդիս:

**ԱՔԵՂԱՆ** – Հիմա... հիմա... *(Կտրուկ)* Ես քու որոնած վերիններեն չեմ, հայր:

**ՎԱՆԱՀԱՅԻՐԸ** – Ինչէր կխոսիս, տղան, կբամբասես ինքդ քեզի, դո՛ւն, իմ ընտրյալս, դո՛ւն, որ այս ամենուն մեջ ամենեն ավելի վեր սավառնողն ես եղեր:

**ԱՔԵՂԱՆ** – Սավառնողը... գուցե՛, երբ թևերս ազատ էին ու թեթև:

**ՎԱՆԱՀԱՅԻՐԸ** – Է, հիմա ինչ եղան թևերդ:

**ԱՔԵՂԱՆ** – Հիմա... հիմա թևերս թռչվեցան, հայր:

**ՎԱՆԱՀԱՅԻՐԸ** – Թռչվեցան:

**ԱՔԵՂԱՆ** – *(Խորհրդավոր ու մոտենալով)* Հիմա ես ալ կվախնամ, հայր:

**ՎԱՆԱՀԱՅԻՐԸ** – Կվախնամ, դո՛ւն ալ, սատանայե՛ն:

**ԱՔԵՂԱՆ** – Սատանա՞մ, ո՛չ. ոչ սատանայեն:

**ՎԱՆԱՀԱՅԻՐԸ** – Հապա՞:

**ԱՔԵՂԱՆ** – Ես... ես կվախնամ... ծովեն:

**ՎԱՆԱՀԱՅԻՐԸ** – Ծովեն:

**ԱՔԵՂԱՆ** – Ծովեն: Հոն ալիքներ կան, փոթորիկ և՛ հուզում. և՛ կռիվ և՛ ... և... ամեն ինչ:

**ՎԱՆԱՀԱՅՐԸ** – Կհասկնամ, որդյակ, անցած օրվան դեպքը  
ցնցեր է հոգիդ, կանցնի, ինչ կապ քու ու ծովուն մեջ: Թարմ է  
սիրտդ, գթոտ ու կարեկից ու ազատեցիր քեզի նման մանուկ  
էակ մը մահեն. օրինյալ ըլլաս:

**ԱՔԵՂԱՆ** – Բայց այդ օրեն, հայր, ինձի կթվի թե ծովը...  
ծովը սիրտն է բնության:

**ՎԱՆԱՀԱՅՐԸ** – *(Շեշտ կդիպե Աքեղան ու քիչ մը խիստ)*  
Դուն նայե երկինք, որդի. երկինքը միտքն է բնության, խոր  
ու խաղաղ:

**ԱՔԵՂԱՆ** – Այո՛, խոր ու խաղաղ, երբ ծավի պայծառ է  
երկինքը, իսկ իմ ստքերս ավելի կնմանին թխպոտ օրերուն,  
երբ հոն ալ ամեն բան պղտոր է ու խառնակ: *(Կտրուկած)* Ես  
քու որոնած վերիններեն չեմ, հայր:

**ՎԱՆԱՀԱՅՐԸ** – Ատիկա ըսողը դո՛ն էս, արեղա՛: Դո՛ն, որ  
եմ հպարտությունս ես եղեր, որուն հոգին ես եմ խմորեր,  
որուն մեջ իմ ամենաթանկագին մտածումներս եմ դրեր,  
իմ սեփական հոգիս եմ դրեր, և որ ինձմե ետքը իմ գործիս  
շարունակողն է ըլլալու: Համեստությունը ես կսիրեմ, արեղա,  
բայց իմ ժառանգս եղողի մը բերնեն ավելի խոյանք ունեցող  
խոսքեր կուզեի լսեմ:

**ԱՔԵՂԱՆ** – *(Հանկարծ դեմքը ծածկելով ու հեծկլրալով)* Ա՛խ,  
դուն դեռ չգիտես... դուն դեռ չգիտես, հայր...

**ՎԱՆԱՀԱՅՐԸ** – *(Բոլորովին այլայլած կողովի և հանկարծ  
խիստ)* Ինձի նայե՛, տեսնե՛մ, նայե աչքերուս:

**ԱՔԵՂԱՆ** – *(Կհեկեկա)*:

**ՎԱՆԱՀԱՅՐԸ** – Մի՞թե, մի՞թե ճշմարիտ է կասկածս, Աքեղա՛,  
նայե աչքերուս:

**ԱՔԵՂԱՆ** – *(Կհեկեկա)*:

**ՎԱՆԱՀԱՅՐԸ** – Այսպես թնյլ, այսպես խեղճ... Դո՛ն,  
որու հոգին ես որձաքարի պես ամուր կկարծեի, անարատ

ու կույս բացառիկ հոգի մը. ու գլուխդ հպարտ ցցած վեր, դեպի երկինք, աշխարհքի ծովուն մեջ, ինչպես իմ այս կույս ու մենավոր կղզիս այս ծովուն մեջ: Թշվառական, խոնարհե՛լ կուզես այդ գեղեցիկ, այդ հպարտ գլուխը ցած, այս ցածի ծովուն դեմ, այն վերերեն, ուր մեր Աստվածն է...

**ԱՔԵՂԱՆ** – Աստված երեսը դարձուց ինձմե:

**ՎԱՆԱՀԱՅՐԸ** – Լռե՛, լռե՛, Այդպես խախտուտ, այդպես ողորմելի... առաջին իսկ փորձումի՛ն:

**ԱՔԵՂԱՆ** – *(Ծունք իջնելով)* Հայր...

**ՎԱՆԱՀԱՅՐԸ** – *(Ետ կքաշվի)* Ելի՛ր, ելի՛ր, ես քեզի շատ եմ տեսեր ծունկերուս քովը, բայց ո՛չ այդպես, ո՛չ այդպես: Ես քեզի այդպես չեմ կրնար տեսնել: Ելի՛ր, ելի՛ր:

**ԱՔԵՂԱՆ** – *(Կեղև ոտքի):*

**ՎԱՆԱՀԱՅՐԸ** – Եվ հեռացիր: Գնա՛, եղի՛ր նորեն այնպես, ինչպես որ էիր, էտքը եկուր ինձի: Այնպես, ինչպես որ էիր... այնպես, ինչպես որ էիր... *(Խոսքը կկտրեն ու կկենսա անշարժ ու խոժոռ):*

**ԱՔԵՂԱՆ** – *(Լռու ու գլխահակ կամաց կհեռանա):*

#### 4

**ՎԱՆԱՀԱՅՐԸ** – Աշխարհքը... աշխարհքն է, որ կուզե մտնե կղզիս: Հո՛ն սատանաները, հո՛ն այդ աղջիկը... և արեղան... իմ արեղան... այդ արեղան... Ո՛չ, անկարելի է: *(Դառնալով դեպի վեր. դեպի կղզիին գազաթը)* Է՛յ, դո՛ն, դո՛ն, ի՛նչպես է քու անունդ, դո՛ն, ձերնակավոր. ո՛չ, աս պատահմունք մըն է միայն, չուրախանաս, դիպված մը անցավոր ու պատահական. չուրախանան...



# ԵՐԿՐՈՐԴ ՏԵՍԱՐԱՆ

## ԺԱՅՌԵՐՈՒՆ ՄԵՋ ԾՈՎԱՓԻ ՄԸ ԿՏՈՐԸ

Ձախ կողմը սեպ-բարձր քարափ, աջ՝ ցրիվ ժայռակայրեր.  
մեջտեղը րափարակ ավազուր, ճակարը ծովն է մինչև  
ժայռերուն ուրքը, խորքը սարերու հեռանկար:

Պայծառ արև իրիկուն է: Ժայռերը, ծառերը, ծովը և ամեն  
ինչ ողողված են արևի նարինջ –կարմիր շողերուն մեջ, որոնց  
գոյները ամբողջ տեսարանի միջոցին թերթն մը կփոխվին ու  
կվառին:

### 1

Քիչ մը արեն տեսարանը պարասպ է: Կլավի աղջիկներու  
սուր քրքիջ ու աղմուկ: Աջ կողմի ցածրիկ ժայռերեն մեկուն վրա  
կերևա միզանուշ մը, կնայի աշխույժ շուրջը ու ետ դառնալով  
ձեռքերը խողովակաձև կղնե բերնին ու ձայն կուտա:

**ԱՌԱՋԻՆ ՄԻԳԱՆՈՒՇ** – Ըն-ն, հո-ն:

Կից ժայռին կերևա ուրիշ միզանուշ մը, որ ժիր ու թռվռուն  
ձեռքով կընե ու կկանչե դեպի հեռուն:

**ԵՐԿՐՈՐԴ ՄԻԳԱՆՈՒՇ** – Ա՛յս կողմը, այս կողմը:

Ու երկուքն ալ ձեռք-ձեռքի թերթն մը կցարկեն ավազուրին  
վրա:

Մինչ նայն ժայռերու վրայեն ու երևեն ներս կթափին հար-  
հար ու խմբով միզանուշները, նուրբ ու թերթն, ձկուն ու շարժուն.  
հազած են բաց-կապույր կամ բաց-կանաչ՝ ցանցնված փրփուր  
զարդերով, բոլորն ալ հերարձակ նայն գոյնի ժայռակներով:  
Կցարկեն, կվազեն, կնետվին. ծիծաղ, հրմշտուք:

Նայն ժայռին ծայրը կերևա Աբեղան իր հալածողներուն  
ձեռքեն փախչողի մը պես: Երևեն ուրիշ միզանուշներ:

Աբեղան կնայի ժայռեն, կշրտապե վար իջնե, կգայթի ցած

ու նստած կմնա ժայռի ուրթին: Ընդհանուր կայրատք քրթիջ ու  
զվարթ իրարանցում:

Արեղան կամաց կելլե ինկած տեղեն մոայլ ու շվար. և  
հոսահայր շարժումով մը ձեռքով կգոցե աչքերը:

Կլեն բոլորը ու կանշարժանան:

**ԵՐՐՈՐԴ ՄԻԳԱՆՈՒՇ** – (Կամաց կմոտենաս Արեղային ու  
կկանչե ականջին) Սեղա:

**ԱՐԵՂԱՆ** – (Կցնցվի ու անմիջապես կբանա աչքերը):

Ընդհանուր քրթիջ, որ իսկոյն կգապվի:

**ՄԻԳԱՆՈՒՇՆԵՐ** – (Զանազան կողմերե ու դիրքերե իրար  
արձագանքելով) Սեղա... Սեղա... Սեղա...

**ԱՐԵՂԱՆ** – Կորեք, չբացեք, հանուն Հիսուսի Քրիստոսի,  
հանուն այս խաչի: (Ձեռքովը խաչ կհանե անոնց վրա):

**ԽՈՒՄԲ ՄԸ ՄԻԳԱՆՈՒՇՆԵՐ**– (Շրջապատելով ու հեզնելով)  
Ա՛խ, այս սիրուն խեղճ մանչը: Ա՛խ, այս սիրուն խեղճ մանչը:  
Ալ անգոր է քու խաչը:

**ԱՐԵՂԱՆ** – (Նորեն կոտրված) Ալ անգոր է աղոթքս, ալ  
անգոր է իմ խաչս:

**ՉՈՐՐՈՐԴ ՄԻԳԱՆՈՒՇ** – Ա՛յ, այ, իզուր, մի՛ տխրիր:

**ԱՌԱՋԻՆ ՄԻԳԱՆՈՒՇ** – Հոս ուրախ է ամեն իր:

**ԱՐԵՂԱՆ** – (Սրտնեղ) Ա՛, ի՛նչ կուզեք. թողեք ինձի:

**ԵՐՐՈՐԴ ՄԻԳԱՆՈՒՇ** – Կուզենք հոգիդ առկայծի:

**ԵՐԿՐՈՐԴ ՄԻԳԱՆՈՒՇ** – Մենք քեզի գեշ ի՛նչ ենք ըրեր:

**ՀԻՆԳԵՐՈՐԴ ՄԻԳԱՆՈՒՇ** – Գիտե՞ս, բերեր ենք լուրեր:

**ԵՐՐՈՐԴ ՄԻԳԱՆՈՒՇ** – Լուրեր, սերեր, սարերով:

**ԵՐԿՐՈՐԴ ՄԻԳԱՆՈՒՇ** – Սերը սիրով,

սերը սիրով

օրենքն ան է

դարերով:

**ԱՐԵՂԱՆ** – (Աչքերը շփելով) Բայց ո՛չ. սա պատրանք է դևի:

**ԱՌԱՋԻՆ ՄԻԳԱՆՈՒՇ** – Դևի՛:

**ՄԻԳԱՆՈՒՇՆԵՐ** – *(Թե-թևի կուրսան, մեջ կանոնեն Աբեղան,  
կղաղնան շորջը ու կերգեն պարելով)*.

Դևի, դևի, թև-թևի,  
պարենք, երգենք թև-թևի,  
գուցե սիրտը թեթևի  
այս անսերի, անթևի:  
Թևներ, թևեր,  
սեր ու վեր.  
տվե՛ք թևեր,  
թռչի վեր:

**ԱԲԵՂԱՆ** – *(Կհարձակվի Երրորդ Միգանուշի վրա)*

Ըսե՛. ըսե՛, դուն ի՛նչ ես,  
այդպես անուշ կինչես:

**ԵՐՐՈՐԴ ՄԻԳԱՆՈՒՇ** – *(Ետ ցարկելով թեթև)*

Չէ՛, ո՛չ դև եմ, ո՛չ փերի.  
քեզի ծովեն լուր բերի:

**ԱԲԵՂԱՆ** – Ուրեմն կամ, կապրի՛ս դուն:

**ԵՐՐՈՐԴ ՄԻԳԱՆՈՒՇ** – Կապրի՛մ այնպես, ինչպես դուն:

**ԱԲԵՂԱՆ** – Ո՛ր է տունդ, բույնդ ո՛ր:

**ԵՐՐՈՐԴ ՄԻԳԱՆՈՒՇ** – Եվ հո՛ս, և հո՛ն, ամենուր:

**ԱՌԱՋԻՆ ՄԻԳԱՆՈՒՇ** – Ալենուշներ, միգանուշներ,  
մենք բոլորս անուշներ:

**ԱԲԵՂԱՆ** – Ձեզի երբեք ես չեմ տեսեր:

**ԱՌԱՋԻՆ ՄԻԳԱՆՈՒՇ** – Նախ պետք էր սեր:

**ԵՐԿՐՈՐԴ ՄԻԳԱՆՈՒՇ** – Ու կարոտներ, սպասումներ...

**ՀԻՆԳԵՐՈՐԴ ՄԻԳԱՆՈՒՇ** – *(Ընկերները ձեղքելով առաջ  
կանցնի)*

Բայց ծանոթ ենք ես ու դուն:

**ԱԲԵՂԱՆ** – Իրար ծանոթ, ես ու դո՛ւն:

**ՀԻՆԳԵՐՈՐԳ ՄԻԳԱՆՈՒՇ** – Հսի, կիիշիս այն առտուն,  
երբ ծովուն մեջ, Սեդան լանջիդ,  
փոթորիկը ականջիդ...

**ԱԲԵՂԱՆ** – *(Ոգևորվելով)* Երբ կռիվ էր պիքին հետ:

**ՀԻՆԳԵՐՈՐԳ ՄԻԳԱՆՈՒՇ** – *(Շարունակելով)*  
...Կկովելիր մեզի հետ,  
որ ոտքերդ կից մը սովին  
պինդ զարկովը ուժեղին  
երկու ծիծիս մեջտեղին...

**ԱԲԵՂԱՆ** – *(Կարեկցուր)* Ցավեցամ:

**ՀԻՆԳԵՐՈՐԳ ՄԻԳԱՆՈՒՇ** – *(Ընկերներուն)* Ցամ, ինչ բան  
է՛ ցավ: *(Շարունակելով իր խոսքը)*...

Այնպես թափով, այնպես ամուր,  
որ դարձա բուռ մը փրփուր:

**ԱԲԵՂԱՆ** – Դոն, փրփուր...

**ՎԵՅԵՐՈՐԳ ՄԻԳԱՆՈՒՇ** – *(Քնքուշ փաթթվելով հինգերորդին)*  
Անո՛շ քուրիկ,  
Փրփուրիկ,  
հատ մը, հատ մը  
համբուրիկ:

**ՉՈՐՐՈՐԳ ՄԻԳԱՆՈՒՇ** – *(Չանջ տալով)*

Ա՛խ, դուք չքքրիք:

**ՀԻՆԳԵՐՈՐԳ ՄԻԳԱՆՈՒՇ** – *(Սրտնեղ)*

Թող տուր ինձի, է՛ հերիք:

**ԱԲԵՂԱՆ** – Իսկ երբ թողիր դուն ծովը:

**ՀԻՆԳԵՐՈՐԳ ՄԻԳԱՆՈՒՇ** – Երբ չէր ինկեր դեռ զովը.  
այսօր, ջերմիկ կեսօրին:

**ԱԲԵՂԱՆ** – Թողիր ինքդ, կամովին:

**ՀԻՆԳԵՐՈՐԳ ՄԻԳԱՆՈՒՇ** – Հայր արևը կանչեց վեր:

**ԱԲԵՂԱՆ** – Հայր... արևը. հրավեր:

Եվ ինչո՞ւ:

**ՀԻՆԳԵՐՈՐԴ ՄԻԳԱՆՈՒՇ** – (Ծիծաղելով ու զարմանալով  
ընկերներուն) Ինչո՞ւ:

**ԱՌԱՋԻՆ ՄԻԳԱՆՈՒՇ** – Չո՞ւ, չո՞ւ:

**ՎԵՑԵՐՈՐԴ ՄԻԳԱՆՈՒՇ** – Չվելու, չվելու,  
հովերուն հետ պաշվելու:

**ԱՔԵՂԱՆ** – Հովերո՞ւն:

**ԵՐԿՐՈՐԴ ՄԻԳԱՆՈՒՇ** – Ա՛յ, այ, եկան:

**ԽՈՐՔԵՆ ԽՈՒՄԲ ՄԸ** – Եկան, եկան:

**ՉՈՐՐՈՐԴ ՄԻԳԱՆՈՒՇ** – Հովիկները, հովիկները, փախե՛ք:

**ՈՒՐԻՇ ԽՈՒՄԲ ՄԸ** – (Ուրուսպելով) Եկան, եկան հովիկները:

## 2

*Ընդհանուր իրարանցում: Ներս կթափին հովիկները՝ թարմ  
ու թեթև պարանիներ խոիվ մազերով, հագուստին գորշ,  
ծալավոր ու ծածանուր:*

*Կթափին ներս րեսարանի խորքեն, կիսառնվին միզանուշ-  
ներում, կփայթովին անոնց զոյգ-զոյգ կամ խմբերով. և առանց  
քնավ կանգ առնելու, անոնք ալ իրենց հետք քաշելով, դուրս կելլեն  
րեսարանի առջևի մասեն, ցայրկելով, աղմուկով ու ծիծաղով:*

*Ջոյգ մը անցնելու արեն.*

**ՄԻԳԱՆՈՒՇ** – Սպասել ալ որ կուտա՞ք:

**ՀՈՎԻԿԸ** – Կովի էինք սարի տակ:

**ՄԻԳԱՆՈՒՇ** – Իհ, ատ որո՞ւն հետ նորեն:

**ՀՈՎԻԿԸ** – Ա՛ն, որ վերը ձյուններեն:

**ՄԻԳԱՆՈՒՇ** – Կատեմ առոնք բոլորն ալ, ինչ կոպիտ են,  
ինչպէս պաղ... (Կանցնին)

Փոքր խումբ մը իրար քաշելով.

**ՀՈՎԻԿ ՄԸ** – Մտնենք թուփին ծոցերը:

**ՈՒՐԻՇ ՀՈՎԻԿ ՄԸ** – Երթանք ծովուն բացերը:

**ՄԻԳԱՆՈՒՇ ՄԸ** – Երթանք պարենք, համ, պարենք:  
**ՈՒՐԻՇ ՄԻԳԱՆՈՒՇ ՄԸ**– Չէ՛, բերկրանքի համար ենք:  
(Կանցնին)

*Մեծ խումբ մը թև-թև շղթա կազմած.*

**ՀՈՎԻԿՆԵՐ** – Անուշ շունչն եք ծովերու:

**ՄԻԳԱՆՈՒՇՆԵՐ** – Դուք ալ հույզքը եթերի:

**ՄԻԱՍԻՆ** – Մենք ջերմ փարած իրարու,  
    ան, ինչ կյանք է անթերի: (Կանցնին)

*Վերջին՝ ետ մնացած խումբ մը շրսապելով.*

**ՄԻԳԱՆՈՒՇ ՄԸ** – (Ետ նայելով Արեղային) Եկ՛ուր, եկ՛ուր,  
տղա՛, դուն ալ եկուր մեզի հետ:

**ՈՒՐԻՇ ՄԻԳԱՆՈՒՇ ՄԸ** – (Փայթվելով իր հովիկին) Ա՛խ, չի  
կրնար. ան անզույգ է, անընկեր...

**ԽՈՒՄԲԸ** – (Հեռանալով) Անընկեր...

### 3

**ԱԲԵՂԱՆ** – (Երկար կնայի անոնց երևեն, մինչև աղմուկը  
կկտրվի: Տխուր գլուխը շարժելով) Անզույգ ու անընկեր... (Լուռ  
քիչ մըն ալ ու հանկարծ սրտին խորքեն) Ա՛խ, գոնե գիտնայի,  
որ իզուր չէ այս ձգնությունը... Բնչ կյանք է աս. մոռցված  
մոմ մը խաչելության առջևը, դժգույն ու մինակ, որ կմխա ու  
կհալի... (Ձեռքովը կծածկե երեսը, գլուխը կկախե կրծքին ու  
կմնա անշարժ):

### 4

*Բարձր սեպ քարափի ծայրեն կերևա ձգնավորը, զգզված ու  
կիսամերկ:*

**ՃԳՆԱՎՈՐԸ** – (Պոռալով) Էյ, ո՞վ է հող: Բնչ գործ ունիս հող  
փոսիս գլխուն:

**ԱԲԵՂԱՆ** – *(Ապշահար կնայի վեր):*

**ՃԳՆԱՎՈՐԸ** – Էյ, քեզի կըսեմ, ի՛նչ բանի ես հող: *(Արագ ցած կմազիցի ժայռեն, երևնալով ու չքանալով քարերու ցցվածքներուն ետևը: Հասնելով քարափի կեսերուն կանգ կառնե)* Ինչո՞ւ ես եկեր, մարդ, այս անմարդ կողմերը:

**ԱԲԵՂԱՆ** – Ա՛խ, երևի դուն այն ճգնավորն ես, որ մեզմե շատ–շատ տարիներ առաջ եկեր էր մինակ այս կղզին ճգնելու: Բայց չե՞ որ անիկա մեռած է արդեն, վաղո՛ւց, վաղո՛ւց:

**ՃԳՆԱՎՈՐԸ** – Իսկ դո՞ւն. դուն մեռած չե՞ս, վաղո՛ւց, վաղո՛ւց:

**ԱԲԵՂԱՆ** – Ես:

**ՃԳՆԱՎՈՐԸ** – Ունայնություն: Դուն ինձի ան ըսե՛ ինչո՞ւ ես եկեր այս անմարդ կողմերը:

**ԱԲԵՂԱՆ** – Չգիտեմ, ինձի բերին:

**ՃԳՆԱՎՈՐԸ** – Ո՞վ բերավ քեզի:

**ԱԲԵՂԱՆ** – *(Մրածկույ)* Չգիտեմ: Բայց չե՞ որ քու ճգնարանդ այս ժայռերուն մյուս կողմն էր, ավելի վերը:

**ՃԳՆԱՎՈՐԸ** – Բայց հոստեղ է իմ փոս:

**ԱԲԵՂԱՆ** – Փո՞ս, ի՛նչ փոս:

**ՃԳՆԱՎՈՐԸ** – Նայե՛ ոտքերուդ տակը. ունայնության փոսը:

**ԱԲԵՂԱՆ** – Ունայնությամն: *(Կնայի ոտքերուն տակը, ոտք քայտած է փորվածք մը գերեզմանի չափ ու ձևով):*

**ՃԳՆԱՎՈՐԸ** – Զգո՛ւյ՛ջ. չքանդե՛ս:

**ԱԲԵՂԱՆ** – Ճի՛շտ է, ճգնավոր, որ դուն տեր ու թագավոր ես եղեր ամբողջ ընդարձակ աշխարհներու, պալատներու մեջ ես ապրեր հայուրավորներ են ծառայեր քու ամեն մեկ քմայքիդ, վայելքներուդ ու զվարձություններուդ սահման չէ եղեր: Ճի՛շտ է, ճգնավոր, ինչ որ պատմեն:

**ՃԳՆԱՎՈՐԸ** – Ունայնություն:

**ԱԲԵՂԱՆ** – Կըսեն՝ թողեր ես այդ բոլորը, պալատն ու խրախճան, իշխանությունն ու փառք թողեր ես ամեն ինչ,

հագեր ես սքեմ, գացեր ես մարդոց մեջ ապաշխարանք քարոզելու, քարոզելու գութ, քարոզելու ողորմածություն, քարոզելու խոնարհություն: Ճիշտ է, ձգնավոր, ինչ որ կպատմեն:

**ՃԳՆԱՎՈՐԸ** – Ունայնություն:

**ԱԲԵՂԱՆ** – Ճիշտ է, որ ատկե ալ ես կշտացեր, եկեր ես այս մենության մեջ անդորրություն գտնելու, մտածելու հոգիիդ փրկությունը:

**ՃԳՆԱՎՈՐԸ** – Ունայնություն:

**ԱԲԵՂԱՆ** – (*Հուզված*) ձգնավոր, ի՞նչ կխոսիս. ունայնություն և քու ձգնությունդ:

**ՃԳՆԱՎՈՐԸ** – (*Արարքեր*) Քիչ մը հեռու իմ փոսես, փուլ չի տաս:

**ԱԲԵՂԱՆ** – Հա՛, այս փոսը: Երևի, գերեզմանդ է, որ վրան այդպես կդողաս: Բայց բաց է ու պարապ:

**ՃԳՆԱՎՈՐԸ** – Ունայնություն և գերեզմանը: Ես գերեզման չունիմ:

**ԱԲԵՂԱՆ** – Հա՛, իրավ որ. գիտեմ: Կըսեն՝ քեզի նետեր ես ծովը, հո՛ն, այն մյուս կողմի բարձր ժայռեն: Չվախցամր հոգիիդ կորուստեն, չվախցամր հանդերձյալ կյանքեն:

**ՃԳՆԱՎՈՐԸ** – Ունայնություն մըն ալ այդ քու հոգիդ ու քու հանդերձյալ կյանքդ:

**ԱԲԵՂԱՆ** – (*Սարսափահար*) Լռե՛, թշվառական, հայիոյանք է խոսածդ:

**ՃԳՆԱՎՈՐԸ** – Իզուր մի՛ սարսափիր ու քիչ մը հեռու փոսես:

**ԱԲԵՂԱՆ** – Ալ ինչ փոս. ալ ինչո՞ւ համար, ուրեմն ալ ինչո՞ւ ես փորեր այդ փոսը, ուրեմն ալ ինչո՞ւ կպահպանես այդպես վախով ու դողով, նույնիսկ մահեղ ալ անդին:

**ՃԳՆԱՎՈՐԸ** – (*Գլուխը շարժելով*) Ա՛, ատիկան է, ատիկա. ունայնություններուն ունայնությունը: Փորեր եմ, փորեր, նայե այս եղունգներովս, ուղեղովս ու սրտովս, փորեր եմ անընդ-



հատ ծնած օրես մինչև, վերջին վայրկյանը, փորեր եմ ու որոներ տակեն բան մը գտնելու համար, կարևոր բան մը. փորեր եմ ու պահպաներ, որ այդչափ աշխատանքս չկորչի. հիմա ալ կպահպանեմ, որովհետև իմ փորածս է. միակ բանը, որ իմս է, իմ ստեղծածս: Միակ բանը, այ՛, այդ փոսը, այդ դատարկ փոսը, այդ միշտ դատարկ փոսը, որ ինչքան փորես, այնքան ավելի դատարկ կդառնա: Դատարկ, դատարկ, կհասկնամ, որ երբեք, երբեք չէ լեցվելու ոչինչով, ոչինչով: Գնամ, դուրս ալ գնա փորե՛ք ու փոսդ ու թող իմինս ինձի: (Կուզե հեռանա):

**ԱԲԵՂԱՆ** – Կեցի՛ր, կեցի՛ր, մանրդ. քեզի հարց մըն ալ. դո՛ւն, որ այդքան իմաստուն ես:

**ՃԳՆԱՎՈՐԸ** – (Կես մը ժայռին ետևեն.) Մանրդը իմաստուն... Ունայնություն: (*Դուրս*):

## 5

*Աբեղան կերթա նորեն փոսին գլուխը և տխուր ու մռայլ կղիտե մրածկուր:*

*Քարերուն մեջեն դուրս կուգա կերպարանք մը ամբողջովին փայթոված մեզի նման քողի մը մեջ: Ծանր-ծանր առաջ կուգա ու կկենա Աբեղային դեմը:*

**ՔՈՂԱՎՈՐԸ** – Ի՛նչ է, եկա՛:

**ԱԲԵՂԱՆ** – (*Գլուխը կբարձրացնե, կղիտե թեթև զարմանքով ու տեսակ մը անփոյթ*) Դո՛ւն ալ անոնցմե:

**ՔՈՂԱՎՈՐԸ** – Ինձի ինչո՞ւ կանչեցիր:

**ԱԲԵՂԱՆ** – Կանչեցի՞, քեզի՞:

**ՔՈՂԱՎՈՐԸ** – Հոգիդ կանչեց ինձի ու եկա:

**ԱԲԵՂԱՆ** – Հոգի՞ս:

**ՔՈՂԱՎՈՐԸ** – Ինչո՞ւ է հոգիդ մռայլ: Ի՛նչ կխորհեիր:

**ԱԲԵՂԱՆ** – Հոգի՞ս:

**ՔՈՂԱՎՈՐԸ** – Ըսե՛, ու մի՛ ըլլար այդպես տխուր:

**ԱՔԵՂԱՆ** – (Փոսը մապրնանիշ ընելով) Ա՛յ, նայէ՛:

**ՔՈՂԱՎՈՐԸ** – Ատ ի՛նչ է որ:

**ԱՔԵՂԱՆ** – Կյա՛նքը:

**ՔՈՂԱՎՈՐԸ** – Կյա՛նքը. այդ նեղ ու մութ փոսը:

**ԱՔԵՂԱՆ** – Այո՛, ունայնության փոսը:

**ՔՈՂԱՎՈՐԸ** – Ա՛խ, վախցեր ես այդ դատարկ փոսեն: Կու-  
զէս լեցնեն:

**ԱՔԵՂԱՆ** – (Աշխոյժ) Լեցնեն...

**ՔՈՂԱՎՈՐԸ** – Իսկո՛յն, դժվար գործ չէ: (Կմտորենա, կկենա փոսին գլոխը և կսկսի իր կիսերգը խորհրդավոր կանչող շարժումներով: Եվ վերեն կսկսի մշուշի նման բան մը իջնել վար դեպի փոսը վերջալոյսի կարմիր ճառագայթներուն տակ. իջնող մշուշին մեջ աղոյր կնշմարվին կարծես դեմքեր, մարմնի մասեր, տերև, ծաղիկ, կայծեր, գոյներ):

Իջէ՛ք, իջէ՛ք,  
երազներ,  
իջէ՛ք զգո՛ւյշ,  
երազներ,  
շոյո՛ղ, անո՛ւշ  
երազներ,  
իջէ՛ք քնքո՛ւշ  
երազներ:  
Ծաղիկ, կանաչ,  
թարմ հյուսեր,  
բախտի կարկաչ  
ու հույսեր.  
դող ու անցուկ  
ու կարոտ,  
ծածուկ արցունք  
վարանոտ,

խելքի, մտքի  
հակասում,  
միշտ նոր կյանքի  
սպասում...  
Իջե՛ք, իջե՛ք,  
երազներ,  
իջե՛ք զգո՛ւյշ,  
երազներ,  
շոյող, անո ւշ  
երազներ,  
իջե՛ք, քնքո՛ւշ  
երազներ:  
Գգվանք, ժպիտ,  
գույն ու բույր,  
աչեր վճիտ  
ու համբույր.  
Իղձեր անվերջ,  
անմեկին,  
տագնապ ու տենչ  
մուկեցին.  
օրոր, գրգիռ  
ու հույզեր,  
սրտի թրթիռ,  
երգ ու սեր...  
Իջե՛ք, իջե՛ք,  
երազներ,  
իջե՛ք զգո՛ւյշ,  
երազներ,  
շոյող, անո՛ւշ  
երազներ,

իջէք, քնքնւշ  
երագներ:  
Աստղեր թովիչ,  
բոց ու կայծ,  
ցնորքներ վառ  
ու առկայծ,  
հավատ ուժի,  
մեծության,  
փառքի, կամքի  
գոյության.  
շոինդ, թնդուն,  
հպարտանք,  
իմաստություն...  
բյոյր պատրանք:  
Իջէք, իջէք,  
երագներ,  
իջէք զգնւշ,  
երագներ,  
շոյող, անոնշ  
երագներ,  
իջէք, քնքնւշ  
երագներ:

**ՔՈՂԱՎՈՐԸ** – Դէն, եկուր ու ալ մի՛ ըլլար տխուր:

**ԱԲԵՂԱՆ** – *(Նայելով)* Լեցավ: Կուզեի ոտքս դնեմ վրան:

**ՔՈՂԱՎՈՐԸ** – Դի՛ր:

**ԱԲԵՂԱՆ** – *(Մեկ ոտքով կկենա փոսին վրա)* Եվ ես կեցած եմ հիմա ունայնության փոսին վրա:

**ՔՈՂԱՎՈՐԸ** – Դուն կեցած ես հիմա երագներու վրա:

**ԱԲԵՂԱՆ** – Այո: Եվ փոսը լեցված է: *(Հանկարծ ոտքս ետ կցարկե ու անգոսայ)* Հէյ, դոն, հէյ, ճգնավոր, հէյ, ունայնու-

թյո՛ն, փոսդ լեցված է, լեցված: Իսկ դո՛ն, քողակիր հմայո՛ղ, ո՛վ ես դուն:

**ՔՈՂԱՎՈՐԸ** – Ես. ես ալ երա՛գ մը:

**ԱԲԵՂԱՆ** – Երա՛գ:

**ՔՈՂԱՎՈՐԸ** – Ես ան՛ եմ, որուն սպասեր ես դուն տարիներ, ու տարիներ առանց գիտնալու, որ կանչեր ես դուն խուցիդ մենությանը մեջ, երկար, երկար գիշերները առանց բառ մը արտասանելու, որուն պապակեր է քու երիտասարդ ծարավ սիրտդ անվերջ ու անվերջ, առանց խոստովանելու: Ես ան՛ եմ, առանց որուն անապատ մըն է կղզին և որուն ներկայությանը անապատին մեջ դրախտ կծաղկի: Ահա՛ եկեր եմ ես քեզի:

**ԱԲԵՂԱՆ** – *(Ոգևորված)* Օրինված ըլլա քու գալուստդ, քողավոր: Ըսե՛, ինչպես կանչեմ քեզի:

**ՔՈՂԱՎՈՐԸ** – Կանչե՛ ինչպես որ սիրտդ ուզե, իմ անուններս հաշիվ չունին: Դուն ծովը շատ սիրեցիր, կանչե՛ ծովիկ, եթե կուզես:

**ԱԲԵՂԱՆ** – *(Երազկոտ)* Այո՛, ծովուն խայտուն ալիքները այս ժայռերու ոտքին միշտ քեզմե են խոսեր ինձի:

**ՔՈՂԱՎՈՐԸ** – Ե՛վ սյուքերը տերևներուն մեջեն, և հավքերը թփերուն տակ, և կարկա՛չը աղբյուրի շրթունքին, ամենը, ամենը, ամեն՛ օր ու ամենուր ինձմե են խոսեր քեզի:

**ԱԲԵՂԱՆ** – Կուզեմ տեսնեմ քու երեսդ: Բաց՛:

**ՔՈՂԱՎՈՐԸ** – Թո՛ղ. գուցե զղջաս:

**ԱԲԵՂԱՆ** – Կուզեմ տեսնեմ քու երեսդ: Բաց՛:

**ՔՈՂԱՎՈՐԸ** – Աղե՛կ. եկո՛ւր, ինքդ բաց:

**ԱԲԵՂԱՆ** – *(Վախով ու դողով)* Ես:

**ՔՈՂԱՎՈՐԸ** – Եկո՛ւր, բաց՛:

**ԱԲԵՂԱՆ** – *(Դողդղալով կմոպենսա և դողդոջուն ձեռքով կբռնե քողին ծայրը ու կբաշե: Քողը կիյնա աղջկան թևերուն: Կեցած է Սեդան՝ ճիշտ այնպես, ինչպես որ էր առաջին արարին*

մեջ: Աբեղան եր-եր կրքաշվի հիացած ու խելագար) Սեդան...

**ՍԵՂԱ** – Ինչ է. ահա՛ ես:

**ԱԲԵՂԱՆ** – (Հեղձեղանքով ասելի ու ասելի հասիշտակված) Օ՛, դուն. դուն իմ էությանս հմայքը, դուն թագուհին իմ ստքերուս. դուն իմ սրտիս ծովը, դուն փոթորիկը իմ հոգիիս: Արևուն հուրքն ես դուն, ծովերուն հույզքն ես դուն, բնության պարզն ես դուն ինձի: (Կնեղովի գեղին) Թո՛ղ, թո՛ղ փաթթվիմ ոտքերուդ, թող համբուրեմ կոխած հողդ, համբուրեմ այդ ձերմակ հագուստիդ անարատ փեշերը... (Կուզե գալարովի անոր ոտքերուն. աղջկան կերպարանքը կմշուշուրովի ու կաներևոթանա: Աբեղան գրկելու դիրքով ինկած է անշարժ այն տեղը, ուր քիչ մը առաջ ոնայնության փոսն էր):

## 6

Խորքի ժայռերուն մեջեն կերևան Ադամ ու Սիմոն վանականներ, թևերնուն մեյ-մեկ թաշկինակ՝ մեջը լիքը:

**ՍԻՄՈՆ ՎԱՆԱԿԱՆ** – Դժոխքի ճամփա է, դժոխքի ճամփա: Բռնե՛ տեսնեմ ձեռքս:

**ԱԴԱՄ ՎԱՆԱԿԱՆ** – (Օգնելով ընկերոջը, որ վերի ժայռն վար իջնե) Նայե՛, հայր Սիմոն, ան ինչ բան է հոն. կարծես մարդ ըլլա գետինը ինկած:

**ՍԻՄՈՆ ՎԱՆԱԿԱՆ** – (Խաչ կհանե երեսը) Հանուն Հիսուսի Քրիստոսի: Մա՛րդ, այսբան հեռուները. դժբախտություն մը պատահած չըլլա՛: (Կիջնե ժայռերեն, և երկուքով զգույշ կմոտենան):

**ԱԲԵՂԱՆ** – (Անոնց ոտքի ձայնեն կբարձրացնե գլուխը ու ապշած կնայի առջևը) Գնանց... (Կնայի շուրջը, կես մը կեղև ու կնայի):

**ՍԻՄՈՆ ՎԱՆԱԿԱՆ** – Ա՛խ, դուն ես, արեղա՛: Կաղոթե՛իր, ինչո՞ւ այսբան հեռուները:

**ԱԴԱՄ ՎԱՆԱԿԱՆ** – Վախցանք:

**ԱՔԵՂԱՆ** – *(Կեղև ուրբի, կնայի անոնց ցրված արտահայտությունը և հանկարծ ուշադիր կսկսի գեղիներ բան մը փնտրելու):*

**ԱԴԱՄ ՎԱՆԱԿԱՆ** – Ինչ կորոնես, արեղա:

**ԱՔԵՂԱՆ** – Ո՛ւր է. ճիշտ հոն պիտի ըլլար: Ո՛ւր է փոսը, ո՞ր է այն փոսը:

**ԱԴԱՄ ՎԱՆԱԿԱՆ** – Ինչ փոս, արեղա:

**ԱՔԵՂԱՆ** – Հա՛, իրավ, մոռցա. չէ՞ որ լեցուց:

**ԱԴԱՄ ՎԱՆԱԿԱՆ** – Լեցո՞ւց, ի՞նչը, ո՞վ:

**ԱՔԵՂԱՆ** – Ան... անիկա. երա՛զը:

**ՍԻՄՈՆ ՎԱՆԱԿԱՆ** – *(Ժպտուն)* Ա՛խ, երա՛զ ես տեսեր: Քունդ տարեր էր, հա՛:

**ԱՔԵՂԱՆ** – Երա՛զ... *(Հանկարծ վրա կնետվի Սիմոն վանականին, շոշափելով անոր մարմինը, պինդ-պինդ թափ փալով անոր թևը):* Իսկ դո՞ն... իսկ դո՞ն... իսկ դո՞ն...

**ՍԻՄՈՆ ՎԱՆԱԿԱՆ** – *(Եզ-եզ քաշվելով)* Տե՛ր Հիսուս-Քրիստոս, դուն խափանես չարը:

**ԱՔԵՂԱՆ** – Իսկ ասիկա՛, իսկ է՛ս, իսկ այս վանքը, այս անապատը... Ինչպես իմանամ ո՞րն է քուն, որն արթուն. ան հոն, անո՞նք, թե՛ հոս, դո՛ւք, էս...

**ԱԴԱՄ ՎԱՆԱԿԱՆ** – Սթափվե՛, արեղա, սթափվե՛: Ինչ երազ, ինչ բան. այ, անիկա Սիմոն հայր-սուրբը, ասիկա ալ ես՝ մեղավոր ծառաս: Կղզիի գագաթն էինք, իջանք սունկ հավաքելու, քարեքար, ժայռեժայռ հեռացանք մինչև հոս. այս կողմերը սքանչելի սունկեր կան. ամբողջ թաշկինակ մը ժողվեր եմ, նայե՛. հրաշալի սունկե-սպաս պիտի ըլլա:

**ԱՔԵՂԱՆ** – *(Հանկարծ)* Իսկ եթե դո՞ւ ինքդ սունկ մըն ես միայն, հրաշալի սունկ մը բուսած ժայռի մը ստվերին, և քունիդ մեջ կերազես միայն, իբրև թե վանական մըն ես ու եկեր ես սունկ հավաքելո՞ւ:

**ԱԴԱՄ ՎԱՆԱԿԱՆ** – Խելքի եկուր, արեղս, ինչէր կխոսիս:

**ԱԲԵՂԱՆ** – (*Շարունակելով*) Կամ գուցե այն ժայռի ստվերն  
ես դուն, քարի կտորի մը ստվերը, որ ինկեր ես հոս ու  
կերագես, թե մեղքերուդ հաղթած սուրբ մըն ես դուն: Ո՞րն  
է երագը, ո՞րը արթուն, ըսէ՛, եթե գիտես, և ի՞նչ բան է ինքը  
երագը:

**ՍԻՄՈՆ ՎԱՆԱԿԱՆ** – (*Վախցած ու խոսքը փոխելու ջանքով*)  
Երթանք: Երթանք, արեղս, ուշ է արդէն: Դժոխքի ճամփաներ  
են, նայէ՛. կատարյալ սատանայի սանդուղ:

**ԱԴԱՄ ՎԱՆԱԿԱՆ** – Երթանք, որ հասնինք իրիկվան հացին:  
Հսկում ունինք այս գիշեր:

**ԱԲԵՂԱՆ** – (*Համակերպած*): Երթանք: Ուտենք սունկե-  
սպասը ու կենանք հսկումի: Երագ մըն ալ ատիկա՛. բայց  
երկանր, երկանր երագ մը. չէ՞, հայր սուրբ:

**ԱԴԱՄ ՎԱՆԱԿԱՆ**– Չգիտեմ, արեղս, ինչ ըսել կուզես:



# ԵՐՐՈՐԴ ՏԵՍԱՐԱՆ

## ՄԻՋՆԱԴԱՐՅԱՆ ԴԱՇԼԻՃ ՄԸ ՍՅՈՒՆԱԶԱՐԴ ՈՒ ԸՆԴԱՐՁԱԿ

Աջ կողմը խոր նիշ մը նեղ ու երկար լուսամուտներով: Նիշի առջևը փայտե բազկաթոռ, վրան բարձ, ուրքին փակը բարձ: Քովը՝ ցած ու փոքրիկ կլոր սեղան մը. վրան մեկ-երկու կանացի իրեր և գեղեցիկ ձեռագիր գիրք մը: Չախ կողմը երկար դիվան. ամեն կողմ գորգեր: Ճակատը սյուններն են, որոնք դահլիճը կրածանեն խորքի սրահեն. սյուներուն մեջ մութ գույնի վարագույրներ:

Անդորր, մեղմ ու ախորժելի:

### 1

Իշխանուհին նստած է բազկաթոռին, ձեռքը սեղանին ու կխոսի: Դեռ չթոռնած գեղեցկություն, թեթև մը ձերմկած մազեր, սգավոր փիկնոջ արտաքին, պարզ ու ընտիր:

Քիչ մը քովնդի ու երևոք նստած է գեպինը, գորգին վրա, Դայակը, որ ժիր ու դյուրաթեք, ավտոր ու սևազգեստ պառալ մըն է:

Իշխանուհին դեմը գլխաբաց կեցած է Գործավարը, ձեռքին ոլորած մագաղաթներ:

**ԳՈՐԾԱՎԱՐԸ** – Այո՛, իշխանուհին եթե կհաճի:

**ԻՇԽԱՆՈՒՀԻՆ** – Աղէկ, ինչպես գիտես, համաձայն եմ:

**ԳՈՐԾԱՎԱՐԸ** – Իսկ Սեպուհին:

**ԻՇԽԱՆՈՒՀԻՆ** – Տղո՛ւս. կկարգադրեմ:

**ԳՈՐԾԱՎԱՐԸ** – Լավ, Իշխանուհին ուրիշ հրաման ունի:

**ԻՇԽԱՆՈՒՀԻՆ** – Ո՛չ: Բարևներս բոլորին: Իսկ Աննան թող ինք-զինքը աղէկ նայի, իր այդպես թույլ կազմովը: Կըսես՝

մայրդ շատ խիստ է դժգոհ:

**ԳՈՐԾԱՎԱՐԸ** – Իշխանուհին պետք չէ որ թողներ մեզի, իր բացակայությունը շատ է զգալի ապարանքին մեջ:

**ԻՇԽԱՆՈՒՀԻՆ** – Է, ապարանքը կդառնա և առանց ինձի: Այդ տարիքին մեջ մոր կարիքը չնչին է: Ես հասցուցեր, պսակեր, կատարեր եմ իմ պարտքս: Աշխարհին տվեր եմ իմ հարկս, հիմա քիչ մըն ալ իմ հանգիստս ու իմ հոգիս:

**ՊԱՌԱՎԸ** – (*Գործավարին*) Թող, դու՛ն ալ, քու ապարանքդ ալ: Տիրուհիս նահատակ մըն է եղեր իր ամբողջ կյանքը, հիմա կուզես, որ նորեն գար ու իյնար կյանքի անիվին տակ: Ո՛չ, ալ հերիք է, հանգիստ է պետք և մեզի, գոնե մեր օրերուն վերջին: Նայե՛, այս անդորր ու լռիկ մենարանը, ոչ մեկ արքունիքի հետ չեմ փոխեր:

**ԳՈՐԾԱՎԱՐԸ** – Ճիշտ է, սիրուն տեղ է Ցամաքաբերդը, սիրուն ու հանգիստ. Սևանի լիճը, դեմի կղզին:

**ԻՇԽԱՆՈՒՀԻՆ** – Եվ վերջապես կուզեմ մոտիկ ըլլամ իմ եկեղեցիիս, որ կշինվի. տեն, աչքիս տակը:

**ԳՈՐԾԱՎԱՐԸ** – Գիտե՛մ իշխանուհիին բարեպաշտությունը. գիտե՛մ անոր գթոտ սիրտն ու առատաձեռնությունը: Հոս ամեն քայլիս անոր ողորմածութենեն կխոսին ու կարեկցությունեն: Բարերարվածները անչա՛նփ, գիտե՛մ: Իզուր չէ անշուշտ, որ սրբուհի կկանչեն:

**ԻՇԽԱՆՈՒՀԻՆ** – (*Ժպտուն*) Իրա՛վ: Թող կանչեն, անունը ոչինչ չի փոխեր: Բան մը պիտի ընե՛մ, թե չէ, այս մենավոր խոլ անկյունը:

**ՊԱՌԱՎԸ** – Մանավանդ տիրուհիիս պես անվերջ հոգատարության ու խնամելու սովոր սրտի մը համար:

**ԻՇԽԱՆՈՒՀԻՆ** – Կին ըլլալը՝ հոգ ըսել է, Եղիսա՛, իսկ մայրը՝ խնամք:

**ԳՈՐԾԱՎԱՐԸ** – Հրաման կուտա՛մ իշխանուհին, որ մեկնիմ:

**ԻՇԽԱՆՈՒՀԻՆ** – Երբ կուզես՝ ճամփա իյնաս:

**ԳՈՐԾԱՎԱՐԸ** – Այսպես, ժամե մը:

**ԻՇԽԱՆՈՒՀԻՆ** – Աղէկ. Աստված հետդ:

**ԳՈՐԾԱՎԱՐԸ** – Առողջ մնա իշխանուհին: *(Կծռի, կհամբուրե խոնարհ անոր ձեռքը ու մեջի վարագոյրներեն կելլե դորս):*

## 2

**ԻՇԽԱՆՈՒՀԻՆ** – *(Քիչ մը լռու. և ետքը հառաչանքով)* Է, կյանքը որքան քիչ բան ունի մեզի տալու:

**ԳՆՈՒԱՎԸ** – Մի՛ տրտնջար, քիչ ունի թե շատ, ինչ որ ունի քեզի տվեր է:

**ԻՇԽԱՆՈՒՀԻՆ** – Այդպես կմտածես և դո՛ւն:

**ԳՆՈՒԱՎԸ** – Ծշմարտությունը ատ է:

**ԻՇԽԱՆՈՒՀԻՆ** – Այն ատեն շատ խղճուկ ու աղքատիկ է ինքը կյանքը:

**ԳՆՈՒԱՎԸ** – Գո՛ւցե:

**ԻՇԽԱՆՈՒՀԻՆ** – Ա՛խ, ինչպես տխուր է այսօր սիրտս:

**ԳՆՈՒԱՎԸ** – Ամպոտ է օրը:

**ԻՇԽԱՆՈՒՀԻՆ** – Ամպոտ է դուրսը, անձրև է ու թուխպ հոգիիս մեջ: Բէր ինձի ավետարանս:

**ԳՆՈՒԱՎԸ** – *(Ոտքի կելլե ու քիչ մը որոնելեն ետքը)* Հո՛ղ է, թևիդ տակը:

**ԻՇԽԱՆՈՒՀԻՆ** – *(Վերցնելով ու բանալով)* Հա՛, մոռցեր էի:

## 3

**ՆԱԺԻՇՏ ՄԸ** – *(Սևազգեստ կին մըն է, որ վարագոյրը ետ ընելով կխոսի խոնարհ)* Վանահայր հայր սուրբն է, կուզե տեսնե իշխանուհին:

**ԻՇԽԱՆՈՒՀԻՆ** – Հայր սո՛րբքը:

**ՆԱԺԻՇՏԸ** – Այո՛, իշխանուհի: Ի՞նչ կիրամայե իշխանուհին:  
**ԻՇԽԱՆՈՒՀԻՆ** – Հո՞ւս առաջնորդե: (*Գիրքը ձեռքեն կղնե վար*):  
**ՆԱԺԻՇՏԸ** – (*Դուրս*):

**ՊԱՌԱՎԸ** – Ա՛յ, աղէկ եղավ. սիրտդ քիչ մը կրացվի: Դուն միշտ ուրախ ես, երբ քու եկեղեցիեդ կխոսին:  
**ԻՇԽԱՆՈՒՀԻՆ** – Բա՛ց վարագույրը:

#### 4

*Պառաւր իւր կընե այուներուն մեջի վարագույրը և բռնած ալ կմնա պարկառանքով: Կմրնե վանահայրը ու շիրակ դեպի Իշխանուհին, որ ուրքի կելլե:*

**ՎԱՆԱՀԱՅՐԸ** – Աստծու օրհնությունը քու վրադ, իշխանուհի:

**ԻՇԽԱՆՈՒՀԻՆ** – Եվ քու, հայր սուրբ: Ի՞նչ լուրեր վանքեն:

**ՎԱՆԱՀԱՅՐԸ** – Աղոթք և օրհնություն:

**ԻՇԽԱՆՈՒՀԻՆ** – Ո՛չ. եկեղեցի՛ն:

**ՎԱՆԱՀԱՅՐԸ** – Օր-օրի կլրանա ու կդառնա տուն աղոթքի ու ներքնասույզ խոհանքի:

**ԻՇԽԱՆՈՒՀԻՆ** – Ի՞նչպես եղավ աջակողյան նիշը:

**ՎԱՆԱՀԱՅՐԸ** – Այնպես, ինչպես որոշեցինք անցած օր:

**ԻՇԽԱՆՈՒՀԻՆ** – Ուրեմն երկու այուներուն ետևը, ուրույն կամարով:

**ՎԱՆԱՀԱՅՐԸ** – Այո՛: Ո՛չ: Ինչպէս թե այուներուն ետևը: Սյուներուն կո՛ղքը:

**ԻՇԽԱՆՈՒՀԻՆ** – Սյուներուն ետևը: Չե՞ որ... այունը այսպես... Եղիսս, հատակագիծը տան:

**ՊԱՌԱՎԸ** – (*Որ քիչ մը հեռուն կեցած էր ձեռքերը կրծքին պարկառանքով, կերթա պարի պահարանեն կրերե ոլորած մագաղաթ մը*):

**ԻՇԽԱՆՈՒՀԻՆ** – (Փռելով մազադաթն իր փոքրիկ սեղանին վրա) Նստե , հայր սուրբ: Այ, նայե՛:

**ՎԱՆԱՀԱՅՐԸ** – Ա՛ս քեզի այուները, աս ալ կո՛ղքը:

**ԻՇԽԱՆՈՒՀԻՆ** – Իրավ է: Ինչ կնշանակե, որ այդ կտորը իրականին վրա դեռ չեմ տեսած: Երևակայելը երբեք ան չէ, չնայելով՝ ինչքան, ինչքան նայեր եմ այս հատակագծին վրա: Գիտե՛ս, հաճախ ամբողջ գիշերներով այդ շենքի մասին կմտմտամ. բոլորանկյունները, բոլոր մանրամասնությունները, ամեն մեկ քարը: Այնպե՛ս բոլորը մոտ է սրտիս, այնպես կապված է հոգիիս, կարծես ամեն մեկ քարը ես եմ գրեր, ես եմ շիներ:

**ՎԱՆԱՀԱՅՐԸ** – (Կատրակով) Այո՛, իշխանուհի՛, ես կկարծեի, թե շինողը ես եմ, արդյունքը եղավ՝ որ դուն շինեցիր:

**ՊԱՌԱՎԸ** – Ճշմարիտ է. Մարիամ Աստվածածնի այդ տաճարը իմ Մարիամ իշխանուհիիս ձեռքի գործն է:

**ՎԱՆԱՀԱՅՐԸ** – (Միրածկոյր) Այո՛, դուն շինեցիր, իշխանուհի՛:

**ԻՇԽԱՆՈՒՀԻՆ** – Ո՛չ, հայր սուրբ, ես շինեցի այդ եկեղեցին, մենք շինեցինք այդ եկեղեցին, մենք, ես ու դու: Միասին ենք խորհեր, միասին ենք ոգևորվեր, միասին ենք կազմեր ու միասին ալ կերպարանավորեր: Եվ այնպես հյուսված է եղեր այդ բոլորը իրարու, որ այժմ բնավ չգիտեմ՝ ո՞րն է որ ինձմե է ծներ և ո՞րը քեզմե: Կհիշե՛ս, հայր սուրբ, մեր այն միասին խորհումներուն ժամերը:

**ՎԱՆԱՀԱՅՐԸ** – Կհիշե՛մ, իշխանուհի՛, բախտավոր բան է կառուցելը, մանավանդ տաճար մը, ուր քու Աստվածդ է բնակելու:

**ԻՇԽԱՆՈՒՀԻՆ** – Ազվո՛ր ըսիր: (Երազկոյր) Կյանքիս ամենն քաղցր վայրկյաններն են եղած, երբ մենք միասին այս նույն սեղանին երկու կողմը նստած մեր երևակայության մեջ ստեղծեր, կառուցեր ենք այդ շենքը:

**ՊԱՌԱՎԸ** – Եվ որո՞ւ ճակտին քանդակվելու է քու անունդ, դարե–դար պատմելու բոլորին քու բարեպաշտությունդ ու աստվածասիրությունդ:

**ԻՇԽԱՆՈՒՀԻՆ** – Թող մոր ու դայակի քու այդ սնափառու–թյունդ, Եղիսա՛. ձգե՛ մեզի առանձին ու մի՛ խանգարեր:

**ՊԱՌԱՎԸ** – (*Քրթանջելով դուրս*):

## 5

**ԻՇԽԱՆՈՒՀԻՆ** – Այո՛, կյանքիս ամենաքաղցր վայրկյան–ները, չեմ քաշվիր կրկնելու, ինչ որ ճշմարիտն է, չեմ ուզեր քաշվիլ: Ինչո՞ւ աչքդ կձգես գետին, ո՛չ, պետք չէ որ գետին ձգես: Ես ամբողջ կյանքս շիտակ եմ նայեր ամենուն երեսին և կուզեմ, որ ամենքն ալ, որոնց համար սրտիս խորքը հարգանք ունիմ, շիտակ նային իմ երեսիս:

**ՎԱՆԱՀԱՅՐԸ** – Չեմ հասկնար ինչ կխոսի իշխանուհին: Ես պատճառ չունիմ ոչ մեկուն առջևը աչքերս գետին ձգելու:

**ԻՇԽԱՆՈՒՀԻՆ** – Բայց ճշմարտությունն ան է, որ ես ու դուն կվախնանք իրարու աչքի մեջ խոր ու շիտակ նայելու:

**ՎԱՆԱՀԱՅՐԸ** – Իշխանուհի՛:

**ԻՇԽԱՆՈՒՀԻՆ** – Թող, թող, մինչև երբ: Ալ լեցվեր է բաժակը: Ինծի համար սաստիկ ծանր է ատիկա ու վիրավորիչ: Ինչո՞ւ. ի՞նչ հանցանք եմք գործեր:

**ՎԱՆԱՀԱՅՐԸ** – (*Ոտքի ելլելով*) Իշխանուհին թող ինծի ներե. պետք է մեկնիմ:

**ԻՇԽԱՆՈՒՀԻՆ** – Ո՛չ, ո՛չ, հայր սուրբ, մի՛ փախչիր. և ի՞նչ օգուտ փախուստը, դուն քու հոգիեդ չես կրնար փախչիլ: Նստե՛, նստե՛, պետք է, որ խոսիմ: Ամբողջ տարի մըն է, որ ես հոս եմ, ամբողջ տարի մըն է շրթունքիս է այդ հարցը և որ շարունակ վախցեր եմ տալու. իսկ այդ վախը խոր կվիրավորե

իմ արժանապատվությունս, կարծես երկու մեղավոր ըլլանք դեմ-դեմի կեցած, որոնք ստիպված են ամոթով իրենց հոգին ծածկելու:

**ՎԱՆԱՀԱՅՐԸ** – Ես չեմ հասկնար ինչ ըսել կուզե իշխանուհին:

**ԻՇԽԱՆՈՒՀԻՆ** – Չես հասկնար...

**ՎԱՆԱՀԱՅՐԸ** – Ըսածներեդ չհասկցա ես ոչինչ:

**ԻՇԽԱՆՈՒՀԻՆ** – Ոչինչ, Հովհաննես:

**ՎԱՆԱՀԱՅՐԸ** – *(Խայթովածի նման կցնցվի)* Իշխանուհի... *(Ու ծանր կեղև նորքի):*

**ԻՇԽԱՆՈՒՀԻՆ** – *(Նոսյնպես նորքի ելլելով)* Միտքդ է արքունի ամառանոցը, մեր փոքրիկ ավազանի եզերքին, վերջալույսի այն իրիկունը, ասկե ուղիղ քսանհինգ տարի առաջ:

**ՎԱՆԱՀԱՅՐԸ** – Եվ այդ քսանհինգ տարիներուն ետևեն դեռ կիիշե իշխանուհին այն քանի մը հասարակ խոսքերը, որ փոխանակեր ենք հոն իրարու հետ:

**ԻՇԽԱՆՈՒՀԻՆ** – Հիշեր եմ ես միշտ:

**ՎԱՆԱՀԱՅՐԸ** – Երախտապարտ եմ, իշխանուհի: Մեծ պատիվ մը, որ ես բնավ չեմ հանդգնած երևակայելու: *(Քիչ մը լռո. վերջը հեղզիակեր գլուխը բարձրացնելով)* Միայն... միայն այն Հովհաննեսը, որուն անունը այդքան զարմանալի կերպով դեռ չէ մոռցեր իշխանուհին, այն Հովհաննեսը, ան մեռած է վաղուց: Իսկ հիմա հոս կեցած է վանական մը, գրեթե ծերունի մը, հեռու արքունիքեն ու ամենքեն, որ եկեր է քեզի հետ կառուցվող շենքի ծախքերու մասին խոսելու:

**ԻՇԽԱՆՈՒՀԻՆ** – Հովհաննեսը մեռեր է գուցե քեզի համար, չգիտեմ, բայց ո՛չ ինձի: Ան միշտ կենդանի է եղեր հոգիիս մեջ և կենդանի ալ կ'մնա: Անոր պատկերն է, վանահայր, միակ պայծառ կետը իմ ամբողջ կյանքիս մեջ:

**ՎԱՆԱՀԱՅՐԸ** – Բայց ատ ըսողը կին մըն է, որ ամուսին է ունեցեր:

**ԻՇԽԱՆՈՒՇԻՆ** – *(Տեսակ մը ընդհատելով)* Եվ խիստ արժանավոր ամուսին մը, որ ես միշտ հարգեր եմ խորապես: Եվ խորապես ալ տանջվեր, որ հարգանքե տարբեր բան մը անոր տալու անկարող եմ եղեր:

**ՎԱՆԱՀԱՅՐԸ** – Բայց ատ ըսողը կին մըն է, որ զավակներ է ունեցեր:

**ԻՇԽԱՆՈՒՇԻՆ** – *(Խիստ)* Ես կատարեր եմ պարտքս: Եվ շատ ծանր է եղեր սրտիս, որ պարտավորությունես ավելի ոչինչ չեմ կրցեր տալ զավակներուս: Ունեցեր եմ ամեն ինչ և ամեն ունեցածս տվեր եմ իմ հարազատներուս: Բայց բախտավորություն ոչ մեկուն չեմ տվեր և ոչ մեկն ալ չեմ ստացեր:

**ՎԱՆԱՀԱՅՐԸ** – *(Կեցած է լուռ և ունքերը կհարած):*

**ԻՇԽԱՆՈՒՇԻՆ** – Լսե՛, պետք է ըսեմ բոլորը, որ մեր մեջեն վերնա այս անախորժ լարումը մեկ անգամ ընդմիշտ: Նայե՛, ես պառավ կին մըն եմ, և դուն ինքդ ըսիր քիչ մը առաջ, որ ծերունի ես արդեն. վախնալու ոչինչ չունինք, քաշվելու ալ ոչինչ չունինք, քանի որ մաքուր է մեր խիղճը: Այս քողարկումը, զգացումներու այս խեղաթյուրումը վայել չէ մեր դեմքին, ո՛չ քու և ոչ ալ իմ: Լսե՛, ինչ որ շրթունքս երբեք չէ արտասաներ և ինչ որ սակայն լեցուցեր է իմ ամբողջ էությունս: Իմ կյանքիս գորշ երկնքին դուն ես եղեր ինձի համար լույսի աստղը, ապրելու իմաստը, առանց այդ լույսին, առանց այդ մխիթարության, ես չգիտեմ, ինչո՞ւ էի ապրելու:

**ՎԱՆԱՀԱՅՐԸ** – *(Ձեռքովը ճակատը սեղմած)* Հերիք է, հերիք է...

**ԻՇԽԱՆՈՒՇԻՆ** – Քու պատկերդ է եղեր իմ դեմս մենությունս վայրկյաններուն: Ինքս ալ աղեկ մը չգիտեմ՝ այն ջերմ աղոթքները, որ սրտես դուրս են հորդեր, ավելի Խաչյալի նկարի՞ն են ուղղված եղեր, թե՞ քու պատկերիդ: Իրավ է, ես



պաշտեր են քու պատկերդ իմ Աստծու հետ միասին:

**ՎԱՆԱՀԱՅՐԸ** – Եվ չէն վախցեր Աստուծմե:

**ԻՇԽԱՆՈՒՀԻՆ** – Աստվամ: *(Բարձրացնելով սեղանեն ավել-  
փարանը)* Աստված սեր է, վարդապետ:

**ՎԱՆԱՀԱՅՐԸ** – *(Մրսձկուր գլուխը շարժելով)* Այդպէս...  
*(Հանկարծ)* Իսկ հիմա:

**ԻՇԽԱՆՈՒՀԻՆ** – Հիմա: Հիմա ալ, տես, այս լուսամուտը,  
որ քու կղզիիդ կնայի ու քու լուսամուտիդ, այն քու փոքրիկ  
լուսամուտիդ, ուր մինչև կեսգիշեր անմար է ճրագը: Դուն  
երևի կկարդաս ու կաղոթես. ես ալ հոսկե կաշխատիմ քու  
մտքերդ կարդամ ու քու աղոթքներդ: Միթե այս բոլորը հոգիդ  
չէ՞ր գիտեր:

**ՎԱՆԱՀԱՅՐԸ** – *(Կտրուկ)* Ո՛չ, բնավ:

**ԻՇԽԱՆՈՒՀԻՆ** – Իրա՞վ: Միթե քու հոգիդ նույնպես լիքը չէ՞  
եղեր ինձմով, ինչպես իմ հոգիս քեզմով:

**ՎԱՆԱՀԱՅՐԸ** – *(Լռու է):*

**ԻՇԽԱՆՈՒՀԻՆ** – Պատասխան տուր, ուրախ չէ՞իր, միթե հո-  
գիդ ուրախ չէ՞ր, երբ հոս այս մենության մեջ դեմ-դեմի նստած  
կխոսեինք ժամերով ու կծրագրեինք: Պատասխան տուր:

**ՎԱՆԱՀԱՅՐԸ** – *(Անհանգիստ)* Չգիտեմ, ես ոչինչ չգիտեմ:

**ԻՇԽԱՆՈՒՀԻՆ** – Չգիտես, ես գիտեմ, միշտ ալ վստահ  
գիտցեր եմ, որ կապրիմ միշտ հոգիիդ մեջ, թեև տարիներու  
այս երկար շարքին մեջ հազիվ ութը-տասը անգամ պատահած  
ըլլանք իրարու մինչև հոս գալս, և շատ ավելի նվազ մեկ-  
երկու խոսք փոխանակած ըլլանք իրարու, միշտ տափակ,  
միշտ անգույն ու միշտ կողմնակի բառերը: Ըսե՛, ճիշտ չէ՞, ինչ  
որ կըսեմ:

**ՎԱՆԱՀԱՅՐԸ** – Թո՛ղ. իշխանուհի՛, հին, անցած-գացած  
օրեր, ի՞նչ իմաստ քրքրելը:

**ԻՇԽԱՆՈՒՀԻՆ** – Հայր-սո՛րբ, եղիր շիտակ ու պատասխան

տուր: Այսօր պետք է մաքրվին հին հաշիվները:

**ՎԱՆԱՀԱՅՐԸ** – Ի՞նչ կուզես, կին, ի՞նչ կուզես դուն ինձմե: Ամբողջ կյանքիս կեսը տառապանք տվիր ինձի, տառապանք ու դառնություն, ջարդեցիր կյանքս, խորտակեցիր երիտասարդությունս, հիմա ալ մոխիրը քրքրել կուզես:

**ԻՇԽԱՆՈՒՀԻՆ** – Իմ խեղճ Հովհաննես...

**ՎԱՆԱՀԱՅՐԸ** – Արդեն կյանքը տառապանքե զատ ուրիշ ի՞նչ է տվեր ինձի... և քեզմե առաջ, և քեզմե ետքը:

**ԻՇԽԱՆՈՒՀԻ** – Ա՛խ, ես զգացեր էի...

**ՎԱՆԱՀԱՅՐԸ** – Վերջ տանք: Ի՞նչ միտք ունի այդ հին ու մարած մոխիրը խառնելը:

**ԻՇԽԱՆՈՒՀԻՆ** – Մարմն... մոխիր...

**ՎԱՆԱՀԱՅՐԸ** – Այո՛, այդ անողոք հուշերն ալ մյուս բոլոր աշխարհային ցավերուս հետ սրտես դուրս քամեցի այն օրը, երբ վրաս առի այս վերարկուն:

**ԻՇԽԱՆՈՒՀԻՆ** – Սրտեդ դուրս քամեցիր...

**ՎԱՆԱՀԱՅՐԸ** – Այո՛, երբ մարեցան բոլոր աշխարհիկ կայծերը:

**ԻՇԽԱՆՈՒՀԻՆ** – Ո՛չ, չմարեցան այդ կայծերը:

**ՎԱՆԱՀԱՅՐԸ** – Իշխանուհի՛:

**ԻՇԽԱՆՈՒՀԻՆ** – Ո՛չ, կըսեմ քեզի, չմարեցան այդ կայծերը: Աշխատեցար, որ մարես. աշխատեցար, որ խաբես քեզի, օրոր ըսիր հոգիիդ ու համոզեցիր քեզի, թե մարեր ես. բայց չմարեցիր, չէիր կրնար:

**ՎԱՆԱՀԱՅՐԸ** – *(Խիստ)* Իշխանուհի՛:

**ԻՇԽԱՆՈՒՀԻՆ** – *(Ցած ձայնով)* Եթե մարեցիր, հապա ի՞նչ է այս եկեղեցին, հապա ի՞նչ է այս մեր եկեղեցին:

**ՎԱՆԱՀԱՅՐԸ** – *(Սարսափած եր քաշվելով)* Լռե՛, լռե՛, իշխանուհի՛:

**ԻՇԽԱՆՈՒՀԻՆ** – Ճշմարտությունը, վարդապետ: Մենք այդ

եկեղեցին չենք շինած քու բարձրյալ Աստուծոյ համար, ինչպես որ միշտ կրկնըներ ես. մի՛ խաբեր քեզի, այդ եկեղեցին շիներ ենք մենք մեզի համար, մեր սիրու Աստուծոն համար:

**ՎԱՆԱՀԱՅՐԸ** – *(Խորրդակված)* Մարիամ...

**ԻՇԽԱՆՈՒՀԻՆ** – Այո՛, այդ քու եկեղեցիդ նվիրված է ո՛չ թե Մարիամ Աստվածածնին, ան նվիրված է քու Մարիամ իշխանուհիիդ: Ըսէ՛, ճիշտ չէ՛:

**ՎԱՆԱՀԱՅՐԸ** – *(Կեցած է լուռ ու գլխահակ):*

**ԻՇԽԱՆՈՒՀԻՆ** – Ըսէ՛, ճիշտ չէ՛:

**ՎԱՆԱՀԱՅՐԸ** – *(Լուռ է ու գլխահակ):*

## 6

*Անկյունը հանկարծ կերևա ձերմակալորը:*

**ՃԵՐՄԱԿԱՎՈՐԸ** – Ըսէ՛, ճիշտ չէ՛:

**ՎԱՆԱՀԱՅՐԸ** – *(Կցնցվի, կողողվի ու հայացքը ձերմակալորին հասած կքարանա):*

**ԻՇԽԱՆՈՒՀԻՆ** – Ի՛նչ եղավ քեզի:

**ՃԵՐՄԱԿԱՎՈՐԸ** – Ըսէ՛, որո՞ն է նվիրված այն եկեղեցին, այն քու նոր շինած եկեղեցին:

**ՎԱՆԱՀԱՅՐԸ** – *(Լուռ է):*

**ՃԵՐՄԱԿԱՎՈՐԸ** – Ըսէ՛. պետք է որ ըսես, պետք է խոստովանիս:

**ՎԱՆԱՀԱՅՐԸ** – *(Խորրդակված)* Այո՛: Ճի՛շտ է, Այդ... եկեղեցին նվիրված է... հի՛ն աստվածներուն:

**ՃԵՐՄԱԿԱՎՈՐԸ** – Ի՛ն աստվածներուս:

**ՎԱՆԱՀԱՅՐԸ** – Քո՛ւ աստվածներուդ:

**ՃԵՐՄԱԿԱՎՈՐԸ** – *(Կաներևութանա):*

**ՎԱՆԱՀԱՅՐԸ** – Ճիշտ է: Ես ողորմելի ու մեծամիտ մարդ մըն եմ. գոցեր եմ աչքերս ու կկարծեմ, թե կթռչիմ, պարզեր եմ թևերս գոռոզ վեր ու կարծեր եմ, թե հասա երկնքին:

**ԻՇԽԱՆՈՒՏԻՆ** – Մի խոսիր այդպես: Մեր սրտերուն այդ կապը, մեր այդ ամբողջ սերը եղեր է սուրբ, ջերմ ու ազնիվ, ինչպես ջերմեռանդ աղոթքի մը մրմունջը, ինչպես ընտիր կնդրուկին բույրը, որ դեպի երկինք կմխա:

**ՎԱՆԱՀԱՅՐԸ** – *(Աչքերը միշտ հառած դեպի ձերմակավորին երևցած կողմը)* Ո՛չ, ո՛չ: Ճշմարիտ է այս բոլորը, բայց դեռ մի հաղթանակեր. կանուխ է դեռ. դեռ կտեսնվինք... *(Ու արագ դուրս, առանց իշխանուհիին կողմը նայելու):*

**ԻՇԽԱՆՈՒՏԻՆ** – *(Շվար ու վախով)* Հովհաննես, Հովհաննես, հայր սուրբ... *(Թուլցած կիյնա իր աթոռին):*

# ԵՐՐՈՐԴ ԱՐԱՐ

## ԱՌԱՋԻՆ ՏԵՍԱՐԱՆ

### ՎԱՆԱՀՈՐ ԽՈՒՅՐ

Ճակատը քառակուսի ցած լուսամուտ մը՝ հասարակ փախարակե փեղկով: Լուսամուտին մեկ կողմը քանի մը շարք դարակ՝ լիքը ամեն մեծության ու ձևի ձեռագիրներով ու մագաղաթներով: Գրադարանին ու լուսամուտին առջև փայտե սեղան մը՝ վրան նորեն գրքեր ու այլ մանր իրեր: Դուռը կողմնակի, գրասեղանին դեմը:

### 1

Բաց լուսամուտեն արևի առատ պայծառ ոսկի շերտ մը ինկած է սենյակի հատակին ու սեղանին: Սեղանին առջև լույսի այդ ողողումին փակ նստած է վանահայրը՝ երկու արմունկը սեղանին ու գլուխը թաղած ավերոն մեջ:

Քիչ մը արեն լուռ է: Կամաց կբացվի դուռը ու կմտնե Վարպետը՝ աշխատավորի փոշուր ու աղբուր հագուստներով: Քայլ մը կրնե դեպի սեղանը ու կկենա:

**ՎԱՐՊԵՏԸ** – Ինձի կանչեր էիր, վանահայր:

**ՎԱՆԱՀԱՅՐԸ** – (Անշարժ է):

**ՎԱՐՊԵՏԸ** – Հայր–սուրբ, կանչեր էիր ինձի:

**ՎԱՆԱՀԱՅՐԸ** – (Ծանր կբարձրացնե գլուխը ու կնայի դիմացինին) Հա՛: (Քիչ մը լուռ) Դե՛, ըսե՛ նայիմ, հիմա ի՛նչ պիտի ընենք:

**ՎԱՐՊԵՏԸ** – Ի՛նչը, հայր–սուրբ:

**ՎԱՆԱՀԱՅՐԸ** – Մենք հիմա ի՛նչ պիտի ընենք այդ շենքը:

**ՎԱՐՊԵՏԸ** – Եկեղեցի՛ն:

**ՎԱՆԱՀԱՅՐԸ** – *(Գլուխը կշարժե դրական):*

**ՎԱՐՊԵՏԸ** – Այսինքն ինչպես: Արդեն գիտես, հայր սուրբ, որ մինչև Աստվածածնի տոնը ավարտած կըլլա գմբեթը, մնացածը երկրորդական բաներ են:

**ՎԱՆԱՀԱՅՐԸ** – *(Մտածկոյ)* Մինչև... Աստվածածին:

**ՎԱՐՊԵՏԸ** – Ինչն է, որ քեզի հոգ կպատճառե, վանահայր:

**ՎԱՆԱՀԱՅՐԸ** – Ուրեմն... մինչև Աստվածածին կըլլա ավարտած: Հըմ. այդպես հաստատ գիտնւմ:

**ՎԱՐՊԵՏԸ** – Ես իմ խոսքիս տերն եմ, հայր սուրբ:

**ՎԱՆԱՀԱՅՐԸ** – *(Տաք ու կտրուկ)* Ես ալ, ես ալ իմ խոսքիս տերն եմ, վարպէտ:

**ՎԱՐՊԵՏԸ** – Ուրեմն...

**ՎԱՆԱՀԱՅՐԸ** – Քանի՞ տարի է, որ դուն վարպետ ես:

**ՎԱՐՊԵՏԸ** – Ես, ինչ գիտնամ, քսան մը կըլլա:

**ՎԱՆԱՀԱՅՐԸ** – Ուրեմն քսան տարի է, որ կշինես ու կշինես, իսկ երբեք պատահէր է, որ շինելէդ ետքը քանդես:

**ՎԱՐՊԵՏԸ** – Քանդեմ, իմ շինամծ. ինչո՞ւ:

**ՎԱՆԱՀԱՅՐԸ** – Ինչո՞ւ այդպես զարմացար: Չէ՞ որ շինելն է դժվարը, քանդելը դյուրին է միշտ:

**ՎԱՐՊԵՏԸ** – Այո՛, ուրիշի շինածը: Իր շինածը քանդելը շատ դժվար է, հայր սուրբ:

**ՎԱՆԱՀԱՅՐԸ** – *(Հայացքը լուսամուտէն դուրս ներսած ու երազկոյ)* Դժվար է, դժվար, իհարկէ. երբ մանավանդ կապված է հին հիշողություններու, հույզերու, վշտերու, երբ կապված է անցյալիդ, երիտասարդ օրերուդ, չէ՞, վարպէտ: Դժվար է, իհարկէ: *(Լռո՛ւ ու ակնապիշ կմնա քիչ մը՝ աչքերը լուսամուտէն դուրս, և հանկարծ գլուխը շրջելով՝ խիստ ու կտրուկ)* Փակէ սա փեղկը:

**ՎԱՐՊԵՏԸ** – Փակեմ, լուսամուտը:

**ՎԱՆԱՀԱՅՐԸ** – Այո՛, այո՛, լուսամուտը:

**ՎԱՐՊԵՏԸ** – Բայց ինչ ախորժելի արև է, ինչպե՞ս ուրախ ու տաք:

**ՎԱՆԱՀԱՅԻՐԸ** – Ու փակես պիտի ճիշտ ստոր համար:

**ՎԱՐՊԵՏԸ** – Բայց...

**ՎԱՆԱՀԱՅԻՐԸ** – Արև... Մեզի անպատճառ պետք է արև, ուրախ ու տաք արև: Մենք դեռ արևապաշտներ ենք. արև ... Չենք կրնար ապրիլ առանց ախորժելի արևի, առանց ուրախ ու տաք արևի: Գոնե լուսամուտ մը, գոնե ձեղք մը, գոնե գողունի ներս սպրդած ճառագայթ մը... *(Հանկարծ բռունցքը զարնելով սեղանին)* Ո՛չ: Գոցե՛, կըսեմ քեզի, ինչ ես քարացեր:

**ՎԱՐՊԵՏԸ** – *(Վարանքով կերթա կգոցե փեղկը):*

Սենյակը գրեթե մութ է:

**ՎԱՆԱՀԱՅԻՐԸ** – Այդպես: Պետք է խցվի այդ անցքը, ուրկե արևը նայի ներս, ուրկե ցամաքը կնայի ներս, ուրկե աշխարհքը կնայի ներս:

**ՎԱՐՊԵՏԸ** – Բայց բնակարանդ դարձավ խավար ու մռայլ, ինչպես դամբարան:

**ՎԱՆԱՀԱՅԻՐԸ** – Ըսե՛ ինչպես եկեղեցի:

**ՎԱՐՊԵՏԸ** – *(Ուսերը կցնցե):*

**ՎԱՆԱՀԱՅԻՐԸ** – Ինչո՞ւ կվախնաս խավարեն: Խավարը խավար է կարճատես աչքերուն: Բոլոր մեծ հղացումները խավարի ծոցն են գոյացեր, բոլոր մեծ խորությունները միայն խավարի մեջ կարելի է տեսնել: Եվ այդ ձեր պաշտած լույսը միթե ծնունդը չէ՞ խավարի, ծնունդ մը ու մահկանացու մը: Խավարն է միայն, որ կա ու կմնա անմահ ու հավիտյան: *(Ելած է ոտքի, կխոսի մտածելով):*

## 2

*Վանահայրը լռած է ու մտախոյզ. լուռ է նաև Վարպետը. կմրնե Աբեղան ու կկենսա դռան քովը լուռ ու խոնարհ:*

**ՎԱՐՊԵՏԸ** – Վանահայրը նոր հրաման ունի՞ ինձի տալու:

**ՎԱՆԱՀԱՅՐԸ** – Այո՛. միայն ո՛չ այս վայրկյանիս, նախ ուրիշ հաշիվ ունիմ մաքրելու: Գնա առայժմ: Շնորհակալ եմ քեզմե. Տերը քեզի ետ (*Դառնալով Աբեղային*) Դոնն ինչու ես եկեր, արեղա՛:

### 3

**ԱԲԵՂԱՆ** – (*Նախ կսպասե մինչև Վարպետի հեռանալը. վերջը գլուխը ավելի խոնարհելով*) Քեզի խոսելիք ունիմ:

**ՎԱՆԱՀԱՅՐԸ** – Ամեն մարդ ինք պիտի բանա իր ճամփան, արեղա՛:

**ԱԲԵՂԱՆ** – Գիտեմ, գիտեմ, որ ալ փակ է ինձի համար քու հոգիիդ ճամփան: Կհասկնամ, որ ասկե ետքը ես քեզի համար անարգ ու անարժան արարած մըն եմ, իսկ դուն ալ ինձի համար... (*Կլռե*):

**ՎԱՆԱՀԱՅՐԸ** – Ըսե՛, մի՛ քաշվիր:

**ԱԲԵՂԱՆ** – Կըսեի, եթե գիտնայի: Ինքս ալ չգիտեմ, կզգամ միայն, որ մենք իրարու անհաշտ թշնամի ենք:

**ՎԱՆԱՀԱՅՐԸ** – Թշնամի՞... Եվ հիմա ատիկա ըսելո՞ւ համար է, որ եկեր ես ինձի:

**ԱԲԵՂԱՆ** – Ո՛չ: Ես եկեր եմ ուրիշ բան մը հայտնելու:

**ՎԱՆԱՀԱՅՐԸ** – Խոսե՛:

**ԱԲԵՂԱՆ** – Դուն ըսեր ես, որ հո՛ս, այս կղզին երբեմն ուրիշ աստվածներ են ապրեր:

**ՎԱՆԱՀԱՅՐԸ** – (*Իր ցնցումը զսպելով*) Ետքը:

**ԱԲԵՂԱՆ** – Ըսեր ես շատ-շատ տարիներ մեզմե առաջ:

**ՎԱՆԱՀԱՅՐԸ** – Ետքը:

**ԱԲԵՂԱՆ** – Ըսեր ես՝ հիմա մեռած են բոլորը:

**ՎԱՆԱՀԱՅՐԸ** – (*Լռու է*):

**ԱԲԵՂԱՆ** – Մեռա՛ծ, վաղո՛ւց մեռած:



**ՎԱՆԱՀԱՅՐԸ** – (*Լոռն է*):

**ԱՔԵՂԱՆ** – Ահա՛ եկեր եմ քեզի ըսելու, որ սխալ ես, այդ աստվածները մեռած չեն:

**ՎԱՆԱՀԱՅՐԸ** – (*Ահաբեկ ու սաղած*): Իսկ դո՞ւն... Իսկ դո՞ւն ատիկա ուրկե գիտես:

**ԱՔԵՂԱՆ** – (*Ցած ու խորհրդավոր*) Ես... ես տեսա՛:

**ՎԱՆԱՀԱՅՐԸ** – Տեսա՞ր, դո՞ւն, իմ մեջս, ինչպե՞ս տեսար:

**ԱՔԵՂԱՆ** – Քո՛ մեջդ, ինչպես թե՛ քու մեջդ: Ո՛չ. ես տեսա հո՛ն... դուրսը:

**ՎԱՆԱՀԱՅՐԸ** – Ո՛ւր:

**ԱՔԵՂԱՆ** – Հո՛ն, հին ձգնարաններուն շուրջը:

**ՎԱՆԱՀԱՅՐԸ** – Ի՞նչ տեսար հոն, ձգնարաններուն շուրջը:

**ԱՔԵՂԱՆ** – Տեսա՛ այն մյուս... հին աստվածներուն արարածները:

**ՎԱՆԱՀԱՅՐԸ** – Արարած...

**ԱՔԵՂԱՆ** – Կսխալիս, վանահայր: Քեզի կըսեմ՝ հին աստվածները կապրին. ու հին աստվածներուն հետն ալ իրենց հին կյանքը: Երբ մենք հո՛ն, մեր մութ ու նեղ եկեղեցիներուն մեջ գետնատարած կապաշխարենք, անոնք հո՛ն կապրին ազանտ. կապրին տաք ու պայծառ արևի տակ, կապույտ ծովուն վրա, ծփուն օդերուն մեջ, ավազուտ ափին, կապրին իրենց զվարթ ու եռուն կյանքը, լի, շարժուն ու հարափոփոխ: Մենք կաղոթենք, անոնք կապրին: Այս ծովը, այս սարերը, այս կղզին, անոնցն է այս բոլորը, մերն է միայն այս խուցերն ու եկեղեցին:

**ՎԱՆԱՀԱՅՐԸ** – Ո՛չ: Մերը չէ նաև ո՛չ այս խուցերը իրենց կեղծավոր լուսամուտներով, ո՛չ ալ եկեղեցին: Անոնցն է, բոլորն ալ անոնցն է:

**ԱՔԵՂԱՆ** – (*Նսախ սաղած, ետքը վախով*) Հայր, ատիկա ըսողը դո՞ւն ես:

**ՎԱՆԱՀԱՅՐԸ** – Մեր Աստվածը հոս ոչինչ չունի, ոչինչ:

**ԱՐԵՂԱՆ** – Հայր:

**ՎԱՆԱՀԱՅՐԸ** – Անոնցն է այս բոլորը: (*Մոտենալով Աբեղային ու ցած*) Ու քանովի՛ պիտի այս բոլորը, արեղա՛: Մինչև Աստվածածին հոս քար մը քարի վրա չի պիտի մնա ո՛չ այս խուցերեն, ո՛չ եկեղեցիեն:

**ԱՐԵՂԱՆ** – Հայր, կծաղրե՞ս ինձի: Գեշ կատակ է ըրածդ:

**ՎԱՆԱՀԱՅՐԸ** – Ծաղր մըն է եղեր իմ ըսածներս մինչև այսօր ու գեշ կատակ մըն է եղեր ըրածներս մինչև հիմա: Բայց ասկե ետքը ալ լուրջ է: Փոխվի պիտի այս կղզիին վրա ամեն բան: Ոչինչ, ոչինչ չի պիտի մնա հոս, ո՛չ արդի շենքերեն, ո՛չ արդի հոգիներեն:

**ԱՐԵՂԱՆ** – Իսկ հին աստվածները, հայր:

**ՎԱՆԱՀԱՅՐԸ** – Պնդե՛ գոտիդ, որդիս, կանչե՛ կամքդ ու դո՛րս վանե մեջեղ բոլոր այդ հին աստվածները: Քանդե՛, քանդե՛, եթե պետք ըլլա, քանդե ամբողջ հոգիդ: Քու հոգիդ ազնիվ է, արժե այդ աշխատանքը: (*Դուրս*):

# ԵՐԿՐՈՐԴ ՏԵՍԱՐԱՆ

## ՄԵՀՅԱՆԻ ՄԸ ԳԱՎԻԹԸ

Երկու կողմը երկու շարք բարձր ու հաղթ պոններ: Ճակատը մեջտեղը լայն ու մեծ կամար մը որ ծածկված է վարագոյրով: Կամարին երկու կողմերը նոյնպէս պոններ են, որոնց երևը քիչ մը փարածոթոյնն ու քարե պար: Կամարի մութ-վարդագոյն վարագոյրին վրա ոսկենկար ճանանչավոր արև մը:

Վարագոյրին առջևը փեսարանին խորքը դրված է քարե փոքրիկ բազին մը, որ կմխա: Բազնի աջ ու ձախ կողմեն երկար քարե սեղաններ քիչ մը ծոռ դիրքով ու քարե նստարաններ. սեղանները մեջտեղի բազնին հետ միասին պայտի ձևը կկազմեն:

Սյուներուն առջևը բարձր աշտանակներ ու առկախ ջահեր: Բազինը, պոնները և աշտանակներուն մեջքը բոլորն ալ գալարված է ծաղիկներու ու կանաչի շղթայով:

### 1

Վառ է միայն երկու ջահ բազնին երկու կողմեն, խորքը. այնպէս որ ահագին բարձր շենքը դողդոջուն կես-մութի մը մեջ է:

**ՍԵՂԱ** – (Ձախ կողմի առջևի պոններուն երևեն եր-եր ներս կմրնէ, միշտ նոյն հագուստով, թեքված քիչ մը դեպի առաջ ու երկու ձեռքովը սրտանց կանչելով) Եկ՛նր, Եկ՛նր...

**ԱԲԵՂԱՆ** – (Երևնալով) Սեղա՛, Սեղա՛...

**ՍԵՂԱ** – Եկ՛նր:

**ԱԲԵՂԱՆ** – Տո՛ր ինձի իմ հանգիստս, տո՛ր ինձի իմ աղոթքներս. տո՛ր իմ վստահությունս ըրածիս, կյանքիս, ուժիս: Ամեն, ամեն ինչ կփլի շուրջս:

**ՍԵՂԱ** – (Միշտ եր-եր դեպի աջ երթալով) Եկ՛նր, Եկ՛նր:

**ԱԲԵՂԱՆ** – Ալ չկա ինձի հանգիստ ո՛չ խուցիս մենությանը մեջ, ո՛չ դուրսը, ո՛չ ալ եկեղեցիին կամարներուն տակը: Սաղմոսներուն մեջեն քու ձայնդ կլսեմ, մութ կամարներուն տակեն քու աչքերդ ինձի կժպտին, խունկի հոտին մեջեն քու թաց մազերուդ բույրը կզգամ... Ինչո՞ւ, ինչո՞ւ կտանջես ինձի:

**ՍԵՂԱ** – Եկո՛ւր, եկո՛ւր:

**ԱԲԵՂԱՆ** – Ետ տուր ինձի իմ հպարտությունս, իմ մեծամիտ խորհրդածություններս, ետ տուր ինձի իմ հավատքս, իմ Աստվածս. տո՛ւր, ետ տուր ինձի իմ Աստվածս...

**ՍԵՂԱ** – Եկո՛ւր... եկո՛ւր... *(Ու կքաշվի, կաներևոյթանաւ աջ կողմի սյուններուն ետին):*

## 2

**ԱԲԵՂԱՆ** – Գնաց նորեն: Նորեն մինակ... *(Շենքի մեջքեղն է. կկենսա, գլուխը կքարձրացնէ, կնայի չորս դին ու գարմանքով)* Աս ո՛ւր եմ ես: Աս ո՛ւր բերավ ինձի:

*Դուրսեն կլավի հեռավոր աղմուկ ու ձայներ: Շրտապ ներս կմտնէ ծերունի պաշտոնյա մը՝ ձեռքին լոյս ու արագ կվառէ ջահերն ու մոմերը:*

**ԱԲԵՂԱՆ** – *(Հանկարծ մոտենալով)* Ծերունի՛, ինչ շենք է սա. ո՛ւր եմ ես:

**ԾԵՐՈՒՆԻՆ** – Վայ, վախցա, արևը վկա: Ո՞վ ես դուն:

**ԱԲԵՂԱՆ** – Եկեղեցի՛ է, ինչ բան է սա:

**ԾԵՐՈՒՆԻՆ** – Եկեղեցի՛, ինչ հիմար լեզու կխոսիս: Զարդ-վաճներու, խաչվածներու տեղը չէ հոս, հանգիստ եղիր:

*Դուրսի աղմուկը հեղզեղեղեղ կմոտենա:*

**ԱԲԵՂԱՆ** – Ինչ ուրախ է հոս, ինչ տոնական:

**ԾԵՐՈՒՆԻՆ** – Անշո՛ւշտ, կյանքը ուրախության համար է տված մեզի:

**ԱԲԵՂԱՆ** – Եվ ատիկա ըսողը ալևոր ծերունի մըն է:

**ԾԵՐՈՒՆԻՆ** – Այո՛, ծերանալը ծանր բան է, բայց հոգիս առույգ է դեռ ու սիրտս երիտասարդ. դեռ կրնամ վայելել կյանքը և վայելեմ պիտի արևս վկա, քանի շունչ կա շրթունքիս: Իհարկե՛ն, ըլլալ քեզի նման երիտասարդ, ան՝ մեծ բախտ է: Ափսո՛ս որ ետ չեն դառնար այդ խեթ ու գուսպ օրերը: Ընը՛, եկան՝ (*Կերթա դեպի աղմուկը*)

**ԱՔԵՂԱՆ** – (*Կքաշվի եր–եյր ու կծածկվի սյուներու սրվերին երևը*):

### 3

*Ձախ կողմի խորքի սյուներուն մեջեն ներս կմընեն Իշխանը իր գենընկերներուն հեյր՝ երեսուն հոգիի չափ. այդչափ մըն այ մեհենասկան աղջիկներ, այլև խումբ մը գինասկիր պատրանհներ՝ ջահեր բռնած: Շենքը կողողվի լոյսով: Այրերը սաղավարտ ունին, վահան, մեջքերնուն սուր: Կանայք հագված են թեթև ու սպիտակ, մազերնուն մեջ իբրև զարդ խրած ունին աստղ մը:*

*Ամենեն առաջ ներս կմընեն քանի մը ջահասկիր ու խումբ մը աղջիկներ ուրախ ու ոգևորված: Երբը Իշխանը՝ շրջապատված իր մեծերեն: Անոնց երևեն այ գինավորականներն ու աղջիկները խառն, ուրախության բացականչություններով. ջահասկիրներ քովերեն ու երնեն:*

**ԱՂԶԻԿՆԵՐՈՒ ԱՌԱԶԻՆ ԽՈՒՄԲԸ** – (*Սյուներեն ներս ուրք դնելուն պես*) Կեցցեն հաղթողները... Կեցցեն քաջերը...

**ԲՈՒՐ ԿԱՆԱՅՔ** – Կեցցեն, կեցցեն հաղթողները:

*Իշխանը կերթա կանգ կառնե բազնին առջևը, բոլորը կրխնին անոր երևը: Աջ կողմի խորքի սյուներուն մեջեն դուրս կուգա քուրմ մը՝ հերմակներ հագած, ուրիշ երկու քուրմ աջեն ու ձախեն:*

**ՔՈՒՐՄԸ** – (*Գալով իշխանին ընդառաջ*) Բարի գալուստ իշխանին: Բարի գալուստ մարտնչողներու:

**ԻՇԽԱՆԸ** – Եկեր ենք մեր զենքերը դնելու Քաջն Վահագնի բազմին ոտքը ու իր սուրբ ծագումը երկրպագելու:

**ՔՈՒՐՄԸ** – Իր սուրբ ծագումը ձեզի զորավիգ, ձեր թևերը միշտ ամուր, ձեր սուրերը միշտ հատու, ձեր վահանը անխորտակ: Լույս ու արև Վահագնի օրհնությունը ձեզի հետ, դուք, որ հաղթողներն եք կյանքի կովին մեջ. ձերն ըլլա միշտ հաջողությունն ու հաղթանակը:

**ՋՈՐԱԿԱՆՆԵՐԸ** – Հաջողությունը մեզի հետ. հաջողությունն ու հաղթանակը:

**ԱՂԶԻԿՆԵՐԸ** – Քաջն Վահագնի օրհնությունը ձեզի հետ:

**ՔՐԻՐՄԸ** – Դեռ բավական ժամանակ կա մինչև մեր լույս Տիրոջ ծնունդը, իշխան: Նստեցեք ու հանգստացեք: Նստեցեք Մեծն Վահագնի ու Մեծն Աստղկան սեղանը: Նստեցեք ու վայլեցեք, դուք, որ կովողներն եք կյանքի մեծ կովին մեջ, կովողներն ու հաղթողները. ձերն է հաղթությունը, ձերն է վայելքը:

**ՋՈՐԱԿԱՆՆԵՐԸ** – Մերն է հաղթությունը, մերն է վայելքը:

**ՔՈՒՐՄԸ** – Բացեք, աղջիկներ, Տիրոջ սեղանը, բացեք Վահագնի ու Աստղկան սեղանը: Բերեք գինի անապական և ուրախություն, բերեք ձեր գեղեցկությունն ու ձեր նազանքը, բերեք, մինչև արժանանանք երկրպագելու լուսածին Վահագնին ու փրփրածին Աստղկան: Բացեք, աղջիկներ, վայելքի սեղանը: *(Իր երկու ընկերներուն հետ կելլե դուրս):*

#### 4

*Իշխանն ու իր զենքերները կհանեն սաղավարտինն ա վահանները, կուրան զինակիրներուն, որոնք կառնեն ու սյուններուն մեջեն կրանին դուրս: Աղջիկներուն մեկ մասը կվազե ձախ սյուններեն դուրս, կբերեն ծաղիկներ, առաջ շաղ կուրան քարե սեղանին, կբերեն սեղանի բազմաձյուղ աշտանակներ և*

գինիով լեցուն արծաթե ավազաններ. կբերեն ոսկի ու արծաթ թասեր, բաժակներ և եղջյուրե գալարուն ըմպանակներ:

*Այդ պարարաստության միջոցին է, որ կխոսվի:*

**ԵՐԻՏԱՍԱՐԴԻ ԶՈՐԱԿԱՆ ՄԸ** – (Առաջ գալով) Բայց կռիվ էր, տանք կռիվ:

**ՀԱՍԱԿԱՎՈՐ ՄԸ** – Թող անպակաս ըլլա կյանքեն սուրբ կռիվը:

**ԵՐԻՏԱՍԱՐԴԻ** – Սարսափելի ջարդ կերան:

**ՈՒՐԻՇ ՄԸ** – (Կատրակով) Կմեղքնամ. թող խնայեիր:

**ԻՇԽԱՆԸ** – Ատ ո՞վ է, որ խնայելու մասին կխոսի: Երբեք, որդիներս, կյանքի կովին մեջ չխնայեք երբեք և ո՞չ ոքի: Խնայելը թուլություն է, մեղքնալը պարտություն: Զարկեք, ով ձեր դեմն է, ով ձեր ճամփան կգոցե: Ով որ քեզի կարգիլե՝ քու թշնամիդ է:

**ԵՐԻՏԱՍԱՐԴԻ** – Զարկեք, հաղթողը մենք ենք:

**ՈՒՐԻՇ ՄԸ** – Ինչ լավ է հաղթող ըլլալը:

**ԵՐԻՏԱՍԱՐԴԻ** – Հաղթող ըլլալ ու կովեն դառնալ:

**ԻՇԽԱՆԸ** – (Երթալով սեղանին գլուխը) Դե՛, հիմա եկե՛ք նստինք, Տիրոջ սեղանը. արդար հատուցում մեր դաժան կովին:

*Աղջիկ ու զորական խառն կնստին: Աղջիկներեն շարերը կմնան ուրքի, կմոտենան ու կծառայեն մեկուն–մյուսին, մեկ–երկուքը կերթան կուգա: Զինակիրները կշարվին իրենց փրկերուն երևը ու կարձանանան:*

*Բազմության կեսը նստած է արդեն, կեսը դեռ ուրքի, որ կխոսվի:*

**ԶՈՐԱԿԱՆ ՄԸ** – (Բաժակը վերցնելով) Կեցցե՛ կռիվը:

**ԿՈՂՔԻ ԱՂԶԻԿԸ** – Կեցցե՛ կովողը:

**ԴԵՄԻ ԶՈՐԱԿԱՆԸ** – Կեցցե՛ գեղեցկությունը:

**ՈՒՐԻՇ ՄԸ** – Կեցցե՛ սերը:

**ԱՂԶԻԿՆԵՐԸ** – Կռիվը կյանքն է աշխարհի:

**ԶՈՐԱԿԱՆՆԵՐԸ** – Սերը վայելքն է աշխարհի:

**ԻՇԽԱՆԸ** – (*Ծիծաղելով*) Կեցե՛ք, կեցե՛ք. մի՛ շտապե՛ք, է՛յ, դո՛ւք, կռի՛վ, է՛յ, դո՛ւք, սե՛ր: Մի՛ բռնկի՛ք այդպես շուտ: Նստեցե՛ք հանգիստ. հպատակվի՛նք հին կարգին: Թասերը պատրաստ, մեր մեծ Աստծուն ձո՛ն եմ ձո՛նելու:

*Աղջիկները գինի կլեցնեն թասերը մեջտեղի գինիի ավազաններեն: Խոր լռություն:*

**ԻՇԽԱՆԸ** – (*Վերցնելով գինիի մեծ եղջյուր մը՝ կերթա կկենսաբազնին առջևը, դենքը դեպի վարագոյրը դարձուցած ու գինին քարձր պահած*) Քեզի՛, ով մեծդ Աստված, Վահագն արի, դուն արևը աշխարհի, դուն կյանքն ու աշխույժ, դուն կռիվ և ուժ, դուն լույս ու զտող, ազնիվը զատող, փառքը ազատող, դուն, որ հաղթեր ես վարի, խավարի, ամեն մոայլի, այլև երկնքին, սև ամպ ու թուխպին, դեհին, վիշապին, աշխարհի ափին, քեզի՛, այգածին, ճառագայթածին, քեզի կձո՛նեմ այս վայելքի եղջյուրը՝ լիքը ազնիվ արբեցնող գինիով, դուն, որ ապրելու ու կռվելու արբեցումը կուտաս մեզի: Տե՛ր, ընդունե՛ մեր ձո՛նը: (*Մեկ-երկու կաթիլ կթափե կրակին, ուժեղ ու պայծառ բոց*):

**ԶԱՅՆԵՐ ԱՄԵՆ ԿՈՂՄԵՆ** – Ընդունված է... ընդունված է... ընդունված է...

**ԻՇԽԱՆԸ** – (*Դառնալով իր տեղը*) Հաղթողի ձո՛նը հաղթողի բազնին վրա մի՛շտ է ընդունված: Խմենք: Կեցցե՛ կյանքն ու իր կռիվը:

**ԲՈՂՈՐԸ** – (*Աղմուկով ու իրարանցումով, նստած, կեցած, թասեր իրարու քախելով*) Կեցցե՛ կյանքն ու իր կռիվը:

*Կիսմեն ու կնստրին. լռություն:*



**ԱՔԵՂԱՆ** – *(Դողդողուն քայլերով առաջ կուգա, ամկնոր վարանքով հայացքը գետին, ձեռքը առաջ մեկնած)* Տվեք թաս մըն ալ ինծի: Ես ալ կուզեմ:

*Ընդհանուր զարմանք ու խոր լռություն:*

**ԻՇԽԱՆԸ** – Դ՞նն հոս ինչ գործ ունիս, սևազգեստ:

**ԱՔԵՂԱՆ** – Տո՛ւր թաս մըն ալ ինծի, ես ալ կուզեմ:

**ԻՇԽԱՆԸ** – Այս եղջուրեն խմել ուզողը կովեն պետք է, որ գա:

**ԱՔԵՂԱՆ** – *(Աղաչավոր)* Մեկ թաս մը միայն, իշխան, ինչ մեծ բան է որ: Անգամ մը միայն, մեկ ումպ մը միայն քու այդ կովի ու վայելքի եղջուրեդ:

**ԻՇԽԱՆԸ** – *(Արհամարհուր)* Տիրոջ սեղանին վրա, ան թշվառ, ոչինչ չի ստացվիր աղաչանքով, գնա մուրացիկներուն սեղանը:

**ԶՈՐԱԿԱՆ ՄԸ** – *(Ծաղրով)* Էյ, բարեկամ, ո՞ր հովերն են քեզի այս կողմը նետեր:

**ԵՐԻՏԱՍԱՐԳ ՄԸ**– Գինիի հոտ է ինկեր ծոմ պահողին քիթը:

**ԻՇԽԱՆԸ** – Տարին տասը չափ ցորեն նվիրեր եմ ես իմ կալերես ձեր անապատին, գնա նստե ու կեր:

**ՀԱՍԱԿԱՎՈՐ ՄԸ** – *(Ծաղրով)* Ու աղոթե՛ք քու ասավածներուդ մեր մեղքերուն համար:

**ՀԱՍ ԶՈՐԱԿԱՆ ՄԸ** – Մեղք... *(Փորը բռնած սասարիկ կիսնդա)* Աղոթե՛, աղոթե՛ մեր մեղքերո՛ն համար... մեր անթիվ մեղքերուն...

*Ընդհանուր հռհռոց:*

**ԱՔԵՂԱՆ** – Իշխան, դուն ինծի չե՞ս ձանչնար:

**ԻՇԽԱՆԸ** – Ա՛յսպես ալ աներես մարդ: *(Բարկացած)* Պիտի հեռանան, թե չէ:

**ՀԱՍԱԿԱՎՈՐԸ** – Ես կձանչնամ քեզի, ես: Դուն այն ցած

վախկոտը չէն, որ սուրդ նետեր ես գետին ու փախեր ես կյանքի կռվեն:

**ԵՐԻՏԱՍԱՐԳ ԶՈՐԱԿԱՆ ՄԸ** – Դո՛ւրս, հայդէ, ցա՛ճ արարած:

**ՈՒՐԻՇ ՄԸ** – Դո՛ւրս, վախկո՛տ:

**ՀԱՍԱԿԱՎՈՐԸ** – Դուն այն մեծամիտ տխմարը չէն, որ կարհամարհես մեր վեհն Վահագնի նվիրած ամենեն վեհ նվերը՝ կյանքը, և քու թշվառ գլուխդ չես ուզեր խոնարհել անոր լույս պատկերին առջևը:

**ԲՈՒՈՐԸ** – Կորսվէ, կորսվէ դուրս:

**ՄԵԿԸ** – Կորսվե դուրս այս սուրբ վայրեն:

**ԵՐԻՏԱՍԱՐԳ ՄԸ** – Աստվածուրա՛ց:

**ՀԱՍԱԿԱՎՈՐԸ** – Դուն այն ամբարտավանը չէն, որ երկրպագել չես ուզեր մեր փրփրածին Աստվածուհիին, ո՛չ անոր նվերը եղող սիրուն, ո՛չ ալ կնոջ գեղեցկությանն ու հմայքին:

**ԱՂԶԻԿՆԵՐԸ** – Դո՛ւրս այդ ամբարտավանը:

**ԱՂԶԻԿ ՄԸ** – Ապո՛ւշ...

**ՀԱՍԱԿԱՎՈՐԸ** – Դուն այն սրբապիղծը չէն, որ կարհամարհես մարմինը, Վահագնի ու Աստղկան այդ հրաշալի կերտվածքը:

**ԱՂԶԻԿ ՄԸ** – *(Քովի տղան մայրնասնիշ)* Արհամարհել այս մարմինը. այս առո՛ղջ, այս ձկո՛ն, այս ուժեղ մարմինը:

**ԱՂԶԻԿՆԵՐԸ** – Սրբապիղծ...

**ԵՐԻՏԱՍԱՐԳ ՄԸ** – *(Քովի աղջիկը մայրնասնիշ)* Այս քնքո՛ւշ, այս գեղեցիկ, այս հոյակա՛յ մարմինը:

**ԵՐԻՏԱՍԱՐԳՆԵՐԸ** – Սրբապիղծ:

**ԱԲԵՂԱՆ** – *(Ամեն հարձակման ավելի ու ավելի խորտակված, ավելի ու ավելի գլուխը վար կկախե ու քայլ-քայլ կքաշվի եր: Վերջին խոսքերուն մտած է արդեն իր նախորդ տեղը՝ սյուներուն ետևը ու ալ չերևար):*

## 6

**ԻՇԽԱՆԸ** – Թողն՛ք, թողն՛ք կորչի: Ես ձոն ունիմ ձոնելու: Առն՛ք թասերը:

*Բոլորը կլեռնեն:*

**ԻՇԽԱՆԸ** – *(Եղջյուրը առած կերթաւ նորեն բազնին առջևը ու գինին վեր բարձրացնելով)* Քեզի՛, ո՛վ վեհդ դիցուհի, ո՛վ փրփրածինդ Աստղիկ, դո՛ւն, որ անարատ ես ու սքանչելի, քու ելած փրփուրիդ նման. դո՛ւն վերին գեղեցկություն, դո՛ւն գերագույն հմայք ու քնքշություն, քու տված լույսիդ նման: Դո՛ւն, որ աղբյուրն ես սիրու, հույսերու և հուզումներու, քեզի օրորող ալիքներուն նման, քեզի՛, ծովածին, քեզի՛ կնվիրեմ այս վայելքի եղջյուրը՝ լիքը ազնիվ ու արբեցնող գինիով, դո՛ւն, որ գեղեցկության ու սիրու վայելքը, հեշտանքն ու արբեցումը կուտաս մեզի: Ընդունեն, դիցուհի՛, իմ ձոնս: *(Մեկ-երկու կաթիլ կթափե կրակին. ուժեղ ու պայծառ բոց):*

**ՁԱՅՆԵՐ ԱՄԵՆ ԿՈՂՄԵՆ** – Ընդունված է... ընդունված է...

**ԻՇԽԱՆԸ** – *(Դառնալով իր տեղը)* Հաղթողի ձոնը միշտ է ընդունված գեղեցկության բազնին վրա: Խմեն՛ք: Կեցցե գեղեցկությունն ու սերը:

**ԲՈՂՈՐԸ** – *(Աղմուկով ու ծիծաղով, կատակներով, ընպանակները իրարու բախելով)* Կեցցե՛ գեղեցկությունն ու սերը:

*Կիսմեն ու կնասրին. լռություն:*

## 7

**ԱԲԵՂԱՆ** – *(Դուրս կելլե իր անկյունեն և վճռական կմտքենսա Հասար գինվորականին, ձեռքը կդնե անոր ուսին ու կտրուկ)* Տե՛ղ տուր ինձի:

*Ընդհանուր զարմանք:*

**ՀԱՍՏ ԶՈՐԱԿԱՆԸ** – Նորէն, այ մուրացկան:

**ԱԲԵՂԱՆ** – *(Ավելի կտրուկ ու խեթ)* Ես ալ կուզեմ նստիմ այս սեղանին:

**ՀԱՍՏ ԶՈՐԱԿԱՆԸ** – Քեզի տեղ չկա այս սեղանին:

**ԱԲԵՂԱՆ** – *(Գրգռված ու դողալով)* Ես պէտք է նստիմ այս սեղանին:

**ՀԱՍՏ ԶՈՐԱԿԱՆԸ** – Տեղ չկա՝ ըսինք քեզի. սուր չունեցողին հոս տեղ չկա. ինչ ես կպեր, ձիոն ճանձ:

**ԱԲԵՂԱՆ** – *(Հանկարծ կփաթթովի Հասար զորականի մարմինն, կվերցնէ նստարանէն, կգլխորե գետրին):*

*Նախ ընդհանուր անբարեհաճ հուզում ու իրարանցում, որը սակայն հանկարծ տրեղի կուտա բռուն ու միահամուռ ծիծաղի մը:*

**ԱԲԵՂԱՆ** – *(Ծունկը կդնէ նստարանին ու բռունցքը սեղանին գարնելով)* Ես պէտք է նստիմ այս սեղանին:

**ՀԱՍՏ ԶՈՐԱԿԱՆԸ** – *(Վեր կթռչի կատրղած, կքաշե սուրը ու կվազե Աբեղային վրա)* Անդին, անզգամ, չեմ ուզեր պղծել այս սուրբ մեծանին գավիթը քու պիղծ արյունովը:

**ԱԲԵՂԱՆ** – *(Հաստար ու ծանր քայլերով կմտրենա անոր: Վայրկյան մը շեշտ կդիպեն իրար մոլեգին: Հանկարծ Աբեղան բոլոր ուժովը կգարնէ դիմացինի թևին, որուն սուրը կիյնա վար: Աբեղան իսկոյն կխլէ ու նորեն ծունկը դնելով նստարանին) Ահա՛, իշխան, և իմ սուր:*

*Ընդհանուր ոգևորություն, աղմուկ, հիանում:*

**ԱՂԶԻԿՆԵՐԸ** – *(Իրարու)* Ինչ ուժ, ինչ ուժ...

**ԱՂԶԻԿ ՄԸ** – Ինչ երկաթի ձեռք:

**ՀԱՍՏ ԶՈՐԱԿԱՆԸ** – Ո՛չ, իշխան, դուն տեսար բնությունը, դուն բոլորը տեսար, իմինս է այդ սուրը:

**ՁԱՅՆԵՐ** – Ո՛չ, ո՛չ, ալ ո՛չ:

**ԵՐԻՏԱՍԱՐԴ ԶՈՐԱԿԱՆ ՄԸ** – Քու մեջքդ դպավ գետին:

**ԻՇԽԱՆԸ** – Սուրը անորն է, որուն ձեռքը որ է:

**ԲՈՂՈՐԸ** – Ապրի մեր արդար իշխանը:

**ՁԱՅՆԵՐ** – Ապրի մեր սոր ընկերը:

**ՄԵԿԸ** – *(Մոտենալով պարտվածին)* Կներեն, բարեկան, բայց կտեսնես, որ քեզի այլևս տեղ չկա հոս:

**ՀԱՍՏ ԶՈՐԱԿԱՆԸ** – Աղէկ, ես կերթամ, բայց մենք դեռ կպատահինք, սևազգեստ. կան սուրս կուտաս ինձի, կան կյանքդ:

**ԱԲԵՂԱՆ** – Կյանքս՝ գուցե:

## 8

**ՁԱՅՆԵՐ** – Գինի տվեք հաղթողին:

**ԵՐԻՏԱՍԱՐԳ ՄԸ** – Վերցուր անոր թասը: Հիմա ան ալ քուկդ է:

**ԱԲԵՂԱՆ** – *(Կաննե Հասար զորականի ընկանակը և կներե անոր երևեն)* Ես չեմ ուզեր ուրիշին խմուկը:

**ԱՂԶԻԿ ՄԸ** – *(Թւը երկարելով)* Ա՛ն, քա՛ջ, իմ թասս:

**ԱՂԶԻԿՆԵՐԸ** – *(Երկնցնելով իրենց թասերը)* Ա՛ն իմ թասս... ա՛ն իմ թասս... առ իմինս...

**ԱԲԵՂԱՆ** – Իշխան, քիչ մը առաջ ես քու եղջուրդ խնդրեցի, այն եղջուրդ, որով ձոնդ ձոնեցիր:

**ԻՇԽԱՆԸ** – *(Եղջուրի միջինը կթափե ու կուրա մուրի աղջկանը լուրջ ու հանգիստ)* Լեցնոր ու տուր իրեն:

**ԱՂԶԻԿԸ** – *(Կկարարե ու կուրա քնքշանքով խորապես սրտանց)* Ա՛ն:

**ԻՇԽԱՆԸ** – Առաջին թասը, նորէկ, գիտցիր, միշտ Վահագնինն է. այդպես է աշխարհի հին օրենքը:

**ԱԲԵՂԱՆ** – Առաջին թասը... ձեր այս կյանքի սեղանին առաջին թասը ես կխմեմ... կյանքի ու աշխարհի օրենքովը... ես կխմեմ կովի կենացը, կովի՛, որ վերն է խավարին ու ամպերուն մեջը, ինչպես որ կըսեք, կովի՛, որ դուրսն է, աշխարհի վրա,

ուրկե դուք կուգաք. կռվի՛, որ հո՛ն է, ծովուն մեջ, փոթորկի  
ատեն, ուրկե են կուգամ:

**ԱՂԶԻԿՆԵՐԸ** – *(Սաստիկ հեքսաբրքիր, փսիսուքով իրարու)*  
Ծովեն... ծովեն...

**ԱԲԵՂԱՆ** – Թող օրհնված ըլլա կյանքի կռիվը: *(Կխմե):*

**ԶԱՅՆԵՐ** – Անո՛շ, անո՛շ... Հաջողություն, հաղթանակը  
միշտ քեզի՛...

**ԻՇԽԱՆԸ** – Աղէկ: Լեցնոր երկրորդ թասը:

**ԱՂԶԻԿՆԵՐԸ** – *(Իրար անցած)* Գինի՛, գինի՛:

**ԱՂԶԻԿԸ** – *(Նորեն կլեցնե ու կուրա սրբանց)* Ա՛ռ:

**ԻՇԽԱՆԸ** – Երկրորդ թասը, նորէկ, գիտցիր, միշտ Աստղի-  
կինն է և այսպես է աշխարհի հին օրենքը:

**ԱԲԵՂԱՆ** – Երկրորդ թասը... այո՛, Աստղիկինն է. ան, որ  
ինչպես կըսեք, ծնավ գեղեցիկ հորդ փրփուրեն, դուրս ելավ  
սիրարծարծ հուզվող ու եռացող ալիքներեն. ան, որ փոթորկի  
անդունդներուն մեջը կգալարի ու կհափշտակե քեզի: Իշխան,  
այս թասը ես կխմեմ քու աղջկանդ կենացը: *(Կխմե):*

**ԱՂԶԻԿՆԵՐԸ** – Սեղամն... Սեղամն...

**ԻՇԽԱՆԸ** – Աղջիկս...

**ԲՈԼՈՐԸ** – *(Սաստիկ հուզված, վսիտով ու սպասողական դիր-  
քով կնային իշխանին կողմը):*

**ՀԱՍԱԿԱՎՈՐ ԶՈՐԱԿԱՆ ՄԸ** – Իշխան, քո աղջիկդ...

**ԻՇԽԱՆԸ** – Կեցիր, այ տղա, կարծես քու դենքդ ծանոթ է  
ինծի:

**ԱԲԵՂԱՆ** – *(Թեթև հեզնանքով)* Հիմա, իհարկե, իշխան,  
հիմա պետք է, որ ճանչնաս:

**ԱՂԶԻԿՆԵՐԸ** – *(Իրարա փսիսոցով)* Ո՞վ է, ո՞վ է, ո՞վ է, որ:

**ՔՈՒՐՄԸ** – *(Կերևա վարագոյրին առջևը)* Պատրաստ եղեք,  
հաղթողներ, ու թողեք սեղանը: Արևելքը շիկներ է, ծովը ծիրան  
է հագեր, ու թարմ բնությունը թափ կուտա քունը աչքերեն Մեծ

Աստծուն երկրպագելու: Լուսատուն ու լուսաստղը գրկելու են հիմա իրար, պատրաստ եղէք դուք ալ երկրպագելու:

**ԱՄԵՆ-ՔԸ** – *(Իսկոյն վեր կցարկեն իրենց տերերեն, զինսկիրները շրասկ կրերեն սաղավարտներն ու վահանները իրենց տերերուն, որոնք կհագնին ու կերթան բագնին առջևը երկու զուգահեռ տողաշար կկազմեն երեսները վարագոյրին, աջ՝ զորականները, ձախ՝ աղջիկները):*

**ԻՇԽԱՆԸ** – *(Մոտենալով Աբեղային)* Տնր ինծի ձեռքդ ու երթանք երկրպագելու. երկրպագելու մեր վեհ աստվածներուն:

**ԱՔԵՂԱՆ** – Երկրպագելու... նոր աստվածներուն:

**ԻՇԽԱՆԸ** – Հին աստվածներուն. միշտ հին ու միշտ նոր ու միշտ հավիտյան: Եկո՛ր:

**ԱՔԵՂԱՆ** – *(Անշարժ ու համառ կեցած է. աչքերը գետին):*

**ԻՇԽԱՆԸ** – Եկո՛ր, կըսեն քեզի, շնուտ. դո՛ն, որ խմեցիր կովի կենացը, դո՛ն, որ խմեցիր իմ Սեղայիս կենացը, պետք է, որ գաս: Տնր ձեռքդ ինծի: *(Կրռնե անոր թնեն ու տեսակ մը կես-հրելով կտանի առաջ այդ տողաշարին մեջեն: Բագնին մեկ կողմը ինքը կանցնի, մյուս կողմը կմնա Աբեղան):*

## 9

Վարագոյրին ետեն կլսվի շեփորին կանչը մեկ-երկու ելևէջ, որուն կհաջորդէ քորմերու ուրախ ու հաղթական երգը: Երգի միջոցին կբացվի կամաց-կամաց ձակտի վարագոյրը, և տեսարանի մնացած բոլոր մասերը հեկզհեկե կթաղվին մութի մեջ:

Խորքի բեմը, որ ավելի ալ բարձր է, կներկայացնէ Սևանի գագաթն իր ավերակով: Աջ՝ կեցած են քորմերը, բոլորն ալ ձերմակազգեստ, կործքերնուն ոսկի արև մը. ձախ՝ կեցած են քրմուհիները, բոլորն ալ ձերմակազգեստ. հերարձակ ու մազերնուն մեջ խրած խոշոր աստղ մը: Հեղ մը քորմերը

կերգեն, հեղ մը քրմնուհիները, վերջը բոլորը միասին:

Նոր բեմի խորքը հորիզոնն է, ծովուն ու երկնքին իրար կպչող ծիրը: Երկինքը շառագոյն է, Կեղ-Կեղ դեղին. ծովը լերթ-կարմիր, Կեղ-Կեղ ծիրանի: Երգի միջոցին հետզհետե կնշմարվի հսկա արևի մը սկավառակը, որ կբարձրանա կամաց-կամաց: Երբ կեսին չափը դուրս է եկած ջուրեն՝ արևը կբացվի ոսպրեի մը պես ու կափարիչը կիյնա ջուրին երեսը՝ արևի ցոլքին նման: Ոսպրեին մեջը վառ կփայլի աչք խորիտ փվող արծաթ-մարգրիտ փայլով մը: Եվ այդ վառ փայլին մեջ կեցած է հաղթական Վահագնը մերկ, բարձր, շիրակ, հաղթ ու առողջ, աջ ձեռքը առաջ պարզած, մազերն ու մորուքը ասորական ձևի և շեկ, աչքերը բոցոտ: Անոր ձախ կողմը թեթև թեթ է ինկած նազանքով ծովային խուրերու ու ծաղիկներու վրա Աստղիկը, սա թեթև մը փաթթված է Վահագնին ու գլուխը հենած անոր մարմնին, ինքը՝ մերկ, ճկուն, նորբ, մազերուն մեջ ահագին աղամանդե աստղ մը ու մարմնին վրա մեկ-երկու թել ծովային նորբ ու երկար սեգ:

Երգեցողությունը կրկնե մինչև ոսպրեի լրիվ բացումը: Երբ երգը հանկարծ կկտրվի, կլավի նորեն շեփորին կանչը ու բոլոր բազմությունը իսկոյն կթափվի գետին խորը երկրպագությամբ: Քորմերն ու քրմնուհիները կխոնարհին մինչև մեջքը: Ոտքի կմնա միայն Արեղան՝ ողիղ և անշարժ:

**ՔՈՒՐՍԸ** - (Խումբին մեջեն, ահեղ) Երկրպագե՛, դճն, շվարած:

**ԱԲԵՂԱՆ** - (Անշարժ է):

**ԻՇԽԱՆԸ** - (Սարսափահար ու կիսաձայն) Երկրպագե՛, ան-միտ:

**ԱԲԵՂԱՆ** - (Անշարժ է):

**ՍԵՂԱ** - (Կերևա հանկարծ բարձր բեմի սանդուղներուն վրա, հանգիստ առաջ կուգա. կկենա ողիղ Արեղային դեմը, քնքուշ ու



հրամայական) Երկրպագէ՛, երկրպագէ՛ ծուլուն ու իր աստծուն:

**ԱՐԵՂԱՆ** – (Նախ գլուխը կթօքէ. ետքը ծոնկերը քիչ-քիչ կծալլվին ու հանկարծ կիյնա գերին):

Սաստիկ դղրդուն մը և մեկ անգամեն կկորչի ամեն բան, կտիրե խորին մութ ու լռություն:

## 10

Երբ թանձր մութը կսկսի փարափիլ՝ տեսարանը փոխված է: Հերզհերե բացվող աղոյր լոյսին մեջեն կնշմարվի հասարակաց սրահը ու ցած սյուններու զոյգ շարք մը տեսարանին ճիշտ մեջտեղը: Եկեղեցի է: Խորքը կերևա միայն երկու վառ մոմ, որոնք առջև երկու վանական սաղմոս կկարդան փոխնիփոխ: Անոնց երևը կհաաշրջանով կեցած են վանականները երեսնին դեպի խորան:

Մշայլ ու մութ, ընթերցումը տխուր ու միայլար:

Լռիկ աղոթող վանականներու շարքին մեջ հանկարծ իլրրոմ մը կիյնա:

**ՎԱՆԱԿԱՆ ՄԸ** – (Մոսաներուն կռնակեն ծովելով դեպի ետ, փսիսոքով) Զո՛ւր, ջո՛ւր, երեսին ջո՛ւր:

Չախ կողմի խորքի սյուններուն մեջեն կերևան երկու վանական, որոնք Աբեղայի թները մտած ու բարձրացուցած կբերեն առաջ: Աբեղան թոյլ ու անզգա: Մովսես վանականը կգա անոնց երևեն՝ օգնելով:

**ԱԳԱՍ ՎԱՆԱԿԱՆ** – (Արագ դուրս աջ կողմի սյուններուն մեջեն, կմտրենա Մովսեսին, երբ Աբեղան արդեն անցուցած են, և կհասձայն) Ի՛նչ է, ի՛նչ կա, ի՛նչ եղավ:

**ՄՈՎՍԵՍ ՎԱՆԱԿԱՆ** – (Միշտ կհասձայն) Աբեղան մարեցավ: Կեցեր էր առջևս կաղոթեր, մեյ մըն ալ տեսա գլուխը կախեց, քիչ մը ծոեցավ ու բոլոր ուժովը ինկավ գետին:

**ԱԳԱՄ ՎԱՆԱԿԱՆ** – Խնդճ արեղա, երևի գիշերը շատ է ձգներ: Տարե՛ք աղբյուրը, տարե՛ք աղբյուրը: *(Եվ ինքը կդառնաս եր իր նախորդ տեղը):*

**ՄՈՎՍԵՍ ՎԱՆԱԿԱՆ** – *(Կշտապե գացողներուն ետևեն):*

*Ու նորեն ամեն ինչ հանդարտ է, ու նորեն որոշ կլավի սաղմոսասացներուն միախար, թախծուր ու ձանձրացած ձայնը:*

**ԱՌԱՋԻՆ ՍԱՂՄՈՍԱՍԱՅ** – «Ոչ գոյ բժշկութիւն մարմնոյ իմոյ յերեսաց բարկութեան Քո»:

**ԵՐԿՐՈՐԴ ՍԱՂՄՈՍԱՍԱՅ** – «Ո՛չ է խաղաղութիւն ոսկերաց իմոց յերեսաց մեղաց իմոց»:

**ԱՌԱՋԻՆ ՍԱՂՄՈՍԱՍԱՅ** – «Անօրէնութիւնք իմ բարձրացան քան զգլուխ իմ, որպէս բեռն ծանրացան ի վերայ իմ»:

**ԵՐԿՐՈՐԴ ՍԱՂՄՈՍԱՍԱՅ** – «Նեխեցան և փտեցան վերք իմ յերեսաց անզգամութեան իմոյ»:

Սաղմոսի միջոցին կամաց-կամաց, շատ հանգիստ տեսարանը կգոցվի, այնպէս որ վերջին քանի մը բառը կլսվի դեռ գոցվելէն ետքը:

# ԵՐՐՈՐԴ ՏԵՍԱՐԱՆ

## ԻՇԽԱՆՈՒՇԻՆ ԱՌԱՆՁՆԱՍԵՆՅԱԿԸ

Փոքրիկ, կոկիկ, ցած առաստաղով սենյակ մը ամբողջովին գորգերու մեջ: Ճակատը բազմոց, մուրիկը ցածիկ այթոռակ մը: Անկյունը ձերմակ ֆոնի վրա սև սիրուն խաչելություն մը ձերմակ նեղ սեղանին, երկու կողմը երկու ամանի մեջ վարդի թարմ փունջեր: Առաստաղեն կախված է արաբական գունավոր լապտեր մը:

Մուտքը աջեն ու ձախեն:

### 1

Իշխանուհին կեցած է բազմոցին առջևը ձիգ ու անշարժ: Քիչ մը հեռուն, անոր դեմը, դռան մուրիկ կեցած է Վանահայրը: Երկուքն ալ հայացքնին ներած են գեպին:

**ՎԱՆԱՀԱՅՐԸ** – (Հանգիստ ու պաշտոնական)... Ա՛ն է կապեր մեզի իրար, ան ծնունդն է մեր երկուքի, անիկա մեր կապն է. իսկ մեր մեջը չի պիտի ըլլա ո՛չ մեկ կապ. մեր մեջեն պետք է խզվի ամեն կապ:

**ԻՇԽԱՆՈՒՇԻՆ** – (Գլուխը բարձրացնելով ու նայնպես հանգիստ) Վարդապետ, այդ եկեղեցին ո՛չ ոք քանդել չի կրնար: Ո՛չ դուն, ո՛չ ես՝ ո՛չ մեկը, անոր հիմը մեր սրտերուն մեջն է դրված:

**ՎԱՆԱՀԱՅՐԸ** – (Խիստ) Անոր հիմը, իշխանուհի՛, մեղքի վրա է դրված:

**ԻՇԽԱՆՈՒՇԻՆ** – Ինչպէս թե՛ մեղքի:

**ՎԱՆԱՀԱՅՐԸ** – Այո՛, մեղքի՛:

**ԻՇԽԱՆՈՒՇԻՆ** – (Հպարտ) Մեղքը միշտ օտար է եղեր ինձի և միշտ ալ օտար պիտի մնա ինձի:

**ՎԱՆԱՀԱՅՐԸ** – Կի՛ն, նորէն խաբել կուզես:

**ԻՇԽԱՆՈՒՀԻՆ** – *(Ապշած)* Խաբէմ:

**ՎԱՆԱՀԱՅՐԸ** – Այո՛, խաբես ու կեղծես:

**ԻՇԽԱՆՈՒՀԻՆ** – Ես:

**ՎԱՆԱՀԱՅՐԸ** – Դո՛ւն, դո՛ւն: Ի՛նչ կզարմանաս, դո՛ւն, որ ամբողջ կյանքդ խաբեր ես ու շարունակ կեղծեր: Խաբեր ես տարիներ ու տարիներ այն մարդը, որ իբրև իր կինը իր տունն է տարեր քեզի, խաբեր ես քու զավակներդ, որոնք շոյանքի կարոտով գիրկդ են վազեր: Խաբեր ու կապեր ես բոլոր շրջապատողներուդ աչքերը, խաբեր ես և ինձի, թեև, այո՛, առանց խոստում մը տալու, առանց բառ մը արտասանելու, խաբեր ես և քեզի՛, քեզի քու աչքիդ նահատակ ես նկարեր, դո՛ւն, որ մարդդ մեռեր է թե չէ, վազեր եկեր ես հոս՝ ինձի հետ նոր շենք շինելու, քու կեղծիքիդ աստծուն նոր տաճար կառուցանելու: *(Բիչ մը լռու):*

**ԻՇԽԱՆՈՒՀԻՆ** – *(Կեցած է ձիգ ու հպարտ, ունքերը կիպած. ո՛չ շարժում, ո՛չ ծայրուն):*

**ՎԱՆԱՀԱՅՐԸ** – Իհարկե, չե՞ որ քու աստվածդ սերն է: Ո՛վ սովիեստութային: Ի՛նչ է սերը, ինչի՞ սեր է Աստված, արուի՞ ու էգի՞: Կին, մեղանչանք է քու անունդ, կեղծիք է քու հոգիդ ու զգայարանքներդ, քու աշխարհդ: Մեղքի վրա է շինված այդ եկեղեցին:

**ԻՇԽԱՆՈՒՀԻՆ** – Ըսի՛ր:

**ՎԱՆԱՀԱՅՐԸ** – Ըսի, ինչ որ պարտական էի ըսելու:

**ԻՇԽԱՆՈՒՀԻՆ** – Դե՛, բաց է դուռը:

**ՎԱՆԱՀԱՅՐԸ** – *(Վիրավորված)* Իշխանուհի՛:

**ԻՇԽԱՆՈՒՀԻՆ** – Ի՛նչ է: Գնա՛, գնա՛ քանդե:

**ՎԱՆԱՀԱՅՐԸ** – Ատիկա իմ պարտքս է և ես գիտեմ, բայց պետք է, որ դո՛ւն ալ կատարես քու պարտքդ:

**ԻՇԽԱՆՈՒՀԻՆ** – Այսի՛նքն: Ի՛նչ է ուզածդ:

**ՎԱՆԱՀԱՅՐԸ** – Պետք է անմիջապես հեռանաս հոսկե,

Ցամաքաբերդեն:

**ԻՇԽԱՆՈՒՀԻՆ** – Հեռանամ... այդպէս կիրամայես:

**ՎԱՆԱՀԱՅԻՐ** – Ըսի, ինչ որ պարտական էի ըսելու:

**ԻՇԽԱՆՈՒՀԻՆ** – Կիրամայես... (*Հանկարծ բռռն բարկությամբ*) Եվ ո՞վ ես դուն, ի՞նչ գործ ունիս հոս, հո՛ս, իմ դեմս, ո՞վ ես դուն:

**ՎԱՆԱՀԱՅԻՐ** – Ես... ես վանական մըն եմ, իշխանուհի՛, քաշված անապատը:

**ԻՇԽԱՆՈՒՀԻՆ** – Անապատ մըն ես դուն ինքդ և օտար, օտար հոգիիս, ինչպես ամենքը: Ամբողջ կյանք մը ապրեր եմ ես օտարներու մեջ, օտար եմ եղեր ես ինքս բոլորին, օտար ու մի՛նակ, մի՛նակ պալատներու ամբոխին մեջ, միս-մի՛նակ իմ իսկ պալատիս, իմ սեփական ընտանիքիս մեջ, մի՛նակ, մի՛շտ: Եվ հոգիիս միակ լուսավոր աստղը եղեր է այն մտածումը, որ հեռո՛ւ, հեռո՛ւ կա ուրիշ հոգի մը, իմինիս պես մի՛նակ, իմինիս պես լքված, իմինիս պես կարոտ, եղբայր հոգի մը, որ կհասկնա ինձի ու իմ կրած ծանր խաչս, որ մոտիկ է ինձի ու կսիրե ինձի: (*Լռո՛ւ*):

**ՎԱՆԱՀԱՅԻՐ** – (*Կեցած է անշարժ ու լարված, բռունցքները սեղմած՝ տեսակ մը կռվի պատրաստ դիրքով*):

**ԻՇԽԱՆՈՒՀԻՆ** – Այդ սարսափելի, այդ հավիտենական, այդ խելագարցնող մենության ձեռքեն փախած, եկեր ապաստաներ եմ հո՛ս, վերջապես միասին ըլլալու, միասին ըլլալու հոգիի մը հետ, միասին ապրելու. միասին ստեղծելու շենք մը, այն միակ հոգիին հետ, որ ինձի կհասկնա, որ հեռուեն ինձի հետ է եղեր ամբողջ կյանքս: Եվ ահա թե ինչպես կհասկնա ինձի այդ միակ հոգին: Ես կի՛ն, ես մե՛ղք, ես է՛գ ու խաբեբա՛: (*Ձայրացած*) Գնա՛, հեռացի՛ր:

**ՎԱՆԱՀԱՅԻՐ** – Ավարտե՛, ու կերթա՛մ:

**ԻՇԽԱՆՈՒՀԻՆ** – Ոչի՛նչ չունիմ քեզի հետ ավարտելու: Ապ-

րեր եւ միշտ մինակ ու օտար, մինակ ու օտար ալ կիջնեն գերեզման: Անմտություն է ճակատագրին հետ կովիլը: Գնա՛, գնա քանդէ՛, փո՛ւ տուր այն քարերը. իմ տաճարս արդեն փուլ եկավ:

**ՎԱՆԱՀԱՅՐԸ** – *(Խոժոռ)* Ներե՛, իշխանուհի՛, եթե ավելորդ խոսք ըսի: Ես ավելի ինձի կխոսեի, քան քեզի՛: Ես ուզեցի, որ ճշմարտությունը մերկ կանգնի մեր առջև, ես ուզեցի բանամ մեր երկուքիս ալ աչքերը:

**ԻՇԽԱՆՈՒՀԻՆ** – Եվ բացի՛ր, շնորհակալ եմ:

**ՎԱՆԱՀԱՅՐԸ** – Կցավիմ, եթե բաց աչքով տեսածդ ան չէ. ինչ որ կուզեիր: Աշխարհիս երեսին եթե տեսնել կուզես, ինչ որ սրտիդ ուզածն է՝ պետք է նայիս փակ աչքերով:

**ԻՇԽԱՆՈՒՀԻՆ** – Ճշմարիտ է:

**ՎԱՆԱՀԱՅՐԸ** – Այդ ճշմարտությունը ես քեզմե սորվեցա... ասկե ուղիղ քսանհինգ տարի առաջ: Ներե՛, իշխանուհի՛: Եվ կարծեմ մեր մեջ ալ մաքրված է ամեն հաշիվ:

**ԻՇԽԱՆՈՒՀԻՆ** – Իմ բոլոր հաշիվներս՝ ա՛լ մաքրված են կյանքի մեջ:

**ՎԱՆԱՀԱՅՐԸ** – Մաքրե վերին հաշիվներդ: Մնաս բարով, իշխանուհի՛:

*Իշխանուհին կեցած է լուռ ու անշարժ, մինչ Վանահայրը հանդարտ ու գլխահակ կելլե դուրս: Իշխանուհին կամաց ու փեսակ մը ակամա կսահի վար ու խորտակված կնարի բազմոցին, ձեռքերը անուժ մեկը բազմոցին վրա նետած, մյուսը՝ գոգը. անկյանք հայացքը կերի մը հառած:*

## 2

**ՊԱՌԱՎԸ** – *(Սրնելով հսկառակ դռներն)* Մինակ ես:

**ԻՇԽԱՆՈՒՀԻՆ** – *(Տխոր գլուխը ձոճելով)* Մինակ, մինակ...

**ՊԱՌԱՎԸ** – Գնա՛ց:

**ԻՇԽԱՆՈՒՇԻՆ** – Ո՞վ:

**ՊԱՌԱՎԸ** – Վանահայրը:

**ԻՇԽԱՆՈՒՇԻՆ** – Չգիտեմ:

**ՊԱՌԱՎԸ** – Ի՞նչ ըսավ որ:

**ԻՇԽԱՆՈՒՇԻՆ** – Ո՞վ:

**ՊԱՌԱՎԸ** – Վանահայրը:

**ԻՇԽԱՆՈՒՇԻՆ** – Չգիտեմ: (*Քիչ մը լուռ*) Բեր ինծի այն...

**ՊԱՌԱՎԸ** – Ի՞նչը, իշխանուհի:

**ԻՇԽԱՆՈՒՇԻՆ** – Հատակագիծը:

**ՊԱՌԱՎԸ** – Եկեղեցիին:

**ԻՇԽԱՆՈՒՇԻՆ** – (*Տխուր գլխով կրնե*):

**ՊԱՌԱՎԸ** – (*Դուրս կելլե իր եկած դռնովը և իսկոյն ալ կվերադառնա կուրս ոլորը*) Ա՛ռ: (*Ինքը կքաշվի դեպի խաչելութունը*):

**ԻՇԽԱՆՈՒՇԻՆ** – (*Կբանա հարակագիծը, կնայի քիչ մը, կբարձրացնե, կհամբուրե և հանգիստ ու կանոնավոր շարժումներով կսկսի պարտե՛լ՝ զսպելով հեկեկանքը, մինչդեռ կործքը ուժգին կելլե՛ջե, և արցունքները սռայ կթափին, սռանց ծայրուն մը հանելո*):

**ՊԱՌԱՎԸ** – (*Եր նայելով ապշած*) Ատ ի՞նչ կրնե իշխանուհին:

**ԻՇԽԱՆՈՒՇԻՆ** – (*Ձայնը դողդոջուն*) Չե՞ս տեսներ: Կպատռեմ:

**ՊԱՌԱՎԸ** – Կպատռե՞ս, ինչո՞ւ:

**ԻՇԽԱՆՈՒՇԻՆ** – Ալ... ալ վերջացավ:

**ՊԱՌԱՎԸ** – (*Ուրախ*)՝ Վերջացա՞վ. ավարտեցա՞վ եկեղեցին:

**ԻՇԽԱՆՈՒՇԻՆ** – Այո՛, ավարտեցավ:

**ՊԱՌԱՎԸ** – Ի՞նչ կըսես: Դե՛, աչքը լույս իշխանուհիիս. ալ ինչո՞ւ ես վշտացեր:

**ԻՇԽԱՆՈՒՇԻՆ** – Վշտացե՛ր, ո՞վ, է՛ս, ամենևին: Չե՞ս տեսներ՝ պառավ, ինչպես ուրախ եմ, ինչպես բախտավոր: Չե՞ս տեսներ՝ կուլամ:

**ՊԱՌԱՎԸ** – (Հուզված ու երկյուղած) Այո՛, իշխանուհիս կուլա... (Առջևը չոքելով) Կուլա՛ տիրուհիս: Ես քու լացդ դեռ չէի տեսեր, այնքան վշտեր, այնքան ցավեր էիր տեսեր: Եվ ի՛նչ տարօրինակ լաց է եղեր ուրախության լացը:



# ՉՈՐՐՈՐԴ ԱՐԱՐ

## ԱՌԱՋԻՆ ՏԵՍԱՐԱՆ

### ԱԲԵՂԱՅԻ ԽՈՒՅԸ. ԳԻՇԵՐ. ՃՐԱԳ

#### 1

Արեղան պառկած է անկողնին, սնարին կողմը նստած է Կույր վանականը արձանի նման շիտակ: Ոտքին կողմը՝ անկողնի եզերքին նստած է Սիմոն վանականը, որ անընդհատ համրիչ կշռջե շուտ-շուտ հորանջելով:

**ԵՐԻՏԱՍԱՐԴ ՎԱՆԱԿԱՆ ՄԸ** – *(Կեցած է սեղանին մուրիկ, կիսադա ճրագին հետ ու կիսուսի ծանր-ծանր, խորհրդածելով)* Եվ ինչքան, ինչքաններ են սակայն այդպես անմիտ: Ա՛յ, ամբողջ այդ դուրսիները: Դժբախտներ: Փանք քեզի, Աստված, որ լուսավորել ես մեր միտքը:

**ՍԻՄՈՆ ՎԱՆԱԿԱՆԸ** – *(Հորանջելով)* Փանք քեզի, Աստված:

**ԵՐԻՏԱՍԱՐԴ ՎԱՆԱԿԱՆԸ** – Մեյ մը ատոնց հարցնող ըլլա՝ ո՛վ մարդ, ի՞նչ ես գտեր այդ ձախողություններու, այդ տաժանակիր աշխատանքի, այդ կարոտություններու, այդ կովի ու դառնության հովտին մեջ, որուն աշխարհք անունը կուտան: Այդպես ալ հիմար հաշիվ: Քանի մը խղձուկ վայելքներու, քանի մը չնչին հաճույքներու համար մարդ առնէ ու զոհէ իր հանդերձյալ կյանքի հավիտենական երանությունը:

**ԱԲԵՂԱՆ** – *(Պառկած տեղէն առանց դիրքը փոխելու՝ հարիկ-հարիկ)* Հայր սուրբ, տեսեր ես դուն երբեք արևի ծագումը:

**ԵՐԻՏԱՍԱՐԴ ՎԱՆԱԿԱՆԸ** – Բ՛նչ:

**ԱԲԵՂԱՆ** – Եղեր ես դուն երբեք արևին տաճարը:

*Երկու վանականները սաշած կնային իրարու:*

**ԵՐԻՏԱՍԱՐԴ ՎԱՆԱԿԱՆԸ** – *(Կմոտենա սնկողնին ու ձեռքը հիվանդի ճարակին դնելով)* Սանն է: Արթոնն ես, արեղա՛:

**ԱԲԵՂԱՆ** – Ես արթոնն եմ: Ես արթնցա, երբ արևը ծագեցավ: Իսկ դո՞ւք, դո՞ւք...

**ԵՐԻՏԱՍԱՐԴ ՎԱՆԱԿԱՆԸ** – Մենք կխոսինք, արեղա՛:

**ԱԲԵՂԱՆ** – Կլսեմ՝ կխոսիս: Գնա՛, դիտե արևին ծագումը:

**ՍԻՄՈՆ ՎԱՆԱԿԱՆԸ** – *(Ձեռքով նշան կրնե, որ հիվանդը հանգիստ թողնե ու պատրաստան չի փա. և ինքը ոտքի ելլելով)* Իրավ՛ կըսե, հայր սուրբ, ո՛ւշ է արդեն, երթանք, որ ինքն ալ հանգստանա: Գիշեր բարի, արեղա՛: Այս գիշեր քեզի խորքուն, վաղը ամեն բան անցած կըլլա: *(Դեպի դուռը):*

**ԵՐԻՏԱՍԱՐԴ ՎԱՆԱԿԱՆԸ**– Առողջությունն քեզի, արեղա՛: *(Դեպի դուռը):*

**ԱԲԵՂԱՆ** – *(Առանց դիրքը փոխելու, հատիկ-հատիկ)* Քեզի կըսեմ՝ տեսեր ես դուն երբեք արևին ծագումը:

## 2

**ԿՈՒՅՐ ՎԱՆԱԿԱՆԸ** – *(Ականջ կրնե, որ ոտքի ձայները հեռանան, վերջը քիչ մը ավելի ծռվելով դեպի սնկողնիս, խորհրդավոր ու կիսաձայն)* Ես... ես տեսեր եմ այդ արևին ծագումը:

**ԱԲԵՂԱՆ** – *(Աշխույժ վեր կթռչի իսկոյն ու կիսովին կնայի հենվելով թևին, մապը կոյրին ուղղած)* Դո՞ն... դո՞ն... դուն տեսեր ես: Դո՞ն, կո ւյր...

**ԿՈՒՅՐ ՎԱՆԱԿԱՆԸ** – *(Ծանր գլխով կրնե):*

**ԱԲԵՂԱՆ** – *(Ցած ձայնով ու ձիգ փայլով)* Եվ երկրպագեր ես:

**ԿՈՒՅՐ ՎԱՆԱԿԱՆԸ** – *(Ծանր գլխով կրնե):*

**ԱԲԵՂԱՆ** – Դո՞ն, դուն տեսեր ես արևին տաճա՞րը, քու այդ աչքերո՞վդ:

**ԿՈՒՅՐ ՎԱՆԱԿԱՆԸ** – Այո՛, տեսեր եմ իմ աչքերովս ու հա-

ներ եմ այդ աչքերը, որ ալ չտեսնեմ:

**ԱՔԵՂԱՆ** – *(Սարասիած)* Հաններ ես աչքերդ:

**ԿՈՒՅՐ ՎԱՆԱԿԱՆԸ** – *(Կարդալու շեշտով)* Այն անդամը, որ քեզի կգայթակղեցնե, կտրե ու դուրս նետե քեզմե, այսպես է գրված:

**ԱՔԵՂԱՆ** – Եվ դուն հաներ ես աչքերդ:

**ԿՈՒՅՐ ՎԱՆԱԿԱՆԸ** – Այո՛:

**ԱՔԵՂԱՆ** – Հաններ ես, քո՛ւ աչքերդ, քու այդ ձեռքերովդ:

**ԿՈՒՅՐ ՎԱՆԱԿԱՆԸ** – Ոչ, ո՛չ ձեռքովս, հաներ եմ կամքիս ուժովը:

**ԱՔԵՂԱՆ** – Կամքիդ:

**ԿՈՒՅՐ ՎԱՆԱԿԱՆԸ** – Դիմե՛ հավատքիդ, ու սարերը կելլեն իրենց տեղեն. աչքն ինչ է, որ իր տեղը մնա:

**ԱՔԵՂԱՆ** – *(Քիչ մը մտածելե ետքը տարակույսով)* Եվ դուն կըսես թե՛ երկրպագեր ես արևի՛ն:

**ԿՈՒՅՐ ՎԱՆԱԿԱՆԸ** – Այո՛, մեղանչեր եմ, արեղա՛: Եվ ձիշտ ատոր համար է, որ կհասկնամ քեզի, կտեսնեմ քու հոգիդ ու կըսեմ քեզի՝ «զգույշ, դևն է, որ արթնցեր է մեջդ, մեջիդ սև դևը»:

**ԱՔԵՂԱՆ** – Ա՛տ է քու հասկցածդ: Ինծի քաշողը ինքը լույսն է ու գեղեցկությունը, ինծի քաշողը աստվածներն են:

**ԿՈՒՅՐ ՎԱՆԱԿԱՆԸ** – Բոլոր դևերն ալ երբեմն աստված են եղած, արեղա՛: Ընկճված աստվածներն են ատոնք. պետք է, որ ընկճես:

### 3

**ՎԱՆԱՀԱՅՐԸ** – *(Կմարնե փխոր ու կքոսն)* Ողջո՛ւյն ձեզի:

**ԿՈՒՅՐ ՎԱՆԱԿԱՆԸ** – *(Կելլե ուրքի):*

**ՎԱՆԱՀԱՅՐԸ** – *(Մտրենալով անկողնին)* Ինչպես ես: Նոր եկա ցամաքեն, ըսին՝ ինծի կանչեր ես:

**ԱՔԵՂԱՆ** – Այո՛, կզգամ ծովուն թարմությունը, որ հազուստ–ներեդ կբուրե:

**ՎԱՆԱՀԱՅԻՐԸ** – Նոր ելա լաստեն:

**ԱՔԵՂԱՆ** – (*Հիացումով*) Լաստեն... լաստեն...

**ՎԱՆԱՀԱՅԻՐԸ** – (*Խոժոռած*) Ինչո՞ւ ես կանչեր ինձի:

**ԱՔԵՂԱՆ** – (*Քիչ մը լուռ*) Հայր, ես երկրպագեցի հին աստվածներուն:

**ՎԱՆԱՀԱՅԻՐԸ** – (*Դաժան ու խիստ*) Շատ բնական է:

**ԱՔԵՂԱՆ** – Ինչ...

**ՎԱՆԱՀԱՅԻՐԸ** – Անշնչոտ, անշնչոտ. կսպասեի՛: Չէ՞ որ քեզի խոստացավ իր տակի ձին, իր ձեռքի սուրը ու իր սեփական աղջիկը. գուցե և օր մըն ալ, ո՞վ գիտե, իր իշխանական ցուպը:

**ԱՔԵՂԱՆ** – (*Սաստիկ վիրավորված*) Հայր...

**ՎԱՆԱՀԱՅԻՐԸ** – Անշնչոտ, շատ բնական է: Այդ բոլորի համար արժե աստված մը ուրանալ: (*Հանկարծ ու բարկություն*) Բայց ինձի՞, ինձի՞ ինչու ես կանչեր հոս:

**ԱՔԵՂԱՆ** – (*Հանդիմանորեն*) Հապա ո՞վ կանչեի, վանա–հայր...

**ՎԱՆԱՀԱՅԻՐԸ** – Մխավվեր ես: Կանչե՛ հայր Անտոնը:

**ԱՔԵՂԱՆ** – Վանահայր...

**ՎԱՆԱՀԱՅԻՐԸ** – Հայր Անտոնին լաստը միայն կհանե քեզի հոն, ուր քու սիրտդ է:

**ԱՔԵՂԱՆ** – Կվոնդես ինձի դուրս:

**ՎԱՆԱՀԱՅԻՐԸ** – Ես կղրկեմ քեզի քու տենչացած աշխարհը:

**ԱՔԵՂԱՆ** – (*Դառն ու հանգիստ*) Կղրկես ինձի իմ աշխարհը: Իսկ ո՞վ իրավունք տվավ քեզի ուզած ժամանակդ դուրս քաշես ինձի աշխարհեն, ուզած ժամանակդ ետ նետես աշխարհ: Ո՞վ քեզի իրավունք տվավ, որ կապես հոգիս, կապկպես զգացումներս: Ո՞վ քեզի իրավունք տվավ, որ հիմա ելեր ես երեսիս հանդիմանություն կկարդաս:

**ՎԱՆԱՀԱՅՐԸ** – *(Կորրված)* Իրավ ես: Ես ուզեր եմ անկարելին: Ես ուզեր եմ ազատեմ քեզի այն երկար գալարուն ճամփեն, որոս դառնություններուն ու տառապանքներուն մեջեն միայն կհասնին մարդիկ այս սուրբ մենարանը: Ես ուզեր եմ անկարելին: Հանե քործերդ ու գնա:

**ԱՔԵՂԱՆ** – Երթամ. ինչո՞ւ, և ո՞ր:

**ՎԱՆԱՀԱՅՐԸ** – Աշխարհ:

**ԱՔԵՂԱՆ** – Աշխարհ... *(Անխոս գլուխը կշարժե. և սպա չարախնդորեն)* Ո՛չ, վանահայր, հո՞ն է իմ աշխարհս. աշխարհքը, այ, այս կղզին է. ես հո՞ն ճանչցա հին աստվածները, հո՞ն ալ պիտի երկրպագեմ:

**ՎԱՆԱՀԱՅՐԸ** – *(Նսիս զարմանքով կդիպե, վերջը ծանր ու վճռական)* Ո՛չ այդ մեկը չեմ թողներ, արեղա՛:

**ԱՔԵՂԱՆ** – Կթողնեն. դո՞ն ես այդպես կամեցեր: Ես ուրիշ աշխարհ չեմ տեսած, ես հո՞ն եմ շինեք իմ աշխարհս:

**ՎԱՆԱՀԱՅՐԸ** – *(Կորուկ)* Լսե՛: Հոս մենարան է ու սրբավայր, ուր այլևս աշխարհիկ հյուր մըն ես դուն, պատահական ուխտավոր մը: Իսկ ուխտավորներուն իրավունքը, գիտեն, երեք օր է միայն: *(Դեպի դռուր):*

**ԿՈՒՅՐ ՎԱՆԱԿԱՆԸ** – *(Երևեն)* Վանահայր, շատ ես խիստ:

**ՎԱՆԱՀԱՅՐԸ** – *(Կիսովին նայելով)* Ո՛չ, հայր սուրբ, հիվանդ էր, ու զիջող եղա: Չի լսեցիր, ամբողջ երեք օր տվի իրեն: Բայց երեք օրը չի լրացած պետք է հայր Անտոնին լաստը ցամաքը հանե այդ տղան: *(Դուրս):*

#### 4

**ԱՔԵՂԱՆ** – Լանստը... լանստը:

**ԿՈՒՅՐ ՎԱՆԱԿԱՆԸ** – Մոռցիր, մոռցիր այն լաստը, արեղա՛: Մոռցիր քեզի աշխարհին կապող այդ երերուն կամուրջը, մոռցիր այդ իրարու կապված երկու գերանի կտորը...

**ԱԲԵՂԱՆ** – Իրարու կապված... այո՛... իրարու կապված:

**ԿՈՒՅՐ ՎԱՆԱԿԱՆԸ** – Դեռ ուշ չէ՛. խեղդե՛ն մեջդ այդ հուշերը, ընկճե՛ հին դևը, ու այս բոլորը թող դառնա հիվանդություն մը, որ եկավ վրադ ու անցավ: *(Թևերը տարածելով անոր վրա)* Ապավինե՛ն Աստծուն, արեղա՛: *(Կերթա դեպի դուռը և կես ձամփեն)* Գիշերը եթե պետք ունենաս՝ զարկ պատը, գամ քեզի օգնելու:

**ԱԲԵՂԱՆ** – Ինձի ինչ կրնաս օգնել դուն, կո՛ւյր, դո՛ւն, որ հաներ ես քու սեփական աչքերդ:

**ԿՈՒՅՐ ՎԱՆԱԿԱՆԸ** – *(Խարխափելով մոտքը կփնտրե)* Կօգնեմ կերպ մը, արեղա՛, խարխափելով, խարխափելով... Զարկ պատը, եթե պետք ունենաս: *(Դուրս):*

## 5

**ԱԲԵՂԱՆ** – *(Նստած է անկողնին մեջ ծունկերը գրկած. քիչ մը արե՛ն լուռ ու անշարժ, վերջը հեզնոտ ու գլուխը շարժելով)* Խարխափելով... խարխափելով... և կըսե՛ մոռցիր լաստը:

**ՍԵՂԱ** – *(Դռան մեջեն հագիվ կնշմարվի)* Մոռցիր, մոռցիր լաստը...

**ԱԲԵՂԱՆ** – *(Ցնցվելով ու շշուկով)* Սեղա՛...

**ՍԵՂԱ** – Մոռցիր և Սեղան:

**ԱԲԵՂԱՆ** – Ես մոռնամ քեզի՛:

**ՍԵՂԱ** – Մոռցիր ինձի, ես քու մեջի սև դևն եմ:

**ԱԲԵՂԱՆ** – Դուն իմ հոգիիս ճերմակ թևն ես: Նստեր էի անապատի ավազին վրա տխուր, չոր ու մինակ, դո՛ւն էիր, որ եկար թև տվիր կյանքիս, բնությունը տվիր զգայարանքներուս ու ծովը սրտիս. ծովը, ուրկե արևները կծնին, ուր ես անգամ մը գրկեր եմ քեզի:

**ՍԵՂԱ** – Մոռցիր, մոռցիր այդ բոլորը. դեռ ուշ չէ՛. եղիր նորեն ան, ինչ որ էիր. մտածե՛. դեռ ամբողջ երեք օր տվին քեզի:

**ԱԲԵՂԱՆ** – Ո՛չ, Սեդա, ո՛չ, ետ դարձ չկա. ո՛չ կրնամ, ո՛չ կուզեմ: Ես երկրպագեցի քու աստվածներուդ, ես ձոնեցի քու աստվածներուդ, ես խմեցի վայելքի եղջյուրեն: Ես հիմա միայն քեզի ծարավ եմ, ես հիմա միայն քու գիրկդ կուզեմ:

**ՍԵՂԱ** – *(Քիչ մը առաջ գալով գրկաբաց)* Եկո՛ւր, ես քու կի՛նդ եմ:

**ԱԲԵՂԱԴ** – *(Ինքն ալ անկողնին վրայեն առաջ ծռելով)*  
Սեդա՛... բայց չե՞ որ դուն երազ մըն ես:

**ՍԵՂԱ** – Եկո՛ւր, դո՛ւն ալ դարձիր երազ մը:

**ԱԲԵՂԱՆ** – Երա՛զ մը:

**ՍԵՂԱ** – Եկո՛ւր նորեն հո՛ն...

**ԱԲԵՂԱՆ** – *(Վահիցած ու հափշտակված)* Ծո՛վը...

**ՍԵՂԱ** – Հո՛ն, ուր անգամ մը գրկեր ես ինձի...

**ԱԲԵՂԱՆ** – Ուր դուն թներուս մեջ կդողայիր քու մարմնիդ բոլոր մասնիկներովը...

**ՍԵՂԱ** – Ուր ալիքները կդողային ու փոթորիկը կգոռար...

**ԱԲԵՂԱՆ** – Ու զարկերուս տակ փրփուրը կեռար...

**ՍԵՂԱ** – Հո՛ն եկուր, հո՛ն, եթե նորեն գրկել կուզես ինձի, միայն հո՛ն: Եկուր, հենց որ նորեն ջրերը հուզվին, հենց որ նորեն ծովը փրփրի:

**ԱԲԵՂԱՆ** – *(Հեղզիկապես ծունկի գալով անկողնին վրա)* Այո՛, երբ որ ջրերը հուզվին, երբ որ ծովը փրփրի...

**ՍԵՂԱ** – Եկո՛ւր, փաթթվինք իրարու ու տանիմ քեզի գրկիս մեջ անդունդե անդունդ, մթնուլորտե մթնուլորտ, տանիմ քեզի դեպի նոր անծանոթները, դեպի այն նոր աշխարհները, որոնց մասին դուն ու քու աշխարհքդ գաղափար անգամ չունիք: Եկո՛ւր:

**ԱԲԵՂԱՆ** – Կուգամ: Առաջին անգամ, երբ քեզի գրկեցի, բացվեցան ինձի որքան, որքան անծանոթներ. գամ նորեն քեզի գրկելու և թող բացվին նո՛ր անծանոթներ:

**ՍԵՂԱ** – Եկն՛ր, տանիմ քեզի հեռն, հեռն քու կյանքիդ նեղ սահմաններեն, տանիմ քեզի նոր գոյության, նոր ձևերու, նոր էության...

**ԱԲԵՂԱՆ** – *(Վերազգած)* Նոր, նոր կյանքի, նոր էության:

**ՍԵՂԱ** – Եկն՛ր, ձուլվիս ծովին, ձուլվիս լույսին ու ջերմության, ձուլվիս ինծի ու Աստղկան, ձուլվիս Վահագնին ու աստվածներուն...

**ԱԲԵՂԱՆ** – Ա՛խ շնուտ, ա՛խ, շնուտ:

**ՍԵՂԱ** – *(Եր-եւր քաշվելով)* Ըննց որ ջրերը հուզվին, հենց որ ծովը փոթորկի...

**ԱԲԵՂԱՆ** – *(Խեղդված ձայնով)* Ըննց որ ջրերը հուզվին, հենց որ ծովը փոթորկի...



# ԵՐԿՐՈՐԴ ՏԵՍԱՐԱՆ

## ԵԿԵՂԵՑԻՒՆ ԱՌՋԵՎԻ ՀՐԱՊԱՐԱԿԸ

*Նոյնը, ինչ որ առաջին արարի երկրորդ տեսարանը:  
Ցերեկ է:*

### 1

*Վանականները խռնված են ու կխոսին հուզված: Արեղան լուռ ու կեղրոնացած է ծառի մը հենած:*

**ԵՐԻՏԱՍԱՐԴ ՎԱՆԱԿԱՆ ՄԸ** – *(Ապշած)* Ինչ կըսես, ինչ կըսես...

**ԱԴԱՄ ՎԱՆԱԿԱՆ**– Ո՞վ էր լսեր այս տեսակ բան:

**ՂԱԶԱՐ ՎԱՆԱԿԱՆ** – *(Ծաղրով)* Հա՛, հա՛, հա՛, վանահայրը խռովեր է եկեղեցիեն:

**ՍԻՄՈՆ ՎԱՆԱԿԱՆ** – Վերջ տուր այդ անպատկառ ծիծաղիդ:

**ՈՒՐԻՇ ՎԱՆԱԿԱՆ ՄԸ** – Բայց իրավ է, որ ալ ժամ չի գար:

**ԱԴԱՄ ՎԱՆԱԿԱՆ** – Ո՞ր է հիմա ինքը:

**ՎԱՆԱԿԱՆ ՄԸ** – Քաշվեր է իր խուցը: Կկարդա՛, կաղոթե՛, ո՞վ գիտե:

**ԾԵՐՈՒՆԻ ՎԱՆԱԿԱՆԸ** – Ա՛, այդ կարդալը, կարդալը: Չէ, այս բոլորեն աղվոր հոտ չի գար:

**ՍԻՄՈՆ ՎԱՆԱԿԱՆ** – Ծերունի՛, մտածե՛ր ես՝ ինչ կխոսիս:

**ԾԵՐՈՒՆԻ ՎԱՆԱԿԱՆԸ** – *(Հեռանալով)* Ես բան չըսի:

**ՍԻՄՈՆ ՎԱՆԱԿԱՆ** – Մեր մեծավորն է, մեր առաջնորդը:

**ԾԵՐՈՒՆԻ ՎԱՆԱԿԱՆԸ** – Ես բան մը չըսի: *(Դուրս):*

**ՍԻՄՈՆ ՎԱՆԱԿԱՆ** – *(Երևեն դուրս ելլելով)* Կեցի՛ր, հայր սուրբ, կեցի՛ր:

**ԴԱՎԻԹ ՎԱՆԱԿԱՆ** – *(Մտածկոյր)* Ճիշտ է. ամբարտավա-  
նությունը մեղք է մահացու:

**ԱԴԱՄ ՎԱՆԱԿԱՆ** – Մարդս պետք է հեզ ըլլա ու խոնարհ:

**ՎԱՆԱԿԱՆ ՄԸ** – Խոնարհ, խոնարհ...

*Ու երեքը միասին կելեն դորս:*

**ՂԱԶԱՐ ՎԱՆԱԿԱՆ** – *(Տեսակ մը ինքնիշխան)* Վանահայրը  
խոռվեր է եկեղեցիեն... *(Ծիծաղը ավին մեջ խեղդելով անոնց  
եպրեն կելլե դորս):*

## 2

**ԱԲԵՂԱՆ** – *(Միշտ իր ծառին տակը՝ անշարժ):*

**ԴԱՎԻԹ ՎԱՆԱԿԱՆ** – *(Նսխորդ խոսքեն միակ մնացողը.  
նախ քիչ մը կմնա մեջտեղը մտածկոյր, ետքը բան չհասկցողի  
շարժումով կօրորե գլուխը ու կմտնենա Աբեղային)* Լսեցի՞ր,  
արեղա՛, լսեցի՞ր:

**ԱԲԵՂԱՆ** – Կլսեմ, կլսեմ... թող ինձի, մի խանգարե՛ որ  
լսեմ:

**ԴԱՎԻԹ ՎԱՆԱԿԱՆ** – *(Զարմացած)* Ինչը:

**ԱԲԵՂԱՆ** – *(Խորքը մատնանշելով)* Ա՛յ, ականջ դի՛ր:

**ԴԱՎԻԹ ՎԱՆԱԿԱՆ** – Ինչ է որ:

**ԱԲԵՂԱՆ** – *(Խորհրդավոր)* Զրերը կհուզվին, ջրերը հուզվի-  
լեն սկսեր:

**ԴԱՎԻԹ ՎԱՆԱԿԱՆ** – Է, ի՞նչ ընենք. երևի, գիշերը փոթորիկ  
ենք ունենալու:

**ԱԲԵՂԱՆ** – *(Սաստիկ հուզվելով)* Փոթորի՞կ, փոթորի՞կ...

**ԴԱՎԻԹ ՎԱՆԱԿԱՆ** – *(Անտարբեր)* Գուցե՛, եղանակները  
փոխվեցան:

**ԱԲԵՂԱՆ** – *(Հանկարծ բռնելով ընկերոջը թևեն)* Ուրեմն այս  
գիշեր... կկարծես՝ այս գիշեր...

**ԴԱՎԻԹ ՎԱՆԱԿԱՆ** – Այդ ինչպե՛ս կդողաս: Խեղճ արեղա,

այն փոթորիկեն ի վեր, երևի, աչքդ վախցեր է: Հանգստացիր, հանգստացիր: Եկուր երթանք եկեղեցի, աղոթե՛մ, սիրտդ կթեթևի:

**ԱԲԵՂԱՆ** – *(Հանկարծ)* Եկուր երթանք ափը:

**ԴԱՎԻԹ ՎԱՆԱԿԱՆ** – Ա՛փը:

**ԱԲԵՂԱՆ** – Եկուր, տեսնել կուզեմ փոթորկին գալը: Բայց... բայց առանձին չեմ կրնար: Գիտե՞ս, կքաշե, կարծես կքաշե, կքաշե... *(Ամուր կսեղմվի ծառին):*

**ԴԱՎԻԹ ՎԱՆԱԿԱՆ** – Աբեղա՛, ավելի աղեկ է՝ երթաս ու պառկիս: Դեռ իզուր ես ելեր ոտքի: Տե՛ս, աչքերդ կատարյալ տենդ ունին դեռ: Երթանք, տանիմ քեզի խուցդ:

**ԱԲԵՂԱՆ** – *(Ծառին քավելով կամաց մը կիջնե ու կնստի)* Թո՛ղ, թո՛ղ, թո՛ղ ինձի: Թո՛ղ, ես տեսնել կուզեմ փոթորկին գալը:

**ԴԱՎԻԹ ՎԱՆԱԿԱՆ** – *(Կեցած է Աբեղայի գլխուն՝ չիմանալով ինչ ընե):*

### 3

**ՎԱՆԱԿԱՆ ՄԸ** – *(Ներս վազելով)* Վանահայրը, վանահայրը: Կլավին ձայներ, զայված աղմուկ ու մեկ-մեկ, երկու-երկու՝ խառն կմերենն վանականները խոժոռ ու մրախոհ: Կուզան ու լոռ կշարվին իրարու քով: Վանական մը կառաջնորդե Կայրը:

**ԿՈՒՅՐ ՎԱՆԱԿԱՆԸ** – Բայց ինչ կա, է՛. ինչ է պատահեր:

**ԱՌԱՋՆՈՐԴՈՂ ՎԱՆԱԿԱՆԸ** – Ըսի՛ չգիտեմ, վանահայրն է պատվիրեր:

**ՎԱՆԱԿԱՆ ՄԸ** – Սո՛ւս, եկավ:

**ԴԱՎԻԹ ՎԱՆԱԿԱՆ** – *(Արթնցնելու պես)* Ոտքի՛, արեղա՛, վանահայրն է:

**ԱԲԵՂԱՆ** – *(Կնայի շուրջը ու կեղև ուրքի):*

**ՎԱՆԱՀԱՅՐԸ** – *(Կուգա խորքեն ծանր ու տխուր: Բոլորը գլուխ կուտան: Լուռ երկար նայվածք մը կնեպե խումբին վրա):*  
Բոլորդ եք:

**ՁԱՅՆ ՄԸ** – Այո՛, վանահայր:

**ՎԱՆԱՀԱՅՐԸ** – *(Կնարի բարձր քարի մը: Սպասողական լռություն)* Բան ունիմ ձեզի ըսելու: *(Կմտածե):* Կտեսնե՞ք այս եկեղեցին, որ գրեթե ավարտած է արդեն և ուր բավական ժամանակե ի վեր մեր աղոթքները կխնկենք մեր Աստծուն, այս եկեղեցին... այս եկեղեցին նվիրված չէ՛ մեր Աստծուն:

*Ընդհանուր զարմանք ու շարժում:*

**ՍԻՄՈՆ ՎԱՆԱԿԱՆ** – Ի՞նչ ըսիր, վանահայր:

**ՎԱՆԱՀԱՅՐԸ** – Այս եկեղեցին նվիրված չէ՛ մեր Աստծուն: Այս եկեղեցին, երբ ես կշինեի, ես դեռ կտրված չէի աշխարհեն... *(Շշուկներ)* Ես կկարծեի, թե կտրված եմ: Մենք բոլորս ալ, որ թողեր ենք աշխարհը ու եկեր անապատ, մեր հոգիին խորքը դեռ մեծ կտոր մը աշխարհք էինք բերեր մեզի հետ. ներքին վայելքի ծածուկ կարոտ մը, քողարկված հաճույքներու բարակ ծարավ մը, մեր անցած կյանքի, կովի ու հուզումներու, ամբողջ նուրբ ու կաշուն ցանց մը. և ականա վերհուշներ: Այս բոլորը դեռ մեզի հետ էր, երբ այս եկեղեցին կշինեինք: Այդ ծածուկ, քողարկված հուզումներն են շիներ այս եկեղեցին, աշխարհեն անապատ եկած, մեզի հետ ներս սպրդած աշխարհի այդ կտորն է շիներ այս եկեղեցին: Աշխարհինն է այդ եկեղեցին, մեր Աստծունը չէ՛: Ատոր կամարներուն տակ մենք այլևս աղոթել չենք կրնար, այդ կամարները պետք է քանդվին:

**ՁԱՅՆԵՐ** – *(Ապշած, սարսափած)* Քանդվին... քանդվին:

**ԱԴԱՄ ՎԱՆԱԿԱՆ** – Մեր եկեղեցին քանդվի՞:

**ԵՐԻՏԱՍԱՐԴ ԿԱՆԱԿԱՆ ՄԸ** – Մեր նոր եկեղեցին քանդվի՞:

**ՎԱՆԱՀԱՅՐԸ** – Այո՛. պետք է քանդենք ու շինենք նորը:

**ՁԱՅՆԵՐ** – *(Զարմանք ու հեզոտություն)* Նորը... նորը...

**ԱԳԱՄ ՎԱՆԱԿԱՆ** – Շինենք նորը:

**ՎԱՆԱՀԱՅՐԸ** – Նորը: Եվ այդ նոր եկեղեցին պիտի շինենք մենք ինքներս: Աշխարհին եկած դրամը աշխարհիկ զգացումներու նվերն է, աշխարհին եկած վարպետները աշխարհիկ հասկացողություն է, աշխարհի արվեստը: Մարդս ինք միայն կրնա շինել իր Աստծուն նվիրված տաճարը, իր մեջքովը, իր ձեռքերովը, իր խելքովը: Թե ինչ ձև է ունենալու մեր նոր եկեղեցին, դեռ ես ինքս ալ որոշ չգիտեմ, այ, կնաստիք միասին ու կխորհինք. կխորհինք ու կստեղծենք:

**ԾԵՐՈՒՆԻ ՎԱՆԱԿԱՆԸ** – *(Հեզոտոր)* Մենք ինչ արհեստավորներ ենք, վանահայր, մենք ինչ կրնանք շինել, դիցուք, եթե ուզենք ալ:

**ՎԱՆԱՀԱՅՐԸ** – Կամքը, ծերունի՛. ուզե ու կշինես, եթե մանանելիս չափ հավատք ունենաս քու կամքիդ:

**ԾԵՐՈՒՆԻ ՎԱՆԱԿԱՆԸ** – Է, անցեր են այն ժամանակները:

**ՎԱՆԱՀԱՅՐԸ** – Ո՛չ, չեն անցեր. դեռ չեն եկեր այդ ժամանակները, իմ նոր եկեղեցիիս մեջեն պիտի երթանք դեպի այդ ժամանակները:

**ԾԵՐՈՒՆԻ ՎԱՆԱԿԱՆԸ** – Լսե՛, վանահայր, լսե՛ ինձի, ես ծերունի մարդ եմ: Դուն շատ ես կարդացեր ու խախտեր ես ուղեղդ: Քու բռնած ճամփադ ծուռ ճամփա է: Մի՛ չարչարեր գլուխդ, այդ ճամփան հերետիկոսներուն ճամփան է:

**ՎԱՆԱՀԱՅՐԸ** – *(Հպարտ)* Այդ ճամփան առաքյալներու ճամփան է. այդ ճամփով է անցեր ինքը Քրիստոս:

**ԱԶԶԱՐ ՎԱՆԱԿԱՆ** – Ո՛ւ... կլսե՛ք:

*Շշուկ ու վրդովում:*

**ԾԵՐՈՒՆԻ ՎԱՆԱԿԱՆԸ** – Մի՛ խոսիր այդպես անմիտ, վանահայր:

**ԱԳԱՄ ՎԱՆԱԿԱՆ** – Ո՛չ ալ այդպես մեծամիտ:

**ԱՆՏՈՆ ՎԱՆԱԿԱՆ** – Եվ ձգե հանգիստ մեզի ու մեր եկեղեցին, մեզի պետք չեն նոր ձևի շենքեր, այս ձևն է մեզի մեր պապերենն ավանդ հասեր:

**ՎԱՆԱԿԱՆ ՄԸ** – Մենք ո՛չ քարտաշ ենք, ո՛չ վարպետ:

**ԱԳԱՄ ՎԱՆԱԿԱՆ** – Եվ չենք եկեր հոս պատեր քանդելու, պատեր շինելու:

**ՈՒՐԻՇ ՎԱՆԱԿԱՆ ՄԸ** – Մենք եկեր ենք հոս հանգստանալու:

**ԶԱՔԱՐԻԱ ՎԱՆԱԿԱՆ** – Այո՛, հանգստանալու ու աղոթելու:

**ԵՐԻՏԱՍԱՐԴ ՎԱՆԱԿԱՆ ՄԸ** – Եվ ինչո՞ւ քանդենք մեր նոր շինած սիրուն աղոթատեղին. ոչինչ չեմ հասկնար, միտքն ինչ է, ինչո՞ւ:

**ԶԱՔԱՐԻԱ ՎԱՆԱԿԱՆ** – Որուն վրա այսքան ծախս է թափվեր, այսքան աշխատանք:

**ՂԱԶԱՐ ՎԱՆԱԿԱՆ** – Եվ ի՞նչ ըսենք իշխանին, իշխանուհիին, որոնք հոգացեր են բոլոր ծախսը,

**ԶԱՅՆԵՐ** – (*Խառն*) Իհարկե՛, իհարկե՛... իշխանը... իշխանուհին...

**ԶԱՔԱՐԻԱ ՎԱՆԱԿԱՆ** – Եվ ո՞վ կուտա այն ատեն տասը չափ ցորենը, պարենը, այսքան նվերը:

**ԶԱՅՆԵՐ** – (*Խառն*) Իհարկե՛... իհարկե՛... ցորենը... պարենը...

**ԱԳԱՄ ՎԱՆԱԿԱՆ** – Հանգիստ թո՛ղ մեզի ու մեր ապրուստը:

**ԶԱՔԱՐԻԱ ՎԱՆԱԿԱՆ** – Քու շինելիք եկեղեցիդ հաց կուտա՞մ մեզի:

**ԳԱՎԻԹ ՎԱՆԱԿԱՆ** – Որքան ալ ըլլա մեր սեղանը սակավ, բայց հաց պետք է, որ ապրինք:

**ԾԵՐՈՒՆԻ ՎԱՆԱԿԱՆԸ** – Որ կյանքի հոգը չխտեղդե մեզի:

**ՄՈՎՍԵՍ ՎԱՆԱԿԱՆ** – Որ մեր աղոթքը չխանգարի:

**ԾԵՐՈՒՆԻ ՎԱՆԱԿԱՆԸ** – Ուշքի եկո՛ւր, վանահայր, քանի կանուխ է ու թո՛ղ մեր անապատը խաղաղ ու հանգիստ:

**ՎԱՆԱՀԱՅՐԸ** – (Նախ շվարածի պես է այս տարափին տակ, երբը գլուխը վեր կաննե, կնայի շրջապատողներուն տեսակ մը սաշնոթյամբ) Դուք... հոն իմ շուրջս, էս... հոս կեցած ձեր մեջը... Ես ձեր վանահայրը, դո՛ւք իմ միաբանությունս, իմ իսկ հիմնած: (Ժպտուն) Միաբանությունն, ինչ միություն ձեր ու իմ մեջ... (Աչքերը շփելով) Կարծես կապը կիյնա աչքերես: Ինչպես է եղեր, որ ես չեմ հասկցեր այսքան պարզ բանը, այսքան ակնհայտնի: Մինչև հոն, մինչև անապատ կրցեր ենք մենք միասին: Մինչև հոս ես կրնայի բերել ձեզի, մինչև հոս կարելի է բերել մարդը, բայց հոսկե անդին... հոսկե անդին մարդ ինքը պիտի երթա: Ճշմարիտը դո՛ւք եք. այդ եկեղեցին պետք է, որ մնա. ան է ձեր եկեղեցին, գացե՛ք, գացե՛ք ներս, ան կուտա ձեզի անվերջ աղոթքներ ու մխիթարանք. ան կրանա ձեզի արքայության դռները, կազատե ձեզի բոլոր սատանաներեն, ան ձեզի ձեր հացն ալ կուտա ու ձեր հանգիստը, գացե՛ք, գացե՛ք ներս ու խաղաղությունը թող ըլլա ձեզի հետ: Իսկ իմ փնտրածս ատիկա չէ. իմ փնտրածս աշխատանքն է, ներքին անդուլ ու անկաշկանդ որոնումը՝ ներքին անվերջ նվաճումները բարձունքեբարձունք, պարիսպեպարիսպ, տարակույսներու անդունդներուն վրայեն, ելքերով ու անկումներով. անդադար խոյանք մը դեպի ճշմարտությունը: Գացե՛ք, գացե՛ք ներս դուք ձեր եկեղեցին, ես ալ երթամ շինեմ իմ եկեղեցիս. բայց այս անգամ էս, միայն էս և կերտվածք մը, որ վայել ըլլա իմ Աստծուս բնակությանը, որու կամարներուն տակ իմ խնկելիք աղոթքիս ո՛չ մեկ բառը կեղծ չհնչե, ո՛չ մեկ բառի արձագանքը դատարկ չհնչե:

**ԴԱՎԻԹ ՎԱՆԱԿԱՆ** – (Ծաղրով) Ատ ո՛ր պիտի շինես, վանահայր, քու նոր կերտվածքը:

**ՂԱԶԱՐ ՎԱՆԱԿԱՆ** – (Ծաղրով) Եվ ինչե՛. գրանի՞տ պիտի ըլլա, թե՛ մարմարե:

**ՎԱՆԱՀԱՅՐԸ** – Գրանիտ ու մարմար, որձաքար ու ամեն տեսակ քար եւ կթողեմ աշխարհի աստվածներուն: Իմ տաճարիս հիմքը իմ բանականությունս պիտի ըլլա, սյուները իմ կամքս է, ու գմբեթն ալ ըլլալու է հավատքս:

**ԾԵՐՈՒՆԻ ՎԱՆԱԿԱՆԸ** – Շատ խախուտ է, վանահայր, նոր շենքիդ հիմքը:

**ՎԱՆԱՀԱՅՐԸ** – *(Անսիրոյթ)* Խախուտ է՝ կփլի:

**ԴԱՎԻԹ ՎԱՆԱԿԱՆ** – Եվ այն ատեն...

**ՎԱՆԱՀԱՅՐԸ** – Կշինեմ նորը:

**ԾԵՐՈՒՆԻ ՎԱՆԱԿԱՆԸ** – Բայց ատիկա վերջ չունի:

**ՎԱՆԱՀԱՅՐԸ** – Կուզեիր, որ վերջ ունենար: Քանի կապրինք՝ շինենք պիտի, պիտի շինենք մեր Աստծուն իր տաճարը, շինենք ու փլի, շինենք ու քանդենք, շինենք ու շինենք միշտ, բայց երբեք, երբեք չավարտենք: Հենց որ ավարտի, ալ տաճար չէ Աստծու, այլ... *(Եկեղեցին մայրնանիշ)* կռատուն:

**ՂԱԶԱՐ ՎԱՆԱԿԱՆ** – *(Կայտաղի)* Կհայիոյե, կհայիոյե մեր Աստծուն:

**ՎԱՆԱՀԱՅՐԸ** – Ամենն ստոր հոգիները միայն հայիոյել կրնան այն Աստծուն, որուն երբեմն երկրպագեր են: Բայց կտեսնեն՝ ալ մենք իրար չենք հասկնար: Մնաք բարով, ձեր Աստվածը ձեզի հետ:

*Կուզե երթա՛ Արեղան առաջ կուգա ու ճանփան կկտրե:*

**ԱԲԵՂԱՆ** – Կեցի՛ր:

**ՎԱՆԱՀԱՅՐԸ** – Ինչ է: Գուցե կուգես նորեն ինձի հետ, արեղա՛: Եկու՛ր, քու հոգիդ թոյչք ունի, ես գիտեմ:

**ԱԲԵՂԱՆ** – Կեցի՛ր: Ըսե՛. քու այդ նոր շենքեդ երևա՛ պիտի արևի ծագումը:

**ՎԱՆԱՀԱՅՐԸ** – Մոռցի՛ր արևն ու իր ծագումը, որ ծագի քեզի ծագումներուն ծագումը, որ արևե քեզի արևներուն արևը:

**ԱԲԵՂԱՆ** – Կեցի՛ր: Ըսե՛, քու այն նոր շենքեդ լսվի՛ պիտի,



տեն, այս աղմուկը... *(Խորքը մաքրանալիչ ընելով)* Կլենա:

**ՎԱՆԱՀԱՅՐԸ** – Ի՞նչ աղմուկ, այդ լսվողը ծովն է ավելոծ:

**ԱԲԵՂԱՆ** – Այո՛, ատիկա՛:

**ՎԱՆԱՀԱՅՐԸ** – Քու փնտրածդ, մանուկ, մարդու կառուցած առաջին եկեղեցին է, նախնականը:

**ԱԲԵՂԱՆ** – Չէ՛, ալ ինծի չես խաբեր քու այդ արհամարհոտ բառերովդ: Խոսե շիտակ. ըսե՛. հասնելո՞ւ է քու եկեղեցիդ ծովուն ձայնը:

**ՎԱՆԱՀԱՅՐԸ** – Իմ եկեղեցիս չէ հասնելու ո՛չ մեկ արտաքին հուզում, ո՛չ մեկ արտաքին աղմուկ: Եթե կուզես ինծի հետ՝ հույսդ կտրե արևեն ու ծովեն:

**ԱԲԵՂԱՆ** – *(Ճանփա տալով)* Անցիր այն ատեն:

**ՎԱՆԱՀԱՅՐԸ** – *(Հեռանալով)* Ափսոս, արեղա՛, քու միտքդ երբեմն թևեր ուներ: *(Դուրս):*

**ԱԲԵՂԱՆ** – *(Երկեն)* Ափսոս, վանահայր, քու սիրտդ երբեմն թևեր ուներ:

**ԿՈՒՅՐ ՎԱՆԱԿԱՆԸ** – *(Երկու ձեռքերը առաջ պարզելով)*  
Ես... ես կուզեի քեզի հետ...

**ՁԱՅՆԵՐ** – *(Շշուկով)* Կո՛ւյրը... կո՛ւյրը...

# ԵՐՐՈՐԴ ՏԵՍԱՐԱՆ

## ԲԱՐՁՐ ԾՈՎԱՓ

Աջ ու ձախ ժայռեր: Քարքարոտ գերհինը քիչ-քիչ կրարձ-  
րանա ու ճակրհին կկազմե ծովուն սեպ շրթունքը: Գիշեր է.  
այլեկոծություն:

### 1

Ժայռի շրթունքին այլքներուն կապաղի ելևէջը:

Այլքները, որոնք կնոջ մարմին ունին, կերևան միայն մինչև  
մեջքը ու կաշիսարին կախվին ժայռեն, քայց վայրկյան մը միայն,  
իսկոյն վար կթափվին նորեն շառաչելով:

**ՋԱՆԱԶԱՆ ԱԼԻՔՆԵՐ** – (Բերնե-բերան ու ընդհատ-ընդհատ)

- Պիտի կորչի՞ս:
- Տեղ տուր լանջիս:
- Քարին փակչիս:
- Ա՛յ, հասանք, հասանք,
- Հոսանք է, հոսանք:
- Ի՛նչ վազեր ենք ափե-ափ:
- Ի՛նչ ցատկեր ենք չափե-չափ:
- Չանփ. ի՛նչ չափ:
- Անչանփ. անչանփ:
- Չանփ, չանփ:
- Աս թռչիլ է , վազել չէ:
- Աս եռալ է, ցատկել չէ:
- Կեցի՛ր, կեցի՛ր ու կանչե:
- Չէ՛, չէ՛, անցի՛ր. աս ան չէ:
- Ա՛ն է:

- Ան չէ՛:
- Է, մեկ չէ՛:
- Կանչե՛, կանչե՛:
- Մենք պարապ չե՛նք:
- Ոչի՛նչ, կանչե՛նք:
- Կանչե՛նք:
- Կանչե՛նք:

**ԽՈՒՄԲ ՄԸ ԱԼԻՔ** (*Միաբերան*)

Հե՛յ, ականջե՛.  
 հույզ ու տենչ է ամեն լանջե,  
 կշառաչե.  
 քեզի ծո՛վն է, որ կկանչե,  
 հե՛յ, ականջե՛:

**ՈՒՐԻՇ ԽՈՒՄԲ ՄԸ** - (*Հեզնանքով ու հեռանալով*)

Ա՛, չէ՛, չէ՛, չէ՛.  
 նստե հողին ու քեզ տանջե:

**ՆԱԽՈՐԳ ԽՈՒՄԲԻՆ ՁԱՅՆԸ** - (*Ավելի հեռուն*)

Հե՛յ, ականջե՛.  
 հույզ ու տենչ է ամեն լանջե...

Ու քիչ մը ատեն ժայռի շրթունքին լուրջուն կտիրե, և ավելի որոշ կլսվի բացերեն փոթորկի խոր ու խուլ աղմուկը:

**2**

**ԱԲԵՂԱՆ** - (*Կողմնակի ժայռերուն մեջեն կնետրվի ներս. մազերը խռիվ, հագուստը խառնակ, աչքերը մոլար*) Եկա՛, եկա՛... (*Ու հանկարծ կկենսա, կշփե ճակատը, կնայի ետ ու կսկսի քարկացած շեշտով մը*) Դե՛, մնան քարով, կղզի՛, մնաս քարով, անապանտ, մնաք քարով, դուք ալ մութ-մութ կամարները տաճարին, մնաք քարով, իմ աղոթքներս ու խնկումը հոգիիս. մնաս քարով և դո՛ն, ո՛վ անողոք ու վրեժխնդիր Աստված,

որուն ուղղեր եմ իմ տենչերս ու աղոթքներս: Դուն ալ մնաս բարով, խցիկս, իմ՝ մենավոր ու լռիկ խցիկս, ալ չեմ դառնալու քեզի: Ա՛յ, դեռ կվառի հող՝ ծոցիդ մեջ՝ ձրագիս աղոտ լույսը. առտվան դեմ մինակը, մինակը մարի պիտի ու ալ երբեք չի պիտի վառի: Թո՛ղ մարի:

*Հովի ուժեղ թափը:*

**ԱԲԵՂԱՆ** – *(Կցնցվի՝ կղառնա ծովոսս ու թևերը կարոտակեզ առաջ պարզելով)* Դե՛, բաց գիրկդ, Սեդա՛մ, բաց թևերդ. ահա՛ հույզքը ջրերուն, ահա՛ վազքը փոթորկին. բաց թևերդ ու նորեն փարած քու խնկելի մարմնիդ, նորեն շունչդ շնչիս, ալիքներուն մեջեն, անցնիմ այն նոր ու մեծ անձանոթին, նոր գոյության ու նոր կյանքին. ան, որ խոստացեր ես ինձի: Բաց գիրկդ, Սեդա՛մ...

### 3

**ՍԻՄՈՆ ՎԱՆԱԿԱՆ** – *(Վերի ժայռին վրայեն շիրակ անոր առջևը կցարկե ու կկորե ձամփան հևալով)* Կեցի՛ր: *(Կործքը սեղմելով)* Շունչս... շունչս...

**ԱԲԵՂԱՆ** – *(Հանկարծակիի եկած ու խոժոռ)* Մեկդի՛ ձամփես:

**ՍԻՄՈՆ ՎԱՆԱԿԱՆ** – Կեցի՛ր, դժբախտ, կեցի՛ր: Վախցի՛ր Աստուծո՛մե:

**ԱԲԵՂԱՆ** – *(Կռվի պատրաստվելով)* Մի՛ կտրեր առջևս:

**ՍԻՄՈՆ ՎԱՆԱԿԱՆ** – Քու առջևդ մութ է ու անդունդ:

**ԱԲԵՂԱՆ** – Ետ քաշվե, մա՛րդ:

**ՍԻՄՈՆ ՎԱՆԱԿԱՆ** – Վախցի՛ր այդ մութեն ու անդունդեն:

**ԱԲԵՂԱՆ** – *(Կատրոս)* Է՛, հերիք է, հեռո՛ գացեք ձեր անդունդներովն ու մութերովը, հեռո՛ ձեր անվերջ վախերովը: Վախ լույսերեն ու բերկրանքեն. վախ մութեն ու տանջանքեն, վախ աստվածներեն ու դժոխքեն: Հեռո՛, բաց ձամփաս: Հոն ո՛չ մութ կա, ո՛չ անդունդ: Ծովն է միայն ու փոթորիկը իմ առջևս:

**ՄԻՄՈՆ ՎԱՆԱԿԱՆ** – Մահն է քու առջևդ, թշվառական:

**ԱԲԵՂԱՆ** – Մահն ալ ձեր վախն է ու ձեր վախի հնարածը:

**ՄԻՄՈՆ ՎԱՆԱԿԱՆ** – Աստված իմ, խելագար է:

**ԱԲԵՂԱՆ** – Մահը ան է, հոն անլ, այս ձեր անապատը, այս վախի ու մեռելության կյանքը, իսկ հոն ազատն է. հույզն ու շարժումը. հոն կյանքն է, և ես կուզեմ կյանքին գիրկը...  
(*Հանկարծ ուժով մը կհրե, կնետրե գետրին*) Հեռո՛ւ ճամփես: Ես կուզեմ ապրիմ, ապրիմ: Սեղան... (*Կնետրվի ծովը*):

**ՄԻՄՈՆ ՎԱՆԱԿԱՆ** – (*Կես մը գետրնեն բարձրանալով, սար-սափահար ու խեղդված ձայնով*) Կորավ, կորավ իր հոգին...

#### 4

*Ժայռերուն մեջեն հերզհերքե կհասնին վանականները՝  
հագուսար ու մազեր հովերուն:*

**ԱԳԱՄ ՎԱՆԱԿԱՆ** – Ո՛ր է, ո՛ր է:

**ԳԱՎԻԹ ՎԱՆԱԿԱՆ** – Գտա՛ր. ձիջտ է. տեսա՛ր:

**ԶԱԲԱՐԻԱ ՎԱՆԱԿԱՆ** – Ո՛ր կողմը անցավ:

**ՂԱԶԱՐ ՎԱՆԱԿԱՆ** – (*Ներս ցարկելով*) Ո՛ր է. ո՛ր է:

**ՄԻՄՈՆ ՎԱՆԱԿԱՆ** – (*Ծովը մայրնասնիշ*) Ա՛յ, հո՛ն...

**ԽՈՒՄԲԸ** – (*Սարսափելով, կհասձայն*) Ծ՛ովը...

**ՄԻՄՈՆ ՎԱՆԱԿԱՆ** – Կորավ իր հոգին:

**ՎԱՆԱԿԱՆ ՄԸ** – Ա՛յ անիծված է այս ժայռը. հոսկե ձգնավոր մըն ալ նետեր է ինքզինքը ծովը:

**ԿՈՒՅՐ ՎԱՆԱԿԱՆԸ** – (*Ուրիշ վանականի մը թևեն կախված, շնչասպառ ու սաստիկ հուզված, թևերը անկարգ խարխափող շարժումներով առաջ պարզած՝ կմրնե ներս*):

**ՎԱՆԱԿԱՆ ՄԸ** – Եկավ իր կոնյրը, իր կոնյրը...

**ԿՈՒՅՐ ՎԱՆԱԿԱՆԸ** – (*Կկենս անշարժ ու ամբողջ հասակովը ուղղվելով, ընդհանուր լռության մեջ*) Իրավ է, իրավ է:

**ԲՈԼՈՐԸ** – *(Զար լռությոսն, գլոխները կկախեն վար):*

**ԿՈՒՅՐ ՎԱՆԱԿԱՆԸ** – *(Ձեռքերը վեր բարձրացնելով)* Ուրեմն... Աստված իմ:

**ՂԱԶԱՐ ՎԱՆԱԿԱՆ** – Այո՛, Աստված: Աստծու վրեժն էր ասիկա: Եկեղեցին քանդել ուզելը անպատիժ չի մնար: Մեծի վրեժը ինկավ ամենեն փոքրի գլխուն:

**ՄՈՎՍԵՍ ՎԱՆԱԿԱՆ** – Ա՛խ, մեր խեղճ, մեր բարի, մեր մաքուր արեղան:

**ԱԴԱՄ ՎԱՆԱԿԱՆ** – Հեզ ու բարի, համեստ ու սուրբ:

**ԽՈՒՄԲ ՄԸ** – Ան սուրբ էր, սուրբ:

**ԶԱԲԱՐԻԱ ՎԱՆԱԿԱՆ** – Եզերքն իջնենք, եղբայրք, գուցե գտնենք դիակը. գոնե դիակը:

**ԵՐԻՏԱՍԱՐԴ ՎԱՆԱԿԱՆ ՄԸ** – Երթանք, բերենք լաստը:

**ԱՆՏՈՆ ՎԱՆԱԿԱՆ** – Դժվար է, բայց պետք է, որ բերենք լաստը:

**ԿՈՒՅՐ ՎԱՆԱԿԱՆԸ** – Լմաստը:

**ԱՆՏՈՆ ՎԱՆԱԿԱՆ** – Զարմանք բան է. ինքը ազատեց ուրիշի մը կյանքը ծովեն ու իր կյանքը տվավ ծովուն:

**ԵՐԻՏԱՍԱՐԴ ՎԱՆԱԿԱՆ ՄԸ** – Երթանք, երթանք, որոնենք:

**ՄՈՎՍԵՍ ՎԱՆԱԿԱՆ** – *(Աչքերը վեր հառած ու մարգարեական շեշտով մը)* Լսեցե՛ք, եղբայրք: Եթե Աստված ողորմի ու դիակը գտնենք, պետք է տանինք թաղենք նոր եկեղեցիի սեմին: Զոհի նոխազը կմորթեն տաճարի սեմին:

**ԴԱՎԻԹ ՎԱՆԱԿԱՆ** – Տերը կխոսի քու բերնովդ: Թաղենք եկեղեցիի սեմին:

**ԽՈՒՄԲԸ** – *(Հեռանալով)* Թաղենք, թաղենք եկեղեցիի սեմին:

*Բոլորը դուրս, կմոռցվի կոյրը, որ կմնա մինակ:*

**ԿՈՒՅՐ ՎԱՆԱԿԱՆԸ** – (Խորյրակված գլուխը կշարժե) Գա-  
ցե՛ք... թաղեցե՛ք... ձեր եկեղեցիի սեմին, հին աստվածներու  
սեմին. ան, կարող են հզոր, այդ հին աստվածները. դեռ շատ  
են հզոր...

**ՁԱՅՆ ՄԸ** – Իզո՛ւր հանեցիր աչքերդ:

**ԿՈՒՅՐ ՎԱՆԱԿԱՆԸ** – (Խորին հուզումով ու ահաբեկ) Ո՛վ  
է աս, որ կհանդգնի...

**ՁԱՅՆԸ** – Իզո՛ւր հանեցիր աչքերդ:

**ԿՈՒՅՐ ՎԱՆԱԿԱՆԸ** – (Վախեն ետ-ետ երթալով) Որո՞ն  
ձայնն ես դուն... կուզեի նայիմ աչքերուդ խորքը...

**ՁԱՅՆԸ** – Իզո՛ւր հանեցիր աչքերդ:

**ԿՈՒՅՐ ՎԱՆԱԿԱՆԸ** – Իզո՛ւր...

# ԳՐՔԵՐ ՈՒ ՄԱՐԴԻԿ

(«Die zeitgenössische Französer», von M. Nordau,  
Մարս Նորդաու, Ժամանակակից ֆրանսացիները)

## I

**Թ**եև գրքի անունը «Ժամանակակից ֆրանսացիներ» է, բայց այդքան էլ խիստ առնելու չէ բառը: Այդտեղ կան միերկու հինավուրց ծանոթներ էլ, Բալզակի ու Միշլեի նման, որոնք դարու մյուս կեսիցն են մեզ նայում: Կա նույնիսկ մի գերմանացի, այն էլ Շիլլերը, որ իր մարքիզ Պոզայի թևը մտած կարծես զարմանքով չորս կողմն է նայում, թե ինչպե՞ս է ընկել այդ ֆրանսական սալոնը:

Գալով «Ժամանակակից» ֆրանսիացիներին՝ բոլորը չեն այդտեղ հրավիրվածները, բայց և այնպես՝ բավականաչափ, և ամենքն էլ այնպես տիպիկ, որ դրանց ասածին ու խոսածին քիչ ականջ դնելուց հետո դժվար չէ ըմբռնելը վերջին քսանքսանհինգ տարիների ֆրանսական գրականության դեմքն ու ոգին:

Ավելի ոգին, քան դեմքը, որովհետև Նորդաու շինող քննադատներից չէ, որոնք իրանց ուսումնասիրած հեղինակի, երբեմն և ամբողջ մի ժամանակաշրջանի ցայտուն, հաճախ և գեղարվեստական պատկերն են տալիս: Սա քանդող քննադատներից է, փորփրող, փնտրող, ու փնտրածը ներքին արժեքն է, ներքին էությունը, բանաստեղծորեն խորը. գրվածքի կենսունակությունը, երկերի ոգին, հեղինակի հոգին:

Եվ հոգու այդ խորերից գեղարվեստական ստեղծագործության վրա նայողի համար՝ բնականաբար շատ քիչ բան է դիմանալու արդի ֆրանսական գրականությունից: Ավելացնեն



իսկույն՝ և ընդհանրապես ամեն գրականությունից:

## II

Նախ գալիս է վիպասանների մի խումբ:

Այդ առաջնության պատիվը գուցե նրա համար է, որ Ֆրանսայում իրոք վեպն էր գրականության տիրողն ու ղեկավարողը վերջին տասնամյակներին: Ասենք ոչ միայն վերջը, այլ ամբողջ դարը, այլև ընդհանրապես ամբողջ իրանց գրականության ընթացքում, վեպը, պատմվածքը ֆրանսական գրական ձևն է *par excellence*: Ֆրանսացին, և գրեթե բոլոր խավերը, մի մասնավոր սեր ունի ասելու, պատմելու, մանավանդ կասկածավոր, խճճված, սկանդալի ու պիկանտ դեպքեր: Նրանց քնարերգությունն անգամ հաճախ այնքան է մոտենում վեպին, որ դժվար է ջոկելը, որովհետև պատկերն է տիրում, ո՛չ թե զգացումը: Իսկ դրաման Ֆրանսայում, թե՛ իր թույլ շենքով, թե՛ իր ծավալուն մշակումով, բեմի լույսին հանած վեպ է ուղղակի, և շատ թատերական անուն հանած երկեր, հայտնի է, որ նախ գրված են եղել իբրև վեպ:

Վերջին վիպասաններից Նորդաուի այս հատորը խոսում է Էդմոն դը Կոնգուրի մասին, Անատոլ Ֆրանսի, Մոպասանի, Բարրեսի ու Ֆրանսուա դը Նիոնի: Եվ իր հանած եզրակացությունները վերջնական կետում նպաստավոր չեն դրանցից և ո՛չ մեկին:

Բոլորովին մի կողմ թողնելով ինքնամոլ, տափակ-հոգի ու շինծու բառերի որսորդ Կոնգուրին ու իր «Journal»-ը, մի-երկու խոսք մյուսների մասին:

Մոպասանի դիտելու պայծառ ընդունակությունը և արտահայտության գրավիչ գեղեցկությունը դուրս է ամեն կասկածից: Բայց ի՛նչ է նրա դիտածը, ի՛նչ է նրա գրվածների մշտական նյութը, և գրեթե միակ նյութը: Սեռական սեր, այն

Էլ ընդհանրապես ցած ու հաճախ հիվանդոտ տեսակի: Նրա հերոսների երկար շարքը, երբ առաջիցդ անց ես կացնում, երբ տեսնում ես այն գրական տաղանդն ու ընդունակությունը, որ վատնված է այդ վատուժները նկարելու, ակամա մի տեսակ զայրույթ ես զգում: Մեզ հետաքրքիր չեն, մեզ պետք չեն, մեզ չեն ոգևորում այն մարդիկը ու մարդոց այն կողմը, որ նրանց անասունին է կապում: Մեզ գրավողը, տևական կյանքի իրավունք ունեցողն ու գեղարվեստորեն հետաքրքիրը մարդկայինն է միայն. ինչ որ մարդը մարդ է շինում, այսինքն ինչ որ ջոկում ու բարձրացնում է մեզ անասունից:

Մի ուրիշ անպայման մեծ տաղանդ ու մի թարմ գրիչ է Անատոլ Ֆրանսը: Իր մասնագիտությունը՝ երգիծանքը (Ironie) և ինչ գեղարվեստական հմտությամբ է գործածում այդ նուրբ զենքը, որ, ինչպես բոլոր շատ նուրբ ու բարակ զենքերը, երկասյրի է սակայն: Ծաղրելն ու հեգնելը, այն էլ շարունակ ու միայն ծաղրելն ու հեգնելը, մարդու մեջ անհրաժեշտաբար սպանում է կարեկցությունը. ծաղրողը կամ չունի, կամ հետզհետե ստիպված է խեղդելու իր գույթը, որպեսզի ավելի սուր ու ավելի անխնա կերպով կոխել կարողանա իր երգիծանքի սառն նշտրակը: Գործիքի այդ սառնությունը քիչ-քիչ հեղինակից անցնում է ընթերցողին, և ընթերցման ավարտումից հետո մի պաղ տպավորություն է մնում մեջդ, չնայելով, որ կարդալիս կարծես քեզ շատ գոհ էիր զգում ու ժպտում: Երգիծանքի թերությունն է դա: Դիտող աչք ու դիտող ականջ ունենալուց առաջ՝ դիտող սիրտ ունեցող մարդիկը ամեն կերպ խույս են տալիս այդ զենքից ու գործ են դնում միայն հումորը, որ երգիծանքի կտրուկությունը չունի գուցե, բայց չունի և նրա սառն թույնը: Թարմ, կենսալից ու կյանքի խորքը դեռ չնայած երիտասարդն է միայն գործածում այդ զենքը, կամ միայն չար մարդիկ: Որ Անատոլը վերջիններից չէ, վկա են գալու իր նոր

գործերը, բայց նրա նախկին երկերը կմնան սառն, որչափ էլ մեծ հաճույքով ժպտենք նրա նրբությանն ու տաղանդին:

Գալով Barrés-ի ու François de Nion-ի այսպես ասված վեպերին, այդտեղ կարելի է գտնել ամեն բան: Դա մայրաքաղաքի ծնունդ ու մայրաքաղաքի համար շինված գրականությունն է: Այդտեղ կա պատմություն, կան լրագրական մանրալուրերից քաղած իրողություններ, կա հասարակական կյանքի պատկեր, թեև շատ միակողմանի, կա զանազան հարցեր ու գիտական թեորիսեր, կա սրախոսություն, գուցե և տաղանդ, և՛ հակասություններ, և՛ անբնականություն, և՛ այս բոլորը խառնված իրար առանց ընդհանուր կապի, առանց ներքին միության: Ինչ որ այդ հաստ խառնուրդին մեջ մեկ կողմ է թողնված, դա գեղարվեստն է, մանավանդ խոր գեղարվեստը: Մենք էլ նրանց թողնենք մի կողմ:

### III

Ինչպես հայտնի է, բանաստեղծները ամեն տեղ աղմկոտ, չհավան ու մեծ-մեծ փրթող ժողովուրդ են: Այնպես որ «օրինավոր» մարդկանց ընկերության մեջ խիստ մեծ զգուշությունով են ներս թողնում: Երևի այդ է պատճառը, որ Նորդաուն այս անգամ միայն նրանց «երեք իշխաններին» է կանչել. Վերլեն, Մալարմե ու Leon Dierx: Ես այսպես բացատրեմ, դուք հասկացեք ինչպես ուզում եք:

Այս եռապետության երրորդ անձը, ինչպես ընդհանրապես պատմության մեջ բոլոր եռապետությունների երրորդ անունը, մի պատահական անմեղ մարդ է, որ հանգամանքների բերմամբ ընկել է հրապարակ: Ես նույնիսկ չգիտեմ ինչպես կարդամ իր անունը. դա անշուշտ միայն իմ տգիտությունս է ցույց տալիս, մխիթարվում եմ սակայն այն շաբլոն մտածումով, թե գոնե ես միակը չեմ: Ահա՛ ինչպես է սկսում Նորդաուն իր

հողվածը.

«Ֆրանսայի վաթսուն լիրիկները կանչված էին, իբրև կայսրընտիր, Մալարմեի մահից հետո թափուր մնացած գահին մի գահակալ ընտրելու: Մրանցից տասնևհինգ հոգի, այսինքն՝ ձայների ամենաբարձր թվով, որ մի անվան վրա հավաքվել էր, ընտրեցին Leon Dierx-ին: Ընտրության արդյունքը մի ընդհանուր զարմանք եղավ նմեծամասնության համար, որովհետև Dierx -ին չէին ճանաչում, և՛ փոքրամասնության համար, որովհետև Dierx -ին ճանաչում էին»:

Բայց այս մի քանի տողերի մեջ ուրիշ շատ ավելի հետաքրքիր ու բազմիմաստ բաներ կան թաքնված, և մարդ բոլորովին մոռանում է Dierx-ին, որ ինչպես երևում է մի խիստ արտասովոր քաղցրահնչյուն բառախաղաց է, ու մի խիստ սովորական բանաստեղծ:

Այդ կտորը կարդացողի համար պարզ է լինելու իմիջիայլոց, թե ինչպես մի Վերլեն կամ Մալարմե դարձել են իշխան: Չէ՞ որ ասված է, «ամեն ժողովուրդ իր իշխանին է արժանի»:

Վերլենը: Որպեսզի առողջ գլուխս ավետարանի տակ չդնեմ, Վերլենի մասին բոլոր հաջորդ տողերը, այլև բոլոր բառերը քաղում եմ Նորդաուի հողվածից: Ով կռիվ ունի, թող գնա նրա հետ կռվելու:

Նախ մարդը. ախտավոր, հարբեցող, ստորին կրքերի ձեռքը գերի ընկած մի թուլամիտ էակ, աղքատ, թափառաշրջիկ ու մեկուսի, որ ունի իր արցունքի, խղճի խայթի ու սթափման վայրկյանները: Մի միստիկ, որի մշուշոտ ու երազկոտ գիտակցությունը աստվածն ու սուրբերն են ողողում, և որը ընդհանրապես առած իրան շատ լավ է զգում:

Ահա և գործը. անկապ խոսքերի ու խառնակ պատկերների մի խճողում, բացակայում որոշ մտքի ու մտածության: Խղճահարության անմխիթար վայրկյաններին ստորության ու

ոչնչության զգացումի արցունքից գոյացած մի քանի մարգրիտ: Ամենալավերը երեք-չորս հատ, ոչ ավելի, բայց որոնց մեր դարը տալու է հաջորդ դարերին, իբրև թանգարանում պահվելիք թանկագին գոհարներ:

Անշուշտ, մի բանաստեղծի համար քիչ չէ դա, բայց մի իշխանի համար: Է, չէ՞ որ մեր դեմոկրատ դարում շատ ավելի աղքատ իշխաններ ենք ձանաչում:

Իսկ ինչ վերաբերում է Մալարմեին, թե՛ իր իշխանությունը և թե՛ իր բանաստեղծությունը, *ce n'est que pour rire*.

Նա հայտնի էր իբրև մեծ բանաստեղծ, երբ դեռ ոչինչ չէր տպած, որ իհարկե ոչինչ, բայց երբ դեռ ոչինչ գրած էլ չէր: Նա մինչև անգամ զարմանում էր, որ մարդիկ այդ աստիճան հասարականում են, գրում են ու տպում, թեև դա արգելք չեղավ, իհարկե, որ ինքն էլ տպի իր ցնդի-փնթի ոտանավորները և «տակից-գլխից դուրս տված» արձակները: Չակերտների մեջ գրածս իր գրքի անունն է (*Divagations*), իր դրած և ո՛չ իբրև կատակ, այնպես որ կարծեմ մեկնությունները ավելորդ են: Կարգին մտածելը խուժանին է վայել, հասկանալի լինելը տափակ գլուխներին, ընտրյալները զառանցում են միայն ու բերնին եկածը «դուրս տալիս»: Եվ նա քիթը բռնած քամիներին՝ դուրս է տալիս և հպարտանում, երբ իր ասածը հասարակ մահկանացուները չեն հասկանում: Արդեն բոլոր դարերի ընկնավորները, լինին մեհենական, թե ոչ, նույն սիստեմն են ունեցել խոսելու ու նույն հպարտությունը իրանց աստվածային բացառիկության:

#### IV

Ամեն ժամանակ իր գրական գերիշխող ձևն ունի, արդյունք օրվա տնտեսական-հանրային պայմանների ու մտավոր ուղղության: Մեր ժամանակի ձևը դրաման է: Գեր-

ման լեզուներով խոսող ժողովուրդների մեջ ավելի վաղ է կատարվել այդ տիրապետությունը և ավելի կտրուկ: Հիմի էլ, այսպես մի տասնյակ տարի է, սկսած է նույնը Ֆրանսայում, թեև քիչ տատանոտ ու խարխափելով կարծես: Դեռ չի խոսում իշխողի լեզվով և չունի դեռ իշխողի հեղինակությունը, բայց ունի հավակնությունը և հրամայական ժեստեր անում է արդեն:

Թվով քիչ չեն դրամայի արդի զինվորները, բայց ինչպես միշտ, «շատերն են կանչված ու քիչերը ընտրված»: Դրանց մեծ մասը հին կարգերով են վարժված ու հին զենքերով զինված, Դոնեի ու Հերվիոյի նման, բայց կան և նոր խիզախներ, «նոր հավեր, որոնք երկաթե ձվեր են ուզում ածեն», ինչպես առածն է ասում, սրանից է Բրիո (Brieux), Գյուրել, այլև Միրբո իր «Վաստ հովիվներովը»:

Paul Hervie և Maurice Donnay այն վարքագիր հեղինակներից են, որոնք կոչում են զգում գրելու, անշուշտ ոչ «Հարանց վարքը», այլ դժբախտաբար «որդոցը», իրանց ժամանակինը: Նրանց ջանքն է, բեմ հանեն փարիզյան վարքն ու բարքը, այն էլ միայն մի որոշ շրջանի: Իրանց նյութը գրեթե բացառաբար ամուսնական անհավատարմության շուրջն է դառնում, երբեմն զուտ, երբեմն էլ բարոյախոսական քարոզներով համեմած, որ իհարկե ավելի դժվարամարս է դարձնում: Գործողության տեղը՝ միշտ փարիզյան սալոնը: Իսկ հերոսները, անհ, ինչ հերոսներ, կոմս, մարքիզ, երեցփոխան, դրամատեր, մինիստր, բարձրագույն պաշտոնյաներ, մի խոսքով բոլոր խոշոր կենդանիները՝ մորթուց դատելով: Իսկ ներսը. խեղճ Ֆրանսա, եթե հավատանք այդ հարգելի վարքագիրներին, ֆրանսական վերին շրջաններում բոլորն էլ ցածհոգի, աղտոտ մարդիկ են, ո՛չ մի սրբություն չճանաչող, ո՛չ մի մարդկային արժանավորության գին չտվող, բացի քաղաքավար ձևերից

ու կեղևից, որոնց միակ ձգտումը փողն է, իսկ կյանքի նպատակակետը՝ կանանց ներքին շրջագգեստը:

Սա գրական այն ժանրն է (roman rose), որի վիպասանական ձևը ողողում է գրավաճառանոցների ցուցափեղկերը և «բարձր շրջանի» ընթերցանության նյութն է կազմում (Gip, Lavedan, Hermand):

Մասնավորապես Հերվիո ու Դոնե մեծ հաջողություն են վայելում փարիզյան բեմի վրա: Հաջողության գլխավոր պատճառները արտաքին են: Նախ՝ առատ շաղ տված կատակներն ու սրախոսությունները, որոնց մի բավական մեծ մասը շատ ցած տեսակի ապրանք է սակայն, երկրորդ արժանիքը՝ լեզուն ու ոճը՝ թեթև, մարգարտահեռ, կենդանի, իսկ դա շատ գնահատված բան է Ֆրանսայում, ուր մեծ կարևորություն են տալիս երաժշտականության. մոռանալու չէ, որ կլասիկները խաղալիս ավելի երգում են, քան խոսում: Եվ վերջապես երրորդն էլ այն, որ դրանք շնորհք ունեցող մարդիկ են, օգտվում են բոլոր գրական ու բեմական միջոցներից և մեջեմեջ էլ տալիս են իսկապես ցնծող ու սիրուն տեսարաններ:

Գալով թերություններին՝ անձիշտ ու խեղաթյուրված է այդ վարքագիծների նկարած վարքը. Փարիզի սալոնաբնականները ո՛չ այդ տեսակ ապուշ են, ո՛չ այդ տեսակ հրեշ: Տկար ու շինծու է նույնպես դրանց դուրս բերած մարդկանց հոգեկան աշխարհը, այլև խախուտ ու թաց ամբողջ գրվածքի շենքը:

## V

Մեզ համար ավելի հետաքրքիր են նորերը, նոր հովերը: Ամենից տարօրինակ Ֆրանսուա դը Գյուրելն է:

Տարօրինակ ու մի տեսակ հնարովի իր ընտրած նյութերը, որոնց ազնվականության ծակերից երևում է բացառիկ լինելու

սնափառությունը: Ինքը դը Գյուրել ազնվական է:

Տարօրինակ է ու անշնորհք իր նյութերը մշակելու եղանակը: Բոլոր գրությունները կարծես բռնի ու զոռով են ստեղծված, բայց երբ գիրքը մի անգամ կա, մնացածը նկարված է վարժ ու վարպետի ձեռքով:

Տարօրինակ ու չգիտես ի՞նչ աշխարհից են եկած նրա մարդիկը. ո՛չ արյուն ունեն, ո՛չ ոսկոր:

Տարօրինակ է ընթերցողի կրած տպավորությունը, նրա գրածները կարդալիս շարունակ մտածում ես, որ սարքած բան է այդ բոլորը, ու կեղծ, բայց և այնպես զգում ես, որ տակը մի բան կա, ինչ-որ կարծես մի արժեքավոր բան: Դը Գյուրել բանաստեղծ է:

Տարօրինակ է վերջապես իր երկերի բախտը, որոնք մեկը մյուսի հետևից ընկնում են բեմ հանելիս, բայց ընկնում են «պատվով»:

Բեմին դիմացավ «Նոր կուռքը», որ համեմատաբար ավելի «այս աշխարհից» է ու ավելի էլ բեմական: Նյութը երկու հավիտենական ախոյաններն են՝ կրոնն ու գիտությունը:

«Գիտությունը շինել ենք մի կուռք, որը սակայն սնանկ է ինքը ու մեր հոգու հարցերին ու պահանջներին բավականություն տալ չէ կարող. ճշմարիտ աստվածը կրոնքն է», ահա միտքը երկու խոսքով: Դը Գյուրել ֆրանսացի է ու ազնվական, հետևաբար կաթոլիկ, և այդ կաթոլիկ տգիտության աչքովն է նայում գիտությանը:

Շատ ավելի բեղմնավոր, շատ ավելի «մոդեռն» ու շատ ավելի հռչակավոր է Բրիոն, որի հռչակը սակայն, որ չէ ծնում ո՛չ հեղինակի գեղարվեստական մեծությունից, ո՛չ գրվածքի ուժից, ո՛չ էլ հոգեբանական խորությունից, այլ ամենից առաջ որովհետև ժամանակի էտիկետը ունի իր վրա ու զբաղվում է օրվա հարցերով:



Դրամայի դրոշակները արդի եվրոպական գրականության մեջ «օրվա չարիքը» քրքրողներն են, որոնք գեղարվեստի ու գիտության վերջին խոսքն են ուզում ասեն միաժամանակ: Եվ ճիշտ դրա համար էլ ոչինչ չեն ասում:

Նրանց երգը գեղարվեստական է կամ իր արտաքինովը միայն, կան, այսպես ասած՝ պատահաբար, գրչից դուրս է պրծել մի խոր ու իրական գիծ, մի ճշմարիտ մարդ, մի ազդող տեսարան. իսկ էականը այն հարցն է, հանրային այս կամ այն երևույթը, որ հեղինակը ուզում է լուսաբանել ու քննադատել: Ուրիշ խոսքով՝ ժուռնալիստներ են դրանք ու հրապարակախոսներ, և մեծ մասով շատ վայրիվերո, որոնք սխալմամբ մտել են գեղարվեստի դռներն ներս, իսկ լավագույն դեպքում՝ ստեղծագործող տաղանդով օժտված մարդիկ, որ ընկել են հասարակական գիտությունների պարտեզը ու մի բան գողացած ուզում են դուրս գան, բայց ցանկի մացառների մեջ խճճված պատռտում են ու քրքրում իրանց էլ, իրանց գեղարվեստն էլ ու այն մի կտոր գողունի գիտությունն էլ:

Բրիոն այս վերջին տեսակի ներկայացուցիչն է, գուցե և լավագույն ներկայացուցիչը: Բայց ո՛չ լավը կօգնե այդտեղ, ո՛չ լավագույնը, որովհետև գործը ինքն է հիվանդ: Գեղարվեստական երկով կատարված ուսումնասիրությունը, վերլուծությունն ու քննադատությունը անհրաժեշտորեն միակողմանի է, նեղ ու ծուռ փաստերը խեղաթյուրված, պատճառները թերի, որովհետև նա անկարող է երևույթի բոլոր կողմերը և բոլոր հարցերը մեջ քաշելու ու անխուսափելի կերպով ստիպված է ամբողջ հարցը այս կամ այն անհատի բախտին կապելու, իսկ օրենքներն ու հանրային երևույթները անհատի հետ գործ չունեն: Խոշոր հարցերը ճնշվում են, ընդհանուր շարժումը կծկվում, հանրային աղետը գալիս կենտրոնանում է մի քանի մարդկանց գլխին: Գեղարվեստը ուրիշ հնար

չունի, եթե ուզում է կարդացվի, եթե ուզում է ազդե: Բայց դրածը դուրս է գալի սուտ:

Նկարել կյանքը իր հոսանքներով ու շարժումներով, պատկերել նրա կռիվը, տառապանքը, պրկումները, հաղթանակը, տալ մարդու հոգին, իր հույսը, երազները, անկումը, ձգտումը, պայքարը – մի խոսքով ներկայացնել ինչ որ մարդն է ու մարդկայինը, որ գեղարվեստի գործն է ու միակ գործը: Բայց մեկնություններ տալ, քննադատել, ապացուցանել, պարսավել ու քարոզել գիտական այսինչ խնդիրն ու թեորին, տնտեսական կամ քաղաքական այնինչ հարցը, գրությունը, ուղղությունը, դա գեղարվեստի գործը չէ: Իսկ երբ բռնի նրա վիզն եք փաթաթում, դառնում է կատաղած մեղու, որ իր վրեժն է ուզում, սպառնում է թե իրան և թե իր վրա հարձակվող հարցը:

Ահա այսպիսի մեղվական մի վրեժխնդրություն է, որ հանում է գեղարվեստը «կապիտալիզմից» Միբբոյի հայտնի դրամայում՝ *Les mauvais benders*: Ինչ աշակերտական ու հաստագլուխ կապիտալիստներ են այդ երեք մեծ գործարանատերերը, և ինչ տկար ֆրազներով լեցված մի լիրիկ միամիտն է այդ Ժան Ռուլը, որ սոցիալիզմն է ձառում, և վերջապես ինչ շինծու կապեր, ինչպես անիրական ու անճիշտ՝ մեր աչքի առաջ կատարվող այդ գործողությունը: Երևակայեցեք մեկը, որ այդ գիրքը կարդա ու դրանով հասկանա ու բացատրե կապիտալի ու բանվորի մաքառման պատճառները, երևույթը, հետևանքն ու նշանակությունը, մի այդ աստիճանի լուրջ, բարդ, խոր ու ահագին նշանակություն ունեցող սոցիալտնտեսական պայքարի ինչությունը: Արջի ծառայություն է սա, որ մատուցվում է սոցիալիզմին, իսկ դրա հետ էլ ծռմովում է ու տափակում գեղարվեստը, չնայելով Միբբոյի ուժեղ ու խորագգաց տաղանդին:

## VI

Մի դեմք էլ, և հրաժեշտ առնենք ֆրանսական դրամայից:  
Ռոստանի (Rostand) մասին է խոսքս, որ վերը հիշված  
ուղղությունների ու մարդկանց հետ ո՛չ մի գործ չունի, և եթե  
ուզում եք՝ ո՛չ մի ուղղության և ո՛չ մի մարդու հետ գործ չունի:  
Հենց դրա մեջն է նրա հրապույրը:

Հեքիաթի բանաստեղծն է նա, և իր երկերն էլ հեքիաթի  
թարմությունը. միամտությունը, զվարթությունն ու առողջու-  
թյունն ունեն: Խոր միտք, կյանքի մարդիկ, իրական կյանք  
այդտեղ փնտրելու իրավունք չունենք, բայց դա իհարկե չի  
նշանակում, որ նրա աշխատությունների մեջ դրանց ամեննին  
չենք պատահի:

Ահագին հաջողություն ունեցավ նրա Cyrano de Bergerac-ը:  
Ֆրանսացին սիրեց սաստիկ. սիրեց, որովհետև իդեալական  
ֆրանսացին կար մեջը, բո՛ւն ֆրանսացին, ֆրանգը: Մի դյու-  
րագրգիռ սուրի-մարդ, մի հանդուգն սուր-լեզու, մի տկարի  
պաշտպան ասպետ ու մի գալան բանաստեղծ:

Փոքր իդեալ չէ, ինչպես տեսնում եք, մանավանդ մեր  
այս եսական ու դրական դարում, ուր սուր լեզուն շատ  
թշնամի է սուրի մարդուն, ուր ասպետները իրանց են միայն  
պաշտպանում, իսկ գալանի հոգում ամեն բան գուցե կա,  
բացի բանաստեղծությունից:

## VII

Եթե հիմա մի հայացք գցենք հետ վերը հիշած մարդկանց  
ու գործերին, կգտնենք և՛ տաղանդ, և՛ սրություն ու երգիծանք,  
և՛ կյանքի պատկերներ, և՛ բանաստեղծական ճիգեր, և՛  
դրամաներ, որ մտածել են տալիս, և՛ ոճ, և՛ լեզու, միայն չենք  
գտնի ապրո՞ղ, տևո՞ղ, խո՞ր երկեր:

Այդ բոլորը մի տեսակ հոսանքի երեսին է լողում, և մենք միայն արևի տակ ցոլցլան այդ մակերեսն ենք տեսնում ու իր ծփանքը, մեր առաջ չի բացվում նրա տակի եռքը, թավալքը, հոսանքի բուն պղտորությունը ու նրա քշած-վարած բեկորներն ու ժայռերը:

Տեսնում ենք շատ մարդիկ, շատ երեսներ, շատ վարք ու բարք, շատ նիստ ու կաց. շատ քիչ ենք տեսնում մարդը, մարդու հոգին, և այն քիչն էլ, որ տեսնում ենք դժբախտաբար կամ կեղծած է, կամ շատ ցածն է առած՝ անասունի դրացին:

Այս տեսակետից դեռ խիստ թարմ է ու ահագին նատուրալիզմի ազդեցությունը, որքան էլ հակազդը զարթած լինի արդեն:

Այսպիսով՝ վերջին տարիների ֆրանսական գրականությունը տվել է մեզ սիրուն կարդացվող գրքեր, երբեմն նաև սիրով կարդացվող գրքեր, բայց չէ տվել սրտով կարդացվող գիրքը:

## VIII

Նորդատի այս հատորը ո՛չ ամբողջական մի գործ է, ո՛չ էլ լրիվ. շատ աչքի ընկնող հեղինակների մասին խոսք չկա, եղածների էլ միայն մի քանի երկերն են աչքի առնված: Բայց այդ բոլորը պահանջելու իրավունք էլ չունենք. զանազան ժամանակ գրած քննադատական ցրիվ հոդվածներ են դրանք, որոնց հավաքել է վերջը ու դրել մի շապիկի տակ:

Այդ լրագրականությունը զգալի է ամեն կտորի մեջ. մեկ, թե՛ երկուսն են միայն քիչ ավելի ձույլ ու ավարտ: Տեղ-տեղ խառնակ է նյութը, հաճախ երկար, երբեմն կողմնակի հարցը տիրապետող, իսկ երբ այդ կողմնակի հարցն էլ մութ է ու քիչ հետաքրքիր՝ հարվածը դառնում է ձիգ, եթե ոչ ձանձրալի:

Սակայն որքան պատահական լինեն այդ հոդվածները,

որքան և անավարտ, բայց և այնպես տալիս են տեղի ու ժամանակի ոգին, և կարևորն էլ այդ է:

Ուշադրության արժանի են նաև հատվածների մեջ այս կամ այն կողմ նետած գեղարվեստական տեսություններն ու սկզբունքները, մանավանդ մեր ընթերցողի համար: Գեղարվեստականի այդ ըմբռնումը ու հայացքները որքան էլ պարզ ու ինքնին հասկանալի լինեն բուն գեղարվեստագետի, բուն գրագետի համար, մեզնից շատերին սակայն օտարոտի են թվալու, և հենց այդ պատճառով, որ ճիշտ հակառակն է պնդված ու փառաբանված մեր գրական հրապարակի վրա, ուր դժբախտաբար անդրջրհեղեղյան հայացքները և շաբլոն ֆրագները թագավորում են դեռ կոկոզավիզ, ինչպես ուրիշ շատ բաների, այնպես էլ մասնավորապես գրականության նկատմամբ:

Եվ ինչ որ ամենից ավելի ինձ դուր է գալիս այդ գրքի մեջ, դա հեղինակի ունեցած բարձր ըմբռնումն է գեղարվեստի, որ գրեթե ամեն էջից զգացվում է, նրա այն բարձր չափը, որով չափում է քննադատելի անձերն ու երկերը, բարձր ու բուն գեղարվեստական չափը:

Տեսնում ես, որ մարդն է որոնում նա ամեն տեղ, մանավանդ առողջ մարդը: Մարդու մեջ էլ մարդկայինը, բայց չկեղծած, չծռած, ճշմարիտ մարդկայինը, և մարդկայինի մեջն էլ վերին մարդկայինը:

# ԳՐԱԿԱՆ ԵՐԿԵՐՈՒ ԴԵՐԸ

## ԻՆՉ Է ԳԻՐՔԸ

### Ա Անժամանակ գրադում

«Ինչ ժամանակ է հիմա գրական հարցերու: Պերձանք է ու շռայլություն գրականությունը ինքը, և շվայտություն մըն է ուժ ու ժամանակ վատնելը այդ կարգի պարապ խնդիրներու վրա, երբ մեր առջևը ցցված են մեր ժողովրդի հալածանքն ու ձուլումը, մեր գոյության ու մեր ոչնչացման դաժան հարցերը»:

Այսպես կմտածե հայ մարդը ականա, երբ գրական երկի մը կամ գրական ուսումնասիրության մը համար գրիչ վերցնել կուզե: Եվ շատ բնական է անշուշտ այդ մտածումն ու տրամադրությունը մեր արդի պայմաններուն մեջ ապրող հայուն համար: Բայց շատ բնական է նաև հաջորդ քայլը, երբ այդ բոլորը մտածելեն ու ըսելեն ետքը՝ նորեն կվերցնենք գրիչը մեր գեղարվեստական երկը գրելու համար, որ կառուցել կցանկանք, վերլուծելու համար մեր գիտական նյութը, որ մշակել կցանկանք:

Որովհետև՝ կապրի կյանքը անընդհատ իր բոլոր կողմերով և կպահանջե, որ դուն ալ ապրիս ու աշխատիս կյանքի բոլոր կողմերով: Ինչպես որ անհատը չի կրնար չուտել, չմտածել ու չհուզվիլ՝ պատերազմ ըլլա թե խաղաղություն, սպառնալիքի տակ ըլլա թե հալածանքի, այդպես ալ ժողովուրդները չեն կրնար թողնել ու անտեսել իրենց ֆիզիկական ու հոգեկան բազմադիմի պահանջները՝ ինչ պայմաններու տակ ալ որ գտնվին: Անշուշտ երբեմն ավելի թափով կքալե կյանքի այս ու այն կողմը, երբեմն կաղ ու ընկճված: Երբեմն կանգ կառնե զարնելե մարդուս սիրտն անգամ, բայց վայրկյան մը միայն:

Ապրող ու ապրիլ ուզող ժողովուրդի մը համար անիմաստ խոսք է բոլորովին, թե «Ինչ ժամանակն է հիմա գրական աշխատանքի», և մասնավորապես մեր դիրքը և մեր պատմությունը ունեցող ժողովուրդի մը համար: «Ժամանակի» ու «անժամանակի» նրբագագություններն են գուցե իսկական շոայությունը մեզի համար, որուն վրա իրավունք չունինք ժամանակ կորսնցնելու: Այդպես կտրվեցնե մեզի գոնե մեր հայ պատմությունը:

Հայուն համար ի՛նչ գրականության ժամանակ էր հինգերորդ դարը: Սասանյաններուն ամենեն փրփրած օրերուն. մեր պետությունը քայքայված, վերջն ալ կործանված: Ժողովուրդը ենթակա բուռն քաղաքական ու կրոնական հալածանքներու, երբ մեկ կողմեն մեր աշխարհը կդառնար ավեր ու անտեր, մինչ մեր նախարարներն ու հոգևորականությունը, այսինքն՝ այն օրերու մտավորական ու ղեկավար մարդիկը, կենթարկվեին արքորի ու մաշումի պարսկական անապատներուն ու բերդերուն մեջ՝ հուսահատ ու կտրիժ դիմադրութենե ետքը:

Մինչև հինգերորդ դարը հայ պետությունն ու ազգությունը դեռ երբեք չէր գտնված ոչնչացման այս աստիճանի մեծ սպառնալիքի մը տակ: Եվ ահա՛ ճիշտ այդ օրերուն է, որ մեկ կողմեն կողբա Խորենացին իր նշանավոր «Ողբը», մյուս կողմեն կհորինե ավելի ևս նշանավոր դյուցազներգությունը ժողովրդական վեպերեն քաղելով, որուն անունը կդնե «Հայոց պատմություն»: Եղիշե վարդապետը գրի կառնե իր յոթը արարով դրաման, որուն անունն է «Վարդանանց պատերազմին պատմությունը»: Եվ այդ դարուն է, այդ երկու մեծ գրքերեն քիչ մը առաջ կամ քիչ մը ետքը, որ Եզնիկ կվերլուծե մարդկային հավատալիքները: Ուրիշներ ալ հույն փիլիսոփաները կթարգմանեն, պատմական երկեր կշարադրեն, կերգեն տաղեր ու շարականներ, կհորի-

նեն քերականություններ ու քերթողական արվեստի ուսումնասիրություններ, այլև ճառ, քարոզ ու մեկնություն, բազմակողմանի գրական հարցեր, ամբողջ նոր ու ընդարձակ գրականություն մը, որ գրաբարի «ոսկեդարը» կհամարենք հիմա:

Եվ ինչո՞ւ համար է այս բոլոր «անժամանակ» աշխատանքը: Հիմնապես մեկ նպատակի մը համար. բարձրացնել ու գորացնել ազգային դարձած քրիստոնեական կրոնը, բարձրացնել ազգային միտքն ու գիտակցությունը և նոր ուժ տալ ազգային դիմադրության:

Այդպես ալ՝ ինչ ժամանակ էր գրական ստեղծագործության թաթարական խաժամուժի հեղեղներու շրջանին, ԺԱ-են մինչև ԺԳ դարերու ընթացքին, որ սրբեց ու քանդեց նորեն արմատ նետած հայ անկախություններն ու քաղաքականությունը, որ կիսովին ցրվեց ու սպառեց մեր ժողովուրդը և ոչնչացուց մեր ազնվականությունը: Ճիշտ այդ դարերուն է սակայն, որ փախստական դեպի արևմուտքի սահմանները, մեկը ամրացած ծովքի դոյակը, մյուսը Հռոմկլայի բերդը, երրորդը Լամբրոնի անառիկ ամրություններու ետին, կգրեն, կերգեն ու կհորինեն մեր փախստական մտավորականները, մեր կաթողիկոսները, մագիստրոսները, իմաստասերները: Մինչ հայրենի հողեն չբաժնվողները կկծկտին լեռներուն ծերպերը, սարերուն խորքերը, վանքի մը հովանիին տակ, կգրեն, կվիճին, կտրվեցնեն ու կայրվին իրենք իրենց հոգիներուն մեջ՝ Նարեկացիեն ու Լաստիվերացիեն սկսած մինչև Գոշն ու Երզնկացին:

Թաթարական լուծի վատթարագույն դարերը մեր գրաբարի երկրորդ ծաղկումն է՝ հայ հույսը, հայ լույսը, հայու հավատն ու ոգին վառ պահելու բուռն տենչանքով:

Իսկ Լենկթեմուրեն սկսած և ամբողջ թուրք-պարսկական



անվերջ պատերազմներու ընթացքին, որոնք մեր հայրենիքի ո՛չ մեկ անկյունը շեն չթողին, ի՛նչ ժամանակ էր երգի ու բանաստեղծության: Բայց այդ մռայլ ԺԵ և ԺԶ դարերուն է, որ մեր աշխարհիկ նոր բանաստեղծությունը կվերընծյուղե. Նաղաշ, Կոստանդին, Թլկուրանցի, Աղթամարցի և դեռ այնքան ուրիշներ ավելի երկրորդական կամ նվազ հայտնի: Այդ բոլոր մարդիկը գրեր են մեծ մասով երկու հալածանքի ու երկու ավերածության մեջտեղը, երբեմն այդ անծայր աղետներու անմիջական ճնշման տակ իրենց նեղությունը, իրենց դժգոհանքը երգելու համար: Բայց ավելի հաճախ և ավելի սովորականը փախստականներ են, բոլորն ալ շուրջի ծանր իրականութենեն, որոնք փոխարինում ու մխիթարանք կփնտրեն անձնական ապրումներու ու վայելքի մեջ:

Քաղաքական ճնշման և քնարական զարթոնքի ներքին բնական կապ մը անսովոր երևույթ չէ ժողովուրդներու պատմության մեջ:

«Անժամանակ» աշխատավոր մըն էր և՛ Մխիթար Սեբաստացին, որ իր խելքի քանի մը հետևորդներու հետ կղեգերի Հոնիականի ու Ադրիականի եզերքները ԺԸ դարուն սկիզբը՝ ապահով անկյուն մը գտնելու համար, բույն մը հյուսելու համար հայ գրականության ու հայ գրքին, հեռո՛ւ իր հայրենի հողերեն, ուր մեռած է ամեն շարժում, հեռո՛ւ իր ժողովուրդեն, որ կտքա ցրիվ ու տրորված, հանգստի խոր շունչ մը քաշելու անկարող:

Վարդապետը կծախե նույնիսկ իր հավատքը, և Սուրբ Ղազարի կղզիին մեջ ամբողջ դար մը իր աշակերտները կգրեն ու կթարգմանեն հին ու նոր գեղարվեստական ու պատմական երկեր՝ Կիկերոն, Հոմերոս ու Վիրգիլիոս: Ի՛նչ ժամանակն էր: Ու կշարադրեն աշխարհագրություն, քերականություն, բառարաններ, կվերակենդանացնեն հայ լեզուն, որ

աղձատեր ու քայքայեր էին ունիթորները: Եվ մեր գրաբար գրականությունը կունենար իր վերջին ծաղկումը:

Եվ վերջապես ինչ երևելի ժամանակ մըն էր հայու ժԹ դարը գրական զարգացման համար, երբ հազիվ քիչիկ մը օրենքի սովերը տեսած, քիչիկ մը եվրոպական շփում, քիչիկ մըն ալ Մխիթարի այդ «անժամանակ» գործին ազդեցությունը, մեկ անգամեն կտրուկ կերպով սկսավ գրական հարցերու տարափ մը և ուժեղ գաղութային գրականություն մը երկու ձյուղերով իրարու զուգահեռ և իրարու զուգընթաց: Ո՛չ պատերազմներն են պակաս եղեր մեր հողերուն վրա ու մեր շուրջը, ո՛չ ճնշումներն ու սիսթեմատիկ հալածանքները, ո՛չ բանտ, աքսոր ու կախաղաններ, ո՛չ տնտեսական ճնշում, գաղթ ու պանդխտություն:

Բայց այդ բոլորին հյուսված, այդ բոլորեն անբաժան, ամեն դադարի բռնկելով, ամեն փոթորկի վայրկյան մը մարելով, եղեր են միշտ հրապարակի վրա գրական խնդիրները և այդ համառ հայ գրականությունը:

Եթե հայ ժողովուրդը սպասեր գրականության համար հանգիստ ու հարմար ժամանակներու, մենք հիմա գրականություն չէինք ունենար: Եվ եթե այսօր սկսինք «շոայլություն» նկատել գրականությունը և իբրև «պերճանք» մը համարել մյուս գեղարվեստներն ու գիտությունները մեզի համար, վաղը կմնանք տկլոր ու զուրկ ամեն ստեղծագործումե, քանի մը աստիճան կիջնենք վար քաղաքակրթության սանդուղեն:

Ժամանակը ոչ մեկ ինքնարդարացում չի ընդունիր և ո՛չ մեկ բացատրություն անոր գլուխը չի մտներ: Այն միայն գործ կպահանջե և հաջողիլ. իսկ հաջողելու համար անընդհատ աշխատանք է պետք, կամք ու հարատևություն: Ատոր համար է, որ մեր նոր երիտասարդությունը իր առողջ բնագդով կհետևի մեր դարավոր պատմության բռնած գծին, մեր շատ

չար ու բարի տեսած ժողովուրդի ներքին բուռն պահանջին, ստեղծելու, բարձրանալու, ազնվանալու: Եվ ան կգրե, կտրվի կստեղծե ու կգբաղի նաև գրական հարցերով և՛ տարագրության ճամփուն վրա, և՛ պանդխտության կայաններուն մեջ, և՛ դեռ չտեղավորված գաղթականի բոլոր տեսակի գրկանքներուն ընդմեջեն:

Մեր ժողովուրդի վերջին ամենածանր աղետներուն ու տարագրության օրերուն կատարված գեղեցիկ խորհրդանիշ մըն է հետևյալ պատկերը: Հյուծված ու տանջանքի մրուրը խմած հայ կինը, որ իր մատին ծայրովը Տեր Ջորի ավազներուն վրա գրել կտրվեցնե իր փոքրիկին:

## **Բ Որո՞ւ համար է գրականությունը**

«Այդ բոլորը աղէկ մեր գրականության համար և մեր գրիչ շարժողներուն համար, բայց ի՞նչ պետք ունի լայն հասարակությունը ձեր գրածին ու մրածին: Ի՞նչ կարևորություն կներկայացնեն այդ գրությունները ժողովուրդի մը լայն խավերուն համար»:

Այսպէ՛ս կդատե որոշ մտայնություն մը: Եվ այդպէս մտածող մարդը, ինքը գիտակցի թե ոչ, «ուսումնական» ըլլա թե «աշխատավոր», դեռ միշտ կեցած է այն հին հասկացողության վրա, թե գիտությունն ու արվեստը որոշ խումբի մը համար է միայն, որոշ առանձնաշնորհյալներու: Այս կերպ մտածող մարդը դեռ չէ հաշտված ներքնապէս նոր դարերու մեծ նորությանը, թե ամեն ինչի հիմքը ժողովուրդն է և ամեն ինչ ժողովուրդի համար: Գուցե նույնիսկ լեզվով ու տեսականորեն ինքն ալ կրկնող մըն է այդ արդիական սկզբունքին, քանի որ սարսափելի ուժ ունի ժամանակի ոգին և մեզի ըսել կուտա հաճախ բաներ, որոնք դեռ չեն դարձած մեր ներքին ըմբռնումը և մեր իսկական համոզումը:

Մանավանդ որ ժողովուրդը, մեր ժամանակներու այդ «ստրին մեծությունը», դեռ իրականին մեջ շատ խեղճ և ստորին պայմաններու մեջ կգտնվի թե՛ աշխատանքի, թե՛ ապրուստի, թե՛ կրթության և թե՛ վայելքի տեսակետեն, որով և շատերուն համար «ժողովուրդ» գաղափարը և ժողովրդապետական սկզբունքները դեռ շոշափելի չեն հարկ եղած չափով: Հեզնանքի ու թերահավատության ընդարձակ ասպարեզ կա դեռ: Զարմանալու պատճառ չունինք, եթե այդ տեսակի հոգիներուն մեջ բացարձակ կերպով կամ քիչ մը ծպտված, բայց կտիրե միշտ հին ռեժիմի մտայնությունը, թե «ժողովուրդը» կամ «լայն հասարակությունը» ուրիշ տեսակի արարած մըն է, բարձր մարդուն և անասունին մեջտեղը գտնվող միջին վիճակ մը, որուն համար անպետք ու ավելորդ են մարդկային «վերին շերտերու» կամ «նեղ հասարակության» հնարած ու մտածած բաները:

Կա և ուրիշ խումբ մը, «դրական» մարդիկը, որոնք ընդհանրապես արհամարհանք մը կցուցադրեն ամեն բանի դեմ, որ իր վրա «գրական» անունը կկրե, կուզե լայն շերտերեն ըլլա, կուզե նեղ: Գրական մարդը, գրական երկը և գրական հարցերը հավասարապես արհամարհելի են ատոնց համար, իբրև անպետք ու հիմարական բաներ, քանի որ ոսկի չեն ծնիր: Մարդկային է երևույթը. մեր չճանչցած ու չգիտցած բաները բնականաբար գնահատել չենք կրնար, մեր չգնահատած բաներն ալ ավելորդ կհամարենք ամենուն համար և մեր ավելորդ համարած բաներով երբ ուրիշները կգբաղին ու կոզևորվին՝ մեր արգահատանքը կշարժեն կամ մեր բարկությունը: Միթին մեջ վախ կամ անախորժություն զգալը բնական է ամենուն, և այդ զգացումը փարատելու համար, ինչպես հայտնի է, կաղմկենք, կմենախոսենք, քիչ մըն ալ հոխորտալից ձևեր կառնենք: Եվ այդ հոխորտանքն

ու արվեստական բարձր խոսվածքը զգալի է «դրական» մարդոց արհամարհանքին մեջ:

Ավելի բարեմիտները կավելցնեն իբրև չքմեղանք, թե «Ձեր գիտությունները ու գրությունները ժողովուրդը չի հասկնար, չի կրնար հասկնալ: Ասոնց ալ պետք է ըսվի ու ընդգծվի, որ գիտական ու գեղարվեստական երկերուն մեջ, ինչպես և ընդհանրապես ամեն տեսակի հարցերու ուսումնասիրության մեջ, ոչինչ չկա խրթին ու անհասկանալի, մատի վրա համրվող մարդոց միայն ըմբռնելի: Խրթինն ու անհասկանալին անոնց նյութին մեջը չէ, այլ արտահայտության ձևին մեջը: Միևնույն բանը կարելի է ըսել գիտական բարբառով, որը հասկնալու համար կպահանջվի նախնական որոշ պատրաստություն: Նույն բանը կարելի է ըսել չոր ու պարզ ֆորմյուլներով ու մասնագիտական բառերով, որ հասկնալի է միայն բացառիկ ընտրյալներուն: Նույն բանը կարելի է ըսել զանազան ուսումներով, ակնարկներով, գալարումներով ու հազար տեսակ պաճուճանքով, որ անվարժ մարդը ճամփե կհանեն ու կխրտնեցնեն: Եվ վերջապես միևնույն բանը կարելի է արտահայտել պարզ ու առօրյա մարդավարի լեզվով ու ձևով: Խրթինն ու անհասկանալին ոճի հարց է, ո՛չ նյութի:

Անշուշտ, ամեն ընթերցող միևնույն բովանդակությունը չէ, որ կհանն որևէ գիտական կամ գեղարվեստական գրվածքե մը, ինչքան ալ պարզ ու թեթև ըլլա հորինվածքը: Ամեն մարդ նույն խորությամբ ու նույն լայնքով չէ, որ կընդգրկե արծարծված հարցերը, ներկայացված տեղեկությունն ու իրականությունը: Բայց ամեն մարդ ալ բան մը կըմբռնե ու բան մը կհանն գրվածքին մեջեն: Եվ եթե բուռի առաջին հանածները խիստ համեստ ալ ըլլան, հաջորդ բուռերը ավելի հարուստ ավարով դուրս կուգան: Ամեն պարագայի այդ ճիգերեն է, որ կմարզվի միտքը ու կխորանան դատողությունները: Աստված անգամ

վեց օրեն ստեղծեց աշխարհքը քառսեն. և ամեն ըմբռնում աշխարհք մըն է, որ կծնի մեր հոգիի քառսեն: Կամաց–կամաց պետք է զատվին լույսերը մութերեն, ցամաքը ջուրերեն, որ վերջապես ստեղծագործությունը ձև առնե:

Մեծ հանցանք է, երբ «լայն հասարակության» ներարկել կուզենք, թե այս ու այն գիտությունը իրեն համար չէ, իրեն անպետք է ու անհասկնալի, թե գեղարվեստները «նեղ հասարակության» համար են, և գրական երկերն ալ՝ գրագետներու: Այս տեսակի քարոզները մեզի դեպի հին ռեժիմի դասակարգերը կտանի, դեպի դասակարգային չինական պատերը: Մինչդեռ մարդկությունն ու հառաջադիմությունը արյան ու քրտինքի հեղեղներով քանդելու կտքնին այդ հնադարյան պատնեշները և կծգտին ամենուն համար մատչելի դարձնեն և՛ գեղարվեստները, և՛ գիտությունները, և՛ անոնց տված վայելքը, և՛ անոնց տված հոգեկան բարձրացումը: Եվ մենք բոլորս պարտական ենք ամեն հնարավոր միջոցներով դրդելու, արթնցնելու, գործի դնելու ժողովրդի և՛ «նեղ», և՛ «լայն» խավերուն միտքը, վարելու ու բոցավառելու անխտիր ամենուն հոգեկան ու քաղաքակրթական պահանջները և ո՛չ թե «անպետքության» ու «ավելորդության» սուտ քարոզներով օրոր կարդանք աշխատանքի բեռին տակ ձգմված քնկոտ հոգիներուն: Մտքերու այդ սթափումեն, քաղաքակրթական պահանջներու այդ ծարավեն կծնի նաև աշխատանքի բեռին թեթևացումը, որովհետև արթնցնել հեղափոխել ըսել է:

## **Գ Ընթերցող հասարակություն**

Հին ու միջին դարերուն կարդալ գիտնալը և կարդացողներուն թիվը շատ էր սակավ, ժողովուրդի մը շատ փոքր մեկ տոկոսը: Տպագրության գյուտեն սկսած և մանավանդ ժողովրդավար նոր կարգերու ընդհանրացումեն ի վեր, այս

վերջին դարու մը ընթացքին, իբրև հետևանք գիտություններու տարածման, լրագիրներու առաջացման և պարտադիր ուսման, գիր գիտնալը և գիրք կարդալը հասավ չտեսնված թափի ու չափի:

Բայց և այնպես հիմա այս վայրկյանիս ալ մարդկության ահագին մեծամասնությունը զուրկ է գրքե և ընթերցումե: Երկրագնդիս վրա ապրելու երջանկությունը ունեցող մարդ ըսված արարածներուն թիվը մեկ միլիարդ և վեց հարյուր միլիոնի չափ կհաշվեն այսօր: Այդ թվի հազիվ մեկ քառորդը կարդալ գիտե: Նախ՝ բազմաթիվ ցեղեր կան և ամբողջ ժողովուրդներ, որ ո՛չ գիր ունին, ո՛չ գրականություն, թեև հասուն և ընդունակ ժողովուրդներ են արդեն և հաճախ տեր են շատ հետաքրքիր անգիր բանահյուսության մը, ինչպես օրինակ քյուրտերը:

Երկրորդ՝ ժողովուրդներու մեկ մեծ մասը՝ «արևելյան» ըսված ժողովուրդները, որոնք և՛ գիր ունին, և՛ գրականություն, երբեմն նույնիսկ շատ հին, շատ հարուստ ու բազմակողմանի գրականություն, ինչպես օրինակ Չինը, Պարսիկը և մանավանդ Հնդիկը, բայց ուր մինչև հիմա ալ կշարունակվի դեռ ու կտիրե միջնադարյան վիճակը, գիրն ու գիրքը բացառիկներու մենաշնորհն է և ընդհանրապես հոգևորականության սեփականությունը: Բայց նույնիսկ «արևմտյան» երկիրներուն մեջ պակաս չեն դեռ ժողովուրդներ, ուր գիր ու կարդալ գիտնալու դրությունը մեծ տարբերություն մը չունի այդ ասիական երկիրներեն:

Երրորդ՝ հարցը միայն գիր ունենալը և գրել-կարդալ գիտնալը չէ. մինչև անգամ այն «քաղաքակիրթ» պետություններուն մեջ, ուր իրավ՝ որ մտցված է պարտադիր ուսումը և ուր գրեթե բոլորն ալ գրել-կարդալ գիտեն, ատով դեռ չեն դարձած ընթերցող ժողովուրդներ: Ուրիշ բան է կարդալ

գիտնալը և բոլորովին ուրիշ բան է կարդալ ուզենալն ու կարդալ կարողանալը:

Նույնիսկ այդ «քաղաքակիրթ» երկիրներուն մեջ մարդոց ստվար մեծամասնությունը այն աստիճան խեղդված է աշխատանքի տակ, այն աստիճան շատ աշխատություն կպահանջվի իրմեն և այն աստիճան չնչին է իր հացի աշխատանքեն դուրս իրեն մնացած ժամանակը, որ բնավ հնար չունի այդ կարգի բաներու մասին մտածելու: Սակայն միայն բանվորն ու գյուղացին չեն այդ լարված ու անդուլ աշխատանքին տակ տքնողը, նվազ լարված չէ նաև այդ աշխատանքը կազմակերպող, վարող ու շահագործող մասը:

Ամենուն վրա ալ դարուս կնիքը կա, կապիտալի կնիքը. ամենուն աշխատանքն ալ տաժանակիր աշխատանքի կնմանի: Ամենքն ալ հոգնած, լեզունին հոգնութենե դուրս կախված, ամենքն ալ ջղային և ամենքն ալ անդադար, անհանգիստ ու խելակորույս վազքի մը մեջ: Մարդիկ ո՛չ թե կաշխատին ու կարտադրեն ապրելու և վայելել կարողանալու համար, այլ ընդհակառակը, կապրին իմիջիայլոց ու կերպ մը քաշ կուտան կյանքերնին աշխատելու և արտադրել կարողանալու համար:

Մեր դարու տնտեսությունը բռնված է խելագար սպորտով մը, խոշոր թիվերու, խոշոր չափերու սպորտովը: Հին ու միջին դարերուն մարդոց բոլոր հաշիվները ընդհանուր առումով հազիվ կանցնեին տասնավորներեն ու հարյուրակներեն դեպի հազարավորները: Հիմա մենք ո՛չ թե հազարներով ու տասնյակ հազարներով, այլ միլիոններով ու միլիարդներով անգամ չենք կրնար մեր հաշիվները փակել, կշտացնել մեր տենչանքները և մեր ծարավը հագեցնել:

Հին, բարի ժամանակներուն մեջ մեր «անկիրթ» նախահայրերը կբավականանային իրենց գյուղի, իրենց շրջապատի մարդիկը շահագործելով, իրենց դրացի ժողովուրդներու



աշխատանքը ծծելով: Հիմա մեր «կիրթ» դարուն մեջ, երբ ծովերու միջոցով և շոգիի աշխատանքով բոլոր ցամաքները կապված են իրարու, հիմա մարդիկ կջանան շահագործելու բոլոր ժողովուրդներուն աշխատանքը, կուզեն տիրել աշխարհիս հեռավոր անկյուններեն բոլոր ժողովուրդներու գլխուն և աշխատցնել աշխարհը իրենց հաշվին:

Համաշխարհային արդարություն, համաշխարհային շուկաներ, համաշխարհային կայսրություններ. Լոնտոն, Փարիզ, Պերլին, Նյու-Յորք ուղեղները կաշխատին, և այդ գլուխներու ղեկավարության տակ կաշխատին գործարաններ, նավարաններ, զինարաններ. շատ մը գործարաններու մուխը չի մարիր տարիներով անընդհատ: Մարդիկ կմաշեն ինքզինքնին, իրենց հոգին ու մարմինը, հնիհն կբանեցնեն իրենց աշխատավորները, կքերթեն ուրիշ իրենցմե ավելի փոքր ու տկար ժողովուրդները, որպեսզի ամեն կողմեն ոսկին հոսի իրենց սնտուկները, որպեսզի այդ ոսկիներով նոր, ավելի բարդ մեքենաներ, գործարաններ ու շահագործարաններ բարձրացնեն, որպեսզի նոր ու նոր միլիոններ ու միլիարդներ դիզել կարողանան միևնույն նպատակով, և այսպես անվերջ:

Կատարյալ եռացող ու կախարդական կաթսա մը. ինքն իր մեջ պղպջող, ինքն իր մեջ գալարվող, ինքն իր մեջ տառապող եռք մը, եփ մը մարդկային բանական էակներու: Միջնադարյան երևակայության ստեղծած «Վհուկներու կաթսան», որ հիմա իրականություն ու մարմին է ստացեր հսկայական չափերով և որուն մեջ մարդկային մարմինները, մարդկային հոգիները, մարդկային խիղճերը և ոսկին կհալին, կգալարին, կթավալին ու կեռան երանության խմիչքը պատրաստելու խարդախությամբ:

Ապագայի մարդը, այսինքն մեզմե ավելի մարդկային մարդը զարմանքով ու ապշությամբ ուսումնասիրե պիտի

օր մը մեր արդի այս խելագար, հիվանդ ու անսանձ կիրքը. այս ամեն բան խլելու, ամենքեն հափշտակելու, ամենքը ոտքի տակ տալու, ամենուն զարնելու և ամեն ինչ իր ձեռքին մեջ հավաքելու արդի դիվային մոլուցքը: Մինչդեռ ինչքան, ինչքան քիչ բան է հարկավոր և՛ կուշտ ըլլալու, և՛ առողջ, և՛ հանգիստ ունենալու, և՛ հոգեկան թռիչք, և՛ ազատություն, և՛ վայելք. և՛ ամենուն համար, ամենուն:

Հիմա մարդիկ կարծես բոլորովին մոռցեր են կյանքի վայելքը, եթե հաշվի չառնենք ամենեն բնագդական ու ամենեն կոպիտ վայելքները: Հիմա մարդիկ կձանչնան միայն վազելու, աքացելու ու իրար ձեռքե խլելու սպորտը, որուն վրա կնային ինչպես գերագույն վայելքի մը վրա, և այդ վայրագ սպորտին անունը դրեր են գործ, աշխատանք:

Հիմա մեր դարը դեռ տաժանակիր աշխատանքի դարն է, ստրուկներու դարը. պատմության առաջին օրերեն եկող կոպտության և ստրկության տիրապետությունը մարդկային ընկերության վրա և ոչ թե խորհող ու ապրող, աշխատող ու վայելող ազատ էակներու դարը. դեռ հեռու է այդ բախտավոր մարդկության արշալույսը: Հիմա հազվագյուտ բացառություն են մեր մեջ այն մարդիկը, որոնք բախտ ունին ու կարելիություն, որոնք կուզեն ու կրնան վայելել բնությունը, ճամփորդությունը, վայելել գեղարվեստները, գիտությունը, վայելել ընկերական կյանքի հանգիստն ու զվարթությունը, ընտանիքի առողջ ու մտերիմ մթնոլորտը, և վերջապես վայելել աշխատանքը: Որովհետև վայելքներուն վայելքն է աշխատանքը, եթե մարդուս վրա բռնի պարտադրված չէ, եթե մարդուս ուժերեն ու պետքերեն վեր չէ, եթե մարդուս բնական հակումներեն դուրս չէ, և եթե իր աշխատանքին բերած արդյունքը ուրիշներու ճանկերուն ու ժանիքներուն համար չէ:

Վաղվան մարդկությունը մեզմե ավելի նվազ հափշտակելու ու տիրելու ծարավի, մեզմե ավելի քիչ մեքենա, և մեզմե ավելի իմաստուն, մեր այս կարճիկ կյանքը խելացի կերպով ապրելու ու վայելելու համար՝ շատ ավելի մեծ ուշ պիտի դարձնե կյանքի բոլոր նուրբ ու ազնիվ վայելքներուն վրա, բարձր վայելքներու բոլոր զովարար աղբյուրներուն վրա: Եվ բարձր վայելքներու այդ աղբյուրներուն մեջ շատ մեծ ու շատ կարևոր տեղ մը կբռնե ընթերցանությունը: Քանի մարդկությունը բարձրանա՝ մարդիկ այնքան մեծ ծարավով վազեն պիտի գիտություններու ու գեղարվեստներու ետևեն, և ատոր համեմատ ալ մեծնա պիտի օր օրի ընթերցողներուն թիվը և խորանա պիտի ընթերցանության պահանջն ու արժեքը:

## **Դ Գրքերուն բազմակողմանի արժեքները**

Այդ գործի արագությանը նպաստելու համար լավ է, որ մենք ալ մեր կողմեն ջանանք հստակ ու գիտակից դարձնելու մեր ստքին դեմ գրքերու ունեցած բազմակողմանի ու բացառիկ դերը թե՛ անհատական, թե՛ հանրային տեսակետեն:

Ոչ միայն «լայն», այլ նույնիսկ «նեղ» ու «նեղագույն» հասարակության անդամներն անգամ չունին հաճախ ընթերցանության արժեքներուն խոր ու լրիվ ըմբռնումը: Կգիտակցին սովորաբար գրքին արժեքը այս կամ այն կողմեն միայն՝ նայելով ընթերցողի գործին, ստացած կրթության, իր ապրած շրջանակին կամ անոր բոլորովին պատահական դատումին ու մերձեցումին: Ընթերցանության մնացած կողմերուն վրա կան բնավ չի մտածվիր, կան ներկա կըլլա հոգիին մեջ պղտոր, ընդհանուր ու կիսովին բնագրական զգացում մը միայն:

Համեմատորեն շատ ավելի դյուրին ու պարզ է գործնական գրական երկի մը դերն ու պետքը ըմբռնելը: Զուտ գիտական

երկերուն կարևորությունը շատ ավելի քիչեր կհասկնան իսկապես: Իսկ գեղարվեստական գրություններուն դերն ու անհրաժեշտությունը կհասկնան անհամեմատ ավելի քիչերը, և հասկցողներն ալ ո՛չ լրիվ չափով, ո՛չ հարկ եղած խորությամբ ու հարգանքով: Թե՛ գուտ գիտական և թե՛ մանավանդ գեղեցիկ գրականության երկերուն վրա շատ շատերը կնային տեսակ մը խաղի վրա և խաղ ըսելով կհասկնան գլխավորապես ժամանց, քանի որ խաղն ալ չէ ըմբռնված դեռ իր բովանդակ իրական մեծ արժեքով: Խաղերուն անհրաժեշտությունն ու կարևորությունն ալ կխուսափի դեռ շատերու դիտողութենեն, թեև ամենքն ալ գիտեն, որ մանուկը գոնե իր կյանքի առաջին վեց-յոթը տարիներուն ինչ որ կտրվի՝ կտրվի խաղով ու խաղալով, և որ կյանքի ամբողջ ընթացքին խաղը միշտ գոյություն ունի աշխատանքին գուգընթաց:

Մինչդեռ ընթերցանության վրա և գրական ստեղծագործության վրա պետք է լրջորեն խորհիլ և պետք է դիտել գրությունները բոլոր կողմերեն, որ բացահայտ դառնա գրքերուն և ընթերցման անփոխարինելի դերը թե՛ անհատներու և թե՛ ազգերու զարգացման, բարձրացման ու ազնվացման տեսակետեն:

Երբ գրքերուն բազմադիմի արժեքները վերլուծման կուզենք ենթարկել՝ բնական կերպով կզատվին իրարմե գրական երկերու անհատական արժեքները իրենց ունեցած համայնական արժեքներեն, այսինքն՝ անհատ էակներուն տված օգուտեն ու վայելքեն ետքը աչքի կհյնան նաև գրքերու բերած օգուտն ու բարձրացումը ամբողջ ժողովուրդին՝ անհատներու ամբողջ հանրության մը: Թեև պարզ է ինքնին, որ այդ երկուքը՝ անհատն ու հանրությունը, միշտ ու ամեն տեղ սերտ կապեր ունին իրարու հետ, հաճախ պարզապես հյուսված են իրարու, քանի որ ժողովուրդի մը անհատը

մեկ մասնիկն է հանրության և իր վրա ներգործող ամեն ազդեցություն ազդեցություն մըն է ամբողջին համար, ինչպես և ամբողջության մը կրած ազդեցությունը վերջապես իրողություն մըն է նաև հանրության մասնիկը կազմող անհատին համար:

Գրքերու անհատական արժեքի տեսակետեն նախ դիտենք ընթերցանության տված օգուտն ու վայելքը, այսինքն գրքի ու ընթերցողի մեջ եղած կապը: Ետքն ալ կանցնինք գրքերու նորեն անհատական արժեքին, բայց հեղինակի տեսակետեն, այսինքն հեղինակի ու ստեղծագործության կապը, վերջապես անցնելու համար գրքի ու գրության համայնական-ազգային արժեքներուն:

## **Ե Գիրքը ուսում**

Գիրքը ընթերցողի կողմեն դիտած քանի մը օգուտ ու արժեք ունի, մեկը մյուսեն պիտանի, մեկը մյուսեն կարևոր: Իր ամենեն առաջին դերը, ամենեն շատ նկատվողը և ընդհանրապես դյուրին ըմբռնվողը ուսման և ուսուցման ծառայելու իր կոչումն է:

Գրքերը ըստ էության փոքրիկ տուփեր են ու սնտուկներ, ուր կանոնավոր կերպով դարսված են ու կպահվին մարդկային տեղեկությունները, ուսումնասիրությունները, փորձերը, դիտողությունները, մտածումները, եզրակացությունները, ներքին աշխարհի վերլուծումները, մարդկային հոգեկան ապրումները, մեկ խոսքով՝ մարդու բովանդակ գիտցած, խորհած ու հասկցած բաները: Ընթերցանությունը ամեն բանե առաջ դպրոց է, ուսում ու կրթություն: Միթե դպրոց մը ամբողջ կյանքի համար, անընդհատ, ամեն տեսակի համար, ամենուն համար, ով որ ուզենա օգտվիլ անոր իմաստութենեն և հարմարվող ամեն ճաշակի, ամեն պետքի,

ամեն տեսակի ընդունակության ու հակումներու:

Ուր որ տիրեր է կամ դեռ կտիրե որոշ դասակարգերու ու բռնակալներու տիրապետությունը, և ժողովուրդը դեռ հպատակ մըն է ու ճորտ մը աշխատանքի, բնականաբար այդ տիրողներուն ձեռքը կկեդրոնանա ինչպես ամեն մարդկային վայելք ու իրավունք, այնպես ալ արհեստները, գեղարվեստները և գիտություններ ունենալու և գործածելու մենաշնորհը: Նյութական հարստություններուն հետ անոնք տեր կդառնան նաև հոգեկան հարստություններուն:

Տարբեր հարց է, որ այդ տիրողները, ինչպես նյութական, այնպես ալ հոգեկան այդ դիզված գանձերը շատ նեղ, շատ միակողմանի, շատ տգետ չափերով ու կերպով կրցած են օգտագործել նույնիսկ իրենց համար: Մինչև հիմա տիրող ու ղեկավարող դասակարգերուն միայն մատչելի մենաշնորհ մըն է եղեր գիրքը, գրականությունն ու գիտությունը: Իզուր չէ անշուշտ, որ Աստված, այսինքն իշխողը, այնպես խստիվ ու խստիվ արգիլեր էր Ադամին, այսինքն հպատակ մարդուն, որ չըլլա թե ուտե «բարիի ու չարի գիտության» թուզեն: Սակայն մարդկային հոգիին մեջ դժբախտաբար ու բարեբախտաբար արթուն է միշտ սատանան, որ արգիլված պտուղները ավելի տենչալի կդարձնե, հոտկե ծնունդ կառնեն ըմբոստացումները ամեն տեսակի հին ու նոր տիրապետողներուն դեմ և ամեն կարգի արգելքներու և սահմանափակության դեմ և այդ ակեն է, որ դուրս կծորին, կհոսին, կգետանան ու կհեղեղին հեղափոխությունները:

Ադամ-Եվայի այդ նշանավոր թուզին պատմությունը հավիտենական պատմությունն է մեկ կողմեն բռնակալության և մյուս կողմեն գիտության ու բարձրացման ձգտող մարդկային տենչանքին, թեև ամեն անգամ ալ այդ հռչակավոր թուզեն ճաշակողը զգացեր է միշտ թե իր իմացական, թե

իր գիտական խեղճությունը և նույն թուզին տերևներովը ջանացեր է կերպ մը իր հասողության մերկությունը ծածկելու:

Այսպես թե այնպես, հիմա որ միլիոնավոր Ադամ-Եվաներ, և հետզհետե Ադամ-Եվաներու ավելի ու ավելի միլիոններ, համը առեր են արդեն եղեմական դրախտի «գիտության» թուզին, հիմա արդեն ուղղակի զարմանալի է, որ ժողովուրդի մը հոգեկան ու տնտեսական բարձրացման համար այս աստիճանի սուր ու կարևոր զենք մը, ինչպես է ընթերցանությունը, թողնված է պատահականության ու երեսի վրա:

Միայն համը առած ըլլալը շատ չեչին ու ապարդյուն բան մըն է, պետք է, որ գիտությունը դառնա տևական ու մշտական սնունդ: Եվ ով որ կձգտի ժողովրդական սկզբունքներու իրական հաղթանակին, ով որ կտենչա լայն խավերու բարձրացումը և ավելի բախտավոր տնտեսական վիճակ մը անոնց համար, ով որ կերպով ժողովուրդներու քաղաքական հավասարեցումը և եղբայրացումը, ան պետք է ձգտի ամեն բանե ավելի ժողովուրդներու հոգեկան մակարդակի բարձրացումին, գիտական ըմբռնումներու խորացումին և զգացական պահանջներու ազնվացմանը: Ժողովուրդը «տեր» հայտարարել և միևնույն ժամանակ պահել ժողովուրդը նույն հին մտավոր ստորին աստիճանին վրա, ետ մնացած ու զուրկ օրվան գիտական հասողութենեն, իմացական թռիչքներեն և հոգեկան պահանջներեն, ո՛չ թե քաղաքական ու տնտեսական թեթևացում կրերե ժողովուրդին, այլ նոր ստրկություն և նոր շահագործում հենց ժողովուրդի անունով և ժողովուրդին մեջեն վեր ցատկած նոր բռնակալներու ձեռքով:

Այս պատճառով ալ ազգերը ինչ չափով որ կհասունանան, այնքան ավելի լուրջ ուշադրություն կդարձնեն դպրոցներու լայնացման ու հանրացման գործին, և այնքան ալ հետզհետե

ավելի ու ավելի կհետաքրքրվին ժողովրդական կրթության բոլոր կողմերովը և բոլոր զենքերովը, որոնց թվին մեջ առաջնակարգ տեղ կբռնե ընթերցանությունը: Եվ հեռու չէ այն օրը, երբ պառլամենտներն ու կառավարությունները իրենք իրենց ձեռքը պիտի ուզեն առնել ժողովուրդներու ընթերցանության գործին կազմակերպումը:

Բոլոր կուսակցությունները մրցին պիտի իրարու հետ այդ ուղղությամբ ամենն ավելի ջանք թափելու ամեն մեկը իր փարախին մեջ: Պակաս չէ ըլլալու և մասնավոր ձեռնարկություններու և ընկերություններու աշխատանքը, և պետք չէ, որ պակաս ըլլա, քանի որ ամեն տեսակի հոգեկան ու տնտեսական շարժումներու պետականացումը կտանի դեպի անհոգի աշխատանք, դեպի դանդաղաշարժություն ու քարացում, իսկ կուսակցական ջանքերը միշտ ալ ըլլալու են միակողմանի և որոշ գույնի ակնոցներով:

Միաժամանակ ձգտին ու աշխատին պիտի բոլոր ընթերցանությունը տարածելու ու ղեկավարելու հոգեբով: Մարմին պիտի առնեն պարբերական դասախոսություններ հասարակության բոլոր խավերուն և անկյուններուն համար ընթերցանության էությունը բացատրելով, ուղիները մատնանշելով և հետաքրքրություն արթնցնելով: Գյուղեգյուղ և ավանեավան շարունակ պիտի երթնեկեն մշտական շրջուն մասնագետ օժանդակներ ամեն տեսակի, կարգի, վիճակի, հակումներու ու նպատակներու համապատասխանող ընթերցման պահանջած մանրամասն ցուցմունքներ տալու և կատարված աշխատանքները ստուգելու:

Պետք է մշակվին ամեն նյութի ու աստիճանի մանրակրկիտ հատակագիծեր ու ծրագիրներ, թե այսինչ նյութեն ինչ կարդան, ինչպես կարդան, ինչ խնդիրներու վրա մասնավոր ուշ դարձնեն, ինչ հարցերու պատասխանը փնտրեն



և ինչ կետերուն շուրջ հանեն իրենց վճիռն ու տեսությունը: Կյանքի պիտի կանչվին գավառական հարուստ կայուն գրադարաններ և անոնց կից բազմաթիվ շարժուն օթոն ու վակոն գրադարաններ ամեն պետքերու հասնող բովանդակությամբ, և ողողեն պիտի հրապարակը աժան, չափազանց աժան, պատկերազարդ, գունավոր, գեղեցիկ, ընտիր ու ճոխ հրատարակություններ ամեն տեսակի գրքերու, քարտեզներու, ալպոմներու ու պարբերականներու, գիտության ու արվեստի բոլոր ճյուղերուն վրա:

Ան ու ասոնց նման բոլոր աղվոր-աղվոր բաները դեռ պիտիներ են դժբախտաբար, որով մինչև ատոնց իրականություն դառնալը գործի բոլոր ծանրությունը ինկած պիտի ըլլա նորեն հոս ու հոն հատ ու բրդուձ հավաքական ճիգերու վրա և մանավանդ անհատական ջանքի՝ ամենը իր հաշվին: Ամեն մարդ ինքը ձգտելու է իր ձեռքեն եկած չափազանց թերի ու տկար միջոցներով հնար եղածին չափ վեր մագլցելու ընթերցանության սանդուղեն:

Պետք է ամեն մարդ համակվի այն խորին ճշմարտությամբ, թե ով օրական գոնե ժամ մը կհատկացնե կանոնավոր, հանգիստ և ընտրովի ընթերցանության, անիկա ո՛չ միայն իր վայելքին ու բարձրացման կաշխատի, այլ կծառայե ամբողջ մարդկության մարդկայնացմանը, նրբացմանը, ազնվացմանը, անիկա կմաքառի ժողովուրդներու իրար մոթելու ու իրար սպաննելու ու գազանությանը դեմ, անիկա կպայքարի ազգերու ու «դասակարգերու» իրար ստելու ու իրար դառնացնելու փոխադարձ տխմարությանը դեմ, անիկա կկռվի ուրիշները ստրկացնելու վայրենի տենչանքին դեմ և ուրիշներու աշխատանքը ուտելու նախամարդկային բնազդներուն դեմ: Որովհետև այդ բոլոր երևույթները ծագում են առած մարդ-անասունի հոգեկան և ընկերական կյանքի

շատ ցած և ստորին աստիճանի պահանջներն ու վիճակն, և թե այդ բոլորը փոխվիլ ու վերացվիլ չեն կրնար, մինչև որ մարդկային լայն ու սովոր մեծամասնության հոգին ինքը չսթափի ու չբարձրանա իր թմրած, իր սմքած ու իր տգետ վիճակն:

## **Զ Գիրքը ընկեր**

Գիրքը խոսք է ու խոսակցություն և միշտ բացարձակապես անհատական. այսինքն կա միշտ մեկը, որ կխոսի մեզի գրքին մեջն, կբանա մեզի իր հոգին, կպատմե մեզի իր կյանքը կամ իր տեսածը, կբացատրե մեզի իր մտածումներն ու եզրակացությունները:

Գրքերուն մեջն մեզի խոսողը հաճախ հեղինակն է միայն, մենք հեղինակի հետ է, որ անմիջական հարաբերության մեջ ենք: Բայց շատ անգամ հեղինակը ավելի կամ պակաս չափով ետ կքաշի, ինքը կմնա սովերի մեջ և մեզի հարաբերության մեջ կդնե պատմութենեն կամ ժամանակակից իրականութենեն եկած անձերու հետ, անոնց կյանքը, գործերը, անանց ներքինն ու արտաքինը անոնց մտքերն ու իղձերն են, որ մենք կտեսնենք ու կլսենք, անշուշտ, հեղինակի երևակայած, ուզած կամ հասկցած ձևերովը, հեղինակի դիտակին մեջն: Շատ անգամ ալ ամբողջապես հեղինակի հնարած և ամբողջովին հեղինակի հոգինն ծնած էակներ են, որոնք որոշ անհատականությամբ և որոշ կենդանի կերպարանքով կուզան մեր դեմը, կխոսին, կգործեն և կապրին:

Եվ մենք կարդալու միջոցին, ինչպես և ընթերցումն ենքը, սերտ հոգեկան հաղորդակցության մեջ կմտնենք այդ բոլոր տեսակի անձերուն ու մարդիկներուն հետ մեր հոգինն մեջ, կվերլուծենք անոնց ըրածը, կխոսինք ու կվիճենք անոնց հետ, կհավնինք, կժխտենք, կվշտակցինք, կատենք

ու կսիրենք: Ուրիշ խոսքով կապրինք ու կկապվինք անոնց հետ, և ինչքան խոր ու մեծ ըլլա այդ անձերու մտքին, սրտին ու գործերուն թողած ազդեցությունը մեր հոգիին վրա, այնքան ալ խոր ու տևական կըլլա բնականաբար մեր կապն ու հաղորդակցությունը անոնց հետ: Ճիշտ այն ձևով, ինչ ձևով որ կկատարվի իրական կյանքի մեջ մեր իրական հանդիպումներու միջոցին մեր կապն ու շփումը ծանոթներու, ուղեկիցներու, կենակիցներու ու զաղափարակիցներու հետ:

Ատոր համար է, որ մեծ հաճույք կզգանք մեր կարդացած ու սիրած գրքերը նորեն ու նորեն կարդալու ատեն, ինչպես որ կյանքի մեջ մեր սիրելի բարեկամներուն վերստին հանդպիլը խոր ուրախություն կպատճառե մեզի: Ատոր համար է, որ շտապ ու վայրիվերո ընթերցումը հնար չի տար ներքին ավելի լուրջ մերձեցումի, երկաթուղիի կառքին մեջ կապված ու լուծված հարևանցի բարեկամության մը պես, երևույթի մը իրարանցումին մեջ մեզի հետ կարձ ու հապշտապ շփումի եկած նոր բարևածանոթի մը պես: Մինչդեռ ուշադիր ու կրկնակի ընթերցումներն է, որ հետզհետե կընտրվին մեր գրենի մտերիմները, ինչպես որ դուրսի հաճախակի ու սրտաբաց հանդիպումներն է, որ կկազմվի կյանքի մտերիմներուն մեր նեղ շրջանակը: Ատոր համար է դարձյալ, որ երկի մը թարգմանիչը կամ իր նախընտրած դերը խաղցող դերասանը շատ հաճախ խոր ու սրտագին մտերմությամբ կկապվին և հեղինակին հետ, և իրենց թարգմանած կամ ներկայացուցած դեմքերուն հետ: Ատոր համար է, որ գրքերը և գրքերուն մեջ պատկերացված մարդիկը իրենց ջերմ պաշտպաններն ունին, իրենց սիրահարները, ինչպես և իրենց բուռն ու կրքոտ հակառակորդները:

Հոգեբանական իրողություն մըն է ասիկա ու կենդանի ներքին իրականություն մը: Գրքերուն մեջն խոսող ու գոր-

ծող մարդիկը, ըլլան իրական ու պատմական դեմքեր, ըլլան բանաստեղծական մարմնացումներ, ինչպես և հեղինակը ինքը, ասոնք բոլորն ալ անխտիր ապրող ու կենդանի արարածներ են մեր հոգիներուն մեջ, իսկական մարդիկ, որոնք դուրսի աշխարհեն մեր հոգիները մտած մյուս մարդոց նման և անոնց հավասար, կան հոն, գոյություն ունին, կշարժին, կգործեն, կխոսին ու կազդեն:

Այդ պատճառով ալ ով սովոր է կարդալու, կապրի մշտապես լայն, բազմերանգ ու խիստ հետաքրքիր ծանոթներու շրջանակի մը մեջ, կապրի լայն աշխարհքի մը մեջ, և կապրի մանավանդ ընտիր աշխարհքի մը մեջ, քանի որ մշտապես հաղորդակցության և անձնական մտերմության մեջ է հին ու նոր դարերու և բոլոր ժողովուրդներու ամենեն խոր, մեծ, իմաստուն, տաղանդավոր ու առաքինի դեմքերուն հետ. ամենաընտիր մարդիկը, որոնք երբևիցե ապրած են արևի լույսին տակ կամ մարդկային տենչանքներուն և երազանքի լույսին տակ:

Գիրքը այդ ընկերական ծանոթացումներու ժամադրավայրն է, համամարդկային ու համադարյան ակումբ մը: Գիրքը ընկերական շրջանակ մըն է, և այդ իմաստով գիրքը ընկերն է մարդու:

Եվ մեր այդ գրենի մտերիմներն ու ծանոթները, ճիշտ մեր աշխարհային ծանոթներուն ու մտերիմներուն նման կազդեն մեր վրա ամեն ուղղությամբ ու կազդեն խորապես:

Իրենց գոյությամբը, իրենց գործերովը, իրենց խոսքերովը կհարստացնեն մեր ծանոթություններու ու տեղեկություններու գանձարանը, կձանչնանք նոր մարդիկ, նոր տեսակի հոգիներ, նոր գործեր, նոր դատում, նոր զգացական աշխարհ, կնպաստեն մեր ըմբռնումներու խորացմանը, մեր աշխարհայացքի լայնացմանը, իրենց դատումներովը մեզի մտածելու

կղրդեն, իրենց առանձնահատկություններովը կիրեն մեր ուշադրությունը նոր որոնումներու:

Անոնք կազդեն մեր զգացումներուն, մեր համակրանքներուն, մեր ճաշակին՝ վարակելով մեզի իրենց էությանը, իրենց սերերովն ու տրամադրություններովը, և խորը դրոշմ կդնեն մեր զգացական գնահատումներուն վրա իրենց պատճառած հաճույքներովն ու զվարճություններովը:

Անոնք կազդեն մեր կամքին ու գործունեությանը իրենց օրինակով, իրենց շարժումներով, իրենց սկզբունքներով, իրենց ներշնչած հիացումով, իրենց գծած կյանքի նպատակներով: Անոնք սիրտ կուտան գոյության համառ կովին մեջ, կոզևորեն, կրոնկցնեն մեզի, հաճախ կդառնան մեր իտեալը, մեր իտեալին ջահակիրը:

Եվ այսպես շարունակ գրքերու միջոցով ուրիշներու հոգին մտնելը, ուրիշներու հոգերովն ու ցավերով ապրիլը, շատ ու հեռավոր մարդոց հետ կապված ըլլալը, շատ «օտար» հոգիներու մեր առջև մերկացվիլն ու մեզի սիրելի ու թանկագին դառնալը, կամաց-կամաց մեր էության մեջ ենն ու ոչ-եսը որոշ չափով կխառնեն իրարու, կհյուսեն իրարու, և մենք կսկսինք նկատել մեզի իբրև մեկ մասը խմբակցության մը, ամբողջության մը, և մեր շահն ու հաճույքը կփնտրենք նախ խմբակցության, վերջն ալ ամբողջության օգուտին ու բախտավորության մեջ:

Գրքերը իբրև ընկեր ու ընկերական շփում կսրեն ու կզարգացնեն մեր մեջ ընկերական զգացումը, մեր հոգիի հանրային-համայնական կողմերը, մեր մարդկային ու համամարդկային գիտակցությունը: Այսինքն՝ կկրթեն ու կքաղաքակրթեն մարդը, մարդու մեջի հին ու խորը նստած անասունը հետզհետե կմարդկայնացնեն. կամրացնեն խիղճը. ամոթը, քաղաքավարությունը, պարտականության

զգացումը, արդարության պահանջը, ներողամտությունը, անձնվիրությունը, որովհետև այս բոլոր հոգեբանական բաները մեզմե կպահանջեն միայն մեկ բան մը՝ մտածել նաև ուրիշներու մասին, այսինքն՝ սանձել եսը:

Այսպես է. մեր սիրած գրքերու էջերուն մեջեն կխոսին մեզի մեր հոգիի լավագույն և մեծագույն ընկերները, որոնք մեկ կողմեն ընկերական շփման բազմադիմի վայելքներն ու առավելությունները կուտան մեզի, մյուս կողմեն ալ կընդլայնեն մեր աշխարհայացքը, կնրբացնեն, կմարդկայնացնեն մեր ամբողջ էությունը:

Անշուշտ, որ այս բոլորը ճշմարիտ է միայն լավ ու ընտիր գրքերու վերաբերմամբ: Ինչպես կյանքի մեջ լավ ու ընտիր ընկերներու կից՝ շատ կան նաև գեշ ուղղությամբ վարակիչ օրինակներ, այդպես ալ գրքերու աշխարհին մեջ պակաս չեն վնասակար ու վատօրինակ գրություններ, որոնք ստորին զգայություններ կհրահրեն, ընկերական ցած ու ծուռ ըմբռնումներ կներարկեն, գեշ օրինակ ու գեշ ճաշակ, անառողջ մտայնություն կբերեն ընթերցողին: Ատոր համար ալ շատ կարևոր հարց է, ինչպես կյանքի իրականության մեջ կենակցության համար ազնիվ ու բարձր անձերու և օրինակներու ընտրությունը, այդպես ալ գրենական աշխարհի մեջ կրթիչ ու գեղեցիկ, ազնվացնող ու բարձրացնող գրքերուն ընտրությունը:

## Է Գիրքը վայելք

Ինչպես որ գրքերը գիտության, ուսման և մտածմունքի շտեմարաններն են, այնպես ալ անոնք միևնույն ժամանակ շտեմարան են բազմատեսակ մեծ ու փոքր մտավոր զվարճություններու, հաճույքներու ու վայելքներու, որովհետև ամեն մեկ մտավոր շարժում, ամեն մեկ մտավոր ստացում ու

յուրացում իր վրա ու իր մեջ ունի զգայություններու ամբողջ փունջ մը:

Մտքի աշխատանքը ինքը հաճույք մըն է, մտածելը, դատելը, դիտելը, երևակայելը, հիշելը, այսինքն, մեր մտքի մեքենային զանազան ուղղությամբ բանիլը զանազան տեսակի բավականություններ են մեզի համար, և ինչքան որ այդ աշխատանքը համաչափ ըլլա մեր մեքենայի տրամադրելի ուժերուն և համապատասխան մեր մեքենայի հակումներուն, այնքան ավելի շեշտված կըլլա նաև իր արտադրած զվարճությունը:

Մտքի աշխատանքին նման ներքին բնական հաճույքներ են նույնպես այդ աշխատանքին արդյունքը եղող ամեն ըմբռնում, ամեն թափանցում, ամեն տեսակի մտավոր նոր կառուցում ու կերտում: Այդ բոլոր նոր-նոր աշխարհները, որ հետզհետե կգոյանան ու կկազմվին մեր մտքի խավարչուտ տիեզերքին մեջ և կներկայանան մեզի իբրև նոր մտապատկեր, նոր հասկացողություն, նոր սկզբունք, նոր հավատք, նոր իտեալ, նոր ձգտում ու նոր որոշում, այս բոլորը կբերեն իրենց հետ նուրբ ու խորին հաճույքներ ու ոգևորություն:

Հաճույք ունին ո՛չ միայն ատոնց ծնունդը, այլև այդ ծնունդները կարապետող մեր մտքի կատարած բոլոր որոնումները, ինչպես և հետագա ամեն տեսակի սրբագրությունները, հավելումները, լրացումները, մեր մտածումներու հղկվիլը, տաշվիլը, կոկվիլը, կլորնալն ու հստակիլը. մեկ խոսքով՝ ամեն յուրացում, ամեն խորացում:

Եվ վերջապես մտավոր հաճույքները կուտան մեզի մեր արդեն վաղուց կազմված ու ավարտած համոզումները, աշխարհայացքը, սկզբունքներն ու իտեալները, երբ կտեսնենք, որ ուրիշներն ալ նույն աստվածներուն կերկրպագեն, որ ուրիշներն ալ իրենց ուրույն ճամփաներով մեր տաճարը

կհասնին: Եվ ինչքան մեծ ու լրիվ է մեր կարդացած գրքերուն ու մեր մտքին մեջ եղած գաղափարակցությունը, ինչքան էական կետերու մեջ զույգ կերթան մեր դատողություններն ու եզրակացությունները, մեր տեսություններն ու մեկնությունները, այնքան ավելի խոր կըլլա բնականաբար և մեր զգացած բավականությունը: Եվ, ընդհակառակը. դժգոհություններու և անախորժություններու աղբյուր են միշտ մեր չընդունած, մեզի անդուր եղող, մեր սկզբունքները խաչաձևող գրքերուն ընթերցումը: Ատոր համար է, որ ամեն մարդ իր կուսակցության թերթը կարդալ կսիրե և ամեն մասնագետ կկարդա մասնավոր սիրով իր դավանակիցներուն գրությունները:

Նույն է իրողությունը նաև ընկերական շփման տեսակետին: Ինչպես որ գրքերն ժամադրավայր են նոր հանդիպումներու, նոր ծանոթություններու, կամ հին ու սիրելի դեմքերու վերստին տեսության և ավելի մոտիկ մտերմության, այդպես ալ այդ նույն գրքերը ժամադրավայր են ընկերական ամեն գույնի ու երանգի հուզումներու ու զվարճության, որովհետև ընկերական շփում ու կենակցում ըլլա կյանքի թե գրքի մեջ, ունի զգայություններու և հաճույքներու սարդի ոստայն մը, որուն նուրբ թելերուն մեջ սիրտը իսկույն ճանձի մը պես կխճճվի:

Հաճույք ունի նոր մարդիկ ճանչնալը, երբ հոգիներու նոր ծալքեր կբացվին մեր առջև, ինչպես և հոգեկան այդ խորքերուն մեջ թափառիլը: Ասոնց բոլորին կապված են հազար տեսակի հարաբերություններ, զգացումներ, ուրախություններ ու տհաճություններ: Եվ ինչքան զարգացած է ու դյուրագրգիռ մեր զգայական աշխարհը, այնքան խոր են ու բարդ նաև մեր զգացած տպավորությունները այդ հոգեկան մոտիկ հարաբերություններու միջոցին: Ինչքան նվազ զգայուն է մեր



հոգեկան կազմը, այնքան ավելի հանգիստ է բնականաբար նաև մեր զգացած բավականությունը: Եվ ասոր համար է, որ պատանեկան տարիքը, ինչպես և կանացի հոգին, մասնավորապես սիրահար է զգացումին զարնող գրքերու «հետաքրքրությունը հարող» երկերու:

Անշուշտ, այդ գրենական հին ու նոր շփումներու միջոցին մասնավոր կերպով հաճույքի աղբյուր կդառնա մեզի, երբ կհանդայինք մեր որոնած, մեր ուզած, մեր երազած, մեր գնահատած մարդիկներուն, որոնք կընեն, ինչ որ մենք կուզեինք որ ընեն, և կընեն այնպես, ինչպես կցանկայինք, որ ընեն և որոնք մարդ արարածի մասին մեր հոգիի ունեցած բարձր, առաքինի ու ազնիվ իտեալացումները կմարմնավորեն: Ատոր վրա է հիմնված «տրամատիկ» դեմքերու հմայքը բանաստեղծության մեջ և գրավչությունը մեծ մարդոց կենսագրություններուն:

Գիրքը, ըլլա ընկեր մը, թե ուսուցիչ մը, թե երկուքը միասին, ինքնին ստեղծագործություն մըն է արվեստի, և անխտիր թե գիտական գիրքը, թե գեղարվեստական: Ատոր համեմատ ալ գիտական վայելքներու և ընկերական վայելքներու կից կան նաև զուտ արվեստի վայելքները ամեն գրական երկի մեջ:

Ամեն գրություն կառուցում մը ունի, շենք մը, ճարտարապետություն մը՝ հարմարվելով իր նյութին, գաղափարին, ձգտումին ու ոգիին: Ամեն ուսումնասիրություն ու պատմություն ունի իրեն հատուկ մասերու կապակցում մը, մասծումներու հյուսք մը և գործողություններու ընթացք: Արդ՝ նայելով, թե ի՞նչ աստիճան ամբողջական է իր ճարտարապետությունը, ի՞նչ աստիճան հարմարած է իր նյութին ու նպատակին, ի՞նչ աստիճան արտահայտիչ է իր ներքին ձգտումին ու գաղափարին, և նայելով, թե ի՞նչ աստիճան բնական է մասերու կապակցումը, հստակ է հյուսքը, և կենդանի է շարժումը,

մեզի հիացում կազդե, գոհունակություն և գնահատություն, այսինքն կդառնա վայելքի առարկա. կզգանք իբրև վսեմ, գեղեցիկ կամ գրավիչ, որ ըսել է հաճելի: Նույն ու նման վայելքներ կառաջացնեն գրքերու մեջ ներկայացված տիպերն ու դեմքերը՝ նայելով, թե ինչ աստիճանի լրիվ են նկարված, ինչ աստիճանի ջինջ են իրենց բնավորության գծերը, ինչ աստիճանի բնական է անոնց վարմունքն ու շարժումը, մտածումն ու գրույցը, և ինչ աստիճանի կենդանի՝ անոնց հոգին: Նմանապես բավականություն ու հիացում կպատճառե մեզի, երբ կտեսնենք, թե հեղինակը ինչ աստիճան ճիշտ է դիտած, ճիշտ է ընդօրինակած, ըլլա արտաքին, ըլլա ներքին բնությունը. ինչ աստիճան նուրբ է, խոր ու ճշմարիտ իր դիտելու ու վերարտադրելու արվեստը:

Եվ վերջապես հաճույքի աղբյուրներ են նաև բոլոր զարդերը, ինչպես կյանքի, այնպես ալ գրքերու մեջ: Նկարագրական զարդարանքը, լեզվական հարդարանքը, ճարտասանական փեշերը, հանգերուն ներդաշնակությունը, չափերուն ելևէջը, խոսքի հոսումին անուշությունը, սրամտության կայծկլտուքը, համեմատություններուն ժանյակը, այլաբանություններուն մանյակը, բացականչական ասեղներ, բառախաղի գնդասեղներ, ո՞ր մեկն ըսեմ, ասոնք բոլորը զվարճության կաթիլներ են և հաճույքի ծորումներ:

Ընթերցողներուն մեծ մասը այս բոլոր մեծ ու փոքր վայելքները արվեստի կիսմե մեկ ունպով, բոլորը իրար խառնած, իբրև ընդհանուր տպավորություն մը: Մինչդեռ անոնք, որ սեր ունին ու վարժություն գրի ու գրքի, մեղվի մը պես կծծեն ամեն մեկ ծաղիկեն իր անուշ ու գինովցնող հյութը և «կըմբռնյանեն» ամեն մեկը առանձին:

## Ը Գրքրեուն մեջ մեր ետը

Գիտական, ընկերական ու արվեստի վայելքները գրքի մը տված հաճույքներուն երեք հիմնական խումբերը կներկայացնեն իրենց բոլոր ստորաբաժանումներով ու անհատնում խառնուրդներով: Սակայն այս ամենը միասին առած դեռ չեն սպառեր գրքի մը մեզի ընծայած բոլոր ուրախություններն ու հուզումները: Պատկերը լրիվ դարձնելու համար ատոնց վրա պետք է ավելցնենք ուրիշ խումբ մը վայելքներ, որոնք ընթերցանության ժամանակ դուրսի առարկաներու էութենեն չէ, որ մեզի կհաղորդվի, այլ՝ թեև անոնց ազդեցության տակ, բայց կրխին մեր ներքին էութենեն, մեր կյանքեն, մեր սեփական անձեն: Ամեն գիրք բացի իր տեսակ մը ընդհանուր և ամենուն համար եղող «առարկայական» վայելքներեն՝ կուտա մեզի նաև զուտ մեր եսեն ու մեր անհատականութենեն ծնող վայելքներ՝ «անձնական» վայելքներ:

Եվ գրականության պատճառած բավականություններուն մեջ ամենեն ավելի սուր կերպով զգացված հաճույքները ճիշտ ատոնք են, որոնք այս կամ այն չափով ու ձևով կկապվին մեր անձնական կյանքին:

Առարկայական վայելքներն ալ անշուշտ կապված են մեր անձին, քանի որ վայելողը մենք ենք և քանի որ վայելքը մեր սեփական մեքենայի գործածության մեջն է, բայց ատոնք կապված են մեր անձին, այսպես ըսեմ, մեկ ծայրով. ստացողը մենք ենք, բայց ազդողը, ցուցադրվածը, բացատրվածը դուրս է մեր եսեն, դուրսի աշխարհի է, «օտար» առարկա: Իսկ երբ գրքին մեջ ներկայացված կյանքը, նկարագրված գործը, պատկերացված մարդը, վերլուծված հարցը ինքն ալ որևէ կերպով առնչություն կունենա մեր անձին հետ, բնականաբար գրվածքը իր երկու ծայրովը կկապվի մեզի, կրկնակի չափով «հետաքրքիր» կդառնա, կրկնակի՛ ուժով

«գրավիչ» ու «կարևոր»:

Այսպես՝ գիտական խնդիրներու մեջ միշտ մեզի համար մասնավոր հրապույր ու արժեք ունի և մեզի մասնավոր կերպով կզբաղեցնեն ու կհուզեն, եթե խոսքը մեր սեփական մասնագիտության մասին է, մեր գործի ու արհեստի մասին, երբ կշոշափեն մեր նպատակները, մեր ծրագիրները, երբ կդպչի մեր շահին, մեր համոզումին, մեր կուսակցության, մեր տեսակետներուն, մեր հավատքին, մեր իտեալներուն, մեր դավանած «դպրոցին» և ուղղության:

Այսպես՝ գիրքերուն մեջեն կյանք առնող դեմքերը մասնավոր կերպով հետաքրքիր կդառնան մեզի, եթե մեր սիրած, մեր հարգած, մեր երագած, մեր որոնած մարդիկը կներկայացնեն: Մեր մեջեն ավելի ճախրանք ունեցող հոգիները իրենց տենչերուն, իրենց անուրջին, իրենց ծարավին մարմնացումը եղող իտեալացված դեմքերը կսիրեն: Մեր մեջեն ավելի դրական հոգիները կփնտրեն իրենց ծանոթ դեմքերուն ճիշտ ու իրական պատկերացումը: Բայց միևնույն է օրենքը երկուքին համար ալ, կուզեն ոտքը ամուր փակած ըլլա հողին, կուզեն թևածի երկնքի կապույտներուն մեջ, միշտ կփնտրեն իր գիտցածը, իր տեսածը, իր հասկցածը, կամ իր ուզածը, իր ըղձանքը, իր երագը: Մասնավոր կերպով գրավիչ, հուզիչ ու «գեղեցիկ» է այն գրվածքը, որ ամենեն ավելի սերտ կիյուսվի ընթերցողի եսին:

Հետևապես ամենեն ավելի հետաքրքրեն պիտի մեզի այն գրական երկերը, որոնց մեջ նկարված ու վերլուծվածը կարծես թե մենք ինքներս ենք, այսինքն, երբ գրքին «հերոսը» կամ հեղինակը գոնե իր հիմնական կողմերովը կկրեն մեր հոգին, մեր հակումները, մեր վարանքը, մեր զգալու ու գործելու առանձնահատկությունները, ունի մեր մտավոր և զգացական ծալքերը:

Այս աստիճանի բազմաթիվ կողմերով նույնությունն ու նմանությունը շատ հազվադեպ է անշուշտ գրքի անձին ու մեր անձին միջև, բայց չափազանց սովորական երևույթ է, երբ գրքերուն մեջ նկարված ու նկարագրվածը մեր հոգիի այս ու այն կողմը կկրե, մեր զգացական ու կամեցական եսին այս ու այն որոշ առանձնահատկությունը, մեր անձնավորության մեկ կտորը, մեկ երեսը: Մեր անձի այդ մասնակի գյուտը գրքին մեջ և հոսկե առաջացող անխուսափելի ներքին համեմատությունը չափազանց կզբաղեցնեմեկի և բավականություն կպատճառե, որովհետև միայն դիցանուշ Նարգիզը չէ, որ կդողար հաճույքեն, երբ իր դեմքին արտացոլումը կդիտեր ջրերու ավազանին մեջ:

Անձնականության խաղցած դերը սակայն ասով ալ չի վերջանար գրքերու բերած վայելքին մեջ: Ուրիշ ճամփով մըն ալ մեր անձը կդառնա ուրախություններու և հաճույքի աղբյուր, երբ շփման մեջ կուգա գրքերու հետ, և այս ճամփան շատ է բանուկ ու սովորական: Ընթերցումը մտքերու զուգորդությամբ և որոշ նմանություններու հետևանքով կարթնցնե մեր հուշերը, իբրև վկա կամ օրինակ կկանչե մեր կյանքի սեփական հիշատակները կամ պարզապես կհիշեցնե մեզ մեր ապրումները, անցած դեպքերը, մեր եղած տեղերը, մեր ճանչցած դեմքերը, կվերակենդանացնե երբեմն սաստիկ պայծառ կերպով մեր կյանքի այս ու այն վայրկյանը, ամբողջ եղելություններ, պատմություններ: Այդ վերհուշները իրենց հետ կբերեն իրենց երբեմնի հուզումները, այսինքն վերապրիլ կուտան մեզի մեր հին հաճույքները:

Եվ ինչքան որ մեր մտքին մեջ կենդանացած այդ իրերը, տեղերը, դեպքերն ու անձերը կապված ըլլան ուժեղ զգացումներու, ինչքան որ արթնցնող հիշատակները, հիշողությունները մեր անցյալի թանկագին ու կարևոր վայրկյանները

ներկայացնեն, և ինչքան որ խորունկ ու հստակ կերպով կատարվի այդ գարթնումը ինքը, այնքան ավելի խոր ու բուռն կըլլան բնականաբար մեր զգացած հաճույքները:

Արդեն հոսկե ալ կրխի գեղարվեստական երկի մը հրապույրին մեկ խոշոր բաժինը: Գեղարվեստական ստեղծագործությունը իր տեսակի կախարդ մըն է, կոգեկոչե մեր հին ու անցած աղվոր օրերը, հին ու անցած անփոխարինելի դեմքերը, հին ու հմայիչ խոսքերը, հին ու դյութիչ շարժումները, կեցվածքները: Ամեն գրական գեղարվեստական երկի մրոտ տողերեն ու էջերեն կայծեր կթափին մեր հոգին և հոն կվառեն մեր ներքին, մեր սեփական կրակները, երբեմն կբռնկեն ամբողջ հին հրդեհներ: Օտար նյութերեն և օտար կառուցումներեն հոտող վայելքներուն կիյուսվին մեր կյանքի հուշերեն ժայթքող հուզումները:

Այս բոլորը ընթերցման միջոցին կծուվին իրարու, և մենք շատ անգամ որոշել ալ չենք կրնար՝ ո՞րը մեզմեն է և ո՞րը գրքեն: Բայց այդ ձույլ ու ընդհանուր ազդեցության տակ է, որ մենք կգնահատենք գրքերը, կսիրենք, կմերժենք կամ անտարբեր կնետենք մեկդի:

## **Թ Գիրքը ամոք**

Բացի բազմերանգ հաճույքներու և վայելքներու անմիջական աղբյուրը մը ըլլալէ, գիրքն է նաև աղբյուր մը բավականություններու, բացասական առումով: Գրքերը շատ անգամ կթերթնեն մեր վշտերը, կքնացնեն մեր ցավերը, կմեղմեն ներքին փոթորիկը կամ ընդհակառակը կվերցնեն ձանձրույթը. այսինքն այս կամ այն ձևով կցրվեն մեր հոգիին վրա ծանրացած անախորժություններու մութ ու մռայլ ամպերը:

Ինչպէս որ աշխարհիս երեսին ընկերն ու մտերմությունը

ամեննն մեծ մխիթարիչն է մարդուս իր ձախողանքի, ցավի ու վիրավոր վայրկաններուն, նույն ձևով ալ նույն ազդեցությունը ունին մեր հոգիին վրա գրքերուն ծոցէն մեզի հետ կապված մեր ընկերներն ու մտերիմները: Մյուս կողմէն ալ գրքերու միջով մշտական հաղորդակցության մեջ ըլլալը մարդկային անհատնում հոգիներու հետ, ականատես ու վշտակից ըլլալը այդքան-այդքան հին ու նոր, երկրածին ու մտածին մարդիկներու կրած տանջանքին, զրկանքին ու անարդարության, կփոքրացնէ, կպակսեցնէ մեր անձնական զրկանքներուն ու տառապանքին պատճառած ցավը: Որովհետև այդպէս է անագորույն իրականությունը, կամ գուցէ գորովասիրտ իրականությունը, որ ցավակցությունը կմխիթարէ մեզի, և ինչքան շատ են ցավակիցները, նույն ցավը կրողները, այնքան ավելի դյուրին է ցավը կրելը: Մեծ ու համայնական աղետները ավելի արիաբար կտարվին, ավելի լուռ ու ստոյիկ կերպով, քան անձնական ու մենավոր շատ ավելի փոքր անախորժությունները:

Ուրիշներու հոգերուն ու վշտերուն գիտակ ու մասնակից ըլլալը այրուցքը հանդարտող պալլասան մըն է, որ կքսվի մեր բաց վերքին վրա:

Քիչ մը ավելի ոլոր ճամբով, բայց նման հետևանքի կրերէ նաև զուտ գիտական ընթերցումը: Բնության անմեռ ուժերուն և հավիտենական անխախտ օրենքներուն դիմաց, տիեզերքներու մշտափոփոխ ու մշտաթավալ գոյացման ու քայքայման հանդեպ, վառումներու և մարումներու, ծնունդներու և մահերու այդ հավերժական խելագար անհունության մեջ, մենք ու մեր բոլոր անձնական-վայրկենական գոյությունն ու հոգերն ու հոգիները այն աստիճան կպզտիկնան, որ կկորսնցնեն իրենց իմաստը, ու մեր «խոշոր» եսը իր «խոշոր» ցավերով կդառնա հանկարծ մեր աչքին ծիծաղելի:

Եվ ո՛չ միայն մենք, այլ ընդհանրապես բոլոր «մարդ» ու «ժողովուրդ» կոչվող փոշիները: Գիտական ընթերցումը փիլիսոփայության շիճուկը կներարկե մեր կաշվին տակ, շիճուկ մը, որ աշխարհին բոլոր մորֆիներեն ու բոլոր թմրեցուցիչ նյութերեն շատ ավելի խոր ու տևական կերպով հանդարտություն ու հաշտություն բերելու կարողությունը ունի մեր հոգիին: Իսկ հանդարտությունն ու հաշտությունը վշտի ժամանակ մեղմացում ըսել է՝ ամոքում: Ինչպես գեղարվեստական, այնպես ալ գիտական գիրքը ամոք կուտան մեզի՝ մեկը իր ցույց տված օրինակելի նմուշներովը, մյուսը իր փիլիսոփայությամբ:

Կա՛ն և մոռացումը, որ նորեն թերթացում կուտա մեր ցավի այրուցքին, կշեղե մեր ուշադրությունը մեր սիրտը կրծող վիշտեն, կգբաղեցնե մեզի հեռավոր ու բոլորովին տարբեր հարցերով, դուրս կքշե մեր հոգին մեր եսի սահմաններեն: Թեև անշուշտ շատ ավելի խախուտ և առժամյա է ընթերցանության մոռացում տվող ազդեցությունը, և չունի ո՛չ խորությունը, ո՛չ տևականությունը ուրիշներու օրինակեն եկող մխիթարանքին և փիլիսոփայութենեն հոսող վերին հաշտեցումին:

Այս տեսակ առժամյա թերթություն բերող և երկրորդական արժեքով միջոց մըն է գիրքը նաև հոգեկան անգործության դեմ, անգործության պատճառած հոգնածության դեմ, ձանձրույթի դեմ: Երբ ընթերցումը կկատարվի ո՛չ թե առավել կամ նվազ որոշ նպատակով կամ ներքին մղումով, այլ պարզապես ժամանցի համար, «ժամանակ սպաննելու» համար, ինչպես որ կըսենք շատ ճիշտ ու պատկերավոր արտահայտությամբ մը:

Պարապ մնացած մարդը թուղթ կխաղա, մեկը կփնտրե, որ հետը խոսի աջեն, ձախեն ու իր դրացին բամբասե, քանի որ ամեն տեղ ալ խոսակցության համեն է բամբասանքը:



Իսկ երբ այս սովորական և ընթացիկ գվարձություններն ո՛չ մեկը չիյնար ձեռքերնիս, կվերցնենք պատահած գիրքը, կսկսինք կարդալու պատահած երեսեն, մինչև որ ճարվի խոսակից մը կամ վրա հասնի մեր խաղընկերը: Այս տեսակի ընթերցումը տարածված է չափազանց: Եվ ինչքան ալ խեղճ ըլլա իր արժեքը, բայց և այնպես արժեք մըն է, քանի որ շատ հաճախ կբաշե մեր ուշադրությունը իր ետևեն ու կփախցնե ձանձրոյթին տհաճոյթունը:

Ուսում և ընկեր, վայելք և սփոփանք, ահա գիրքը:

Ահա՛ մշտահոս ու առատաբուխ աղբյուր մը գիտության, իմաստության, հոգեկան շփման, մտերիմ կապերու, խորին հուզումներու և մխիթարության, հոգեկան գվարձոյթան ու վայելքներու, բարձրացման ու ազնվացման: Հին հեքիաթներու «անմահական» աղբյուրը, որում կենդանաբար ջուրը երիտասարդոյթուն կուտա, առողջոյթուն և հովացում հոգնած, տանջված և որոնող հոգիներուն:

Արևելքը, որ հարուստ է անապատներով, աղբյուրներու պաշտամունք ունի, և հոն աղբյուր մը բանալը ամենեն սուրբ ու ամենեն բարեպաշտ գործերեն մեկն է համարված միշտ: Հոգեկան տեսակետեն մարդկոյթունը լայն խավերովն առած դեռ միշտ արևելքի ժողովուրդ է. մարդկային հոգին դեռ անապատներու մեջ կապրի, պատառ մը չոր հացի չոր ավազներուն վրա և բարկ եսականոյթան կիզիչ ճառագայթներուն տակ, և դեռ մարդկոյթան ամենաստվար մեծամասնոյթան համար բացառիկ կերպով սուրբ ու նվիրական գործ մըն է մարդու քալած այդ անապատին մեջ աղբյուր մը բանալը, ուր իսկույն ովասիս մը կանաչի:

Գիտնանք, ամեն անգամ, որ մարդ մը կմոտեցնենք գրքերուն և ընթերցանոյթան սերն ու վարժոյթունը կուտանք

անոր, կենսատու և զովարար աղբյուր մըն է, որ կբանանք  
անոր խոսքան ճամփան վրա:

## **Ժ Իսկ հեղինակը ինչու կգրե**

Մինչև հիմա կդիտեինք գրական երկերը ընթերցանության  
տեսակետեն, այդ ստեղծագործություններուն ընթերցողին  
համար ունեցած զանազան արժեքները. կդիտեինք միայն  
ընթերցողին դարձած երեսը երևույթին, մինչդեռ գրական  
երևույթ մը մեզի կներկայանա միշտ երկու երեսով:

Բոլորովին տարբեր բան մըն է գիրքը ստեղծող հեղինակին  
համար և բոլորովին տարբեր բան մըն է ընթերցողին համար:  
Մեկուն համար գրական երկը երկունք մըն է, հղացում մը,  
երկար որոնում մը, կտոր-կտոր լրացում մը ու հետզհետե  
միայն գոյացած ամբողջացում մը: Մինչդեռ մյուսներուն հա-  
մար անհկա պատրաստ ու ձույլ ամբողջություն մըն է առաջին  
իսկ վայրկյանեն, պարզ ու զատ գոյություն մը կյանքի ու  
բնության մյուս երևույթներուն նման:

Մեկը շինող-կառուցողն է, ոչինչեն ինչ մը ստեղծողը,  
մյուսները պատրաստ ստացող են ու օգտագործողը: Երկուքի  
համար ալ գիրքը վայելքի աղբյուր է. երկուքի համար ալ  
գիրքը կներկայացնե միշտ շատ մը արժեքներ, բայց բոլորովին  
իրարմե տարբեր տեսակի վայելքներ ու իրարմե տարբեր  
տեսակի արժեքներ, նույնիսկ տեսակ մը իրար հակադիր  
արժեքներ:

Արդ, ինչի մեջն է գրական երկի մը արժեքն ու կարևորու-  
թյունը ստեղծագործողին համար: Ինչո՞ւ համար մարդիկ  
գիրք կշարադրեն: Ինչն է հեղինակները դրդողը, որ գրական  
երկեր հորինեն:

Այդ դրդիչները շատ են, կրնանք վերածել երեք խումբի:  
Նախ՝ ներքին հոգեբանական մայր դրդիչներ: Երկրորդ՝ կի-

սահոգեկան–կիսաընկերական դրդիչներ: Եվ երրորդ՝ հավելյալ ու հետևանք դրդիչներ:

Ամենեն նախնականն ու ամենեն խորունկը բնականաբար հոգեբանական մայր դրդիչներն են:

Եվ ամենեն առաջ այն պարզ իրողությունը, որ լեցված հոգին ներքին, բնական պահանջ ունի թափվելու, հոսելու, զեղումի: Բան մը գիտցողը, լուր մը իմացողը, նոր բան մը մտածողը ներքին մղում մը ունի իր գիտցածը ուրիշներուն ալ հաղորդելու: Բան մը լավ հասկցողը ուրիշներուն ալ կուզե հասկցնե սուտ թե իրավ ճշմարտության մը տիրացողը կցանկա, որ ուրիշներն ալ դավանող դառնան իր ճշմարտության՝ ամեն հավատացյալ փափաք ունի, որ ամենքն ալ դառնան իր սուրբ հավատքին, եթե պետք է՝ նույնիսկ սրով և հրով:

Այդպես ալ ամեն մարդկային հոգի կարիք ունի իր հույսերը, կարոտները, սպասումները, ուրախություններն ու ակնկալությունները ուրիշներուն հետ բաժնելու: Իր վշտերն ու կասկածները, իր մտահոգություններն ու անախորժությունները մոտիկ ու մտերիմ, երբեմն նույնիսկ օտար ու պատահական մարդոց հետ կիսելու: Ուրիշ խոսքով մեր հոգին պահանջ ունի իր ներսը դիզված ու փոթորկող ապրումները արտահայտելու: Եթե լռե ու միայն պահե՝ կնեղվի: Պետք է երթա ընկերոջ մը, բարեկամի մը, հարևանի մը, ըսե, խոսի, պատմե, որ քիչ մը հանգստանա:

Եվ ամեն մարդ ալ, ինչպես լավ գիտենք, կխոսի միշտ իր հոգիին մեջ տիրող խնդիրներու և նյութերու մասին, իր ցավերեն կխոսի: «Ի յաւելվածոյ սրտի խոսի բերան»: Հավելվածը լեցվածն է, զեղվածն է, եզերքներեն դուրս թափվողը:

Ահա այս տեսակի հոգեկան թեթևացում մըն է նաև ամեն գրական արտահայտություն: Փոխանակ բանավոր

կերպով անմիջապես ըսելու, պատմելու, երգելու կամ բացատրելու, նույնը կրնե հեղինակը գրիչով թուղթի վրա: Եվ այդ գրված թղթերը աչքի առաջ ունին և ուղղված են կան որոշ անձի մը, որոշ մեկ-երկու անձերու, կան որոշ խումբի մը, որոշ հավաքականության մը և կան ավելի ևս սովորական ընդհանրության, հասարակության, այսինքն այդ տեսակի հարցերով ու խնդիրներով հետաքրքրվողներուն, գաղափարակիցներու, զգացակիցներու:

Խոսքին մեջ ուրեմն բոլորովին նույնն է. թափել ինչ որ իր հոգիին մեջ լեցված է, դիզված է, որ կհուզե ու կճնշե, ինչքան ուժեղ կերպով մտահոգություն ու անհանգստություն պատճառե, այնքան ալ ուժեղ ու բուռն կըլլա հորդելու, թափելու, արտահայտվելու ներքին դրդումը:

Գիր չունեցող, գրի ազատ գործածությունը չունեցող, գրի վարժությունը չունեցող մարդը կունենա նույն գրական հորդումը, բանավոր կերպով կըսենք անգիր բանահյուսություն:

Գիր գիտցող, գրքերու հետ ապրող ու գրականության ընտել մարդը, հետևելով գրի մարդոց օրինակին, գրելով կըսե իր ըսելիքը, որ շատ մը առավելություններ կըբերե իր հետ: Իր խոսքը կերթա մարդկային շատ ավելի լայն խավերու: Իր խոսքը կերթա հեռավոր վայրեր ու հեռավոր դարեր: Եվ իր խոսքը կըլլա շատ ավելի կոկ ու գեղեցիկ, քանի որ գիրը հնարավորություն կուտա գրվածը կրկին ու կրկին կարդալու, վրան մտածելու, սրբագրելու և մշակելու ուրիշներուն ներկայացնելե առաջ: Եվ գրածդ կդառնա քու սեփականությունդ քու անձիդ ու քու անունիդ սերտորեն կապված, փոքրիկ անմահության պես բան մը, որ բոլոր դարերու մարդոց սին ու կարճամիտ տենչերեն մեկն է եղած:

Հոգեբանական այս հիմնական ներքին դրդումին վրա

անմիջապես կավելնան երկը ստեղծելու, ձևակերպելու գործադրությունն առաջացող քանի մը նոր հրապույր ունեցող դրդիչներ, նորեն ներքին հոգեբանական:

Ամենն առաջ աշխատելու, ստեղծագործելու հաճույքը: Մեր ուժերուն համապատասխանող, մեր բնական հակումներե ծնունդ առնող ամեն աշխատանք ու գործադրություն մեծ բավականության աղբյուր է միշտ, երբ մանավանդ ներքին հոգեկան առատութենէ ինքնաբուխ կհոսի:

Ինչքան դուրին, ինչքան ինքնին բխի աղբյուրը, այնքան մեծ կըլլա մեր աշխատանքին հրապույրը և իր բերած ուրախությունն ու ոգևորությունը: Նույնիսկ իր պատճառած չարչարանքն ու հոգնությունը կկրենք սիրով, որ կդառնա իր տեսակի բավականության աղբյուր:

Այս աշխատանքի պատճառած ուրախությունը կսկսի արագ հարստանալ, երբ հնարելու, կառուցելու, դասավորելու, գյուտեր ընելու և ամբողջություններ կերտելու գոհացումը կուգա վրան կավելնա: Ամեն գրված նոր գլուխ, ամեն ստեղծված նոր տեսարան, ամեն նոր փաստ ու ապացույց, ամեն սուր նկատողություն, ամեն սիրուն համեմատություն, ամեն նոր ելք ու շարժում, ամեն թռիչք ու խորացում նոր հրճվանք ու նոր հրապույր կբերեն ստեղծագործ հոգիին, որ հետզհետե կտեսնէ իր կարողությունները, կգիտակցի իր ուժին, որ առաջվնէ չգիտեր, թե ունի:

Ինչքան խոր ու լայն կարողանա, ինչքան բարձր հաջողի, այնքան ալ մեծ կըլլա ավելի խոր թռիչքներու պահանջը, ավելի նոր ու ավելի համարձակ ձեռնարկներու ձգտումը: Գրելը, հորինելը, ստեղծագործելը կդառնա իր գործն ու արվեստը, կյանքի իմաստ ու ոգևորություն:

Երբ կենդանի ապրում մը, խոր մտածում մը կամ բուն հուզում մը և գրելու այս ծարավն ու հաջողելու գիտակ-

ցությունը հոգիին մեջ կփաթթվին իրարու՝ գրական երկի մը ծնունդը գրեթե անխուսափելի է:

Այս ստեղծագործ բուն ներքին դրդիչներուն ընդհանրապես կմիանան կիսաներքին-հոգեբանական և կիսաարտաքին-ընկերական դրդիչներ, բոլորն ալ արդյունք մարդկային մշտական ընկերակցության և անհատի ու համայնքի ներքին խոր կապին:

Ամեն քիչ-շատ ապրած, փորձված, տեսած ու սորված անհատ ընկերական բնական պահանջ ունի ուրիշները կրթելու, միջավայրը բարձրացնելու, տգիտության դեմ պայքարելու, նախապաշարումներն ու հինցած ըմբռնումները խորտակելու, հոգիները քիչ մը ավելի լուսավորելու, ազնվացնելու ու բարձրացնելու և իր շրջապատողներուն ճաշակը քիչ մը ավելի հղկելու:

Այս ուրիշներու մասին մտածող ընկերական ձգտումները ունին անշուշտ իրենց ավելի եսական երեսները: Մակերեսի ուռուցիկ դառնալը գոգավորություն մըն է իր տակի երեսին համար. հեղինակ մը այդ բոլոր ընկերական ձիգերը կթափե, որովհետև հոգեբանորեն, իր ներսեն ուրիշներուն ազդել, ուրիշներու դատողության վրա տիրել կուզե. իր շրջապատողներն ու ընթերցողները իր համոզումներու ուժին և զգացումներու թափին ենթարկել կուզե, վարակել կուզե իր հոգիով, իր անձով, իր մտածելու եղանակով ու ճաշակով, այն ամեն բաներով, ինչով ինքն է լեցուն: Կձգտի իր ետևեն քաշե «ամբոխները», «ուսումնականները», «երիտասարդությունը» իր խելքի ուժով, իր կամքի ուժով, իր սրտի ուժով: Իշխել կուզե հոգիներուն վրա, իր հոգին սուզվիլ կտենչա հոգիներու այդ ծովուն խորքը:

Միևնույն ժամանակ իր կառուցած երկը հանրության որոշ

զգացումներուն, ձգտումներուն ու որոնումին մեկ մարմնացումը կնկատե, գիտե, որ մարդկային հոգիի փնտրտութիւն մեջ ինքը ըրած է գյուտ մը, մնայուն պատկերացում մը, գաղափարի մը ընդգծումը: Իր համայնքին, իր ժողովուրդին կամ մարդկութեան համար եղած է պիտանի արտահայտիչ մը, գիտական կամ գեղարվեստական կամ գործնական գրական դէմք մը:

Մինչև հիմա հիշված պատճառ-դրդիչներուն կավելանա քանի մը հետևանք դրդիչներ, այսինքն՝ արդէն կատարված աշխատանքի և ստեղծագործության արդյունքը եղող հավելյալ դրդիչներ:

Ամենէն բարձրը՝ բան մը ստեղծած, նորություն մը բերած և ընկերական դեր մը կատարած ըլլալու գիտակցությունը բնականաբար կբարձրացնէ իր հոգին իր աչքին, գիտե որ արժեք մըն է և կձանձնա իր առավելությունները առանց իր թերություններն ու իր տկար կողմերը անտեսելու. ո՞ր բանն է կատարյալ այս աշխարհիս երեսին, ո՞ր գործն է անթերի: Ինչքան ալ շատ թերիներ ունենա՝ որոշ շնորհք ու որոշ առավելություններ կմնան, որոնք բնական ու արդար հպարտություն կներշնչեն և տրամադրութեան բարձրացում կուտան: Հոգեկան այդ բարձրության վրա մնալու և ավելի ևս բարձրանալու ջանքը կդառնա հավելյալ մեծ դրդում մը նախորդներէն ծնող:

Այս ներքին գնահատանքին սակայն կմիանան նաև ուրիշներու արտաքին գնահատական արտահայտությունները, հեռուէն ու մոտէն, բերանացի ու գրավոր. այսպես ալ շրջապատողներուն համակրանքը, գովքը, հիացումը: Հեղինակը կդառնա առարկա ընդհանուրի խոսակցության, քննության, վեճի ու աղմուկի և ուշադրության: Ամեն կողմէ ջերմ նայվածք, սիրալիք խոսք, սիրառատ վերաբերում, շոայված հարգանք ու պատիվ: Այս բոլորը կշոյեն մարդուս զգացումները ու

կղաճանան աղբյուր մեծ ու փոքր ուրախություններու և ախորժանքի, և բնագոյորեն կմղեն հեղինակը նոր աշխատանքի, նոր արժեքներու ստեղծագործության:

Իսկ հեղինակ մը ինչքան շատ ստեղծե, որչափ շատ գրե ու անուն հանե, այնքան ալ շատ կկարդացվի ընդհանուր առումով, բնականոն պայմաններու մեջ. ըսել է՝ իր երկերը ավելի շատ կծախսվին և ավելի եկամուտ կբերեն. աս ալ կղաճա վերջին հավելյալ դրդիչ մը, վերջին, բայց ո՛չ չնչին: Ամեն հեղինակի աշխատանքին մեջ կա այն կամ այն չափով նաև այս դրամական կողմը, ապրուստի հարցը, եկամուտի ու առուծախի հաշիվները և չի կրնար չըլլալ, քանի որ հեղինակը բոլոր մյուս մտավոր աշխատավորներու շարքին, ուսուցչի, խմբագրի, դերասանի ու երաժշտագետի նման, արհեստավոր մըն ալ ինքն է, և ամեն արհեստավոր պետք է ապրի իր աշխատանքով: Արժեքավոր հեղինակ չկա, որ գրե միայն դրամի համար՝ իր ձեռք բերած համբավը շահագործելով, բայց դրամի հաշիվները կան միշտ ու ամենուն համար ամեն աշխատանքի մեջ, շատ հազվագյուտ բացառիկներ ազատ են այդ հոգեն, ուրեմն և դրդիչ են:

Իր՝ արդեն կատարած գործին գիտակցությունն ու հոգեկան բարձրացումը, հանրության գնահատանքն ու ուշադրությունը, և դրամի ու դիրքի տված առավելությունները կյանքի մեջ. ասիւ երեք հավելյալ դրդիչներ, որոնք հեղինակը աշխատանքի կմղեն:

Ես մինչև հիմա գրելու միայն ուրախությունները, հաջողիլն ու գնահատվիլը շեշտեցի՝ ատոնց դրդիչ ըլլալը ավելի ցայտուն կերպով մատնանշելու համար:

Կյանքի մեջ սակայն հեղինակներու հետ կապված չեն միայն հաջողանք ու գնահատություն, դյուրություն ու վայելք, այլ նաև շատ մեծ անհաջողություններ, սայթաքումներ, մեծ



տառապանք, երբեմն տաժանակիր աշխատանք, անվերջ փորձեր ու որոնումներ, առանց իրենց ընել ուզածը գլուխ բերելու, առանց իրենց հոգին բավարարել կարողանալու, միշտ դժգոհ իրենց ըրածեն, ինքզինքնին քննադատելով: Ուժեղ նախանձներ կան, երբ իրենց ջանքերն ու արդյունքը ավելի մեծ տաղանդներու կամ ընկերակիցներու գործին հետ կհամեմատեն: Ճնշող ու չարչարող բան է, երբ կզգաս, որ արժեք ունիս և արժեքավոր երկ մըն ես մեջտեղ դրած, որ չի գնահատվիր, որուն վրա ուշ չեն դարձներ կամ կխօսեն: Անախորժություն մըն է հեղինակին համար, երբ իր ստեղծագործության մեջ բաներ կփնտրեն ու բաներ կգովեն, որ իրեն համար անարժեք է: Այդպես ալ մանավանդ երբ իր ամբողջ կյանքը կչարչարվի պատառ մը հացի համար և ծայրը ծայրին բերել չի կրնար, որ իր կերտել ուզած երկը հանգիստ ստեղծագործել կարողանա, կամ երբ հրատարակչի մը առևտրական քմայքին պետք է հարմարցնե իր աշխատանքը կամ ընթերցող հասարակության պահանջին ու ձաշակին:

Հեղինակներու ճամփան ալ, ինչպես կյանքի բոլոր ճամփաները, հարդարված ու զարդարված չէ միայն վայելքներով և հաջողությամբ: Ամեն տեսակի դառնություններ, հոգեկան ծանր ապրումներ, համառ ու լարված աշխատանք, հաճախ չափազանց հոգնեցուցիչ և բազմատեսակ զրկանքներ ու աղքատություն ցանված են նաև գրականության նվիրված մարդոց ճամփուն վրա: Բայց այս բոլոր դժվարություններն ու դառնությունները հեղինակը չեն հեռացներ հեղինակելե, ընդհակառակը, կարծես ավելի կսրեն ստեղծելու ծարավը և ավելի կամք ու համառություն կդնեն հեղինակի հոգիին մեջ: Եթե ուրախությունը, հաջողությունը, սերն ու վայելքը, փառքն ու դրամը ստեղծագործության դրական դրդիչներն են, այս ձախողանքը, չհասկցվիլը, չըմբռնվիլը,

ուզածը ընել չի կրնալը, աղքատ ու անփառունակ մնալը ստեղծագործության «ի բացասականե» դրդիչներն են: Ու կներկայացնեն այն հսկայական համառ ջանքերը, որով հեղինակները կձգնին հաղթահարել բոլոր արգելքներն ու թշնամանքը, արժեքավորելու համար իրենց աշխատանքը և պարտադրելու համար հասարակության իրենց անձն ու իրենց գործը:

Թե՛ գիտական ու գործնական երկերու հառաջաբաններուն մեջ, թե՛ գեղարվեստական երկերու հերոսներու բերնով շատ հաճախ կպատմվի կամ կնշմարվի հեղինակին կրած դառնությունները իր արհեստին երեսնն և իր հոգեբանական տվայտանքը իր երկի դժվար երկունքեն:

Հեղինակի մը համար հեղինակելու հետ կապված ամեն ինչ, դրական կամ բացասական, դրդիչ մըն է միշտ այս կամ այն ձևով, այս կամ այն չափով:

## **ԺԱ Ընթերցողի կապը հեղինակի հետ**

Պատահական ու թեթև ընթերցանության սովոր անձերը ընդհանրապես քիչ կհետաքրքրվին հեղինակով, չեն փնտրեր ու չգիտեն, թե որո՞ւ գրածն է, որ կկարդան, ըլլա լուր, տեղեկություն, թե պատմություն մը, ձիշտ այնպես, ինչպես որ բերնե բերան կրկնվող, եղելությունները, կատակները ու երգերը ըսելու կամ լսելու ատեն հեղինակի մասին խոսք չկա: Գրքերուն վրա սովորաբար հեղինակին անունը միշտ գրված կըլլա և միշտ ալ մեքենաբար կկարդացվի, բայց ուշադրության առարկա չի դառնար ու կմոռցվի:

Քիչ մը ավելի հարատև ընթերցողներուն համար շարք մը երկեր գրած հեղինակին անունը կմնա շրթունքներուն վրա ու կգործածվի, բայց ավելի իբրև որոշ տեսակի գրության անուն, քան նեղ մտքով հեղինակի: «Թո՛վոտ մը տվեք ինձի»,

կղիմե գերմանուհին գրադարանապետին: «Մայն-Ռիտս ո՞վ է վերուցեր», կփնտրե ուրիշ մը իր կորուստը: «Ի՞նչ կկարդաս, Րաֆֆի», այսինքն ստեղծագործողը չէ, որ աչքի առաջ ունի խոսողը, այլ ստեղծագործությունը:

Ընթերցողի հոգին հեղինակին հետ դեռ մասնավոր կապ մը չունի, հեղինակի անձով դեռ չես հետաքրքրված, իր անունը լսած ես, գիտես, իբրև որոշ տեսակի գրություններու հեղինակ:

Հեղինակի անձը կշեշտվի, երբ ընթերցանության կնոտենաս հատկապես այսինչ մարդու գրածը ըլլալուն համար: Կան իր գրական համբավեն, կան գիտական հոչակեն դրդված, կան բարեկամներուդ գովասանքեն ու գնահատանքեն ոգևորված: Հոս արդեն միայն հեղինակին անունը գիտնալը չէ հարցը, այլ հեղինակի գրական կամ գիտական որոշ առավելությունները լսած ըլլալդ և ստուգել ուզելդ է կարևորը: Հեղինակի մը տաղանդն ու գիտությունն է, որ մեջտեղ է դրած, հեղինակի մը կարողություններն են արդեն, որ հետաքրքրություն կարթնցնեն:

Հեղինակի անձին ստացած կարևորությունը շատ ավելի կգորանա, երբ ո՛չ թե ուրիշներու խորհրդով, հանրային ճաշակով կամ գրավաճառի մը, քննադատի մը հանձնարարությամբ կառաջնորդվիս, այլ այդ հեղինակի նախորդ երկը կամ երկերը կարդացած ես ու կձանչնաս անձամբ իր կարծիքները, իր գրելու եղանակը, իր աշխարհայացքը, իր վերաբերումը քեզի հետաքրքրող հարցերուն, այսինքն՝ ծանոթ ես հեղինակի ստեղծագործ հոգիին, գիտես անոր առավելությունները, ուժը, շնորհքը ու կհավնիս: Ուրիշ խոսքով անհատապես շփման մեջ ես հեղինակի ստեղծագործ հոգիին հետ, կձանչնաս հեղինակը իբրև հեղինակ:

Այս ծանոթությունն ու համակրանքը արդեն կդառնա

ուղղակի սեր ու մտերմություն, երբ հեղինակը կարտահայտե քու համոզումներդ, քու գիտական տեսություններդ ունի, քու գեղարվեստական ճաշակդ ու քու գրական ըմբռնումները կմարմնավորե կամ քու իրական ապրումներդ շատ մոտ ու նման տեղեր, դեմքեր ու դեպքեր կնկարե, քու սեփական երագներուդ, կարոտներուդ ու ձգտումներուդ մարմին կուտա. այսինքն՝ երբ հեղինակը քու հոգիիդ բանաստեղծն է, քու մտքերուդ գիտնականը և քու տեսակետներուդ բանասերը: Այլևս այդ հեղինակը ո՛չ միայն տաղանդ մըն է քեզի համար, այլ հոգիի բարձր ընկեր մը, չես կըրնար անոր երկերեն և ո՛չ մեկը չկարդալ, ջերմությամբ կխոսիս իր մասին, կսքանչանաս և՛ կարդալու ատեն, և՛ հանձնարարելու: Խնդիրը կրնա հասնիլ մինչև մոլեռանդության, մինչև կույր պաշտամունքի և պատշաճության սահմանները անցնող միակողմանի փառաբանության: Իր ապրումներն ու պնդումները և քու սեփական զգացումներդ ու դատումներդ սերտորեն հյուսված են իրար: Ո՛չ միայն իր ստեղծագործությունը սիրելի է քեզ, այլև իր գրությունը, այլև տպված գիրքը, որ միշտ սեղանիդ վրա է ու քու ձեռքիդ շոյանքին տակը: Սիրահարվածի մը հոգեբանությունն է. քու սիրած էակիդ կապված ամեն իր թանկ է քեզի համար, և հեղինակի հասցեին եղած ամեն քննադատություն, ամեն պարսավ ուղղակի քու հոգիդ կծակե, կզգաս իբրև անձնապես քեզի դեմ ուղղված, կզգաս իբրև թշնամանք ու թշնամություն:

Երբ մտերմությունը այս խորության է հասած՝ ընթերցողը այլևս չի կրնար չհետաքրքրվիլ իր հեղինակին նաև անձովն ու կյանքովը: Միայն իբրև հեղինակ ճանչնալն ու հոգեկից ըլլալը հերիք չի գար այլևս, իր մասին ամեն բան կհետաքրքրե քեզի և մանավանդ իր ապրած իրական կյանքը, իր կյանքի ամբողջ ընթացքը, իր տառապանքներն ու թռիչքները, իր

ստեղծագործության դրդիչները և իր կյանքի բոլոր ներքին ու արտաքին պարագաները. ընթերցողը կսկսի փետրել իր սիրած հեղինակի կենսագրության բոլոր ծալքերն ու մանրամասնությունները: Եվ բնական կերպով այս բոլոր կենսագրական տեղեկությունները նոր կապեր կստեղծեն ընթերցողին ու հեղինակին միջև. մինչև հիմա հեղինակի երկերուն մեջեն հոսող ու ցայտող հոգին էր սիրվածը, հիմա ատոր կավելնա հեղինակի կյանքին վեպեն ծորող սերն ու համակրանքը և կենդանությունը: Ընթերցողի հոգիին մեջ հեղինակը կամբողջանա և կմարմնավորի ծանոթ ու մտերիմ իսկական անձի մը պես:

Բոլորովին տարբեր է անձնական ու իրական ծանոթության դերը հեղինակի ու ընթերցողի մեջ եղած կապի տեսակետեն: Բնականաբար հարցը կվերաբերի միայն ժամանակակից հեղինակներու, որոնց համբավը կրնա արդեն հաստատված ըլլալ կամ դեռ հաստատված չըլլալ: Այս երկու պարագային ալ դեր մը ունի անշուշտ հեղինակին տեսած ըլլալդ, հետը շփման եկած ըլլալդ կամ ավելի ևս հեղինակը մոտիկեն ճանչցած ըլլալ կամ ուղղակի հեղինակին հետ մտերիմ, բարեկամ, ընկեր ըլլալդ: Շատ կան հեռուէն հեռու հիացումներ որևէ հեղինակի մը գրություններով, որ ավելի կամ պակաս չափով կպաղին, երբ առիթը կներկայանա հեղինակին հետ անձնական շփման գալու: Հոտ դեր ունին հեղինակի անձին ներքին ու արտաքին գծերն ու թերությունները: Հոտ դեր ունի մարդկային հոգիի բնական պահանջը իր հավնած ու սիրած էակը իտեալացնելու, ամեն թերություններն ու ճղճիմութենէ ազատ ու բարձր երևակայելու, իսկ այս իտեալացման բոլոր պահանջներուն շատ քիչ հեղինակներ կրնան հաջողությամբ դիմագրավել: Հետևանքը կըլլա ընթերցողի հոգիին մեջ ջերմության աստիճանացույցին անկումը: Եվ վերջապես հոտ

դեր ունի նաև այն բնական իրողությունը, որ անձ մը ինչքան կուզե ազնիվ ըլլա, շնորհալի ու բարձր հեռուէն դիտած, երբ կմոտենանք ու կապրինք հետը առօրյա շփումով՝ կարծես կվարժվինք, սովորական կդառնա ու կարծես կպզտիկնա այս կամ այն աստիճանի: Մյուս կողմէն ալ կենսակցությունը կմերկացնէ, իսկ մերկությունները ինչքան ալ սիրուն ըլլան՝ իրենց ամէն մասերով ու կետերով դիմանալ չեն կրնար արևու լույսին. հոս ծռություն մը, հոծ բիծ մը, անախորժ ծալք մը կամ գիծ մը: Եվ այս բոլոր մարմնական ու հոգեկան ծուռն ու թերին, որ սովորական մարդոց վրա կտեսնենք ու կանցնինք մեր բարձր դատած, մեր շատ գնահատած ու իտեալացուցա՛մ դէմքերուն վրա շատ ավելի անախորժ կզգանք, և մեր հիացումը կվիրավորվի: Մեր համակրանքը կգաղջանա:

Բայց շատ անգամ ալ կպատահի հակառակը. հեղինակ մը, որ կամ բնավ չէինք կարդացած, կամ կարդացած էինք առանց որևէ մասնավոր ուշադրության, հանկարծ երբ անձնապես տեղ մը կհանդպինք կամ քիչ մը ավելի մոտիկէն շփման կուգանք՝ կսկսինք հետաքրքրվիլ իր երկերով. տեսնելէդ ու հետը խոսելէդ ետքը կարծես պահանջ կզգաս իր երկերուն ավելի մոտիկէն ծանոթանալու: Կապը փոխադարձ է. ինչպես երկերուն ընթերցումը հետաքրքրություն կառաջացնէ դեպի հեղինակին անձը, այնպես ալ հեղինակին անձը հետաքրքրություն կներշնչէ դեպի իր երկը:

Ընթերցողներու հոգիին մեջ հեղինակներու հանդէպ կան անշուշտ հաստատուն սերեր, որոնք ամբողջ կյանքը կտևեն, դիցուք և որոշ թերթն ելևէջներով: Բայց շատ սովորական են նաև այն սերերն ու մտերմությունները, որոնք որոշ շրջան մը հոգիդ կգրկեն, և կյանքիդ, պայմաններուդ ու տարիքիդ փոփոխության հետ կմարին: Չմարողներն ալ, որոնք կտևեն ու կմնան մինչև ընթերցողի կյանքին ավելի

հասուն ու ծանրագլուխ տարիները, մինչև կյանքի էջքին ու վերջքին տարիները, ատոնք ալ բնականաբար պահել չեն կրնար պատանության ու երիտասարդական օրերուն խենթ հատկությունները: Տարիքին հետ զգացումներն ալ կապրին ու կհոլովվին բնության անխուսափելի օրենքներով: Եվ վերջապես նոր զգացումները թե՛ ապրումի, թե՛ փորձի, թե՛ մտքի և թե՛ գրականության գավառներուն մեջ կրերեն նոր հեղինակներ, նոր ոգևորություն, նոր տեսություններ, նոր գիտություն և նոր ստեղծումներ, որոնք եթե մեր նախորդ ոգևորություններուն ու սերերուն հակընդդեմ ալ չեն, բայց և այնպես բոլորովին նույն ալ չեն և ատոր համեմատ ալ ընթերցողի գերադասություններն ու գնահատումները որոշ տեղափոխություններ ու թեքումներ կկրեն: Նոր հեղինակներ կուգան նոր մտքերով, նոր արվեստով, նոր գրավիչ ուժերով: «Նոր» կլսենք ընթերցողի տեսակետեն, թե չէ ատոնք կըլլան հաճախ շատ հին, դարավոր հին հեղինակներ, որոնց հետ ընթերցողը նոր շփման կուգա, նոր կձանձնա և նոր կսկսի թափանցել անոնց գեղեցկությունն ու բարձրությունը: Ու կկապվին հոգեկան նոր մտերմություններ:

## **ԺԲ Հեղինակին կրած ազդեցությունները**

Հեղինակն ալ որոշ կապեր ունի իր ընթերցողներուն հետ և որոշ չափով մը կենթարկվի իր ընթերցողներու ազդեցությանը: Իր ընկերներուն, բարեկամներուն ու մտերիմներուն կամ ավելի պատահական անձերու արտահայտած կարծիքը, գնահատանքը, ինչպես և անոնց ըրած նկատողություններն ու ցանկալի համարած ուղղումները անշուշտ որ մտածել կուտան հեղինակին և տեսակ մը վերաքննության կենթարկեն իր ստեղծագործությունը իր հոգիին մեջ:

Այլև լրագրության ու գրախոսության վերաբերումը, քննա-

դատությունն ու վերլուծումները անշուշտ դեր մը կխաղան: Այդպես ալ իր գրվածքին տարածվիլն ու կարդացվիլը, կամ, ընդհակառակը, իր գրքին արմատ չբռնելը, անոր մասին չխոսվիլը և շատ քիչ տարածվիլը բնականաբար կազդե հեղինակի և տրամադրության վրա, և՛ ոգևորության, կնպաստե կամ կխանգարե որոշ չափով մը անոր աշխատանքը. կրնա նույնիսկ դրդել որոշ ուղղումներու, որոշ զգուշության, որոշ սրբագրություններու իր հաջորդ ստեղծագործություններու միջոցին ընթերցող հասարակության մատնանշած ուղղությամբ՝ ավելի մեծ հաջողություն ու գնահատանք քաղելու համար: Այսինքն իր ընդհանուր աշխատանքին ու ստեղծագործության վրա ընթերցողները որոշ ազդեցություն կբանեցնեն, գեթ որոշ չափով մը կստիպեն ենթարկվիլ իրենց ճաշակին, իրենց ուզածին:

Սակայն այդ չափը ընդհանուր առումով շատ համեստ է և շատ քիչ անգամ կրնա իսկապես խորքին վրա ազդել: Արտաքին զիջումներու, ձևական սրբագրություններու և թեթևակի փոփոխություններու մեջ է ընդհանրապես, որ հեղինակը կհոժարի ընթերցողներու պահանջքին: Որովհետև ամեն հեղինակ ծառ մըն է որոշ հողի ու տեղի վրա բուսած, որոշ պտուղի մը սերմեն և որոշ պայմաններու տակ սնած ու աճած. քննադատության հովերը կրնան քիչ մը ծառը թեքել, եթե ուժեղ են ու տևական, և կամ ծառը ինքը եթե շատ է բարակ, կրնան փչող հովերը տ երևաթափ ընել որոշ ժամանակի մը համար, բայց ծառի բնական էութենեն լուրջ բան մը փոխել չեն կրնար: Բարդին կմնա բարդի, տանձենին ալ՝ տանձենի: Ամեն հեղինակ, հատկապես ամեն արժեքավոր հեղինակ, իր էությամբ, իր զգացումներով, դատումներով, աշխարհայացքով, ճաշակով ու ոճով որոշ ու կազմակերպված արդյունքն է քանի մը շատ կարևոր իրողություններու, որոնք



արդեն ո՛չ թե թեթևակի ու երկրորդաբար, այլ շատ խոր, հիմնական ու մշտական ազդեցություն կբանեցնեն ամեն մեկ հեղինակի վրա:

Մենք հեղինակ ըսելով սովորաբար կըմբռնենք անհատ մը, որ գիրք մըն է գրած, և անհատը իր ստեղծագործության հետ կըմբռնենք անջատ, ինքն իրմով լրացած երևույթ մը, և իր գրած գիրքն ալ կհասկնանք իբրև անոր մտածած, անոր կառուցած աշխատությունը ամբողջովին: Մինչդեռ իրականորեն ամեն հեղինակի երկերուն մեջ որոշ մաս մըն է միայն իր սեփականը, իսկապես իր մտածածն ու հնարածը, իսկապես միայն իր ստեղծագործությունը:

Երբեմն իրավ որ զգալի նորություն մը ունի հեղինակը և մեծ ու աչքառու է իր բերած ինքնաստեղծ նոր մասը: Ավելի երկրորդական հեղինակներու քով, բայց ընդհանրապես հեղինակներու սովոր մասին մեջ շատ փոքր է իսկապես նոր տարրը: Եղածը իր մեծագույն մասով կրկնություն մըն է նախորդ իրմե առաջ եղած գրություններու, անշուշտ քիչիկ մը տարբեր դասավորումով: Եվ սա է պատճառը, որ շատերը բանահյուսական երկի մը հիմքը կհամարեն ձևը, ինչպես ըսված ըլլալը: Բուն նյութը՝ միտքը, խորքը, կյանքն ու զգացումը, կըսեն նույն է ամեն գրվածքի մեջ:

Ճշմարտությունն այն է, որ ամեն հեղինակի յուրաքանչյուր հեղինակության մեջ աշխատած են ու կաշխատին բազմաթիվ ուրիշներ, ամբողջ համայնություններ, և շատ ավելի մեծ չափերով, քան ինքը հեղինակը: Հեղինակը արտահայտիչ մըն է միայն համայնություններու մտածածին, ըսածին ու զգացածին. բազմատեսակ գիրքերու ու ճառերու մեջ հեղինակը կներկայանա միայն իբրև ուրիշներու կողմե արտահայտված իրողությունները մեկ կետի մը, մեկ դեպքի մը շուրջը փաթեղը, կեդրոնացնողը, փնջողն ու իր հոգիին

բոցովը ջերմացնողը:

Այս ուղղությամբ առաջին ու ամենամեծ հանրային ազդակը հեղինակի մը տաղանդն է, հեղինակի բնածին խառնվածքը: Ամեն հեղինակ, ինչպես իր մարմնին, այնպես ալ իր հոգիին մեջ կ'պտտեցնէ դարավոր ու դարավոր ժառանգական կարողություններու որոշ համադրում մը: Մարդս ինչ որ կ'զգա, ինչ որ կ'մտածէ և ինչ որ կ'ընէ գլխավորապես դարավոր ժառանգական ունակություններու ու հակումներու բերած ու մշակած չափովն ու ձևովը կ'զգա, կ'ընէ ու կ'մտածէ: Ինչպես մեր մարմինը, այնպես ալ մեր հոգին, մեր էությունը, մեր գործն ու ստեղծագործությունը ամենեն առաջ կ'պարտինք մեր ծնողներուն ու մեր ծնողներու ծնողներուն, մեր տոհմին, մեր ցեղին, մեր ժողովուրդին: Ամեն մարդու և ամեն հեղինակի հոգիին մեջ տիրապետողը ամենեն առաջ իր ժողովուրդի կողմն է, իր ժողովուրդի շնորհներն ու հակումները, իր ցեղային հոգեբանությունը:

Երկրորդ մեծ ազդակը ամեն մարդու էության ու գործունեության, այդպես ալ ուրեմն ամեն հեղինակի ստեղծագործության, այն միջավայրն է, ուր կ'ծնի, կ'բացվի, կ'ծաղկի ու հասունության կ'հասնի անհատը: Այսինքն՝ ընտանիքը, համայնքը, շրջապատող բնությունը, շուրջի քաղաքակրթական վիճակն ու հաստատությունները: Այս բոլոր իրականությունները խոշոր չափերով մասնակից են հեղինակի աշխատանքին, այս կամ այն ձևով խոսքի կուզան ու կ'ներկայանան ամեն հեղինակի երկերուն մեջ:

Երրորդ մեծ ազդակն ու աշխատակիցը հեղինակի գործածած լեզուն է, որ նորեն հանրային երևույթ մըն է դարերու ու երկար սերունդներու աշխատանքեն ծնած ու զարգացած: Գրական երկը լեզվական կառուցում մըն է, և այդ լեզուն պատրաստ կստանա հեղինակը իր մոր

շրթունքեն, իր դպրոցեն, իր շրջապատեն: Շատ համեստ է ու համեմատաբար շատ չնչին անհատ հեղինակի մը բերած նպաստը, ինչ որ լեզվի հիմնականին ու էականին կվերաբերի: Այդ լեզվեն օգտվելու կերպին ու այդ լեզվի գործածության իր ինքնահատուկ ձևերուն մեջն է ընդհանրապես յուրաքանչյուր հեղինակի անհատական բերքը: Բայց նույնիսկ հեղինակի ոճին ու կառուցման անձնական ճարտարապետության վրա, երբ երևույթներուն կնայինք քիչ մը ավելի վերեն ու հեռվեն, չափազանց մեծ է մայրենի լեզվի դրած կնիքը: Մարդուս ըսելու, արտահայտելու, դասավորելու, վերլուծելու եղանակները, նույնիսկ իր գործածած լեզվական զարդերը, խաղերը, հանգերը, պատկերները, համեմատությունները, կատակները խոր կապերով հյուսված են միշտ դարերու խորքեն եկող մայրենի հնավանդ լեզվին:

Ատոր հետևանքն է, որ ժողովուրդները իրարմե կզատվին ու իրարու կկապվին գլխավորապես լեզվով: Այդպես ալ գրականությունները կզատվին մյուս գրականություններեն լեզվով: Եվ յուրաքանչյուր հեղինակ մեծ չափերով ենթակա է նաև իր մայրենի լեզվով եղած այդ գրականության, իր մայրենի լեզվով դիզված բանահյուսական հարստության, որ ըսել է՝ ժողովուրդի մը հին ու նոր արդեն գոյություն ունեցող գրական ստեղծագործությունները կներկայացնեն չորրորդ մեծ աշխատակիցն ու ազդակը նոր հեղինակներու նոր երկերուն մեջ: Երգերու, վեպերու, գիտական որոշ նյութերու, հետաքրքրություններու, ուսումնասիրելու որոշ եղանակներու, գործնական որոշ հարցերու, նախընտրելի որոշ նյութերու, գեղեցիկ օրինակներու և ազգային ընդգծված ձգտումներու դարավոր հավաքածու մըն է ամեն ժողովրդի բանահյուսությունը և՛ անգիր, և՛ մանավանդ գրավոր: Ամեն նոր հեղինակ բանահյուսական այդ ազգային ստեղծա-

գործություններուն վրա է կրթված և անոնց ոգիովն ու էությանմբն է թաթխված բնական պայմաններու մեջ: Եվ ինքն ալ շուտով կդառնա այս կամ այն չափով իր ժողովուրդի ինքնահատուկ էության և իր ազգային գրականության ուրույն գծերուն մեկ արտահայտիչը:

Այս ազգային մեծ ազդակներուն քովը պետք է դրվի նաև, իբրև անհատ հեղինակներու աշխատանքին գործակցող ուժ, այն ամենը, ինչ որ հեղինակը կան իր խառնուրդ կյանքով, կան երկրներկիր իր թափառումներով, կան իր ուսած քանի մը լեզուներով կրցած է յուրացնել ուրիշ ժողովուրդներեն, օտար ընթերցումներեն, մարդկային ընդհանուր պատմութենեն ու պատմություններեն, օտար բանահյուսական երկերեն, իբրև գիտություն, իբրև ոճ, իբրև ճաշակ, իբրև մտածման եղանակ, իբրև մշակույթ, իբրև ավելի լայն ու համամարդկային որոնում, ձգտում և փիլսոփայություն: Աս ալ կդառնա ահան ամեն հեղինակի վրա ներգործող հինգերորդ ազդակն ու գործակիցը:

Ինչքան ատեն որ ժողովուրդները իրարմե անջատ կապրին՝ այս վերջին ազդակի ուժը տկար է համեմատաբար: Բայց տիրապետության, հպատակության ու գաղթային պայմաններով որքան որ ժողովուրդները իրարու կսանրվին՝ այնքան կշեշտվի բնականաբար օտար մտքի, ճաշակի, նյութի ու մշակման ազդեցությունը ժողովուրդի մը գրական անհատին վրա, ուրեմն և ժողովուրդի ամբողջ գրականությանը վրա: Եվ հիմա, որ մարդկությունը հետզհետե տնտեսապես ու քաղաքակրթորեն, շուտով նաև պետական կազմով իրար օղակվելու և միակ ամբողջություն մը դառնալու վրա է, այդ համամարդկային փոխադարձ ազդեցություններու բաժինն ալ բնական կերպով արագ պիտի մեծնա: Բոլոր գրականություններն ալ պետք է ավելի

սերտորեն կապվին իրարու ընդհանուր համամարդկային լայն գրական-ստեղծագործական հոսանքի մը մեջ: Այսինքն՝ ամեն հեղինակ իր ժողովուրդեն ու իր անմիջական միջավայրեն ստացած ազդեցություններուն վրա կրե պիտի նաև համամարդկային մտքի, զգացումներու և ձգտումներու ազդեցությունը, և ինքն ալ պիտի դառնա՝ ազգայինին կից և ազգայինով արտահայտված՝ նաև համամարդկային հոգեկան որոնումներու պատկերող մը:

Ամեն հեղինակ այս բոլոր աղբյուրներեն ծծած հյութերով ու նյութերով կշաղվե իր ստեղծագործությունը, որ հիմա իր կողմեն կերթա ազդելու իր ընթերցողներու հոգեկան զարգացմանը, ինչպես և իր ազգային գրականության բարձրացմանն ու հարստացմանը:

Ինչպես ամեն մարդ, այնպես ալ ամեն հեղինակ, անշուշտ իրավունք ունի իր կատարած գործը իրը համարելու, իր աշխատանքով հպարտ ու բախտավոր ըլլալու և իր աշխատանքին պտուղը որոշ չափով մը ինքը վայելելու: Ասիկա կտևե ինչքան ատեն որ հեղինակը կապրի: Հեղինակի մահվան հետ բացահայտ կդառնա մյուս ավելի խորունկ ճշմարտությունը. անհատները վայրկյաններ են, որոնք կուգան ու կանցնին ու կդառնան հետզհետե վերացական անուն մը: Հեղինակները վայրկենական ու մասնական գործադրողներն են միայն շատ ավելի լայն ամբողջության մը կատարած դարավոր աշխատանքին, որ բանահյուսություն կանվանենք: Տեսականը, մեծարժեքը և խորհրդավորը այդ դարեդար կատարվող ճիգերուն ընդհանուր հոսումն է, ապրող, խորհող ու նրբազգաց ժողովուրդի մը ստեղծագործական գալարումները, որով անձ և տալ ու մնայուն դարձնելու կջանա իր մարդկային հոգիին մեջ անցած-դարձածին, իր ապրումներուն, իր զգացումներուն ու իր մտածումներուն խոր-

քը թափանցել կտենչա, և ապրելուն ու կյանք ըսվածին ներքին իմաստը կփնտրե: Ստեղծագործական այս դարավոր հոսանքին մեկ ուղիսն է, մեկ երակը, մեկ սահանքը, մեկ ցայտքը, մեկ ալիքը, մեկ ծուփը ամեն մեկ հեղինակ:

## **ԺԳ Բանահյուսական երկերու հանրային արժեքը**

Մինչև հիմա աչքի առաջ ունեինք բառակերտ երկերուն արժեքը անհատական տեսակետեն, թե ի՞նչ օգուտ ու հաճույք կուտան անոնք անհատ անձերու՝ ընթերցողին ու հեղինակին:

Բայց անհատական տեսակետը վերլուծելու ատեն, ըսված է արդեն շատ բան, և ամենեն էականը, ինչ կվերաբերի նաև գրություններու հանրային արժեքին, քանի որ երևույթի մը հանրային կողմն ու դերը անոր անհատական դերին ու արժեքին ընդլայնումն ու ընդհանրացումն է էապես: Ընդգծեցի վերը, որ ամեն հեղինակ իր ժողովուրդի գրականությունը հյուսող թել մըն է քիչ մը հաստ կամ բարակ, քիչ մը երկար կամ կարճ: Ընդգծած եմ նույնպես, որ այդպես է նաև ամեն ընթերցող, ով կօգտվի ու մտերիմ է գրական մեծարժեք երկերու, ո՛չ միայն իր անձի բարձրացմանը կաշխատի, այլ իր անձի միջոցով կնպաստե իր ժողովուրդի բարձրացմանը:

Կմնա, ուրեմն, որ այս վերջին էջերուն մեջ շեշտենք ու ընդգծենք բանահյուսական երկերու անհատական արժեքներեն դեպի հանրայինը անցնող ընդհանրացումը, դիտենք անոնց հանրային արժեքավորումը:

Ամեն բառակերտ ստեղծագործություն, ըլլա գործնական, գիտական թե գեղարվեստական, անմիջապես նվիրված է հարցի մը, երևույթի մը, մտածումի մը, հոգեկան վիճակի մը, ընկերական խնդրի մը, մարդկային հարաբերության մը անմիջական քննությանը կամ պատկերացմանը: Ամեն գիրք հարց մը, կողմ մը, խորշ մը կլուսավորե, հարցի մը պատաս-

խանը կփնտրե, ըմբռնումի մը, փորձառության մը քարոզիչն է. ամեն գիրք բան մը կլուսաբանե, թաքուն իր մը դեպի լույսը կքաշե: Գիրքը լույս է, ուր որ երթա՝ հետը լույս կտանի: Իրեն քսվող միտքը կայծ կառնե, իրեն շփվող հոգիները բոց կառնեն: Ընթերցումը ժողովուրդներու միտքը կբանա, ավելին գիտնալու, ավելի խորը հասկնալու ծարավը կուտա, «ինչու»-ները փնտրելու ու ճամբու վրա կդնե:

Ամեն գիրք իր հատուկ նյութովն ու մշակած հարցերովը, իր ուսումնասիրած երևույթներովը ժողովրդի մը մտավոր զարգացման ու հոգեկան հասունության կձգտի այս կամ այն չափով, այս կամ այն խորությամբ ու թափով:

Բայց բացի այդ հատուկ ու հիմնական նյութեն ամեն գրության մեջ որքան-որքան կողմնակի դիտողություններ ու դատողություններ մեջ կուգան խոսքի ընթացքին, որոնք կյանքեն, իրականութենեն կամ գիտութենեն ու փորձերեն կհոսին և ո՛չ միայն գրչին ծայրեն, որով և ամեն գրական երկ կդառնա նաև այդ պատահական գաղափարներու տարածողն ու ժողովրդականացնողը: Ատոր համար է, որ ամեն երկ, բացի իր բուն նյութեն, բազմաթիվ ուրիշ գիտություններու ուսումնասիրության նյութ կրնա դառնալ: Այսպես, օրինակ, երգ մը կամ վեպ մը, կրնա նյութ դառնալ լեզվական վերլուծության, գրապատմական դիտողության, գրականության պատմության, պատմական ուսումնասիրության, վարքուբարքի, ըմբռնումներու ու փիլիսոփայական տեսություններու և դեռ ուրիշ շատ կողմերե: Այս բոլոր կողմերեն բոլոր շոշափված անցողակի նյութերը կենսատու ջրի կաթիլներ են, որ անձրևի պես ժողովուրդի մը մտքի մշակ ու անմշակ արտերուն վրա կթափին:

Ինչքան շատ են բառերով կերտված ստեղծագործությունները ժողովրդի մը գրականության մեջ, և որքան լայն

շերտեր կօգտվին այդ գրական երկերեն, որքան շատ են հեղինակները ամեն տեսակի և որքան շատ են ընթերցողները ամեն տեսակի, այնքան բարձր է այդ ժողովուրդի մտավոր մակարդակը: Գրականության մը բազմակողմանիությունը, խորությունն ու հարստությունը մեկ կողմեն ժողովուրդի զարգացումը կկերտեն, մյուս կողմեն ալ, բնականաբար, այդ ժողովուրդի հոգեկան բարձրության աստիճանը կնշեն: Ժողովուրդի մը գրականության մեջ այս հանրային ուսումնական մեծ կարևորության զույգ կերթա նաև այդ երկերուն հանրային դաստիարակիչ մեծ արժեքը:

Ամեն բանահյուսական ստեղծագործություն մարդու մը հոգին է, մարդու մը ապրումները, մարդու մը մտածումները, որոնումները, մարդու մը ճիգերն ու պայքարը: Ասկե զատ գրական երկերու մեկ շատ խոշոր մասին մեջ իրական կամ երևակայական բազմաթիվ ուրիշ մարդոց վրա կխոսվի շարունակ: Կգծեն այդ տիպարներու հոգին, անոնց գործերը, տենչերը, անոնց հաջողություններն ու ձախողանքը, անոնց ոգևորությունը, քաջությունն ու անձնվիրությունը:

Գրքերուն սև մուրին մեջեն կենդանի մարդիկ կխոսին մեզի, մեծ ու հետաքրքիր անձեր կկենան մեր դեմը իրենց գործով, իրենց կյանքով ու պայքարով: Եվ այդ բոլոր մարդկային մեծ կամ ազնիվ դեմքերը իրենց համոզումներով, իրենց վարմունքի ջերմությամբ, իրենց ընկերական նվիրումով, իրենց խանդավառությամբ կքաշեն մեզի իրենց ետևեն. մեյ-մեկ օրինակ կդառնան մեզի մեր հոգիին ու մեր գործունեության համար:

Դաստիարակության ամենեն սուր զենքը կենդանի օրինակն է մանկավարժության մեջ, այսինքն՝ շրջապատող անձերու կյանքն ու վարքը: Գրականությունը հսկա շրջապատ մըն է առանց պատերու. բոլոր հեղինակները իրենց



բոլոր հերոսներուն հետ և բոլոր պատմական դեմքերը մեր կենսակիցներն են, մեր ուսուցիչները, մեր օրինակները: Ի՞նչ կա ավելի կրթիչ ու ազնվացնող, քան մեծ մարդոց կենսագրությունը, քան զանազան ասպարեզներու վրա գործող պատմական խոշոր դեմքերու վարքն ու գործը, քան ամենեն տաղանդավոր հորինողներու իրենց կյանքն ու իրենց փորձառութենեն քաղած ու ձուլած վիպական դեմքերը:

Իրական թե երևակայական այս բոլոր մեծ մարդիկը, տաղանդի կնիքը կրող այդ անձերը, նվիրումի, բարձրության ու ազնվության այդ գրավիչ օրինակները, մեծ նպաստ մը ու մեծ խթան մըն է ամեն ժողովուրդի բարձրացման համար: Ամեն ժողովուրդ նախ իր և վերջն ալ նաև ուրիշ ժողովուրդներու գրականության վրա կկրթե իր հոգին, գրականության ու պատմության հերոսներով կոզևորվի և անոնց տաք շունչին տակ կդաստիարակվի: Ընթերցանությունը այդ պատճառով ալ շատ բացառիկ ու շատ կարևոր գործիք մըն է ժողովուրդներու դաստիարակության գործին մեջ, որուն ապագա հնարավորություններու մասին նախորդ էջերուն մեջ արդեն մատնանիշ ըրած են:

Կենդանի օրինակներու այս վարակիչ ազդեցութենեն զատ՝ գրական երկերը ուրիշ կողմ մըն ալ ունին, որուն արժեքը նորեն չափազանց մեծ է մարդկային հոգիի քաղաքակրթվելու, ընկերական հարաբերություններուն նրբացման ու ազնվացման տեսակետեն:

Գրքերը կպարտադրեն, որ ընթերցողը ուրիշներու հոգիին մեջը նայի, ուրիշներու ցավերը, հոգերը, ուրախություններն ու ներքին պայքարները դիտե, ուրիշներուն հուզումները, երկմտությունները, տենչերն ու ընդվզումները իր հոգիին մեջն ապրի: Ժողովուրդ մը որքան մեծ գրականություն ունենա, այնքան ավելի կվարժվի իր եսի նեղ սահմաններեն դուրս

գալու, այնքան կտորվի ուրիշներու կյանքին մասնակցիլ ու կենակցիլ: Եսն ու ոչ-եսը հաճախ կփաթթվին իրարու: Գրականությունն ու ընթերցանությունը ժողովուրդները դեպի այլասիրություն կմղեն:

Գրականությունը եսականությունները սանձահարող ամենեն կարևոր զենքերեն մեկն է, մարդկային ընկերական զգացումները սրող հեսան մը, անձնվիրության, բարության, խղճի ու բարոյական բարձրացման մշակիչ մը: Արդեն բարոյականությունը ընկերականություն ըսել է, ամեն բանի մեջ իր ընկերն ալ մտածել. իսկ ընկերական հարաբերություններու բարձրացումն ալ հիմնված է մեր անզուսպ եսի աստիճանական սանձահարումին վրա: Բանահյուսական երկերուն ստեղծումը և անոնց տարածուն ընթերցումը ժողովուրդները կփափկացնեն, կտաշեն, մարդասեր, այլասեր ու ժողովրդասեր կդարձնեն:

Ուսումնական, դաստիարակչական ու բարոյական այս հանրային արժեքներուն կից՝ գրականությունը իր ամբողջությամբ ինքնին քաղաքակրթական մեծ երևույթ մըն է, մարդկային հոգեկան ստեղծագործություններեն գուցե ամենեն գլխավորը:

Ամեն գրական երկ ժողովուրդի մը գրականության մեկ էջն է, մեկ հատորը, մեկ կտորը, և այդ էջերուն ու կտորներուն ամբողջությունը ժողովուրդի մը ամենեն մեծ հարստությունը, ժողովուրդի մը հոգեկան գանձարանը, և ձիշտ ատոր համար ալ ժողովուրդի մը հպարտության առարկան, ժողովուրդի մը արժեքը բարձրացնող քաղաքակրթական մեծարժեք իրողություն մը:

Ժողովուրդի մը արժեքը բարձրացնող թե՛ ինքն իր աչքին և թե՛ ուրիշ ժողովուրդներու աչքին: Ցայտուն չափերեն մեկն է ազգերու քաղաքակրթական բարձրության, տեսակ մը

վավերագիրը արժեքավոր ազգերու շարքին մեջ իր տեղն ու դիրքը ունենալու: Որքան մեծ է, հարուստ ու խոր ժողովուրդի մը բանահյուսական ընդհանուր ստեղծագործությունը համամարդկային գրականություններու լայն հյուսքին մեջ, այնքան ալ մեծ է այդ ժողովուրդին դիրքն ու արժեքը ազգերու ու ցեղերու ընդհանուր հյուսքին մեջ:

Իր այս աստիճանի բարձր ու ազնիվ հասկություններուն համար ալ գրականությունը իր ամբողջությամբ, ինչպես և իր ցայտուն հեղինակներով ու բացառիկ կարևոր երկերով խորին կապ մըն է, խորին կապ մը նույն ժողովուրդի բոլոր մասերուն ու բոլոր անդամներուն միջև:

Ինչպես որ նույն լեզուն խոսիլը ազգը ազգեն զատող և ազգի մը հատվածները իրարու զոդող ամենեն կարևոր կապն ու օղակն է ամեն տեղ, այնպես ալ այդ մայրենի լեզվով կատարված բոլոր արժեքավոր ստեղծագործությունները մեկ-մեկ զոդող օղակներ են և այդ ստեղծագործություններում ամբողջությունը ներկայացնող գրականությունը ժողովուրդի մը բոլոր հոգիներն ու բոլոր սրտերը իրարու կապող ոսկի շղթան է:

Քաղաքակրթական բոլոր տեսակի ստեղծագործությունները՝ պետություն, կրոն, օրենք, արհեստ ու արվեստ և մյուս գեղարվեստները այս կամ այն չափով նույնպես ունին իրենց վրա հավաքականությունները ձուլող և ժողովուրդներուն հպարտություն ու բարձրացում ներշնչող կարողությունը. միայն թե միշտ տարբեր ուժով կշեշտվի զոդող հմայքը լեզվի, լեզվական գեղարվեստի և գիտություններու, այսինքն բանահյուսական ստեղծագործության:

# ԲՈՎԱՆԴԱԿՈՒԹՅՈՒՆ

ՆԱԽԱԲԱՆ .....	3
ԼԵՎՈՆ ՇԱՆԹ.....	5
<b>ԵՐԳԵՐ .....</b>	<b>7</b>
ԻՆՉՈՒԻ .....	7
ՈՒՐՎԱՆԿԱՐՆԵՐ .....	8
ՀՅՈՒՍՔ.....	9
ԳՆԱՑՔԸ .....	9
ՄԱՀ .....	10
ԺԱՆԳԸ.....	11
ՀՈՂՄԱՂԱՑ.....	12
ԱՆՈՒՇ ՀՈՎԻԿ.....	12
ՎԵՐ .....	13
ԱԼԻՔԸ.....	14
ԱՆՏԱՌԻՆ ԵՐԳԸ .....	14
ԱՂՈԹՔԸ.....	16
ՄԱԿՈՒՅԿԸ .....	16
ԱՍՈՒՊ ՄԸ .....	18
ԵՐՆԵԿ.....	18
ՓՈԹՈՐԻԿ .....	19
ՍՏՎԵՐԴ .....	19
ԵՍ ՊԱՏՐԱՆՔԸ ՍԻՐԵՑԻ.....	20
ՇՈԳԵՆԱՎԻՆ ՄԵՋ .....	21
ԼՈՒՄՆԻՆ ՏԱԿ.....	22
ԴՈՒՆ ԻՄՍ ԷԻՐ .....	22
ԻՆՉՊԵՍ ՄԵԳԸ .....	24
ԼՈՒՌ .....	24

ՍՐԻՆԳ.....	25
ՀՈՍ ԵԿՈՒՐ .....	25
ԵԹԵ .....	26
ՄՈՒԹԻՆ ՄԵՋ .....	27
ԳԻՇԵՐԱՊԱՀԸ.....	28
ԶԳՈՒՇ.....	29
ՖԱՆԹԱՋԻ .....	30
ՆԵՏ ՄԸ .....	31
ՊԱՏԿԵՐԻՆ ՄԵՋ.....	31
ՄԱՀԻԿԸ .....	32
ԾՈՎ .....	32
ՍԵՎԵՐՈՒ ՄԵՋ .....	34
ՍԻՄՖՈՆԻ.....	34
ՓԻԼԻՍՈՓԱՆԵՐ .....	35
<b>ԼԵՌԱՆ ԱՂՋԻԿԸ.....</b>	<b>36</b>
<b>ԴՐԱՄԱՆԵՐ .....</b>	<b>71</b>
<b>ՀԻՆ ԱՍՏՎԱԾՆԵՐ.....</b>	<b>71</b>
<b>ԳՐՔԵՐ ՈՒ ՄԱՐԴԻԿ.....</b>	<b>175</b>
<b>ԳՐԱԿԱՆ ԵՐԿԵՐՈՒ ԴԵՐԸ .....</b>	<b>189</b>





# ԼԵՎՈՆ ՇԱՆԹ

Կազմող և խմբագիր՝ Ն. Վիրաբյան  
Հրատարակչության խմբագիր՝ Գ. Հովհաննիսյան  
Համակարգչային ձևավորումը՝ Հ. Փիլոյանի  
Կազմի ձևավորումը՝ Ա. Օհանջանյանի  
Կազմի նկարը՝ Գ. Պողոսյանի

**ԷԴԻՑ ՊՐԻՆՏ**  
Երևան, Թումանյան 12  
հեռ.՝ (374 10) 520 848  
[www.editprint.am](http://www.editprint.am)  
[info@editprint.am](mailto:info@editprint.am)



**EDIT PRINT**  
12 Toumanyan str., Yerevan  
Tel.: (374 10) 520 848  
[www.editprint.am](http://www.editprint.am)  
[info@editprint.am](mailto:info@editprint.am)